


〔重刊訂正本〕

中國醫學大成

錢若利題



〔四十七〕



〔重刊訂正本〕

# 中國醫學大成

〔四七一〕

上海科學技術出版社

神農本草經

〔魏〕吳普述

〔清〕孫星衍

孫馮翼同輯

珍珠囊補遺藥性賦

〔元〕李東垣原編

〔清〕王晉三重訂

雷公炮製藥性解

〔明〕李中梓編輯

〔清〕王晉三重訂

原編曹炳章

總審定裘沛然

總審閱蕭敏材朱邦賢沈麗君

## 重刊訂正《中國醫學大成》序

《中國醫學大成》一書，我鄉先輩四明曹炳章先生所輯集，爲發揚中醫學，保存古醫籍，以饗同道並惠後學作也。曹氏纂集是書時，正值西學東漸，國內淺見倖進之徒，競尚浮華，大肆鞭撻我國文化固有之精英，如民族醫學，悉在消滅之列，中醫學不絕如縷。而先生乃在此時從事中醫叢書巨著之編輯，姑不論其學術價值，獨其保存民族文化精粹之苦心孤詣令人可敬，其卓識遠見，又何其可欽也。

楊志一在原書序中有說：『大凡學術之成立，歷久而不敗者，必有其真實之價值在。』善哉言乎！中華民族立國數千年而得以生存繁衍，如無優秀之文化及可貴之醫學，則亦何逃於優勝劣敗之例。尤



其在科學迅猛發展之今日，百技更新，而古老之中醫藥學日益引起國內外有識之士之重視。各類中醫藥研究所之建立，亦爲保護人民健康之需要，順應世界醫學發展之潮流而設。凡此種種，夫豈偶然。

惟中醫學歷史悠久，濫觴於炎黃，昌盛於漢唐，歷代醫家多有創見，其學術經驗載於文獻者浩如煙海，遺佚者可弗論，僅就先生纂集之時，存書尙達萬種，學者既不能盡讀，又無力購置，且諸書精粗雜糅，版本文字舛誤殊多，使學習中醫者常興望洋之嘆。先生乃爲之博採精選，上自先秦，下迄近代，凡理論、方藥、臨床各科咸備，別爲十三類，書計三百六十五種，分醫經、藥物、診斷、方劑、通治、外感病、內科、外科、婦科、兒科、針灸、醫案及外集雜著各類。其中傷科、眼科及五官病歸入外科，推拿、手術歸入針灸，醫論、醫話、醫史歸入雜著。所收各書，皆中醫要籍，大都內



容精粹，切合實用，版本亦從精選，並加句斷。各書之首，皆列著作校刊略歷及內容提要，以便讀者入門粗知梗之助。

中醫學歷來叢書頗少，是書搜羅廣而選擇精，洵爲前所未有之巨著。惜全書印刊未半而抗戰軍興，烽煙迷漫，醫籍出版被迫中輟。而已印行之一百三十六種，今亦散佚不全。上海科學技術出版社爲應學者需求，重爲付梓，並影印以存原貌。書中明顯錯訛者，由我院及中醫文獻研究所等有關單位專業人員校勘改正，使之益臻完善。

夫文以載道，中醫學爲我國醫學之重要財富，文獻則是寶庫中之重要內容。故有志斯道者，務求先通中醫之理論法則、方藥效用和臨床處置，使對中醫學有全面之理解，更須驗之臨床，以汲取其理論精華與豐富經驗。學問之事，原恃艱苦以求而非獵取可得。昔張仲景勤求古訓，博採衆方；孫思邈青衿之歲，高尚是典，白首之



年，未嘗釋卷；葉香岩以不讀破萬卷，不敢輕言醫。茲三人者，皆由勤奮好學而成一代高醫，故學習中醫宜下一番札實工夫。在此基礎上運用現代科學技術研究和整理中醫學，才有闡明和提高希望。中西醫結合，亦將另具特色。以務實精神，走中醫現代化循序而進之道路，勇於繼承，敢於創新，使傳統醫學有所發現與創造。苟能如此，不僅爲祖國爭光，並將爲人類造福。

本叢書一百三十六種，分爲五十冊；每冊後並皆附有全部書目。它的出版，爲中醫和愛好中醫者提供珍貴之醫學文獻，讀者勤習而深研之，必能奠定中醫學根柢，大有助於中醫事業之繼承與發展。

裘沛然

一九八八年六月作於  
上海中醫學院



〔魏〕

吳普述

〔清〕

孫星衍  
孫馮翼

同輯

# 神農本草經

中國醫學大成



## 神農本草經提要

本草經三卷。傳爲神農所作。故曰神農本草經。但漢書藝文志不錄。考漢平帝紀則云。元始五年。舉天下通知方術本草者。詔傳遣詣京師。樓護傳。稱護少誦醫經。本草方術數十萬言。始見本草之名。或曰。上古未有文字。師學相傳。謂之本草。兩漢以來。名醫漸多。張華輩始就古學。附以新說。編述成書。由是本草乃見於經錄。寇宗奭曰。漢書雖言本草。不能斷自何代所作。淮南子雖言神農嘗百草以和藥。亦無本草之名。惟帝王世紀云。黃帝使岐伯嘗味草木。定本草經。造醫方以療衆疾。則本草之名。實自黃帝始。韓保昇曰。藥有玉石草木鳥獸蟲魚。而云本草者。爲諸藥中草類最多也。李時珍曰。神農本草藥分三品。計三百六十五種。以應周天之數。上品一百二十種爲君。主養命以應天。無毒。久服不傷人。能輕身益氣者。中品一百二十種爲臣。主養性以應人。無毒有毒。斟酌其宜。欲遏病補羸者。下品一百二十五種爲佐使。主治病以應地。多毒。不可久服。欲除寒熱邪氣。破積聚愈疾者。本書爲魏吳普增輯。再由孫星衍等博採名醫別錄。太平御覽。及經史諸子百



家。而輯述之。關於藥物學說。雖已美備。其所引據。於性味功用。實無所發明。蓋孫氏非知醫者。亦無足怪。其於名物形狀。羅列富有。惟莫辨是非。如水萍與藻蘋並列。柳華和檉杞同種。均有未合。茲備錄各家考證。以待來哲之攻究。今所以舍顧本而從孫刊者。取其徵引之豐富耳。至於名象之是非。功用之變化。在善讀者之自得之矣。



## 邵序

記曰。醫不三世。不服其藥。鄭康成曰。慎物齊也。孔冲遠引舊說云。三世者。一曰黃帝鍼灸。二曰神農本草。三曰素女脈訣。康成周禮注亦曰。五藥。草木、蟲、石、穀也。其治合之齊。則存乎神農子儀之術。是禮記注所謂慎物齊者。猶言治合之齊。指本草諸書而言也。冲遠既引舊說。復疑其非。鄭義過矣。漢書引本草方術。而藝文志闕載。賈公彥引中經簿有子儀本草經一卷。不言出於神農。至隋經籍志始載神農本草經三卷。與今分上中下三品者相合。當屬漢以來舊本。隋志又載雷公本草集注四卷。蔡邕本草七卷。今俱不傳。自別錄以後。累有損益升降。隨時條記。或傳合本文。不相別白。據陸元朗經典釋文所引。則經文與名醫所附益者。合併爲一。其來舊矣。孫君伯淵偕其從子。因大觀本草黑白字書。釐正神農本經三卷。又據太平御覽引經云。生山谷生川澤者。定爲本文。其有豫章朱崖常山奉高郡縣名者。定爲後人羈入。釋本草者。以吳普本爲最古。散見於諸書。徵引者綴集之。以補大觀本所未備。疏通古義。系以攷證。非澹雅之才。沈鬱之思。未易爲此也。古者



協陰陽之和。宣羸縮之節。凡夫含聲負氣。以及倒生旁達。蠅飛螻動之倫。胥盡其性。遇物能名。以達於利用生生之具。儒者宜致思焉。淮南王書曰。地黃主屬骨。而甘草主生肉之藥也。又曰。大戟去水。亭歷愈張。用之不節。乃反爲病。論衡曰。治風用風。治熱用熱。治邊用蜜丹。潛夫論曰。治疾當真人參。反得支羅服。當得麥門冬。反蒸橫麥。已而不識真。合而服之。病以浸劇。斯皆神農之緒言。惟其瞻涉者博。故引類比方。悉符藥論。後儒或忽爲方技家言。漁獵所及。又是末師而非往古。甚至經典所載。鳥獸草木亦展轉而昧其名。不已慎乎。後漢書華佗傳。吳普從佗學。依準佗療。多所全濟。佗以五禽之戲別傳。又載魏明帝使普爲禽戲。普以其法語諸醫。疑其方術相傳。別有奇文異數。今觀普所釋本草。則神農、黃帝、岐伯、雷公、桐君、醫和、扁鵲。以及後代名醫之說。靡不賅載。則其多所全濟。由於稽考之勤。比驗之密。而非必別有其奇文異數。信乎非讀三世書者。不可服其藥也。世俗所傳黃帝、神農、扁鵲之書。多爲後人竄易。余願得夫閱覽博物者。爲之是正也。因孫君伯仲校定本草而發其端。至其書考證精審。則讀者宜自得之。餘姚邵晉涵序。



## 張序

儒者不必以醫名。而知醫之理。則莫過於儒者。春秋時和與緩。神於醫者也。其通周易辨血蟲之義。醫也而實儒也。世之言醫者。必首推神農。然使神農非與太乙遊。則其傳不正。非作赭鞭鉤鏹。巡五岳四瀆。則其識不廣。非以土地所生萬千類。驗其能治與否。則其業不神。傳不正。識不廣。業不神。雖日取玉石草木禽獸蟲魚米穀之屬。歷試之。親嘗之。亦僅與商賈市販等耳。於醫乎何與。吾故曰神農千古之大儒也。考崇文總目載食品一卷。五臟論一卷。皆繫之神農。其本久不傳。傳之者神農本草經耳。而亦無專本。唐審元哀輯之。書錄解題謂之大觀本草。讀書志謂之證類本草。厥後繆希雍有疏。盧之頤有乘雅半偈。皆以本經爲之主。然或參以臆說。或益以衍斷。解愈紛。義愈晦。未有考核精審。卓然有所發明者。則證古難。證古而折衷於至是爲尤難。孫淵如觀察偕其從子鳳卿輯神農本草經三卷。於吳普名醫外。益以說文。爾雅。廣雅。淮南子。抱朴子諸書。不列古方。不論脈證。而古聖殷殷治世之意。燦然如列眉。孔子曰。多識於鳥獸草木之名。又曰。致知在格物。

則是書也。非徒醫家之書。而實儒家之書也。其遠勝於希雍之頤諸人也固宜。或以本草之名始見漢書平帝紀樓護傳。幾有疑於本草經者。然神農始嘗百草。始有醫藥。見於三皇紀矣。因三百六十五種注釋爲七卷。見於陶隱居別錄矣。增一百十四種。廣爲二十卷。唐本草宗之。增一百三十三種。孟昶復加釐定。蜀本草又宗之。至郡縣本屬後人所附益。經但云生山谷生川澤耳。洪範以康寧爲福。雅頌稱壽考萬年。又何疑於久服輕身延年。爲後世方士之說者。大抵儒者之嗜學如醫。然淵源其脈也。覆審其胾視也。辨邪正。定是非。則溫寒平熱之介也。觀察方聞綴學以鴻儒名。海內求其著述者。如金膏水碧之珍。儒卿好博聞。妍丹吮墨。日以儒爲事。則上溯之義皇以前。數千年如一日。非嗜之專且久而能然耶。顧吾獨怪是編中無所謂治書癖者。安得起神農而一問之。嘉慶四年太歲在己未冬十月望日宣城張炯撰於瞻園之灌木莊。



## 孫序

神農本草經三卷。所傳白字書。見大觀本草。按嘉祐補注序云。所謂神農本經者。以朱字。名醫因神農舊條而有增補者。以墨字。間於朱字。開寶重定序云。舊經三卷。世所流傳。名醫別錄。互爲編纂。至梁貞白先生陶宏景。乃以別錄參其本經。朱墨雜書。時謂明白。據此則宋所傳黑白字書。實陶宏景手書之本。自梁以前。神農、黃帝、岐伯、雷公、扁鵲各有成書。魏吳普見之。故其說藥性主治。各家殊異。後人纂爲一書。然猶有旁注。或朱墨字之別。本經之文。以是不亂。舊說本草之名。僅見漢書平帝紀及樓護傳。予按藝文志有神農黃帝食藥七卷。今本譌爲食禁。賈公彥周禮醫師疏引其文。正作食藥。宋人不考。遂疑本草非七略中書。賈公彥引中經簿。又有子儀本草經一卷。疑亦此也。梁七錄有神農本草三卷。其卷數不同者。古今分合之異。神農之世。書契未作。說者以此疑經。如皇甫謐言。則知四卷成於黃帝。陶宏景云。軒轅已前。文字未傳。藥性所主。當以識識相因。至於桐雷。乃著在於編簡。此書當與素問同類。其言良是。且藝文志農兵五行雜占經方神僊諸家。俱

有神農書。大抵述作有本。其傳非妄。是以博物志云。太古書今見存有神農經。春秋傳注。賈逵以三墳爲三皇之書。神農預其列。史記言秦始皇不去醫藥。卜筮之書。則此經幸與周易並存。顏之推家訓乃云。本草神農所述。而有豫章、朱崖、趙國、常山、奉高、真定、臨淄、馮翊等郡縣名出諸藥物。皆由後人所羈。非本文。陶宏景亦云。所出郡縣。乃後漢時制。疑仲景元化等所記。按薛綜注張衡賦引本草經。太一禹餘糧。一名石腦。生山谷。是古本無郡縣名。太平御覽引經上云。生山谷或川澤。下云生某山某郡。明生山谷本經文也。其下郡縣名醫所益。今大觀本俱作黑字。或合其文云。某山川谷。某郡川澤。恐傳寫之誤。古本不若此。仲景元化後。有吳普李當之。皆修此經。當之書世少行用。魏志華佗傳言普從佗學。隋經籍志稱吳普本草。梁有六卷。嘉祐本草云。普修神農本草。成四百四十一種。唐經籍志尙存六卷。今廣內不復存。惟諸書多見引據其說。藥性寒溫五味。最爲詳悉。是普書宋時已佚。今其文惟見掌禹錫所引藝文類聚初學記。後漢書注事類賦諸書。太平御覽引據尤多。足補大觀所缺。重是別錄。前書因采其文。附於本經。亦略備矣。其普所稱有神農。說者卽是本經。大觀或誤作黑字。亦據增其藥物。或數浮於三百六



十五種。由後人以意分合。難以定之。其藥名有禹餘糧。王不留行。徐長卿。鬼督郵。之屬。不類太古時文。按字書以禹爲蟲。不必夏禹。其餘名號。或係後人所增。或聲音傳述。改古舊稱所致。又經有云。宜酒漬者。或以酒非神農時物。然本草衍義已據素問首言。以妄爲常。以酒爲漿。謂酒自黃帝始。又按文選注引博物志亦云。杜康作酒。王著與杜康絕交。書曰。康字仲寧。或云黃帝時人。則俱不得疑經矣。孔子曰。述而不作。信而好古。又云。多識於鳥獸草木之名。今儒家拘泥耳目。未能及遠。不覩醫經本草之書。方家循守俗書。不察古本。藥性異同之說。又見明李時珍作本草綱目。其名已愚。僅取大觀本。割裂舊文。妄加增駁。迷誤後學。予與家鳳卿集成是書。庶以輔翼完經。啓蒙方伎。略以所知。加之考證。本經云。上藥本上經。中藥本中經。下藥本下經。是古以玉石草木等上中下品分卷。而序錄別爲一卷。陶序朱書云。本草經卷上注云。序藥性之源本。論病名之形診。卷中云。玉石草木三品。卷下云。蟲獸果菜米合三品。此名醫所改。今依古爲次。又帝王世紀及陶序稱四卷者。掌禹錫云。按舊本亦作四卷。韓保昇又云。神農本草上中下并序錄合四卷。若此。則三四之異。以有序錄。則抱朴子養生要略。太平御覽所引神農經。或云問。

於太乙子。或引太乙子云云。皆經所無。或亦在序錄中。後人節去之耳。至其經文。或以痒爲癢。創爲瘡。淡爲痰。注爲蛀。沙爲砂。兔爲菟之類。皆由傳寫之誤。據古訂正。勿嫌驚俗也。其辨析物類。引據諸書。本之毛詩、爾雅、說文、方言、廣雅、諸子、雜家。則鳳卿增補之力居多云。陽湖孫星衍撰。



## 周序

著本草者。代有明哲矣。而求道者必推本於神農。以爲神聖之至誠盡性。其興物以全民者。義至精而用至大也。歷三代之世。以迄秦漢。守其書而傳習之。蓋無敢違其教者。自陶貞白雜入明醫別錄。朱墨分書。其書無專本矣。至宋以降。朱墨互淆。其書無真本矣。紛紜散亂。千有餘歲。好古者乃欲一一收拾以復其舊。亦難矣哉。故靈胎徐氏有本草百種錄。修園陳氏有本草經讀。各於經旨有所發明。不愧述者。要止體厥功能。以便世用。而於三品之全物。卒闕焉而無聞。久之乃得顧氏輯本。復於同郡石埭徐氏借得孫氏輯本二書。皆以考核爲能者也。而於其中不能無疑焉。孫氏之書。比於顧氏詳且博矣。其所引據。於性味功用。一無所發。蓋孫氏本非知醫者。此無足怪。乃於名物形狀。亦徒羅列富有。莫正是非。如水萍則藻蘋並列。柳華則檉杞同稱。如此之類。未可殫舉。然而備錄前文。以待來哲之論定焉。猶曰賢者至虛至慎。闕所不知之義也。若夫橘柚用其實也。非用其木。青蘘爲巨勝苗。巨勝九穀長。其可實穀而苗草耶。二種出入。嫌於妄作矣。尤異者。孫顧二

書同出大觀。而三品互殊。幾於十二。顧氏詆孫不考本經目錄。故三品種數。顯與名例相違。夫本經目錄。載在李氏綱目第二卷。昭昭者也。孫氏之輯此書。不可謂不勤者矣。獨於此忽焉。而不一寓目耶。豈謂本經久無真本。安所得其目錄。李氏所述不足據耶。然而名例相違。又何也。夫數典者。經生之空談。而無與於醫之實用者也。天下無無用之物。而患無用物之人。物無不樂效用於人。而人每至於負物。是書也。苟不求所以用之。卽名物品數。盡如神農之舊。而何所濟於世。古聖垂教之深心。歷代賢士表章之盛意。其在是耶。用藥一用兵也。善用則攻。卽爲補。不善用則補。亦殺人。世人於兵皆知不可妄動。獨於醫藥。往往輕於嘗試。抑獨何哉。學海慮古籍之湮也。亟爲刊佈。而敘其梗概如此。以見舍顧而從孫者。亦取徵引之富贍耳。至於名象之是非。功用之變化。在善讀者之自得之矣。時光緒辛卯秋仲建德周學海徵之記。



# 神農本草經目錄

## 卷一 上經

丹沙	四
雲母	五
玉泉	六
石鍾乳	六
涅石	七
消石	八
朴消	八
滑石	八
石膽	九
空青	一〇

曾青	一〇
禹餘糧	一一
太一餘糧	一一
白石英	一二
紫石英	一二
五色石脂	一二
白青	一三
扁青	一四
菖蒲	一四
藟華	一五
人參	一五
天門冬	一六

甘草	一六
乾地黄	一七
朮	一七
兔絲子	一八
牛膝	一九
充蔚子	一九
女萎	二〇
防葵	二〇
茺胡	二一
麥門冬	二二
獨活	二三
車前子	二三
木香	二四
署豫	二四

薏苡仁	二五
澤瀉	二五
遠志	二六
龍膽	二六
細辛	二六
石斛	二七
巴戟天	二七
白英	二七
白蒿	二八
赤箭	二八
奄闔子	二九
析蓂子	二九
著實	三〇
赤芝	三〇



卷柏	三一
藍寶	三一
芎藭	三二
藤蕪	三三
黃連	三三
絡石	三三
疾藜子	三四
黃耆	三五
肉松容	三五
防風	三五
蒲黃	三六
香蒲	三六
續斷	三七
漏蘆	三七

營實	三七
天名精	三八
決明子	三八
丹參	三九
茜根	三九
飛廉	四〇
五味子	四〇
旋華	四〇
蘭草	四一
蛇牀子	四一
地膚子	四二
景天	四二
因陳	四二
杜若	四三

沙參	四四
白兔藿	四四
徐長卿	四四
石龍芻	四五
薇銜	四五
雲實	四六
王不留行	四六
升麻	四六
青蘘	四七
姑活	四七
別羈	四八
屈草	四八
淮木	四八
牡桂	四九

茵桂	四九
松脂	五〇
槐實	五〇
枸杞	五〇
柏實	五一
伏苓	五一
榆皮	五二
酸棗	五三
檠木	五三
乾漆	五三
五加皮	五四
蔓荊實	五四
辛荑	五四
桑上寄生	五五



杜仲	五五
女貞實	五六
木蘭	五六
蕤核	五七
橘柚	五七
髮髮	五八
龍骨	五八
麝香	五九
牛黃	五九
熊脂	五九
白膠	五九
阿膠	六〇
丹雄雞	六〇
雁肪	六一

石蜜	六一
蜂子	六二
蜜蠟	六三
牡蠣	六三
龜甲	六三
桑蜋蛸	六四
海蛤	六四
文蛤	六五
蠱魚	六五
鯉魚膽	六五
藹實莖	六六
大棗	六六
蒲萄	六七
蓬蘽	六七

雞頭實.....六八

胡麻.....六八

麻蕒.....六九

冬葵子.....七〇

莧實.....七〇

瓜蒂.....七一

瓜子.....七一

苦菜.....七一

卷一一 中經

雄黃.....四

石流黃.....四

雌黃.....五

水銀.....五

石膏.....五

慈石.....五

凝水石.....六

陽起石.....六

孔公孽.....七

殷孽.....七

鐵精.....七

理石.....八

長石.....八

膚青.....八

乾薑.....八

泉耳實.....九

葛根.....九

括蕒根.....一〇



苦參	一〇
當歸	一一
麻黃	一二
通草	一二
芍藥	一三
蠱實	一三
瞿麥	一四
元參	一四
秦艽	一五
百合	一五
知母	一六
貝母	一六
白芷	一七
淫羊藿	一七

黃芩	一七
狗脊	一八
石龍芮	一八
茅根	一九
紫菀	一九
紫草	一九
敗醬	二〇
白鮮	二〇
酸醬	二〇
紫參	二〇
藁本	二一
石韋	二一
草薺	二一
白薇	二二

水萍	二二
王瓜	二三
地榆	二三
海藻	二三
澤蘭	二四
防己	二四
款冬花	二五
牡丹	二五
馬先蒿	二六
積雪草	二六
女莞	二六
王孫	二七
蜀羊泉	二七
爵牀	二七

假蘇	二七
翹根	二八
桑根白皮	二八
竹葉	二九
吳茱萸	二九
卮子	三〇
蕪荑	三〇
枳實	三一
厚朴	三一
秦皮	三一
秦朮	三二
山茱萸	三三
紫葳	三三
豬苓	三四



白棘	三四
龍眼	三四
松蘿	三五
衛矛	三五
合歡	三六
白馬莖	三六
鹿茸	三六
牛角腮	三六
羚羊角	三六
牡狗陰莖	三七
麝羊角	三七
犀角	三七
燕屎	三八
天鼠屎	三八

蝟皮	三九
露蜂房	三九
鱉甲	四〇
蟹	四〇
柞蟬	四〇
蟻螬	四一
烏賊魚骨	四二
白僵蠶	四二
鮀魚甲	四二
搏雞	四三
活蟪	四三
石龍子	四三
木虫	四四
蜚虻	四四

蜚廉	四五
蜜蟲	四五
伏翼	四五
梅實	四六
大豆黃卷	四七
粟米	四七
黍米	四八
蓼實	四八
葱實	四九
水蘇	四九
石灰	三
礬石	四

卷二 下經

鉛丹	四
粉錫	五
代赭	五
戎鹽	五
白堊	六
冬灰	六
青琅玕	六
附子	七
烏頭	七
天雄	八
半夏	八
地文	九
虎掌	九
鳶尾	九

大黃	一
亭歷	一
桔梗	一〇
葇蕩子	一
草蒿	二
旋復花	二
藜蘆	二
鉤吻	三
射干	三
蛇合	四
恆山	四
蜀漆	五
甘遂	五
白斂	六

青箱子	一六
藿罔	一六
白及	一七
大戟	一七
澤漆	一七
茵芋	一七
貫衆	一八
薺花	一九
牙子	一九
羊躑躅	一九
商陸	二〇
羊蹄	二〇
篇蓄	二〇
狼毒	二一



白頭翁	二一
鬼臼	二二
羊桃	二二
女青	二三
連翹	二三
蘭茹	二三
烏韭	二四
鹿藿	二四
蚤休	二四
石長生	二五
陸英	二五
藎草	二五
牛扁	二六
夏枯草	二六

莞華	二六
巴豆	二七
蜀茺	二八
阜莢	二八
柳花	二八
棟實	二九
郁李仁	二九
莽草	三〇
雷丸	三〇
桐葉	三一
梓白皮	三一
石南	三一
黃環	三一
深疏	三一

鼠李	三三
藥實根	三三
藥華	三三
蔓椒	三四
豚卵	三四
麋脂	三四
鼯鼠	三五
六畜毛蹄甲	三五
蝦蟆	三五
馬刀	三六
蛇蛻	三六
邱蚓	三七
蠨螋	三七
吳蚣	三八

水蛭	三八
班苗	三八
貝子	三九
石蠶	三九
雀甕	四〇
蜣螂	四〇
螻蛄	四〇
馬陸	四一
地膽	四一
鼠婦	四二
螢火	四二
衣魚	四三
桃核仁	四三
杏核仁	四四

腐婢	四四
苦瓠	四四
水蘄	四五
彼子	四五
本草經佚文	四七
附吳氏本草十二條	四九
附諸藥制使	五〇
玉石上部	五一
玉石中部	五二
玉石下部	五二
草藥上部	五三
草藥中部	五六
草藥下部	五八
木藥上部	六〇

木藥中部	六一
木藥下部	六二
獸上部	六二
獸中部	六三
獸下部	六三
蟲魚上部	六三
蟲魚中部	六四
蟲魚下部	六五
果上部	六五
果下部	六五
菜上部	六五
米上部	六五
米中部	六六



# 神農本草經

## 卷一 上經

上藥一百二十種。爲君。主養命以應天。無毒。多服久服不傷人。欲輕身益氣不老延年者。本上經。

丹沙	雲母	玉泉	石鍾乳	涅石	消石
朴消	滑石	石膽	空青	曾青	禹餘糧
太乙餘糧	白石英	紫石英	五色石脂	白青	扁青
右玉石上品一十八種。舊同。					

魏	清	清
吳	陽湖	建德
普	孫	周
等	醒	學
述	衍	海
	同	校
	輯	正
		鄞縣
		曹炳章
		圈點

昌蒲	菟絲子	牛膝	人參	天門冬	甘草	乾地黄
朮	兔絲子	牛膝	人參	充蔚子	女萎	防葵
茈菰	麥門冬	獨活	活	車前子	木香	署豫
薏苡仁	澤瀉	遠志	龍膽	細辛	石斛	
巴戟天	白英	白蒿	赤箭	菴闍	析蓂子	
薯蕷	赤黑青白黃紫芝	卷柏	藍實	芎藭	肉松容	
蘼蕪	黃連	絡石	蒺藜子	黃耆	營實	
防風	蒲黃	香蒲	續斷	漏蘆	營實	
天名精	決明子	丹參	茜根	飛廉	五味子	
旋華	蘭草	蛇牀子	地膚子	景天	因陳	
杜若	沙參	白兔藿	徐長卿	石龍芻	薇銜	
雲實	王不留行	升麻	青蘘	姑活	別羈	
屈草	淮木					

右、草上品七十三種。舊七十二種。

牡桂 茵桂 松脂 槐實 枸杞 柏實

伏苓 榆皮 酸棗 藥木 乾漆 五加皮

蔓荊實 辛夷 桑上寄生 杜仲 女貞實 木蘭

蕤核 橘柚

右、木上品二十種。舊一十九種。

髮髮

右、人一種。舊同。

龍骨 麝香 牛黃 熊脂 白膠 阿膠

右、獸上品六種。舊同。

丹雄雞 鴈肪

右、禽上品二種。舊同。

石蜜 蜂子 蜜臘 牡蠣 龜甲 桑螵蛸

海蛤 文蛤 蠶魚 鯉魚膽

右、蟲魚上品一十種。舊同。



薄實莖。大棗。葡萄。蓬蒿。雞頭實。

右果上品五種。舊六種。

胡麻。麻黃。

右米穀上品二種。舊三種。

冬葵子。莧實。瓜蒂。瓜子。苦菜。

右菜上品五種。舊同。

丹沙味甘微寒。主身體五藏百病。養精神。安魂魄。益氣明目。殺精魅邪惡鬼。久服通神明不老。能化為汞。生山谷。太平御覽引多有生山谷三字。大觀本作生符陵。宜改為白字。而以郡縣為黑字。下皆仿此。

吳普本草曰。丹沙神農甘。苦有毒。扁鵲苦。李氏大寒。或生武陵。採無時。能化未成水銀。畏磁石。惡鹹水。太平御覽

名醫曰。作末。名真朱光。色如雲母。可折者良。生符陵山谷。採無時。

案說文云。丹巴越之赤石也。丹象丹井。象丹形。古文作口。亦作彤。沙。水散石也。頌。丹沙所化為水銀也。管子地數篇云。山上有丹沙者。其下有銑金。淮南子

地形訓云。赤天七百歲生赤丹。赤丹七百歲生赤瀕。高誘云。赤丹、丹沙也。山海經云。丹粟、粟沙。音之緩急也。沙舊作砂。非。汞卽瀕省文。列僊傳云。赤斧能作水瀕。鍊丹與消石服之。按金石之藥。古人云久服輕身延年者。謂當避穀絕人道。或服數十年乃効耳。今人和肉食服。遂多相反。轉以成疾。不可疑古書之虛誣。雲母味甘平。主身皮死肌。中風寒熱。如在車船上。除邪氣。安五藏。益子精。明目。久服輕身延年。一名雲珠。一名雲華。一名雲英。一名雲液。一名雲沙。一名磷石。生山谷。

名醫曰。生太山齊廬山。及瑯邪北定山石間。二月采。此錄名醫說者卽是仲景之無從別耳亦以補普書不備也

案列僊傳云。方回鍊食雲母。抱朴子僊藥篇云。雲母有五種。五色並具而多青者名雲英。宜以春服之。五色並具而多赤者名雲珠。宜以夏服之。五色並具而多白者名雲液。宜以秋服之。五色並具而多黑者名雲母。宜以冬服之。但有青黃二色者名雲沙。宜以季夏服之。晶晶純白名磷石。可以四時長服之也。李善文選注引異物志。雲母一名雲精。入地萬歲不朽。說文無磷字。玉篇云。磷薄也。

雲母之別名。

玉泉味甘平。主五藏百病。柔筋強骨。安魂魄。長肌肉。益氣。久服耐寒暑。御覽引能

古通不飢渴。不老神僊。人臨死服五斤。死三年色不變。一名玉杵。御覽引作玉濃初

之長生不死御覽又引云玉桃服之長生不死若不得早服之。臨死日服之。其尸畢天地不朽。則化疑當作桃生山谷。

吳普曰。玉泉一名玉屑。神農岐伯雷公甘李氏平畏款冬惡青竹。御覽白玉杵如

白頭公。同上事類賦引云白玉體如白首翁

案周禮玉府王齋則供食玉。鄭云玉是陽精之純者。食之以禦水氣。鄭司農云。

王齋當食玉屑。抱朴子僊藥篇云。玉可以為米。酒及地榆酒化之為水。亦可以

蔥漿消之為粉。亦可餌以為丸。亦可燒以為粉。服之一年以上。入水不露。入火

不灼。刃之不傷。百毒不犯。不可用已成之器。傷人無益。當得璞玉。乃可用也。得

于闐國白玉尤善。其次有南陽徐善亭部界山中玉。及日南盧容水中玉亦佳。

石鍾乳味甘溫。主欬逆上氣。明目益精。安五藏。通百節。利九竅。下乳汁。御覽引云

乳大觀本作一生山谷。

吳普曰。鍾乳一名虛中。神農辛。桐君黃帝醫和甘。扁鵲甘無毒。御覽引云生山



谷。御覽引云。陰處岸下溜汁成。御覽引作溜。汁所成聚。如乳汁。黃白色。空中相通。二月三

月采陰乾。凡吳普本草掌禹錫所引者不復注。惟注其出御覽諸書者。

名醫曰。一名公乳。一名蘆石。一名夏石。生少室及太山。采無時。

案。范子計然云。石鍾乳出武都。黃白者善。凡引計然多出事文類聚。列僊傳云。文選注。御覽及大觀本草。

印疏煮石髓而服之。謂之石鍾乳。鍾當爲湏。說文云。乳汁也。鍾。假音字。

涅石。舊作磐石。據郭璞注。山海經引作涅石。味酸寒。主寒熱洩利。白沃陰蝕。惡創目痛。堅筋骨齒。鍊

餌服之。輕身不老。增年。一名羽硯。生山谷。

吳普曰。磐石一名羽硯。一名羽澤。神農。歧伯。酸。扁鵲。鹹。雷公。酸無毒。生河西或

隴西。或武都石門。采無時。歧伯久服傷人骨。

名醫曰。一名羽澤。生河西及隴西。武都石門。采無時。

案。說文無磐字。玉篇云。磐石也。硯。磐石也。西山經云。女牀之山。其陰多涅石。郭

璞云。卽磐石也。楚人名爲涅石。秦名爲羽涅也。本草經亦名曰涅石也。范子計

然云。磐石出武都。淮南子倣真訓云。以涅染緇。高誘云。涅。磐石也。舊涅石作磐

石。羽涅作羽硯。非。

消石、味苦寒。主五藏積熱。胃張閉。滌去蓄結。飲食推陳致新。除邪氣。鍊之如膏。久服輕身。御覽引云一名芒生山谷。

吳普曰。消石神農苦扁鵲甘。凡出掌禹錫所引亦見御覽者不著所出

名醫曰。一名芒消。生益州及武都隴西西羌。采無時。

案。范子計然云。硝石出隴道。據名醫一名芒消。又別出芒消條。非。北山經云。京

山其陰有元礪。疑礪即消異文。

朴消、味苦寒。主百病。除寒熱邪氣。逐六府積聚。結固留癖。能化七十二種石。鍊餌

服之。輕身神僊。生山谷。

吳普曰。朴硝石神農岐伯雷公無毒。生益州或山陰。入土千歲不變。鍊之不成。

不可服。御覽

名醫曰。一名消石朴。生益州。有鹽水之陽。采無時。

案。說文云。朴。木皮也。此蓋消石外裹如玉璞耳。舊作硝俗字。

滑石、味甘寒。主身熱洩瀉。女子乳難。癰閉。利小便。蕩胃中積聚寒熱。益精氣。久服

輕身。耐飢長年。生山谷。

名醫曰。一名液石。一名共石。一名脫石。一名番石。生赭陽及太山之陰。或按北  
白山。或卷山。采無時。

案。范子計然云。滑石。白滑者善。南越志云。管城縣出管石。卽滑石也。

石膽。味酸寒。主明目目痛。金創諸癰瘡。女子陰蝕痛。石淋寒熱。崩中下血。諸邪毒  
氣。令人有子。鍊餌服之不老。久服增壽神僊。能化鐵爲銅。成金銀。御覽引一名畢  
石。生山谷。

吳普曰。石膽。神農。酸小寒。李氏。大寒。桐君。辛有毒。扁鵲。苦無毒。御覽引云一名  
生羌道或句青山  
二月庚子辛丑采

名醫曰。一名黑石。一名基石。一名銅勒。生羌道羌里句青山。二月庚子辛丑日  
采。

案。范子計然云。石膽出隴西羌道。陶宏景云。僊經一名立制石。周禮瘍醫。凡療  
瘍以五毒攻之。鄭云。今醫方有五毒之藥。作之合黃堊。置石膽。丹沙。雄黃。礬石。  
慈石。其中燒之。三日三夜。其煙上著。以雞羽掃取之。以注創。惡肉破骨則盡出。  
圖經曰。故翰林學士楊億嘗筆記。直史館楊峒有瘍生於頰。人語之。依鄭法合

燒藥成。注之瘡中遂愈。信古方攻病之速也。

空青味甘寒。主青盲耳聾。明目。利九竅。通血脈。養精神。久服輕身。延年不老。能化銅鐵。鉛錫作金。生山谷。

吳普曰。空青神農甘一經。酸。久服有神。僊玉女來侍。使人志高。覽御

名醫曰。生益州及越嶲山有銅處。銅精熏則生空青。其腹中空。三月中旬采亦無時。

案西山經云。皇人之山。其下多青。郭璞云。空青。曾青之屬。范子計然云。空青出巴郡。司馬相如賦云。丹青。張揖云。青青腹也。顏師古云。青腹。今之丹青也。曾青。味酸小寒。主目痛。止淚出。風痺。利關節。通九竅。破癥堅。積聚。久服輕身不老。能化金銅。生山谷。

名醫曰。生蜀中及越嶲。采無時。

案管子揆度篇云。秦明山之曾青。荀子云。南海則有曾青。楊倞注。曾青。銅之精。范子計然云。曾青出宏農。豫章。白青出新淦。青色者善。淮南子地形訓云。青天八百歲生青曾。高誘云。青曾。青石也。



禹餘糧。味甘寒。主欬逆寒熱。煩滿下痢。御覽有赤白。血閉癥瘕大熱。鍊餌服之。不飢。輕身延年。生池澤及山島中。

名醫曰。一名白餘糧。生東海及池澤中。

案。范子計然云。禹餘糧出河東。列僊傳云。赤斧上華山取禹餘糧。博物志云。世傳昔禹治水。棄其所餘食於江中而為藥也。按此出神農經。則禹非夏禹之禹。或本名白餘糧。名醫等移其名耳。

太一餘糧。味甘平。主欬逆上氣。癥瘕血閉漏下。除邪氣。久服耐寒暑。不飢輕身。飛行千里。神僊。御覽引作若神僊。一名石腦。生山谷。

吳普曰。太一禹餘糧。一名禹哀。神農岐伯。雷公。甘平。李氏。小寒。扁鵲。甘無毒。生太山上。有甲。甲中有白。白中有黃。如鷄子黃色。九月采。或無時。

名醫曰。生太山。九月采。

案。抱朴子金丹篇云。靈丹經用丹沙。雄黃。雌黃。石硫黃。曾青。礬石。磁石。戎鹽。太一禹餘糧。亦用六一泥。及神室祭醮合之。三十六日成。

白石英。味甘微溫。主消渴陰痿不足。欬逆。御覽引作嘔逆。胸膈間久寒。益氣。除風溼痺。御覽

引作陰溼痺

久服輕身

御覽引作身輕健

長年。生山谷。

吳普曰。白石英。神農甘。岐伯、黃帝、雷公、扁鵲、無毒。生太山。形如紫石英。白澤長者二三寸。采無時。御覽引云久服通日月光

名醫曰。生華陰及太山。

案司馬相如賦有白垺。蘇林云。白垺。白石英也。司馬貞云。出魯陽山。

紫石英。味甘溫。主心腹欬逆。御覽引作嘔逆邪氣。補不足。女子風寒在子宮。絕孕十年無子。久服溫中輕身延年。生山谷。

吳普曰。紫石英。神農、扁鵲、味甘平。李氏、大寒。雷公、大溫。岐伯、甘無毒。生太山。或會稽。采無時。欲令如削。紫色達頭如樗蒲者。

又曰。青石英。形如白石英。青端赤後者是。赤石英。形如白石英。赤端白後者是。赤澤有光。味苦。補心氣。黃石英。形如白石英。黃色如金。白後者是。黑石英。形如白石英。黑澤有光。御覽掌禹錫引此節文

名醫曰。生太山。采無時。

青石、赤石、黃石、白石、黑石、脂等。味甘平。主黃疸洩利。腸癖膿血。陰蝕下血。赤白邪

氣。癰腫疽痔惡創。頭瘍疥搔。久服補髓益氣。肥健不飢。輕身延年。五石脂各隨五色。補五藏。生山谷中。

吳普曰。五色石脂。一名青。赤。黃。白。黑。符。青。符。神農。甘。雷公。酸。無毒。桐君。辛。無毒。李氏。小寒。生南山。或海涯。采無時。赤。符。神農。雷公。甘。黃帝。扁鵲。無毒。李氏。小寒。或生少室。或生太山。色絳滑如脂。黃。符。李氏。小寒。雷公。苦。或生嵩山。色如猪腦。雁雛。采無時。白。符。一名隨。字隨歧伯。雷公。酸。無毒。李氏。小寒。桐君。甘。無毒。扁鵲。辛。或生少室。天婁山。或太山。黑。符。一名石泥。桐君。甘。無毒。生洛西山空地。

名醫曰。生南山之陽。一本作南陽。又云黑石脂。一名石涅。一名石墨。

案。吳普引神農甘云云。五石脂各有條。後世合爲一條也。范子計然云。赤石脂出河東。赤色者善。列遷傳云。赤須子好食石脂。

白。青。味甘平。主明目。利九竅。耳聾。心下邪氣。令人吐。殺諸毒三蟲。久服通神明。輕身延年不老。生山谷。

吳普曰。神農甘平。雷公。酸。無毒。生豫章。可消而爲銅。御覽名醫曰。生豫章。采無時。

案、范子計然云。白青出巴郡。

扁青味甘平。主目痛明目。折跌癰腫。金創不瘳。破積聚。解毒氣。御覽引作辟毒利精神。久服輕身不老。生山谷。

吳普曰。扁青神農雷公。小寒無毒。生蜀郡。治丈夫內絕。令人有子。御覽引云治身輕

名醫曰。生朱崖武都朱提。采無時。

案、范子計然云。扁青出宏農。豫章。

右玉石上品一十八種。舊同。

菖蒲味辛溫。主風寒溼痺。欬逆上氣。開心孔。補五藏。通九竅。明耳目。出聲音。久服輕身。不忘不迷。或延年。一名昌陽。御覽引云生石上。一寸九節者。久服輕身。云云。字黑。生池澤。

吳普曰。昌蒲一名堯韭。藝文類聚引云一名昌陽。

名醫曰。生上洛及蜀郡嚴道。五月十二日采根。陰乾。  
案、說文云。茆。昌蒲也。益州生茆。茆。茆也。廣雅云。印。昌陽。昌蒲也。周禮醯人云。昌



本。鄭云。昌本昌蒲根。切之四寸爲菹。春秋左傳云。饗以昌歠。杜預云。昌歠。昌蒲  
菹。呂氏春秋云。冬至後五旬七日。昌始生。昌者百草之先。於是始耕。淮南子說  
山訓云。昌羊去蚤蠹。而來蛉鷲。高誘云。昌羊。昌蒲。列僊傳云。商邱子胥食昌蒲  
根。務光服蒲韭根。離騷草木疏云。沈存中云。所謂蘭蓀。卽今昌蒲是也。  
鞠華。味苦平。主風頭眩腫痛。目欲脫。淚出。皮膚死肌。惡風溼痺。久服利血氣。輕身  
耐老延年。一名節華。生川澤及田野。

吳普曰。菊華一名白華。

初學記

一名女華。一名女莖。

名醫曰。一名日精。一名女節。一名女華。一名女莖。一名更生。一名周盈。一名傅  
延年。一名陰成。生雍州。正月采根。三月采葉。五月采莖。九月采花。十一月采實。  
皆陰乾。

案說文云。鞠。治牆也。鞠。日精也。似秋華。或省作款。爾雅云。鞠。治牆。郭璞云。今之  
秋華菊。則鞠。鞠。款。皆秋華字。今惟作菊。說文以爲大菊。蘧麥。假音用之也。  
人參。味甘微寒。主補五藏。安精神。定魂魄。止驚悸。除邪氣。明日。開心。益智。久服輕  
身延年。一名人銜。一名鬼蓋。生山谷。

吳普曰。人參一名土精。一名神草。一名黃參。一名血參。一名人微。一名玉精。神農甘小寒。桐君雷公苦。岐伯黃帝甘無毒。扁鵲有毒。生邯鄲。三月生葉小兒核黑莖有毛。三月九月采根。根有頭足手面目如人。覽御名醫曰。一名神草。一名人微。一名土精。一名血參。如人形者有神。生上黨及遼東。二月四月八月月上旬採根。竹刀刮暴乾。無令見風。案說文云。蔞人蔞藥草。出上黨。廣雅云。地精人蔞也。范子計然云。人參出上黨。狀類人者善。劉敬叔異苑云。人參一名土精。生上黨者佳。人形皆具。能作兒啼。天門冬味甘平。主諸暴風溼偏痺。強骨髓。殺三蟲。去伏尸。久服輕身。益氣延年。一名顛勒。爾雅注引云。門冬生山谷。一名滿冬。今無文。名醫曰。生奉高山。二月七月八月采根暴乾。案說文云。蔞蔞蔞冬也。中山經云。條谷之山。其草多蔞冬。爾雅云。蔞蔞蔞冬。列僊傳云。赤須子食天門冬。抱朴子僊藥篇云。天門冬或名地門冬。或名筵門冬。或名顛棘。或名淫羊食。或名管松。甘草味甘平。主五藏六府寒熱邪氣。堅筋骨。長肌肉。倍力。金創腫。解毒。久服輕身。

延年。御覽引云一名美草。一作黑字。生山谷。

名醫曰。一名密甘。一名美草。一名蜜草。一名蔞。當作蔞。草生河西積沙山及上郡。

二月八月除日采根暴乾十日成。

案說文云。甘。甘草也。蔞。大苦也。苦。大苦苓也。廣雅云。美草。甘草也。毛詩云。隰有苓。傳云。苓。大苦。爾雅云。蔞。大苦。郭璞云。今甘草蔓延生。葉似荷。青黃莖赤黃。有節。節有枝相當。或云蔞似地黃。此作甘。省字。蔞。苓通。

乾地黃味甘寒。主折跌絕筋傷中。逐血痺。填骨髓。長肌肉。作湯除寒熱積聚。除痺。生者尤良。久服輕身不老。一名地髓。生川澤。

名醫曰。一名苧。一名芒。生咸陽黃土地者佳。二月八月采根陰乾。

案說文云。苧。地黃也。禮曰。鉏毛牛。藿。羊苧。豕薇。廣雅云。地髓。地黃也。爾雅云。苧。地黃。郭璞云。一名地髓。江東呼苧。列僊傳云。呂尙服地髓。

朮。味苦溫。主風寒溼痺。死肌痙疸。止汗除熱。消食作煎餌。久服輕身。延年不飢。一名山薊。藝文類聚作山薊。生山谷。

吳普曰。朮。一名山連。一名山芥。一名天蘇。一名山薑。藝文類聚

名醫曰。一名山薑。一名山連。生鄭山漢中南鄭。二月三月八月九月采根暴乾。  
案。說文云。荒。山薺也。廣雅云。山薑。荒也。白朮。牡丹也。中山經云。首山草多荒。郭  
璞云。荒。山薺也。爾雅云。朮。山薺。郭璞云。今朮似薺而生山中。范子計然云。朮出  
三輔。黃白色者善。列僊傳云。涓子好餌朮。抱朴子僊藥篇云。朮一名山薺。一名  
山精。故神藥經曰。必欲長生。長服山精。  
兔絲子。味辛平。主續絕傷。補不足。益氣力。肥健。汁去面肝。久服明目。輕身延年。一  
名兔蘆。生川澤。

吳普曰。兔絲一名玉女。一名松蘿。一名烏蘿。一名鴨蘿。一名複實。一名赤網。生  
山谷。御覽

名醫曰。一名菟縷。一名唐蒙。一名玉女。一名赤網。一名兔纍。生朝鮮田野。蔓延  
草木之上。色黃而細。爲赤網。色淺而大。爲兔纍。九月采。實暴乾。  
案。說文云。蒙。玉女也。廣雅云。兔邱。兔絲也。女蘿。松蘿也。爾雅云。唐蒙。女蘿。女兔。  
兔絲。又云。蒙。玉女。毛詩云。爰采唐矣。傳云。唐蒙。菜名。又薦與女蘿。傳云。女蘿。兔  
絲。松蘿也。陸璣云。今兔絲蔓連草上生。黃赤如金。今合藥兔絲子是也。非松蘿。



松蘿自蔓松上。枝正青。與菟絲異。楚詞云。被薜荔兮帶女蘿。王逸云。女蘿。兔絲也。淮南子云。千秋之松。下有茯苓。上有兔絲。高誘注云。茯苓。千歲松脂也。兔絲。生其上而無根。舊作菟。非。

牛薺。味苦酸。御覽作主寒。御覽作溼痿痺。四肢拘攣。膝痛不可屈伸。逐血氣傷熱火。爛墮胎。久服輕身耐老。御覽作一名百倍。生川谷。

吳普曰。牛薺。神農甘。一經酸。黃帝。扁鵲甘。李氏。溫。雷公。酸。無毒。生河內或臨卽。葉如夏藍。莖本赤。二月八月采。御覽

名醫曰。生河內及臨朐。二月八月十月采根陰乾。

案。廣雅云。牛莖。牛膝也。陶宏景云。其莖有節似膝。故以爲名也。膝當作薺。

充蔚子。味辛微溫。主明目益精。除水氣。久服輕身。莖主癰瘰癧。可作浴湯。一名益母。一名益明。一名大札。生池澤。

名醫曰。一名貞蔚。生海濱。五月采。

案。說文云。菴。菴也。廣雅云。益母。充蔚也。爾雅云。菴菴。郭璞云。今菴蔚也。毛詩云。中谷有菴。傳云。菴。離也。陸云。舊說及魏博士濟陰周元明皆云。菴。閭是也。韓詩

及三蒼說。悉云益母。故曾子見益母而感。劉歆曰。葍、臭穢。臭穢即茺蔚也。舊作茺。非。

女萎味甘平。主中風暴熱。不能動搖。跌筋結肉。諸不足。久服去面黑肝。好顏色。潤澤。輕身不老。生山谷。

吳普曰。女萎一名葍蕤。一名玉馬。一名地節。一名蟲蟬。一名烏萎。一名葍。一名玉竹。神農苦一經。甘桐君、雷公、扁鵲甘無毒。黃帝辛。生太山山谷。葉青黃相值如薑。二月七月采。治中風暴熱。久服輕身。御覽一名左眊。久服輕身耐老。同上。

名醫曰。一名葍。一名地節。一名玉竹。一名馬熏。生太山及邱陵。立春後采。陰乾。案爾雅云。葍、萎蕤。郭璞云。藥草也。葉似竹。大者如箭竿。有節。葉狹而長。表白裏青。根大如指。長一二尺。可啖。陶宏景云。按本經有女萎無萎蕤。別錄有萎蕤而為用正同。疑女萎即萎蕤也。惟名異耳。陳藏器云。魏志樊阿傳。青黏一名黃芝。一名地節。此即萎蕤。

防葵味辛寒。主疝瘕腸洩。膀胱熱結。溺不下。欬逆溫瘧。癰癰驚邪狂走。久服堅骨髓。益氣輕身。一名黎蓋。生川谷。

吳普曰。房葵一名黎蓋。一名爵離。一名房苑。一名晨草。一名利如。一名方蓋。神農辛小寒。桐君扁鵲無毒。歧伯雷公黃帝苦無毒。莖葉如葵。上黑黃。二月生根。根大如桔梗。根中紅白。六月花白。七月八月實白。三月三日采根。覽御名醫曰。一名房慈。一名爵離。一名農果。一名利茹。一名方蓋。生臨溜及嵩高。太山少室。三月三日采根暴乾。

案博物志云。防葵與狼毒相似。

茈胡。味苦平。主心腹去腸胃中結氣。飲食積聚。寒熱邪氣。推陳致新。久服輕身。明目益精。一名地熏。

吳普曰。茈胡一名山菜。一名茹草。神農。歧伯。雷公。苦無毒。生冤句。二月八月采根。覽御

名醫曰。一名山菜。一名茹草。葉一名芸蒿。辛香可食。生宏農及冤句。二月八月采根暴乾。

案博物志云。芸蒿葉似邪蒿。春秋有白蒿。長四五寸。香美可食。長安及河內並有之。夏小正云。正月采芸。月令云。仲春芸始生。呂氏春秋云。菜之美者。華陽之

芸。皆卽此也。急就篇有芸。顏師古注云。卽今芸蒿也。然則是此茈胡葉矣。茈柴前聲相轉。名醫別出前胡條。非。陶宏景云。本經上品有茈胡而無此。晚來醫乃用之。

麥門冬。味甘平。主心腹結氣。傷中傷飽。胃絡脈絕。羸瘦短氣。久服輕身。不老不飢。生川谷及隄阪。

吳普曰。一名馬韭。一名薺冬。一名忍冬。一名忍陵。一名不死藥。一名僕壘。一名隨脂。太平御覽引云。一名羊韭。一名羊素。一名馬韭。一名禹韭。一名禹餘糧。神農。岐伯。甘平。黃帝。桐君。雷公。甘無毒。李氏。甘小溫。扁鵲。無毒。生山谷肥地。葉如韭。肥澤叢生。采無時。實青黃。

名醫曰。秦名羊韭。齊名愛韭。楚名馬韭。越名羊著。一名禹葭。一名禹餘糧。葉如韭。冬夏長生。生函谷肥土石間久廢處。二月三月八月十月采陰乾。案說文云。葱。葱冬草。中山經云。青要之山。是多僕壘。据吳普說。卽麥門冬也。忍葱壘。壘音同。陶宏景云。實如青珠。根似穠麥。故謂麥門冬。獨活。味苦平。主風寒所擊。金瘡止痛。貴豚癰瘰。女子疝瘕。久服輕身耐老。一名羌



活。一名羌青。一名護羌使者。生山谷。

吳普曰。獨活一名胡王使者。神農黃帝苦無毒。八月采。此藥有風花不動。無風獨搖。覽御

名醫曰。一名胡王使者。一名獨搖草。此草得風不搖。無風自動。生雍州或隴西南安。二月八月采根暴乾。

案列僊傳云。山圖服羌活獨活。則似二名。護羌胡王皆羌字緩聲。猶專諸為專設諸。庾公差為庾公之斯。非有義也。

車前子味甘寒無毒。主氣癰止痛。利水道小便。除溼痺。久服輕身耐老。一名當道。御覽有云一名牛舌

大觀本作牛遺黑字生平澤。名醫曰。一名茅苣。一名蝦蟇衣。一名牛遺。一名勝鳥。生真定邱陵阪道中。五月五日采陰乾。

案說文云。茅。一曰茅苣。苣茅苣一名馬鳥。其實如李。令人宜子。周書所說。廣雅云。當道馬鳥也。爾雅云。茅苣馬鳥。馬鳥車前。郭璞云。今車前草大葉長穗。好生道邊。江東呼為蝦蟇衣。又隴牛賴。孫炎云。牛前一名牛賴。毛詩云。采采茅苣。傳

云茅苴馬鳥。馬鳥，車前也。陸璣云：馬鳥一名車前，一名當道。喜在牛蹟中生。故

曰車前當道也。今藥中車前子是也。幽州人謂之牛舌草。

木香，味辛，主邪氣，辟毒疫溫鬼，強志，主淋露。御覽引云：主氣不久服不夢寤。寤寐。

御覽引云：一名密青，又云輕身致神仙。大觀本俱作黑字。生山谷。

名醫曰：一名蜜香，生永昌。

署豫舊作署豫是味甘溫，主傷中，補虛羸，除寒熱邪氣，補中益氣力，長肌肉，久服

耳目聰明，輕身不飢延年。一名山芋，生山谷。

吳普曰：薯蕷一名諸署。御覽文類聚亦作薯署齊越名山芋，一名修脆，一名兒草。

御覽引云：秦楚名玉延，齊越名山芋。鄭趙名山芋，一名玉延。神農甘小溫。桐君、雷公甘。御覽無毒，或生臨胸。

鍾山始生赤莖，細蔓。五月華白，七月實青黃，八月熟落。根中白皮黃類芋。御覽引云：

二月三月八月采根惡甘遂

名醫曰：秦楚名玉延，鄭越名土藟，生嵩高。二月八月采根暴乾。

案廣雅云：玉延，藟署預也。北山經云：景山草多藟。郭璞云：根似羊蹄，可食。

今江南單呼為藟，語有輕重耳。范子計然云：藟本出三輔，白色者善。本草衍

義云。山藥上一字犯宋英廟諱。下一字曰蕓。唐代宗名豫。故改下一字爲藥。  
蕓苡仁味甘微寒。主筋急拘攣。不可屈伸。風溼痺下氣。久服輕身益氣。其根下三  
蟲。一名解蠱。生平澤及田野。

名醫曰。一名屋茨。一名起實。一名蕓。生真定。八月采實。采根無時。

案。說文云。蕓。蕓苡。一曰蕓英。蕓。一曰蕓苡。廣雅云。蕓起。實蕓。目也。吳越春秋。鮒  
娶於有辛氏之女。名曰女嬉。年壯未孳。嬉於砥山。得蕓苡而吞之。意若爲人所  
感。因而妊孕。後漢書馬援傳。援在交趾。常餌蕓苡實。用能輕身。省欲。以勝瘴。蕓  
俗作蕓。非。

澤瀉味甘寒。主風寒溼痺。乳難。消水。養五藏。益氣力肥健。久服耳目聰明。不飢。延  
年輕身。面生光。能行水上。一名水瀉。一名芒芋。一名鵠瀉。生池澤。

名醫曰。生汝南。五六月采根。陰乾。

案。說文云。蕓。水瀉也。爾雅云。蒲蕓。郭璞云。今澤瀉。又蕓牛脣。郭璞云。毛詩傳云。  
水瀉也。如續斷。寸寸有節。拔之可復。毛詩云。言采其蕓。傳云。蕓。水鳥也。陸璣云。  
今澤瀉也。其葉如車前草大。其味亦相似。徐州廣陵人食之。

遠志。味苦溫。主欬逆傷中。補不足。除邪氣。利九竅。益智慧。耳目聰明不忘。強志倍力。久服輕身不老。葉名小草。一名棘菴。陸德明爾雅音義引作菴。一名萋繞。御覽作一名細草。生川谷。

名醫曰。生太山及冤句。四月采根。葉陰乾。

案。說文云。菴。棘菴也。廣雅云。棘菴。遠志也。其上謂之小草。爾雅云。萋繞。棘菴。郭璞云。今遠志也。似麻黃。赤華。葉銳而黃。

龍膽。味苦澀。主骨間寒熱。驚癇邪氣。續絕傷。定五藏。殺蟲毒。久服益智不忘。輕身耐老。一名陵游。生山谷。

名醫曰。生齊胸及冤句。二月八月十一月十二月采根。陰乾。

細辛。味辛溫。主欬逆頭痛。齒動。百筋拘攣。風溼痺痛。死肌。久服明目。利九竅。輕身長年。一名小辛。生山谷。

吳普曰。細辛一名細草。御覽引云。神農黃帝雷公桐君辛小溫。歧伯無毒。李氏。

小寒。如葵葉。色赤黑。一根一葉相連。御覽引云。三月八月采根。

名醫曰。生華陰。二月八月采根。陰乾。



案廣雅云。細條、少辛、細辛也。中山經云。浮戲之山。上多少辛。郭璞云。細辛也。管子地員篇云。小辛大蒙。范子計然云。細辛出華陰。色白者善。

石斛味甘平。主傷中除痺下氣。補五藏虛勞羸瘦。強陰。久服厚腸胃。輕身延年。一名林蘭。御覽引云。一名禁生。山谷。

吳普曰。石斛神農甘平。扁鵲酸。李氏寒。御覽

名醫曰。一名禁生。一名杜蘭。一名石薺。生六安水傍石上。七月八月采莖陰乾。案范子計然云。石斛出六安。

巴戟天味辛微溫。主大風邪氣。陰痿不起。強筋骨。安五藏。補中增志益氣。生山谷。

名醫曰。生巴郡及下邳。二月八月采根陰乾。

白英味甘寒。主寒熱入疽消渴。補中益氣。久服輕身延年。一名穀菜。元本誤生山谷。

名醫曰。一名白草。生益州。春采葉。夏采莖。秋采花。冬采根。

案爾雅云。苻兔目。郭璞云。今江東有鬼目草。莖似葛葉圓而毛。子如耳瑱也。赤色叢生。唐本注白英云。此鬼目草也。

白蒿味甘平。主五藏邪氣。風寒溼痺。補中益氣。長毛髮令黑。療心縣少食常飢。久服輕身。耳目聰明不老。生川澤。

名醫曰。生中山。二月采。

案說文云。繫。白蒿也。艾。冰臺也。廣雅云。繫母。蒹蒻也。爾雅云。艾。冰臺。郭璞云。今艾。白蒿。夏小正云。二月采繫。傳云。繫。由胡。由胡者。繫母也。繫母者。蒹蒻也。爾雅云。繫。皤蒿。郭璞云。白蒿。又繫。由胡。郭璞云。未詳。毛詩云。于以采繫。傳云。繫。皤蒿也。又采繫。祁祁。傳云。繫。白蒿也。陸璣云。凡艾白色者。為皤蒿。楚詞。王逸注云。艾。白蒿也。按。皤。白音義。皆相近。艾是藥名。本草經無者。即白蒿是也。名醫別出艾條。非。

赤箭。味辛溫。主殺鬼精物。蠱毒惡氣。久服益氣力。長陰肥健。輕身增年。一名離母。一名鬼督郵。生川谷。

吳普曰。鬼督郵一名神草。一名閭狗。或生太山。或少室。莖箭赤無葉。根如芋子。三月四月八月采。根日乾。治癰腫。御覽名醫曰。生陳倉。雍州及太山少室。三月四月八月采。根暴乾。

案抱朴子云。按僊方中有合離草。一名獨搖。一名離母。所以謂之合離離母者。此草爲物。下根如芋魁。有游子十二枚。周環之。去大魁數尺。雖相須而實不相連。但以氣相屬耳。別說云。今醫家見用天麻。卽是此赤箭根。

奄閭子。

舊作菴蘭。御覽作奄閭。是味苦微寒。

主五藏瘀血。腹中水氣。臚張留熱。風寒溼痺。身體

諸痛。久服輕身。延年不老。生川谷。

吳普曰。奄閭。神農。雷公。桐君。歧伯。苦。小溫。無毒。李氏。溫。或生上黨。葉青厚。兩相

當。七月花白。九月實黑。七月九月十月采。驢馬食僊去。御覽

名醫曰。駝驢食之神僊。生雍州。亦生上黨及道邊。十月采實陰乾。

案司馬相如賦。有奄閭。張揖云。奄閭。蒿也。子可治疾。

析蕒子。味辛微溫。主明目。目痛淚出。除痺補五藏。益精光。久服輕身不老。一名蔑

析。一名大蕒。一名馬辛。生川澤及道旁。

吳普曰。析蕒。一名析目。一名榮冥。一名馬駢。雷公。神農。扁鵲。辛。李氏。小溫。四月

采乾。二十日生道旁。得細辛良。畏乾薑。苦參。葶實。神農。無毒。生野田。五月五日

采陰乾。治腹脹。御覽

名醫曰。一名大薺。生咸陽。四月五月采暴乾。

案說文云。薺。析薺。大薺也。廣雅云。析薺。馬辛也。爾雅云。析薺。大薺。郭璞云。薺葉細。俗呼之曰老薺。舊作薺非。

著實。味苦平。主益氣。充肌膚。明目聰慧。先知。久服不飢不老。輕身。生山谷。

吳普曰。著實。味苦酸平。無毒。主益氣。充肌膚。明目聰慧。先知。久服不飢不老。輕身。生少室山谷。八月九月采。實暴乾。御覽

名醫曰。生少室。八月九月采。實日乾。

案說文云。著。蒿屬。生千歲三百莖。史記龜策傳云。著百莖共一根。

赤芝。味苦平。主胸中結。益心氣。補中增慧。智不忘。久食輕身不老。延年神僊。一名丹芝。黑芝。味鹹平。主癰利水道。益腎氣。通九竅。聰察。久食輕身不老。延年神僊。一名元芝。青芝。味酸平。主明目。補肝氣。安精魂。仁恕。久食輕身不老。延年神僊。一名龍芝。白芝。味辛平。主欬逆上氣。益肺氣。通利口鼻。強志意。勇悍安魄。久食輕身不老。延年神僊。一名玉芝。黃芝。味甘平。主心腹五邪。益脾氣。安神。忠信和樂。久食輕身不老。延年神僊。一名金芝。紫芝。味甘溫。主耳聾。利關節。保神益精氣。堅筋骨。好



顏色。久食輕身不老延年。一名木芝。生山谷。舊作六種今并

吳普曰。紫芝一名木芝。

名醫曰。赤芝生霍山。黑芝生恆山。青芝生太山。白芝生華山。黃芝生蒿山。紫芝生高夏地上。色紫形如桑。御覽六芝皆無毒。六月八月采。

案說文云。芝。神草也。爾雅云。茵芝。郭璞云。芝一歲三華。瑞草。禮內則云。芝栢。盧植注云。芝。木芝也。楚詞云。采三秀于山間。王逸云。三秀謂芝草。後漢書華佗傳。有漆葉青藟散。注引佗傳曰。青藟者。一名地節。一名黃芝。主理五藏。益精氣。本字書無藟字。相傳音女廉反。列僊傳云。呂尚服澤芝。抱朴子僊藥篇云。赤者如珊瑚。白者如截肪。黑者如澤漆。青者如翠羽。黃者如紫金。而皆光明洞徹。如堅冰也。

卷柏。味辛溫。生山谷。主五藏邪氣。女子陰中寒熱痛。癥瘕血閉絕子。久服輕身。和顏色。一名萬歲。生山谷石間。

吳普曰。卷柏。神農。辛。桐君。雷公。甘。御覽引云。一名萬歲。一名神枝。時一名求股。一名醫曰。一名豹足。一名求股。一名交時。生常山。五月七月采。陰乾。

案、范子計然云。卷柏出三輔。

藍實、味苦寒。主解諸毒。殺蟲蛟。注鬼螫毒。久服頭不白。輕身。生平澤。

名醫曰。其莖葉可以染青。生河內。

案、說文云。葑、馬藍也。藍、染青草也。爾雅云。葑、馬藍。郭璞云。今大葉冬藍也。周禮掌染草。鄭注云。染草、藍蒨。象斗之屬。夏小正五月啓灌藍。毛詩云。終朝采藍。箋云。藍、染草也。

芎藭、味辛溫。主中風入腦頭痛。寒痺筋攣。緩急。金創。婦人血閉無子。生川谷。

吳普曰。芎藭、御覽引云神農、黃帝、岐伯、雷公、辛無毒。扁鵲、酸無毒。李氏、生溫熱寒。或生胡無桃山陰。或太山。御覽作或斜谷葉香細青黑。文亦如藁本。冬夏叢生。五月華赤。七月實黑。莖端兩葉。三月采根。有節似馬銜狀。

名醫曰。一名胡藭。一名香果。其葉名藤蕪。生武功斜谷西嶺。三四月采根。暴乾。案、說文云。營、營藭。香草也。芎、司馬相如說。或从弓。春秋左傳云。有山鞠藭乎。杜預云。鞠藭所以禦溼。西山經云。號山其草多芎藭。郭璞云。芎藭一名江蘿。范子計然云。芎藭生始無枯者善。有脫字司馬相如賦。有芎藭。司馬貞引司馬彪云。芎

窮似藁本。郭璞云。今歷陽呼爲江離。

蘼蕪。味辛溫。主欬逆。定驚氣。辟邪惡。除蠱毒。鬼注。去三蟲。久服通神。一名薇蕪。生川澤。

吳普曰。蘼蕪一名芎藭。御覽

名醫曰。一名茝離。芎藭苗也。生雍州及冤句。四月五月采。葉暴乾。

案說文云。蘼。蘼蕪也。離。茝離。蘼蕪。爾雅云。斬茝。蘼蕪。郭璞云。香草。葉小如委狀。

淮南子云。似蛇牀。山海經云。臭如蘼蕪。司馬相如賦。有江離蘼蕪。司馬貞引樊

光云。藁本一名蘼蕪。根名斬茝。

黃連。味苦寒。主熱氣。目痛。皆傷泣出。明目。御覽引云。主莖。傷大觀本無。腸辟。腹痛下利。婦人陰

中腫痛。久服令人不忘。一名王連。生川谷。

吳普曰。黃連。神農。岐伯。黃帝。雷公。苦無毒。李氏。小寒。或生蜀郡太山之陽。御覽

名醫曰。生巫陽及蜀郡太山。二月八月采。

案廣雅云。王連。黃連也。范子計然云。黃連出蜀郡。黃肥堅者善。

絡石。味苦溫。主風熱死肌。癰傷。口乾舌焦。癰腫不消。喉舌腫。水漿不下。久服輕身。

明目。潤澤。好顏色。不老延年。一名鮫石。生川谷。

吳普曰。落石一名鮫石。一名明石。一名縣石。一名雲華。一名雲珠。一名雲英。一名雲丹。神農苦小溫。雷公苦無毒。扁鵲桐君甘無毒。李氏大寒。云藥中君采無

時。覽御

名醫曰。一名石蹉。一名略石。一名明石。一名領石。一名縣石。生太山或石山之陰。或高山巖石上。或生人間。正月采。

案西山經云。上申之山多硌石。疑卽此。郭璞云。硌。磊硌。大石貌。非也。唐本注云。俗名耐冬。山南人謂之石血。以其包絡石木而生。故名。絡石。別錄謂之石龍藤。以石上生者良。

疾藜子。味苦溫。主惡血。破癥結積聚。喉痺乳難。久服長肌肉。明目輕身。一名旁通。一名屈人。一名止行。一名豺羽。一名升推。御覽引云。一名君水。香大觀本無文。生平澤或道旁。

名醫曰。一名卽藜。一名茨生。馮翊七月八月采實暴乾。案說文云。薺。蒺藜也。詩曰。牆有茨。以茨爲茅葺覆屋宇。爾雅云。茨。蒺藜。郭璞云。布地蔓生。細葉。子有三角。刺人。毛詩云。牆有茨。傳云。茨。蒺藜也。



黃耆味甘微溫。主癰疽久敗創。排膿止痛。大風癰疾。五痔鼠瘻。補虛。小兒百病。一名戴糝。生山谷。

名醫曰。一名戴椹。一名獨椹。一名芟艸。一名蜀脂。一名百本。生蜀郡白水漢中。二月十月采。陰乾。

肉松容味甘微溫。主五勞七傷。補中。除莖中寒熱痛。養五藏。強陰。益精氣。多子。婦人癰瘕。久服輕身。生山谷。

吳普曰。肉菰蓉一名肉松蓉。神農黃帝鹹。雷公酸小溫。御覽作李氏小溫生河西。御覽東山陰地。長三四寸。叢生。或代郡。雁門。二月至八月采。陰乾。用之。

名醫曰。生河西及代郡雁門。五月五日采。陰乾。案。吳普云。一名肉松蓉。當是古本。蓉卽容字。俗寫菰蓉。非正字也。陶宏景云。是

野馬精落地所生。生時似肉。舊作肉菰蓉。非。

防風味甘溫無毒。主大風頭眩痛。惡風。風邪。目盲無所見。風行周身。骨節疼痛。御覽作煩滿。久服輕身。一名銅芸。御覽作芒。生川澤。

吳普曰。防風一名迴雲。一名回艸。一名百枝。一名藺根。一名百韭。一名百種。神

農、黃帝、岐伯、桐君、雷公、扁鵲、甘無毒、李氏、小寒。或生邯鄲上蔡。正月生葉細圓。青黑黃白。五月花黃。六月實黑。三月十月采根日乾。琅瑯者良。御覽  
名醫曰。一名苗艸。一名百枝。一名屏風。一名蘭根。一名百蜚。生沙苑及邯鄲、琅瑯、上蔡。二月十月采根暴乾。  
案、范子計然云。防風出三輔。白者善。  
蒲黃、味甘平。主心腹旁光寒熱。利小便。止血消瘀血。久服輕身益氣力。延年神僊。  
生池澤。

名醫曰。生河東。四月采。

案、玉篇云。蒿謂今蒲頭有臺。臺上有重臺。中出黃。即蒲黃。陶宏景云。此即蒲蘆花上黃粉也。僊經亦用此。攷爾雅苻離。其上蒿。苻離與蒲蘆聲相近。疑即此。香蒲、味甘平。主五藏心下邪氣。口中爛臭。堅齒。明目聰耳。久服輕身耐老。御覽作能老  
一名眊。御覽名眊生池澤。

吳普曰。眊一名眊石。一名香蒲。神農、雷公、甘。生南海池澤中。御覽  
名醫曰。一名醮。生南海。

案、說文云。菩、草也。玉篇云。菩、香草也。又音蒲。本草圖經云。香蒲、蒲黃苗也。春初生嫩葉。未出水時。紅白色茸茸然。周禮以爲蒹。

續斷。味苦微溫。主傷寒補不足。金創癰傷折跌。續筋骨。婦人乳難。御覽作乳癰云。本字作久服益氣力。一名龍豆。一名屬折。生山谷。

名醫曰。一名接骨。一名南草。一名槐。生常山。七月八月采陰乾。

案、廣雅云。襄、續斷也。范子計然云。續斷出三輔。桐君藥錄云。續斷生蔓延。葉細莖如荏大。根本黃白有汁。七月八月采根。

漏蘆。味苦鹹寒。主皮膚熱。惡創疽痔瘻痺。下乳汁。久服輕身益氣。耳目聰明。不老延年。一名野蘭。生山谷。

名醫曰。生喬山。八月采根陰乾。

案、廣雅云。飛廉、漏蘆也。陶宏景云。俗中取根名鹿驪。

營實。味酸溫。主癰疽惡創結肉。跌筋敗氣。熱氣陰蝕不瘳。利關節。一名牆薇。一名牆麻。一名牛棘。生川谷。

吳普曰。薔薇一名牛勒。一名牛膝。一名薔藤。一名山棗。御覽

名醫曰。一名牛勒。一名薔薇。一名山棘。生零陵及蜀郡。八月九月采陰乾。  
案陶宏景云。卽是牆薇子。

天名精。味甘寒。主瘀血。血瘕欲死。下血止血。利小便。久服輕身耐老。一名麥句薑。  
一名蝦蟇藍。一名豕首。生川澤。

名醫曰。一名天門精。一名玉門精。一名麋顱。一名蟾蜍蘭。一名覲。生平原。五月  
采。

案說文云。蕪。豕首也。爾雅云。茹蕪。豕首。郭璞云。今江東呼豬首。可以燭蠶蛹。陶  
宏景云。此卽今人呼爲猗菜。唐本云。鹿活草是也。別錄一名天蔓菁。南人呼爲  
地松。掌禹錫云。陳藏器別立地菰條。後人不當仍其謬。

決明子。味鹹平。主青盲目。淫膚。赤白膜。眼赤痛淚出。久服益精光。太平御覽引作  
字治輕身。生川澤。

吳普曰。決明子。一名草決明。一名羊明。御覽

名醫曰。生龍門。石決明。生豫章。十月采。陰乾百日。  
案廣雅云。羊躑躅。英光也。又決明。羊明也。爾雅云。薔薇。英光。郭璞云。英。明也。葉



黃銳赤。華實如山茱萸。陶宏景云。形似馬蹄決明。

丹參。味苦微寒。主心腹邪氣。腸鳴幽幽。如走水。寒熱積聚。破癥除瘕。止煩滿益氣。一名卻蟬草。生川谷。

吳普曰。丹參一名赤參。一名木羊乳。一名卻蟬草。神農、桐君、黃帝、雷公、扁鵲、苦無毒。李氏大寒。歧伯、鍼生、桐柏或生太山山陵陰。莖華小方如荏。毛根赤。四月華紫。五月采根陰乾。治心腹痛。

名醫曰。一名赤參。一名木羊乳。生桐柏山及太山。五月采根暴乾。案廣雅云。卻蟬丹參也。

茜根。味苦寒。主寒溼風痺黃疸。補中。生川谷。

名醫曰。可以染絳。一名地血。一名茹慮。一名茅蒐。一名蒨。生喬山。二月三月采根暴乾。

案說文云。茜茅蒐也。蒐茅蒐。茹蘆。人血所生。可以染絳。从艸从鬼。廣雅云。地血。茹蘆蒨也。爾雅云。茹蘆茅蒐。郭璞云。今蒨也。可以染絳。毛詩云。茹蘆在阪。傳云。茹蘆茅蒐也。陸璣云。一名地血。齊人謂之茜。徐州人謂之牛蔓。徐廣注史記云。

茜一名紅藍。其花染繒赤黃也。按名醫別出紅藍條。非。

飛廉味苦平。主骨節熱。脛重酸疼。久服令人身輕。一名飛輕。肥杜黑字生川澤。

名醫曰。一名伏兔。一名飛雉。一名木禾。生河內。正月采根。七月八月采花。陰乾。

案廣雅云。伏豬。木禾也。飛廉。漏蘆也。陶宏景云。今既別有漏蘆。則非此別名耳。

五味子味酸溫。主益氣。欬逆上氣。勞傷羸瘦。補不足。強陰。益男子精。御覽引云。一

本作黑字生山谷。

吳普曰。五味子。一名元及。御覽

名醫曰。一名會及。一名元及。生齊山及代郡。八月采。實陰乾。

案說文云。葇莖。豬也。莖莖。豬草也。葇莖。豬也。廣雅云。會及。五味也。爾雅云。葇莖。

郭璞云。五味也。蔓生子。叢在莖頭。抱朴子僊藥篇云。五味者。五行之精。其子

有五味。移門子服五味子。十六年色如玉女。入水不露。入火不灼也。

旋華味甘溫。主益氣。去面肝。御覽黑色。媚好。御覽作令。其根味辛。主腹中寒熱邪。

氣。利小便。久服不飢。輕身。一名筋根。華一名金沸。御覽引云。一名美。生平澤。

名醫曰。生豫州。五月采。陰乾。

案、陶宏景云。東人呼爲山薑。南人呼爲美草。本草衍義云。世又謂之鼓子花。蘭草。味辛平。主利水道。殺蠱毒。辟不祥。久服益氣。輕身不老。通神明。一名水香。生池澤。

名醫曰。生大吳。四月五月采。

案、說文云。蘭。香草也。廣雅云。蘭。蘭也。易其臭如蘭。鄭云。蘭。香草也。夏小正五月蓄蘭。毛詩云。方秉蘭兮。傳云。蘭。蘭也。陸璣云。蘭。卽蘭。香草也。其莖葉似藥草澤蘭。范子計然云。大蘭出漢中三輔。蘭出河東宏農。白者善。元楊齊賢注李白詩。引本草云。蘭草澤蘭二物同名。蘭草一名水香。云都梁是也。水經。零陵郡都梁縣西小山上。有渟水。其中悉生蘭草。綠葉紫莖。澤蘭如薄荷微香。荆湘嶺南人家多種之。與蘭大抵相類。顏師古以蘭草爲澤蘭。非也。

蛇牀子。味苦平。主婦人陰中腫痛。男子陰痿溼痒。除痺氣。利關節。瘕癰惡創。久服輕身。一名蛇米。生川谷及田野。

吳普曰。蛇牀一名蛇珠。

見御覽

名醫曰。一名蛇粟。一名虺牀。一名思葢。一名繩毒。一名棗棘。一名牆蘼。生臨淄。

五月采實陰乾。

案廣雅云。蛇粟。馬牀。蛇牀也。爾雅云。盱虺牀。淮南子。汜論訓云。亂人者。若蛇牀之與薜蘿。

地膚子。味苦寒。主勞光熱。利小便。補中益精氣。久服耳目聰明。輕身耐老。一名地葵。御覽引云。一名地華。四字脈作麥。皆黑字。觀生平澤及田野。

名醫曰。一名地麥。生荊州。八月十月采實陰乾。

案廣雅云。地葵。地膚也。列僊傳云。文賓服地膚。鄭樵云。地膚曰落帚。亦曰地掃。爾雅云。莽馬帚。卽此也。今人亦用爲帚。

景天。味苦平。主大熱火創。身熱煩邪惡氣。華主女人漏下赤白。輕身明目。一名戒火。一名慎火。御覽引云。一名水母。大觀本作黑字。水作火。生川谷。

名醫曰。一名火母。一名救火。一名據火。生太山。四月四日。七月七日采陰乾。

案陶宏景云。今人皆盆養之於屋上。云以辟火。

因陳。御覽作因塵蒿。味苦平。主風溼寒熱邪氣。熱結黃疸。久服輕身。益氣耐老。御覽作生邱陵阪岸上。



吳普曰。因塵。神農、岐伯、雷公、苦無毒。黃帝、辛無毒。生田中。葉如藍。十一月采。覽御

名醫曰。白兔食之僊。生太山。五月及立秋采。陰乾。

案。廣雅云。因塵。馬先也。陶宏景云。僊經云。白蒿。白兔食之僊。而今因陳乃云此。恐非耳。陳藏器云。茵陳經冬不死。因舊苗而生。故名茵陳。後加蒿字也。據此知

舊作茵陳蒿。非。又按。廣雅云。馬先疑即馬新蒿。亦白蒿之類。

杜若。味辛微溫。主胸脇下逆氣。溫中。風入腦戶。頭腫痛。多涕淚出。久服益精。藝文

引氣作明目輕身。一名杜衡。藝文類聚生川澤。

名醫曰。一名杜連。一名白連。一名白苓。一名若芝。生武陵及冤句。二月八月采

根暴乾。

案。說文云。若杜若。香草。廣雅云。楚蘅。杜蘅也。西山經云。天帝之上有草焉。其狀如葵。其臭如薷蕪。名曰杜衡。爾雅云。杜。土鹵。郭璞云。杜。蘅也。似葵而香。楚詞云。采芳州兮杜若。范子計然云。杜若生南郡漢中。又云。秦蘅出於隴西天水。沈括補筆談云。杜若即今之高良薑。後人不識。又別出高良薑條。按。經云。一名杜衡。是名醫別出杜蘅條非也。衡正字。俗加艸。

沙參。味苦微寒。主血積驚氣。除寒熱。補中益肺氣。久服利人。一名知母。生川谷。

吳普曰。白沙參一名苦心。一名識美。一名虎須。一名白參。一名志取。一名文虎。神農黃帝扁鵲無毒歧伯鍼李氏大寒。生河內川谷或般陽瀆山。三月生如葵。

葉青實白。如芥根大。白如蕪菁。三月采。

名醫曰。一名苦心。一名志取。一名虎鬚。一名白參。一名識美。一名文希。生河內及冤句般陽瀆山。二月八月采根暴乾。

案廣雅云。苦心沙參也。其蒿青蕪也。范子計然云。白沙參出洛陽。白者善。

白兔藿。味苦平。主蛇虺蜂蠆狗。菜肉蠱毒。注一名白葛。生山谷。

吳普曰。白菟藿一名白葛穀。御覽

名醫曰。生交州。

案陶宏景云。都不聞有識之者。想當似葛耳。唐本注云。此草荆襄山谷大有。俗謂之白葛。

徐長卿。味辛溫。主鬼物百精蠱毒疫疾邪惡氣溫瘧。久服強悍輕身。一名鬼督郵。生山谷。

吳普曰。徐長卿一名石下長卿。神農、雷公、辛。或生隴西。三月采。

名醫曰。生太山及隴西。三月采。

御覽

案廣雅云。徐長卿。鬼督郵也。陶宏景云。鬼督郵之名甚多。今俗用徐長卿者。其根正如細辛。小短扁扁爾。氣亦相似。

石龍芻。味苦微寒。主心腹邪氣。小便不利。淋閉風溼。鬼注惡毒。久服補虛羸輕身。耳目聰明延年。一名龍鬚。一名草續斷。一名龍珠。生山谷。

吳普曰。龍芻一名龍多。一名龍鬚。一名續斷。一名龍木。一名草毒。一名龍華。一名懸莞。神農、李氏、小寒、雷公、黃帝、苦無毒。扁鵲、辛無毒。生梁州。七月七日采。

御覽

此條誤附續斷

名醫曰。一名龍華。一名懸莞。一名草毒。生梁州溼地。五月七月采。莖暴乾。

案廣雅云。龍木。龍須也。中山經云。賈超之山。其中多龍修。郭璞云。龍須也。似莞而細。生山石穴中。莖列垂。可以爲席。別錄云。一名方賓。鄭樵云。爾雅所謂薜鼠莞也。舊作芻。非。

薇銜。味苦平。主風溼痺。歷節痛。驚癇吐舌。悸氣賊風。鼠瘻癰腫。一名糜銜。生川澤。

吳普曰。薇薺一名靡薺。一名無顛。一名承膏。一名醜。一名無心。御覽一名醫曰。一名承膏。一名承肌。一名無心。一名無顛。生漢中及冤句邯鄲。七月采

莖葉陰乾。

雲實。味辛溫。主洩利。舊作痢。御覽作泄。利腸澼。殺蟲蠱毒。去邪惡結氣。止痛除熱。華主見鬼精物。多食令人狂走。久服輕身通神明。生川谷。

吳普曰。雲實一名員實。一名天豆。神農辛小溫。黃帝鹹。雷公苦。葉如麻。兩兩相值。高四五尺。大莖空中。六月花。八月九月實。十月采。

名醫曰。一名員實。一名雲英。一名天豆。生河間。十月采暴乾。

案廣雅云。天豆。雲實也。

王不留行。味苦平。主金創止血。逐痛出刺。除風痺內寒。久服輕身耐老。御覽作增能老。壽生山谷。

吳普曰。王不留行。一名王不流行。神農苦平。歧伯雷公甘。三月八月采。

案鄭樵云。王不留行曰禁宮花。曰剪金花。葉似槐。實作房。

升麻。味甘辛。大觀本主解百毒。殺百老物殃鬼。辟溫疾障邪毒蠱。久服不夭。本作觀。



主解百毒殺百精老物殃鬼辟瘟一名周升麻。大觀本作周麻。生山谷。舊作黑字。據吳普疫瘴氣邪氣。蠱毒此用御覽文。今增入有此

吳普曰。升麻。神農甘。

名醫曰。生益州。二月八月采根日乾。

案廣雅云。周麻。升麻也。此據御覽

青蘘味甘寒。主五藏邪氣。風寒溼痺。益氣補腦髓。堅筋骨。久服耳目聰明。不飢不

老增壽。巨勝苗也。生川谷。舊在米穀部。非

吳普曰。青蘘一名夢神。神農苦雷公甘。

名醫曰。生中原。

案抱朴子僊藥篇云。孝經援神契曰。巨勝延年。又云巨勝一名胡麻。餌服之不

老耐風溼。補衰老也。

姑活味甘溫。主大風邪氣。溼痺寒痛。久服輕身益壽耐老。一名冬葵子。舊在唐本

增今

名醫曰。生河東。

案、水經注解縣引神農本草云。地有固活女疏。銅芸紫苑之族也。陶宏景云。方藥亦無用此者。乃有固活丸。即是野葛一名。此又名冬葵子。非葵菜之冬葵子。療體乖異。

別羈。味苦微溫。主風寒溼痺。身重四肢疼酸。寒邪歷節痛。生川谷。舊在唐本退澤。中無毒。今增。名醫曰。一名別枝。一名別騎。一名鼈羈。生藍田。二月八月采。

案、陶宏景云。方家時有用處。今俗亦絕耳。  
屈草。味苦。主胸脇下痛邪氣。腹間寒熱陰痺。久服輕身。益氣耐老。御覽作補。生川澤。舊在唐本退澤。中無毒。今增。

名醫曰。生漢中。五月采。  
案、陶宏景云。方藥不復用。俗無識者。

淮木。味苦平。主久欬上氣。傷中虛羸。女子陰蝕漏下。赤白沃。一名百歲城中木。生山谷。舊在唐本退澤。中無毒。今增。

吳普曰。淮木。神農、雷公、無毒。生晉平陽河東平澤。治久欬上氣。傷中羸虛。補中益氣。御覽。

名醫曰。一名炭木。生太山。采無時。

案李當之云。是樟樹上寄生。樹大銜枝在肌肉。今人皆以胡桃皮當之。非也。相君云。生上洛。是木皮。狀如厚朴。色似桂白。其理一縱一橫。今市人皆削以充厚朴。而無正縱橫理。不知此復是何物。莫測真假。何者爲是也。

右草上品七十三種。舊七十二種。攷六芝當爲一。升麻當白字。米穀部誤入青蘘。唐本退六種。姑活。屈草。淮木。皆當入此。

牡桂。味辛溫。主上氣欬逆。結氣喉痺。吐吸利關節。補中益氣。久服通神。輕身不老。生山谷。

名醫曰。生南海。

案說文云。桂。江南木。百藥之長。檖桂也。南山經云。招搖之山多桂。郭璞云。桂葉似枇杷。長二尺餘。廣數寸。味辛。白花。叢生山峰。冬夏常青。間無雜木。爾雅云。檖木。桂。郭璞云。今人呼桂皮厚者爲木桂。及單名桂者是也。一名肉桂。一名桂枝。一名桂心。

茵桂。味辛溫。主百病。養精神。和顏色。爲諸藥先聘通使。久服輕身不老。面生光華。

媚好常如童子。生山谷。

名醫曰。生交趾。桂林巖崖間。無骨正圓如竹。立秋采。

案楚詞云。雜申椒與菌桂兮。王逸云。茱桂皆香木。列僊傳云。范蠡好服桂。

松脂。味苦溫。主疽惡創頭瘍。白禿疥搔風氣。安五藏。除熱。久服輕身。不老延年。一

名松膏。一名松肪。生山谷。

名醫曰。生太山。六月采。

案說文云。松木也。或作案。范子計然云。松脂出隴西。如膠者善。

槐實。味苦寒。主五內邪氣。熱止涎唾。補絕傷。五痔火創。婦人乳癰。子藏急痛。生平澤。

名醫曰。生河南。

案說文云。槐木也。爾雅云。櫟槐大葉而黑。郭璞云。槐樹葉大。色黑者名爲櫟。又

守宮槐葉。晝聶宵炕。郭璞云。槐葉晝日聶合而夜炕布者。名爲守宮槐。

枸杞。味苦寒。主五內邪氣。熱中消渴。周痺。久服堅筋骨。輕身不老。御覽作耐老一名杞

根。一名地骨。一名枸杞。一名地輔。生平澤。



吳普曰。枸杞一名枸己。一名羊乳。御覽

名醫曰。一名羊乳。一名卻暑。一名僊人杖。一名西王母杖。生常山及諸邱陵阪

岸。冬采根。春夏采葉。秋采莖實。陰乾。

案。說文云。櫪。枸杞也。杞。枸杞也。廣雅云。地筋。枸杞也。爾雅云。杞。枸。櫪。郭璞云。今

枸杞也。毛詩云。集于苞杞。傳云。杞。枸。櫪也。陸璣云。苦杞。秋熟正赤。服之輕身益

氣。列僊傳云。陸通食櫪。盧木實。抱朴子。僊藥篇云。象柴。一名托盧是也。或名僊

人杖。或云西王母杖。或名天門精。或名卻老。或名地骨。或名枸杞也。

柏實味甘平。主驚悸。安五藏。益氣。除溼痺。久服令人悅澤美色。耳目聰明。不飢不

老。輕身延年。生山谷。

名醫曰。生太山。柏葉尤良。由四時各依方面。采陰乾。

案。說文云。柏。鞠也。廣雅云。栝栢也。爾雅云。柏。櫪。郭璞云。禮記曰。鬯白以櫪。范子

計然云。栝脂出三輔。上升價七千。中三千一斗。

伏苓味甘平。主胸脇逆氣。御覽作憂恚驚邪恐悸。心下結痛。寒熱煩滿。欬逆。口焦

舌乾。利小便。久服安魂養神。不飢延年。一名茯菟。御覽作扶神。案元本云。其生山

谷。

吳普曰。茯苓通神。桐君甘。雷公。扁鵲。甘無毒。或生茂州大松根下。入地三丈一尺。二月七月采。

名醫曰。其有抱根者名茯苓。生太山大松下。二月八月采陰乾。

案廣雅云。茯苓神。茯苓也。范子計然云。茯苓出嵩高三輔。列僊傳云。昌容采茯苓。餌而食之。史記褚先生云。傳曰。下有伏靈。上有兔絲。所謂伏靈者。在兔絲之下。狀似飛鳥之形。伏靈者。千歲松根也。食之不死。淮南子說林訓云。茯苓掘兔絲死。舊作茯苓。非。

榆皮味甘平。主大小便不通。利水道。除邪氣。久服輕身不飢。其實尤良。一名零榆。生山谷。

名醫曰。生潁川。三月采皮。取白暴乾。八月采實。

案說文云。榆白粉。粉榆也。廣雅云。柘榆。梗榆也。爾雅云。榆白粉。郭璞云。粉榆先生葉。卻著莢。皮色白。又菹莖。郭璞云。今云刺榆。毛詩云。東門之粉。傳云。粉白榆也。又山有樛。傳云。樛莖也。陸璣云。其鍼刺如柘。其葉如榆。淪爲茹。美滑如白榆。

之類。有十種。葉皆相似。皮及木理異矣。

酸棗。味酸平。主心腹寒熱。邪結氣聚。四肢酸疼。溼痺。久服安五藏。輕身延年。生川澤。

名醫曰。生河東。八月采。實陰乾。四十日成。

案。說文云。棧。酸棗也。爾雅云。棧。酸棗。郭璞云。實小味酢。孟子云。養其棧棘。趙岐云。棧棘小棘。所謂酸棗是也。

槩木。味苦寒。主五藏腸胃中結熱。黃疸腸痔。止洩利。女子漏下赤白。陰陽蝕創。一名檀桓。生山谷。

名醫曰。生漢中及永昌。

案。說文云。槩。黃木也。槩。木也。司馬相如賦有槩。張揖云。槩木可染者。顏師古云。槩。黃槩也。

乾漆。味辛溫。無毒。主絕傷補中。續筋骨。填髓腦。安五藏。五緩六急。風寒溼痺。生漆去長蟲。久服輕身耐老。生川谷。名醫曰。生漢中。夏至後采之。

案說文云。漆木汁可以髹物。象形。漆。如水滴而下。以漆爲漆水字。周禮載師云。漆林之征。鄭元云。故書漆林爲漆。杜子春云。當爲漆林。

五加皮。味辛溫。主心腹疝氣腹痛。益氣療癰。小兒不能行。疽創陰蝕。一名豺漆。

名醫曰。一名豺節。生漢中及冤句。五月十月采莖。十月采根陰乾。

案大觀本草引東華真人黃石經云。舜常登蒼梧山曰。厥金玉之香草。朕用偃息正道。此乃五加也。魯定公母單服五加酒。以致不死。

蔓荊實。味苦微寒。主筋骨間寒熱痺拘攣。明目堅齒。利九竅。去白蟲。久服輕身耐老。小荊實亦等。生山谷。

名醫曰。生河間。南陽。冤句。或平壽。都鄉高岸上。及田野中。八月九月采實陰乾。

案廣雅云。牡荊。蔓荊也。廣志云。楚荊也。牡荊。蔓荊也。據牡曼聲相近。故本經於蔓荊不載。所出州土。以其見牡荊也。今或別爲二條。非。

辛夷。味辛溫。主五藏身體寒風頭腦痛面𦏧。久服下氣輕身。明目增年耐老。一名

辛矧。御覽引一名侯桃。一名房木。生川谷。

名醫曰。九月采實暴乾。



案漢書楊雄賦云。列新雉於林薄。師古云。新雉卽辛夷耳。爲樹甚大。其木枝葉皆芳。一名新矧。史記司馬相如傳。雜以流夷。注漢書音義曰。流夷。新夷也。陶宏景云。小時氣辛香。卽離騷所呼新夷者。陳藏器云。初發如筆。北人呼爲木筆。其花最早。南人呼爲迎春。按唐人名爲玉蕊。又曰玉蘭。桑上寄生。味苦平。主腰痛。小兒背強。癰腫。安胎。充肌膚。堅髮齒。長鬚眉。其實明目。輕身通神。一名寄屑。一名寓木。一名宛童。生川谷。

名醫曰。一名蔦。生宏農桑樹上。三月三日采莖陰乾。案說文云。蔦。寄生也。詩曰。蔦與女蘿。或作鵲。廣雅云。宛童。寄生鵲也。又寄屏。寄生也。中山經云。龍山上多寓木。郭璞云。寄生也。爾雅云。寓木。宛童。郭璞云。寄生樹。一名蔦。毛詩云。蔦與女蘿。傳云。蔦。寄生也。陸璣云。蔦。一名寄生。葉似當盧。子如覆盆子。赤黑甜美。

杜仲。味辛平。主腰脊痛。補中益精氣。堅筋骨。強志。除陰下痒。溼。小便餘瀝。久服輕身耐老。一名思僊。生山谷。

吳普曰。一名杜仲。一名木綿。一名思仲。覽

名醫曰。一名思仲。一名木綿。生上虞及上黨漢中。二月五月六月九月采皮。  
案廣雅云。杜仲。曼榆也。博物志云。杜仲皮中有絲。折之則見。  
女貞實。味苦平。主補中安五藏。養精神。除百疾。久服肥健。輕身不老。生山谷。

名醫曰。生武陵。立冬采。

案說文云。楨。剛木也。東山經云。太山上多楨木。郭璞云。女楨也。葉冬不凋。毛詩云。南山有杞。陸璣云。木杞其樹如櫟。陳藏器一作栗一名狗骨。理白滑。其子爲木虵子。可合藥。司馬相如賦有女貞。師古曰。女貞樹冬夏常青。未嘗凋落。若有節操。故以名焉。陳藏器云。冬青也。

木蘭。味苦寒。主身大熱。在皮膚中。去面熱。赤炮酒釀。惡風瘕疾。陰下痒溼。明耳目。一名林蘭。生川谷。

名醫曰。一名杜蘭。皮似桂而香。生零陵及太山。十二月采皮陰乾。  
案廣雅云。木欄。桂欄也。劉逵注蜀都賦云。木蘭。大樹也。葉似長生。冬夏榮。常以冬華。其實如小柿甘美。南人以爲梅。其皮可食。顏師古注漢書云。皮似椒而香。可作面膏藥。

蕤核味甘溫。主心腹邪氣。明目。目赤痛傷淚出。久服輕身益氣。不飢。生川谷。

吳普曰。蕤核一名某。神農雷公甘平無毒。生池澤。八月采。補中強志明目。久服不飢。

名醫曰。生函谷及巴西。

案說文云。桫欏。桫欏。爾雅云。桫。白桫。郭璞云。桫小木。叢生有刺。實如耳瑯。紫赤可啖。一切經音義云。本草作蕤。今桫核是也。

橘柚味辛溫。主胸中瘕熱。逆氣。利水穀。久服去臭下氣。通神。一名橘皮。生川谷。非果部

名醫曰。生南山江南。十月采。

案說文云。橘果出江南。柚條也。似橙而酢。爾雅云。柚條。郭璞云。似橙實酢。生江南。禹貢云。厥包橘柚。僞孔云。大曰橘。小曰柚。列子湯問篇云。吳楚之國有木焉。其名爲櫟。碧樹而冬生。實丹而味酸。食其皮汁。已憤厥之疾。司馬相如賦有橘柚。張揖曰。柚卽橙也。似橘而大。味酢皮厚。右木上品二十種。舊一十九種。攷果部橘柚當入此。

髮髮。味苦溫。主五癰。關格不通。利小便水道。療小兒癰。大人瘞。仍自還神化。

案說文云。髮根也。髮髻也。髻髮也。或作髦。毛詩云。不屑髦也。箋曰。髦髮也。儀禮云。主婦被錫。注云。被錫讀爲髮髻。古者或剔賤者刑者之髮。以被婦人之紒。爲飾。因名髮髻焉。李當之云。是童男髮。據漢人說髮髻當是剃刑人髮。或童男髮。本經不忍取人髮用之。故用剃餘也。方家至用天靈蓋。害及枯骨。卒不能治病。古人所無矣。

右人一種。舊同。

龍骨。味甘平。主心腹鬼注。精物老魅。欬逆洩利膿血。女子漏下。癥瘕堅結。小兒熱氣驚癇。齒主小兒大人驚癇。瘕疾狂走。心下結氣。不能喘息。諸瘕殺精物。久服輕身。通神明延年。生山谷。

吳普曰。龍骨生晉地山谷陰大水所過處。是龍死骨也。青白者善。十二月采。或無時。龍骨畏乾漆。蜀椒。理石。龍齒。神農李氏大寒。治驚癇。久服輕身。御覽大觀本節文名醫曰。生晉地及太山巖水岸土穴中死龍處。采無時。案范子計然云。龍骨生河東。



麝香味辛溫。主辟惡氣。殺鬼精物。溫瘧蟲毒痢瘞。去三蟲。久服除邪。不夢寤厭寐。生川谷。

名醫曰。生中臺及益州雍州山中。春分取之。生者益良。

案說文云。麝如小麋。麝有香。黑色麝也。御覽引爾雅云。麝父麝足。郭璞云。脚似

麝有香。

牛黃味苦平。主驚癇寒熱。熱盛狂瘞。除邪逐鬼。生平澤。

吳普曰。牛黃味苦無毒。牛出入呻御覽作夜走牛字鳴御覽作夜走牛字者有之。夜有光。御覽作夜走牛字

角中。牛死入膽中。如雞子黃。後漢書延篤傳注

名醫曰。生晉地。於牛得之。即陰乾百日。使時燥。無令見日月光。

熊脂味甘微寒。主風痺不仁筋急。五藏腹中積聚。寒熱羸瘦。頭瘍白禿面肝。久服

強志不飢輕身。生山谷。

名醫曰。生雍州。十一月取。

案說文云。熊獸似豕。山居冬蟄。

白膠味甘平。主傷中勞絕。腰痛羸瘦。補中益氣。婦人血閉無子。止痛安胎。久服輕

身延年。一名鹿角膠。

名醫曰。生雲中。煮鹿角作之。

案。說文云。膠。昵也。作之以皮。考工記云。鹿膠青白。牛膠火赤。鄭云。皆謂煮用其皮。或用角。

阿膠味甘平。主心腹內崩。勞極。灑灑如瘧狀。腰腹痛。四肢酸疼。女子下血。安胎。久服輕身益氣。一名傅致膠。

名醫曰。生東平郡。煮牛皮作之。出東阿。

案。二膠本經不著所出。疑本經但作膠。名醫增白字阿字。分爲二條。右獸上品六種。舊同。

丹雄雞味甘微溫。主女人崩中漏下。赤白沃。補虛溫中。止血通神。殺毒辟不祥。頭主殺鬼。東門上者尤良。肪主耳聾。腸主遺溺。胝胫裏黃皮主洩利。尿白主消渴傷寒寒熱。黑雌雞主風寒瘕痺。五緩六急。安胎。翮羽主下血閉。雞子主除熱。火瘡癰瘡可作虎魄。神物。雞白藥肥脂。生平澤。

吳普曰。丹雞卵可作琥珀。

名醫曰。生朝鮮。

案。說文云。雞知時畜也。籀文作雞。肪肥也。腸。大小腸也。臙。鳥脰。脰。鳥胃也。齒。糞也。翮。羽莖也。羽。鳥長毛也。此作臙。省文。尿。卽屎字。古文徙亦齒假音字也。

雁肪。味甘平。主風癱拘急偏枯。氣不通利。久服益氣不飢。輕身耐老。一名鶩肪。生池澤。

吳普曰。雁肪。神農。岐伯。雷公。甘無毒。

御覽有鶩肪二字。當作一名鶩肪。

殺諸石藥毒。

御覽引云。采無時。

名醫曰。生江南。取無時。

案。說文云。雁。鵠也。鶩。舒鳧也。廣雅云。鳴鵠。倉鳴雁也。鳧。鶩。鴨也。爾雅云。舒雁鵠。郭璞云。禮記曰。出如舒雁。今江東呼鳴。又舒鳧。鶩。郭璞云。鴨也。方言云。雁自關而東。謂之鳴鵠。南楚之外。謂之鵠。或謂之倉鳴。據說文云。別有雁。以爲鵠。雁字無鴨字。鴨卽雁之急音。此雁肪。卽鵠鴨脂也。當作雁字。名醫不曉。別出鶩肪條。又出白鴨鵠條。反疑此爲鵠雁。何其謬也。陶蘇皆亂之。

右禽上品二種舊同。

石蜜。味甘平。主心腹邪氣。諸驚癇瘧。安五藏。諸不足。益氣補中。止痛解毒。除衆病。

和百藥。久服強志。輕身不飢不老。一名石飴。生山谷。

吳普曰。石蜜。神農。雷公。甘氣平。生河源或河梁。御覽又一引云。生武都山谷。

名醫曰。生武都河源及諸山石中。色白如膏者良。

案。說文云。蠶。蠶。甘飴也。一曰螟子。或作蜜。中山經云。平逢之山多沙石。實惟蜂蜜之廬。郭璞云。蜜。赤蜂名。西京雜記云。南越王獻高帝石蜜五斛。玉篇云。蠶。蠶。甘飴也。蘇恭云。當去石字。

蜂子。味甘平。主頭風。除蠱毒。補虛羸。傷中。久服令人光澤。好顏色不老。大黃蜂子。主心腹張滿痛。輕身益氣。土蜂子。主癰腫。一名蜚零。生山谷。

名醫曰。生武都。

案。說文云。蠶。飛蟲螫人者。古文省作蠶。廣雅云。蠶。蜂也。又土蜂。蠶。蜂也。爾雅云。土蠶。郭璞云。今江南大蠶。在地中作房者為土蠶。啖其子即馬蠶。今荆巴間呼為蠶。又木蠶。郭璞云。似土蠶而小。在樹上作房。江東亦呼為木蠶。又食其子。禮記檀弓云。范則冠。鄭云。范。蠶也。方言云。蠶。燕趙之間謂之蠶。其小者謂之蠶。或謂之蚘蛻。其大而蜜謂之壺蠶。郭璞云。今黑蠶穿竹木作孔。亦有蜜者。



或呼笛師。按、蠶名爲范者。聲相近。若司馬相如賦以汜爲楓。左傳。泐泐卽汎汎也。

蜜臘味甘微溫。主下利膿血。補中續絕傷金創。益氣不飢耐老。生山谷。

名醫曰。生武都蜜房木石間。

案。西京雜記云。南越王獻高帝蜜燭二百枚。玉篇云。蠟蜜滓。陶宏景云。白蠟生於蜜中。故謂蜜蠟。說文無蠟字。張有云。臘別蠟。非舊作蠟。今據改。

牡蠣味鹹平。主傷寒寒熱。溫瘧灑灑。驚恚怒氣。除拘緩鼠瘻。女子帶下赤白。久服強骨節。殺邪氣延年。一名蠣蛤。生池澤。

名醫曰。一名牡蛤。生東海。采無時。

案。說文云。蠣蚌屬。似蠔微大。出海中。今民食之。讀若賴。又云。蜃屬有三。皆生於海。蛤屬千歲雀所化。秦謂之牡厲。

龜甲味鹹平。主漏下赤白。破癥瘕。瘵瘧五痔。陰蝕溼痺。四肢重弱。小兒顛不合。久服輕身不飢。一名神屋。生池澤。

名醫曰。生南海及湖水中。采無時。

案廣雅云介龜也。高誘注淮南子龜殼龜甲也。

桑蜚蛸味鹹平。主傷中疝瘕陰痿益精生子。女子血閉腰痛。通五淋。利小便水道。一名蝕臄。生桑枝上。采蒸之。

吳普曰桑蛸條一名蝕臄。一名害焦。一名致。神農鹹無毒。覽御

名醫曰蝕蛸子也。二月三月采火炙。

案說文云蟲蟲蛸也。或作蜚蛸。蝕蛸。蝕蛸子。廣雅云。蝕蛸。烏洩。冒焦。蝕蛸也。爾雅云。不過蝕蛸。其子蜚蛸。郭璞云。一名蝕蛸。蝕蛸卵也。范子計然云。蝕蛸出三輔。上價三百。舊作蝕聲相近。字之誤也。玉篇云。蜚同蝕。

海蛤味苦平。主欬逆上氣。喘息煩滿。胸痛寒熱。一名魁蛤。

吳普曰海蛤神農苦。歧伯甘。扁鵲鹹。大節頭有文。文如磨齒。采無時。

名醫曰生南海。

案說文云蛤蜊屬。海蛤者百歲燕所化。魁蛤一名復鬘。老服翼所化。爾雅云。魁陸。郭璞云本草云。魁狀如海蛤。圓而厚。朴有理縱橫。即今之蚶也。周禮鼈人供蟲。鄭司農云。蟲蛤也。杜子春云。蟲蜚也。周書王會云。東越海蛤。孔鼈云。蛤文蛤。

按、名醫別出海蛤條云。一名魁陸。一名活東。非。

文蛤主惡瘡蝕。御覽作五痔。御覽下有孔出。

名醫曰生東海。表有文采無時。

蠹魚。初學記引。味甘寒。主溼痺面目浮腫。下大水。一名鮰魚。生池澤。

名醫曰生九江。采無時。

案說文云。鱣。鮠也。鮠。鱣也。讀若絳。廣雅云。鱣。鮠。鮠。鮠也。爾雅云。鮠。郭璞云。鮠也。

毛詩云。鮠。鮠傳云。鮠。鮠也。據說文云。鮠。鮠也。與鱣不同。而毛長。郭璞以鮠釋鮠。

與許不合。然初學記引此亦作鮠。蓋二字音同。以致譌舛。不可得詳。廣雅又作

鮠。亦音之譌。又廣志云。豚魚一名鮠。御覽更異解也。又陸璣云。鮠。鮠即鮠魚也。似鮠

狹厚。今京東人猶呼鮠魚。又本草衍義曰。蠹魚。今人謂之黑鯉魚。道家以為頭

有星為厭。據此諸說。若作鮠字。說文所云鮠。廣志以為江豚。本草衍義以為黑

鯉魚。若作鯉字。說文又以為鮠。廣雅以為鮠。陸璣以為鮠魚。說各不同。難以

詳究。

鯉魚膽味苦寒。主目熱赤痛青盲。明目。久服強悍。益志氣。生池澤。

名醫曰。生九江。采無時。

案。說文云。鯉。鱣也。鱣。鯉也。爾雅云。鯉。鱣。舍人云。鯉一名鱣。郭璞注。鯉云。今赤鯉。魚。注。鱣云。大魚似鱣。毛詩云。鱣鮪發發。傳云。鱣。鯉也。據此。知郭璞別為二。非矣。古今注云。兗州人呼赤鯉為赤驥。謂青鯉為青馬。黑鯉為元駒。白鯉為白騏黃。鯉為黃雉。

右。蟲魚上品。一十種。舊同。

藕實莖。味甘平。主補中養神。益氣力。除百疾。久服輕身耐老。不飢延年。一名水芝丹。生池澤。

名醫曰。一名蓮。生汝南。八月采。

案。說文云。藕。夫渠根。蓮。夫渠之實也。茄。夫渠莖。爾雅云。荷。芙渠。郭璞云。別名芙蓉。江東呼荷。又其莖茄。其實蓮。郭璞云。蓮謂房也。又其根藕。

大棗。味甘平。主心腹邪氣。安中養脾。助十二經。平胃氣。通九竅。補少氣。少津液。身中不足。大驚。四肢重。和百藥。久服輕身長年。葉覆麻黃。能令出汗。生平澤。

吳普曰。棗主調中益脾氣。令人好顏色。美志氣。大觀本草引。



名醫曰。一名乾棗。一名美棗。一名夏棗。八月采。生河東暴乾。  
案說文云。棗。羊棗也。爾雅云。遵羊棗。郭璞云。實小而圓紫黑色。今俗呼之爲羊  
矢棗。又洗大棗。郭璞云。今河東猗氏縣出大棗子。如雞卵。  
蒲萄味甘平。主筋骨溼痺。益氣倍力。強志。令人肥健耐飢。忍風寒。久食輕身。不老  
延年。可作酒。生山谷。

名醫曰。生隴西、五原、敦煌。

案史記大宛列傳云。大宛左右以蒲萄爲酒。漢使取其實來。於是天子始種苜  
蓿。蒲萄肥饒地。或疑此本經不合。有蒲萄。名醫所增。當爲黑字。然周禮場人云。  
樹之果。蓀珍異之物。鄭元云。珍異。蒲萄。枇杷之屬。則古中國本有此。大宛種類  
殊常。故漢特取來植之。舊作葡。據史記作蒲。

蓬蘽味酸平。主安五藏。益精氣。長陰令堅。強志倍力。有子。久服輕身不老。一名覆  
盆。生平澤。

吳普曰。缺盆一名決盆。甄氏本草曰。覆蓋子一名馬瘻。一名陸荆。上  
名醫曰。一名陸蘗。一名陰藥。生荆山及冤句。

案、說文云。蔞、木也。莖、缺盆也。廣雅云。蔞、陸英、莓也。爾雅云。莖、蔞、盆。郭璞云。覆盆也。實似莓而小。亦可食。毛詩云。葛藟荒之。陸璣云。一名巨瓜。似燕蕒。亦連莖。葉似艾白色。其子赤。可食。列僊傳云。昌容食蓬蘽根。李當之云。卽是人所食莓。陶宏景曰。蓬蘽是根名。覆盆是實名。

雞頭實、味甘平。主溼痺腰脊剌痛。補中除暴疾。益精氣強志。令耳目聰明。久服輕身不飢耐老神僊。一名雁喙實。生池澤。

名醫曰。一名芡。生雷澤。八月采。

案、說文云。芡、雞頭也。廣雅云。荻、芡、雞頭也。周禮蓬人加蓬之實芡。鄭元云。芡、雞頭也。方言云。荻、芡、雞頭也。北燕謂之荻。青徐淮泗之間謂之芡。南楚江湘之間謂之雞頭。或謂之雁頭。或謂之烏頭。淮南子說山川云。鷄頭已瘦。高誘云。水中芡。幽州謂之雁頭。古今注云。葉似荷而大。葉上感縐如沸。實有芒刺。其中有米。可以度飢。卽今蕎子也。

右、果上品五種。舊六種。今以橘柚入木。

胡麻、味甘平。主傷中虛羸。補五內。御覽作藟益氣力。長肌肉。填髓腦。久服輕身不老。一

名巨勝。葉名青蘘。生川澤。

吳普曰。胡麻一名方金。神農、雷公、甘無毒。一名狗蝨。立秋采。

名醫曰。一名狗蝨。一名方莖。一名鴻藏。生上黨。

案廣雅云。狗蝨、巨勝、藤藎、胡麻也。孝經援神契云。鉅勝延年。宋均云。世以鉅勝爲苟杞子。陶宏景云。本生大宛。故曰胡麻。按本經已有此。陶說非也。且與麻黃並列。胡之言大。或以葉大於麻故名之。

麻黃味辛平。主五勞七傷。利五藏下血寒氣。多食令人見鬼狂走。久服通神明輕身。一名麻勃。麻子味甘平。主補中益氣。肥健不老。神僊生川谷。

吳普曰。麻子中仁。神農、歧伯、辛。雷公、扁鵲、無毒。不欲牡厲。白薇。先藏池中者。食殺人。麻藍一名麻黃。一名青欲。一名青葛。神農、辛。歧伯、有毒。雷公、甘。畏牡厲。白薇。葉上有毒。食殺人。麻勃一名麻花。雷公、辛。無毒。畏牡厲。

名醫曰。麻勃、此麻花上勃勃者。七月七日采。良。子九月采。生太山。

案說文云。麻與林同。人所治在屋下。臬、麻也。臬、臬實也。或作臬葶。麻母也。莫、芋也。以黃爲襍。香草。爾雅云。臬、臬實。臬、麻。孫炎云。臬、麻子也。郭璞云。別二名。又芋。

麻母。郭璞云。苴麻盛子者。周禮籩朝事之。籩其實麤麤。鄭云。麤。泉實也。鄭司農云。麻實曰麤。淮南子齊俗訓云。胡人見麤不知其可以爲布。高誘云。麤。麻實也。據此則宏景以爲牡麻無實。非也。唐本以爲麻實是。

右米穀上品二種。舊三種。今以青蘘入草。

冬葵子。味甘寒。主五藏六府寒熱。羸瘦五癰。利小便。久服堅骨長肌肉。輕身延年。

名醫曰。生少室山。十二月采之。

案說文云。𦵏。古文終葵菜也。廣雅云。𦵏。葵也。攷𦵏與終形相近。當卽爾雅蔞葵。爾雅云。蔞葵繁露。郭璞云。承露也。大莖小葉。華紫黃色。本草圖經云。吳人呼爲繁露。俗呼胡燕支子。可婦人塗面。及作口脂。按名醫別有落葵條。一名繁露。亦非也。陶宏景以爲終冬至春作子。謂之冬葵。不經甚矣。蔞實。味甘寒。主青盲明目。除邪。利大小便。去寒熱。久服益氣力。不飢輕身。一名馬蔞。

名醫曰。一名蔞實。生淮陽及田中。葉如藍。十一月采。案說文云。蔞。蔞菜也。爾雅云。蔞。赤蔞。郭璞云。今蔞菜之赤莖者。李當之云。蔞實。



當是今白莧。唐本注云。赤莧。一名藎。今名莫。實字誤。

瓜蒂味苦寒。主大水身面四肢浮腫。下水殺蠱毒。欬逆上氣。及食諸果病在胸腹中。皆吐下之。生平澤。

名醫曰。生嵩高。七月七日采陰乾。

案。說文云。瓜。瓠也。象形。蒂。瓜當也。廣雅云。水芝。瓜也。陶宏景云。甜瓜蒂也。

瓜子味甘平。主令人悅澤好顏色。益氣不飢。久服輕身耐老。一名水芝。御覽作土芝生平澤。

吳普曰。瓜子一名辦。七月七日采。可作面脂。

名醫曰。一名白瓜子。生嵩高。冬瓜仁也。八月采。

案。說文云。辦。瓜中實。廣雅云。冬瓜。瓠也。其子謂之輶。陶宏景云。白當爲甘。舊有

白字。據名醫云。一名白瓜子。則本名當無。

苦菜。味苦寒。主五藏邪氣。厭穀胃痺。久服安心益氣。聰察少臥。輕身耐老。一名荼。草。一名選。生川谷。

名醫曰。一名游冬。生益州山陵道旁。凌冬不死。三月三日采陰乾。

案。說文云。茶。苦菜也。廣雅云。游冬苦菜也。爾雅云。茶。苦菜。又檟苦茶。郭璞云。樹小如梔子。冬生葉可煮作羹。今呼早采者爲茶。晚取者爲茗。一名荈。蜀人名之苦菜。陶宏景云。此卽是今茗。茗一名茶。又令人不眠。亦凌冬不凋。而兼其止生益州。唐本注駁之非矣。選與荈音相近。右茶上品五種舊同。

# 神農本草經

魏 吳 普等述  
清 陽湖 孫 星 衍 同 輯  
清 建德 周 學 海 校 正  
鄞縣 曹 炳 章 圈 點

## 卷二 中經

中藥一百二十種爲臣。主養性以應人。無毒有毒。斟酌其宜。欲遏病補羸者本中經。

雄黃	石硫黃	雌黃	水銀	石膏	慈石
凝水石	陽起石	孔公孽	殷孽	鐵精落	理石
長石	膚青				

右、玉石中品十四種。舊十六種。

乾薑 象耳實 葛根 括樓 苦參 當歸

麻黃 通草 芍藥 蠱實 瞿麥 元參

秦艽 百合 知母 貝母 白芷 淫羊藿

黃芩 狗脊 石龍芮 茅根 紫苑 紫草

敗醬 白鮮皮 酸醬 紫參 橐本 石韋

葶藶 白薇 水萍 王瓜 地榆 海藻

澤蘭 防己 款冬華 牡丹 馬先蒿 積雪草

女苑 王孫 蜀羊泉 爵床 假蘇 翹根

右、草中品四十九種。舊四十六種。

桑根白皮 竹葉 吳茱萸 卮子 蕪荑 枳實

厚朴 秦皮 秦朮 山茱萸 紫葳 猪苓

白棘 龍眼 松蘿 衛矛 合歡

右、木中品一十七種。舊同。

白馬莖 鹿茸 牛角鯁 殺羊角 狗陰莖 麝羊角

犀角

右、獸中品七種。舊同。

燕屎 天鼠屎

右、禽中品二種。舊三種。

蝟皮 露蜂房 鼈甲

烏賊魚骨 白僵蠶 鮐魚甲

木 蟲 蜚 蟲 蜚 廉

右、蟲魚中品一十七種。舊十六種。

梅實

右、果中品一種。舊同。

大豆黃卷 赤小豆 粟米 黍米

右、米穀中品三種。舊二種。

藜實 慈實 薏 水蘇

右、菜中品三種。舊同。

蟹 枰 蟬 蟻 螬

樗 雞 活 螭 石龍子

廣 蟲 伏 翼



雄黃、味苦平寒。主寒熱鼠瘻惡創。疽痔死肌。殺精物惡鬼邪氣百蟲毒。勝五兵。鍊食之輕身神僊。一名黃食石。生山谷。

吳普曰。雄黃神農苦。山陰有丹。雄黃生山之陽。故曰雄。是丹之雄。所以名雄黃。名醫曰。生武都敦煌山之陽。采無時。

案西山經云。高山其下多雄黃。郭璞云。晉太興三年。高平郡界有山崩。其中出數千斤雄黃。抱朴子僊藥篇云。雄黃當得武都山所出者。純而無雜。其赤如雞冠。光明曄曄。乃可用耳。其但純黃似雌黃色。無赤光者。不任以作仙藥。可以合理病藥耳。

石流黃。流舊作硫。御覽引作流。是味酸溫。主婦人陰蝕。疽痔惡血。堅筋骨。除頭禿。能化金銀銅

鐵奇物。御覽引云。石流赤生羌道山谷。益肝。生山谷。

吳普曰。硫黃一名石留黃。神農黃帝。雷公。鹹有毒。醫和。扁鵲。苦無毒。或生易陽。

或河西。或五色黃。是潘水石液也。潘御藥。古字。燒令有紫燄者。八月九月采。治婦人

血結。御覽云。治婦人絕。陰能合金銀銅鐵。

名醫曰。生東海牧羊山及太山河西山。礬石液也。

案、范子計然云。石流黃出漢中。又云。劉馮餌石流黃而更少。劉逵注吳都賦云。流黃、土精也。

雌黃、味辛平。主惡創頭禿痂疥。殺毒蟲。蝨身痒邪氣諸毒。鍊之久服輕身。增年不老。生山谷。

名醫曰。生武都。與雄黃同山生。其陰山有金。金精熏則生雌黃。采無時。

水銀、味辛寒。主疥癰痂瘍白禿。殺皮膚中蝨。墮胎除熱。殺金銀銅錫毒。鎔化還復爲丹。久服神仙不死。生平土。

名醫曰。一名汞。生符陵。出於丹砂。

案、說文云。頌、丹砂所化爲水銀也。廣雅云。水銀謂之汞。淮南子地形訓云。白礬九百歲生白頌。白頌九百歲生白金。高誘云。白頌、水銀也。

石膏、味辛微寒。主中風寒熱。心下逆氣驚喘。口乾舌焦不能息。腹中堅痛。除邪鬼產乳。金創。生山谷。

名醫曰。一名細石。生齊山及齊廬山、魯蒙山。采無時。

慈石、味辛寒。主周痺風溼。肢節中痛不可持物。洗洗酸消。除大熱煩滿及耳聾。一

名元石。生山谷。

吳普曰。慈石一名磁君。

名醫曰。一名處石。生太山及慈山。山陰有鐵處則生其陽。采無時。

案北山經云。瀘題之山其中多磁石。郭璞云。可以取鐵。管子地數篇云。山上有慈石者。下必有銅。呂氏春秋精通篇云。慈石召鐵。淮南子說山訓云。慈石能引鐵。只作慈。舊作磁。非。名醫別出元石條。亦非。

凝水石。味辛寒。主身熱腹中積聚邪氣。皮中如火燒煩滿。水飲之。久服不飢。一名白水石。生山谷。

吳普曰。神農辛。歧伯。醫和。扁鵲。甘無毒。李氏。大寒。或生邯鄲。采無時。如雲母色。  
御覽引云一名寒水石

名醫曰。一名寒水石。一名凌水石。鹽之精也。生常山。又中水縣及邯鄲。

案。范子計然云。凝水石出河東。色澤者善。

陽起石。味鹹微溫。主崩中漏下。破子臧中血。癥瘕結氣。寒熱腹痛無子。陰痿不起。  
御覽引作補不足。御覽二字有一名白石。生山谷。

吳普曰。陽起石。神農、扁鵲、酸無毒。桐君、雷公、歧伯、鹹無毒。李氏、小寒。或生太山。  
御覽引云。或陽起山。采無時。

名醫曰。一名石生。一名羊起石。雲母根也。生齊山及琅邪。或雲山、陽起山。采無時。

孔公孽。味辛溫。主傷食不化。邪結氣惡。創疽癰痔。利九竅。下乳汁。御覽引云。一名黑生山谷。

吳普曰。孔公孽。神農、辛。歧伯、鹹。扁鵲、酸無毒。色青黃。

名醫曰。一名通石。殷孽根也。青黃色。生梁山。

殷孽。味辛溫。主爛傷。瘀血洩利。寒熱。鼠瘻。癰疽。結氣。一名薑石。生山谷。按此當與一條。

名醫曰。鍾乳根也。生趙國。又梁山及南海。采無時。

鐵精。平。主明目。化銅。鐵落。味辛平。主風熱。惡創。瘍疽。創痂。疥氣。在皮膚中。鐵。主堅肌耐痛。生平澤。舊為三條。今并。

名醫曰。鐵落。一名鐵液。可以染皂。生牧羊及枋城或析城。采無時。

案、說文云。鐵、黑金也。

理石、味辛寒。主身熱、利胃解煩。益精明目。破積聚。去三蟲。一名立制石。生山谷。

名醫曰。一名肌石。如石膏。順理而細。生漢中及廬山。采無時。

長石、味辛寒。主身熱、四肢寒厥。利小便。通血脈。明目去翳眇。下三蟲。殺蠱毒。久服不飢。一名方石。生山谷。

吳普曰。長石一名方石。一名直石。生長子山谷。如馬齒。潤澤玉色。長鮮。服之不飢。御覽

名醫曰。一名土石。一名直石。理如馬齒。方而潤澤。玉色。生長子山及太山臨淄。采無時。

膚青、味辛平。主蠱毒及蛇菜肉諸毒惡創。生川谷。

名醫曰。一名推青。一名推石。生益州。

案、陶宏景云。俗方及僊經並無用此者。亦相與不復識。

右、玉石中品一十四種。舊十六種。攷鐵落鐵宜與鐵精爲一。

乾薑、味辛溫。主胸滿欬逆上氣。溫中止血。出汗逐風。溼痺腸澼下利。生者尤良。久



服去臭氣。通神明。生川谷。

名醫曰。生犍爲及荊州揚州。九月采。

案。說文云。薑御溼之菜也。廣雅云。蔞廉。薑也。呂氏春秋本味篇云。和之美者。陽樸之薑。高誘注。陽樸地名。在蜀郡。司馬相如上林賦有茝薑云云。

梟耳實。味甘溫。主風頭寒痛。風溼周痺。四肢拘攣痛。惡肉死肌。久服益氣。耳目聰明。強志輕身。一名胡梟。一名地葵。生川谷。

名醫曰。一名菴。一名常思。生安陸及六安田野。實熟時采。

案。說文云。菴。卷耳也。苓。卷耳也。廣雅云。苓耳。菴。常梟。胡梟。梟耳也。爾雅云。菴耳。苓耳。郭璞云。江東呼爲常梟。形似鼠耳。叢生如盤。毛詩云。采采卷耳。傳云。卷耳。苓耳也。陸璣云。葉青白色。似胡荽。白花細莖。蔓生。可煮爲茹。滑而少味。四月中生子。正如婦人耳瑱。今或謂之耳瑱艸。鄭康成謂是白胡荽。幽州人謂之爵耳。淮南子覽冥訓云。位賤尙梟。高誘云。梟者菴耳。菜名也。幽冀謂之檀菜。雒下謂之胡梟。

葛根。味甘平。主消渴。身大熱。嘔吐諸痺。起陰氣。解諸毒。葛穀主下利。十歲已上。一

名鷄齊根。生川谷。

吳普曰。葛根。神農甘。生太山。

名醫曰。一名鹿藿。一名黃斤。生汶山。五月采根暴乾。

括樓根。味苦寒。主消渴身熱。煩滿大熱。補虛安中。續絕傷。一名地樓。生川谷及山陰。

吳普曰。括樓一名澤耳。一名澤姑。見御覽

名醫曰。一名果臝。一名天瓜。一名澤姑。實名黃瓜。二月八月采根暴乾。三十日成。生宏農。

案說文云。蓂蓂。蓂果臝也。廣雅云。王白蓂也。當爲王蓂爾雅云。果臝之實括樓。郭璞云。今齊人呼之爲天瓜。毛詩云。果臝之實。亦施于宇。傳云。果臝括樓也。呂氏春秋云。王善生。高誘云。善或作瓜。瓠瓠也。按呂氏春秋善字。乃蓂之誤。

苦參。味苦寒。主心腹結氣。癥瘕積聚。黃疸。溺有餘瀝。逐水除癰腫。補中明目止淚。一名水槐。一名苦蕒。生山谷及田野。

名醫曰。一名地槐。一名菟槐。一名驕槐。一名白莖。一名虎麻。一名岑莖。一名祿

田。一名陵朗。生汝南。三月八月十月采根暴乾。

當歸味甘溫。主欬逆上氣。溫瘧寒熱。洗在皮膚中。大觀本洗音辭婦人漏下絕子。諸惡創

瘍金創。煮飲之。一名乾歸。生川谷。

吳普曰。當歸神農、黃帝、桐君、扁鵲、甘無毒。岐伯、雷公、辛無毒。李氏、小溫。或生羌胡地。

名醫曰。生隴西。二月八月采根陰乾。

案廣雅云。山斬當歸也。爾雅云。薛山斬。郭璞云。今似斬而龐大。又薛白斬。郭璞云。卽上山斬。苑子計然云。當歸出隴西。無枯者善。

麻黃味苦溫。主中風傷寒。頭痛溫瘧。發表出汗。去邪熱氣。止欬逆上氣。除寒熱。破癥堅積聚。一名龍沙。

吳普曰。麻黃一名卑相。一名卑監。神農、雷公、苦無毒。扁鵲、酸無毒。李氏、平。或生河東。四月立秋采。御覽

名醫曰。一名卑相。一名卑鹽。生晉地及河東。立秋采莖陰乾令青。案廣雅云。龍沙麻黃也。麻黃莖狗骨也。苑子計然云。麻黃出漢中三輔。

通草。御覽作味辛平。主去惡蟲。除脾胃寒熱。通利九竅血脈關節。令人不忘。一名附支。生山谷。

吳普曰。通草一名丁翁。一名附支。神農、黃帝、辛。雷公、苦。生石城山谷。葉菁蔓延。生汁白。正月采。御覽

名醫曰。一名丁翁。生石城及山陽。正月采枝陰乾。

案廣雅云。附支。通草也。中山經云。升山其草多寇脫。郭璞云。寇脫草生南方。高丈許。似荷葉而莖中有瓢。正白。零陸人植而日灌之。以爲樹也。爾雅云。離南活莧。郭璞注同。又倚商活脫。郭璞云。即離南也。范子計然云。通草出三輔。

芍藥。味苦平。主邪氣腹痛。除血痺。破堅積。寒熱疝瘕止痛。利小便。益氣。藏文類聚本作黑字。觀生川谷及邱陵。

吳普曰。芍藥。神農、苦。桐君、甘。無毒。岐伯、鹹。李氏、小寒。雷公、酸。一名甘積。一名解倉。一名誕。一名餘容。一名白朮。三月三日采。名醫曰。一名白朮。一名餘容。一名犁食。一名解食。一名誕。生中岳。二月八月采。根暴乾。

案、廣雅云。欒夷、芍藥也。白朮、牡丹也。北山經云。繡山其草多芍藥。郭璞云。芍藥一名辛夷。亦香草屬。毛詩云。贈之以芍藥。傳云。芍藥香草。范子計然云。芍藥出三輔。崔豹古今注云。芍藥有二種。有草芍藥。有木芍藥。木者。花大而色深。俗呼爲牡丹。非也。又云。一名可離。

蟲實味甘平。主皮膚寒熱。胃中熱氣。風寒溼痺。堅筋骨。令人嗜食。久服輕身。花葉去白蟲。一名劇草。一名三堅。一名豕首。生川谷。

吳普曰。蟲實一名劇草。一名三堅。一名劇荔花。御一名澤藍。一名豕首。神農、黃帝甘辛無毒。生宛句。五月采。上同

名醫曰。一名荔實。生河東。五月采。實陰乾。

案、說文云。荔。草也。似蒲而小。根可作刷。廣雅云。馬薺。荔也。月令云。仲冬之月。荔挺出。鄭云。荔挺。馬薺也。高誘注。淮南子云。荔馬。荔草也。通俗文云。一名馬蘭。顏之推云。此物河北平澤率生之。江東頗多種於階庭。但呼爲旱蒲。故不識馬薺。瞿麥味苦寒。主關格諸癰結。小便不通。出刺決癰腫。明目去翳。破胎墮子。下閉血。一名巨句麥。生川谷。



名醫曰。一名大菊。一名大蘭。生大山。立秋采實陰乾。

案說文云。蘧蘧麥也。菊大菊蘧麥。廣雅云。茈威陵茗蘧麥也。爾雅云。大菊蘧麥。

郭璞云。一名麥句薑。卽瞿麥。陶宏景云。子頗似麥。故名瞿麥。

元參。味苦微寒。主腹中寒熱積聚。女子產乳餘疾。補腎氣。令人目明。一名重台。生川谷。

吳普曰。元參一名鬼藏。一名正馬。一名重臺。一名鹿腹。一名端。一名元臺。神農。

桐君。黃帝。雷公。扁鵲。苦無毒。歧伯。鍼。李氏。寒。或生冤胸山陽。二月生葉如梅毛。

四四相值似芍藥。黑莖方高四五尺。花赤生枝間。四月實黑。

御覽

名醫曰。一名元臺。一名鹿腸。一名正馬。一名端。生河間及冤句。三月四

月采根暴乾。

案廣雅云。鹿腸元參也。范子計然云。元參出三輔。青色者善。

秦艸。味苦平。主寒熱邪氣。寒溼風痺。肢節痛。下水利小便。生山谷。

名醫曰。生飛鳥山。二月八月采根暴乾。

案說文云。葍草之相耳者。玉篇作葍。居包切。云秦艸藥。凡同。蕭炳云。本經名秦

瓜。然則今本經名。亦有名醫改之者。

百合味甘平。主邪氣腹張心痛。利大小便。補中益氣。生川谷。

吳普曰。百合一名重邁。一名中庭。生冤胸及荆山。藏文類聚引

名醫曰。一名重箱。一名摩羅。一名中逢花。一名強瞿。生荊州。二月八月采根暴

乾。

案。玉篇云。蠡。百合蒜也。

知母味苦寒。主消渴熱中。除邪氣。肢體浮腫。下水補不足。益氣。一名蜆母。一名連母。一名野蓼。一名地參。一名水參。一名水浚。一名貨母。一名蜆母。生川谷。

吳普曰。知母。神農桐君無毒。補不足益氣。御覽引云

名醫曰。一名女雷。一名女理。一名兒草。一名鹿列。一名韭逢。一名兒躑草。一名

東根。一名水須。一名沈燔。一名薺。生河內。二月八月采根暴乾。

案。說文云。芪。芪母也。薺。荒薺也。或从父作薺。廣雅云。芪母。兒躑東根也。爾雅云。

薺。薺薺。郭璞云。生山上。葉如韭。一曰蜆母。范子計然云。蜆母出三輔。黃白者善。

玉篇作薺母。

貝母。味辛平。主傷寒煩熱。淋瀝邪氣。疝瘕喉痺。乳難。金創風瘰。一名空草。

名醫曰。一名藥實。一名苦花。一名苦菜。一名商商字草。一名勤母。生晉地。十月采根暴乾。

案。說文云。苧。貝母也。廣雅云。貝父。藥實也。爾雅云。苧。貝母。郭璞云。根如小貝。圓而白花。葉似韭。毛詩云。言采其蟲。傳云。蟲。貝母也。陸璣云。其葉如括蕒而細小。其子在根下。如芋子正白。四方連累相著。有分解也。

白芷。味辛溫。主女人漏下赤白。血閉陰腫。寒熱風頭。侵目淚出。長肌膚潤澤。可作面脂。一名芳香。生川谷。

吳普曰。白芷一名蠶。一名苻離。一名澤芬。一名曉。御覽

名醫曰。一名白芷。一名蠶。一名莞。一名苻離。一名澤芬。葉一名蒿麻。可作浴湯。生河東下澤。二月八月采根暴乾。

案。說文云。芷。蠶也。蠶。楚謂之離。晉謂之蠶。齊謂之芷。廣雅云。白芷其葉謂之葍。西山經云。號山其草多葍。郭璞云。葍。白芷別名。蠶。香草也。淮南子修務訓云。身苦秋葍被風。高誘云。葍。白芷。香草也。王逸注楚詞云。藥。白芷。按。名醫一名莞。

云云。似卽爾雅莞苻離其上鬲。而說文別有曉。夫離也。菡夫離上也。是非一草。舍人云。白蒲一名苻離。楚謂之莞。豈蒲與菡相似。而名醫誤合爲一乎。或說文云。楚謂之離。卽夫離也。未可得詳。舊作芷。非。

淫羊藿。味辛寒。主陰痿絕傷。莖中痛。利小便。益氣力。強志。一名剛前。生山谷。

吳普曰。淫羊藿。神農。雷公。辛。李氏。小寒。堅骨。覽御

名醫曰。生上郡陽山。

黃芩。味苦平。主諸熱黃疸。腸澼洩利。逐水下血。閉惡創疽蝕火瘍。一名腐腸。生川谷。

吳普曰。黃芩一名黃文。一名妒婦。一名虹勝。一名經芩。一名印頭。一名內虛。神農。桐君。黃帝。雷公。扁鵲。苦無毒。李氏。小溫。二月生。赤黃葉。兩兩四四相值。莖空中。或方圓。高三四尺。四月花紫紅赤。五月實黑。根黃。二月至九月采。覽御

名醫曰。一名空腸。一名內虛。一名黃文。一名經芩。一名妒婦。生秣歸及冤句。三

月三日采根陰乾。

案說文云。荃。黃荃也。廣雅云。菡。黃文。內虛。黃芩也。范子計然云。黃芩出三輔。

色黃者善。

狗脊。味苦平。主腰背強。關機緩急。周痺。寒溼。郛痛。頗利老人。一名百枝。生川谷。

吳普曰。狗脊一名狗青。一名赤節。神農。苦。桐君。黃帝。岐伯。雷公。扁鵲。甘。無毒。李氏。小溫。如草薺。莖節如竹。有刺。葉圓。赤。根黃白。亦如竹根。毛有刺。岐伯經云。莖長節。葉端員。青赤。皮白。有赤脈。

名醫曰。一名強脊。一名扶蓋。一名扶筋。生常山。二月八月采根。暴乾。

案。廣雅云。接絜。狗脊也。玉篇云。接。莖。狗脊根也。名醫別出接。契條。非。

石龍芮。味苦平。主風寒溼痺。心腹邪氣。利關節。止煩滿。久服輕身。明目不老。一名魯果能。御覽作食果。一名地樅。生川澤石邊。

吳普曰。龍芮一名薑苔。一名天豆。神農。苦平。岐伯。酸。扁鵲。李氏。大寒。雷公。鹹。無毒。五月五日采。

名醫曰。一名石能。一名彭根。一名天豆。生太山。五月五日采子。二月八月采皮。陰乾。

案。范子計然云。石龍芮。出三輔。色黃者善。



茅根味甘寒。主勞傷虛羸。補中益氣。除瘀血。血閉寒熱。利小便。其苗主下水。一名蘭根。一名茹根。生山谷田野。

名醫曰。一名地管。一名地筋。一名兼杜。生楚地。六月采根。

案。說文云。茅。菅也。菅。茅也。廣雅云。菅。茅也。爾雅云。白華。野菅。郭璞云。菅。茅屬。詩云。白華。菅兮。白茅束兮。傳云。白華。野菅也。已漚為菅。

紫苑味苦溫。主欬逆上氣。胸中寒熱結氣。去蠱毒瘰癧。安五藏。生山谷。

吳普曰。紫苑一名青苑。

名醫曰。一名紫菀。一名青苑。生房陵及真定邯鄲。二月三月采根陰乾。

案。說文云。苑。茹苑。出漢中房陵。陶宏景云。白者名白苑。唐本注云。白苑即女苑也。

紫草味苦寒。主心腹邪氣五疸。補中益氣。利九竅。通水道。一名紫丹。一名紫芙。引云一名地血。大觀本無文。生山谷。

吳普曰。紫草節赤。二月花。

名醫曰。生礪山及楚地。三月采根陰乾。

案、說文云。苳草也。藐苳草也。蔞草也。可以染留黃。廣雅云。苳蔞、苳草也。山海經云。勞山多苳草。郭璞云。一名紫蔞。中染紫也。爾雅云。藐苳草。郭璞云。可以染紫。敗醬味苦平。主暴熱火創赤氣。疥搔疽痔。馬鞍熱氣。一名鹿腸。生川谷。

名醫曰。一名鹿首。一名馬草。一名澤敗。生江夏。八月采根暴乾。

案、范子計然云。敗醬出三輔。陶宏景云。氣如敗醬。故以爲名。

白鮮味苦寒。主頭風黃疸。欬逆淋瀝。女子陰中腫痛。溼痺死肌。不可屈伸。起止行步。生川谷。

名醫曰。生上谷及冤句。四月五月采根陰乾。

案、陶宏景云。俗呼爲白羊鮮。氣息正似羊羶。或名白羶。

酸醬味酸平。主熱煩滿。定志益氣。利水道產難。吞其實立產。一名醋醬。生川澤。

吳普曰。酸醬一名酢醬。覽御

名醫曰。生荆楚及人家田園中。五月采陰乾。

案、爾雅云。葍寒醬。郭璞云。今酸醬草。江東呼曰苦葍。

紫參味苦辛寒。主心腹積聚。寒熱邪氣。通九竅。利大小便。一名牡蒙。生山谷。

吳普曰。伏蒙一名紫參。一名泉戎。一名音腹。一名伏菟。一名重傷。神農、黃帝、苦。李氏小寒。生河西山谷。或宛句。商山。圓聚生根。黃赤有文。皮黑中紫。五月花紫。赤實黑大如豆。三月采根。御覽大觀本節文

名醫曰。一名衆戎。一名童腸。一名馬行。生河西及宛句。三月采根。火炙使紫色。案。范子計然云。紫參出三輔。赤青色者善。

藁本。味辛溫。主婦人疝瘕。陰中寒腫痛。腹中急。除風頭痛。長肌膚。說顏色。一名鬼卿。一名地新生山谷。

名醫曰。一名微莖。生崇山。正月二月采根暴乾。三十日成。

案。廣雅云。山茝蔚香。藁本也。管子地員篇云。五臭疇生藁本。荀子大略篇云。蘭茝藁本。漸于蜜醴。一佩易之。樊光注爾雅云。藁本一名麋蕪。根名蘄芷。舊作藁非。

石韋。味苦平。主勞熱邪氣。五癰閉不通。利小便水道。一名石韠。生山谷石上。

名醫曰。一名石皮。生華陰山谷。不聞水及人聲者良。二月采葉陰乾。

葶藶。味苦平。主腰背痛。強骨節。風寒溼周痺。惡創不瘳。熱氣。生山谷。

名醫曰。一名赤節。生真定。八月采根暴乾。

案博物志云。接莢與草薺相亂。

白薇。味苦平。主暴中風。身熱肢滿。忽忽不知。人狂惑邪氣。寒熱酸疼。溫瘧洗洗。發作有時。生川谷。

名醫曰。一名白幕。一名微草。一名春草。一名骨美。生平原。三月三日采根陰乾。

水萍。味辛寒。主暴熱身痒。載文類聚初學記作癢此是下水氣。勝酒長須髮。載文類聚作烏類聚消渴。久

服輕身。一名水華。載文類聚引生池澤。

吳普曰。水萍一名水廉。生澤水上。葉圓小。一莖一葉。根入水。五月華白。三月采

日乾。御覽

名醫曰。一名水白。一名水蘇。生雷澤。三月采暴乾。

案說文云。萍。萍也。無根浮水而生者。萍。萍也。蕒。大萍也。廣雅云。藻。萍也。夏小正

云。七月湟潦生萍。爾雅云。萍萍。郭璞云。水中浮萍。江東謂之藻。又其大者蘋。毛

詩云。于以采蘋。傳云。蘋。大萍也。范子計然曰。水萍出三輔。色青者善。淮南子原

道訓云。萍樹根於水。高誘云。萍。大蘋也。

王瓜。味苦寒。主消渴內痺。瘀血月閉。寒熱酸疼。益氣愈聾。一名土瓜。生平澤。

名醫曰。生魯地田野及人家垣牆間。三月采根陰乾。

案。說文云。蕒。王蕒也。廣雅云。葵菇。瓜瓠。王瓜也。夏小正云。四月王蕒秀。爾雅云。鉤蕒菇。郭璞云。鉤瓠也。一名王瓜。實如瓠瓜。正赤。味苦。月令王瓜生。鄭元云。月令云。王蕒生。孔穎達云。疑王蕒則王瓜也。管子地員篇。剽土之次。曰五沙。其種大蕒。細蕒。白莖青秀。以蕒。本草圖經云。大蕒。卽王蕒也。坊亦謂之土瓜。自別是一物。

地榆。味苦微寒。主婦人乳癰痛。七傷帶下。病止痛。除惡肉。止汗。療金創。御覽引云。酒作黑字。而無本。草消。生山谷。

名醫曰。生桐柏及冤句。二月八月采根暴乾。

案。廣雅云。菑陳。地榆也。陶宏景云。葉似榆而長。初生布地。而花子紫黑色如豉。故名玉豉。

海藻。味苦寒。主癰瘤氣頸下核。破散結氣。癰腫癥瘕。堅氣。腹中上下鳴。下十二水。腫。一名落首。生池澤。



名醫曰。一名薄。生東海。七月七日采暴乾。

案說文云。薄。水草也。或作藻。廣雅云。海蘿。海藻也。爾雅云。薄。海薄也。郭璞云。藥

草也。一名海蘿。如亂髮。生海中。本草云。又薄。石衣。郭璞云。水苔也。一名石髮。江

東食之。或曰薄葉。似籬而大。生水底也。亦可食。

澤蘭。味苦微溫。主乳婦內衄。御覽作中風餘疾。大腹水腫。身面四肢浮腫。骨節中

水。金創癰腫。創膿。一名虎蘭。一名龍棗。生大澤傍。

吳普曰。澤蘭。一名水香。神農。黃帝。岐伯。桐君。酸無毒。李氏。溫。生下地。水傍。葉如

蘭。二月生香。赤節。四葉相值。枝節間。

名醫曰。一名虎蒲。生汝南。三月三日采陰乾。

案廣雅云。虎蘭。澤蘭也。

防己。味辛平。主風寒溫瘧。熱氣諸癰。除邪利大小便。一名解離。御覽作石解。引云

觀本六生川谷。

吳普曰。木防己。一名解離。一名解燕。神農。辛。黃帝。岐伯。桐君。苦無毒。李氏。大寒。

如芳莖蔓延如茺。白根外黃似桔梗。內黑又如車輻解。二月八月十月采根。御覽

名醫曰。生漢中。二月八月采根陰乾。

案。范子計然云。防己出漢中旬陽。

款冬花。味辛溫。主欬逆上氣。善喘喉痹。諸驚癇。寒熱邪氣。一名橐吾。御覽一作石一名顆冬。顆冬。作一名虎須。一名兔奚。生山谷。

吳普曰。款冬十二月花黃白。類聚文

名醫曰。一名氏冬。生常山。及上黨水傍。十一月采花陰乾。

案。廣雅云。苦萃。款凍也。爾雅云。菟奚。顆凍。郭璞云。款冬也。紫赤華。生水中。西京

雜記云。款冬花于嚴冬。傅咸款冬賦序曰。仲冬之月。冰凌積雪。款冬獨敷。華豔。

牡丹。味辛寒。主寒熱中風。瘕瘕。驚癇邪氣。除癥堅。瘀血。留舍腸胃。安五藏。療癰。創。一名鹿韭。一名鼠姑。生山谷。

吳普曰。牡丹。神農。歧伯。辛。李氏。小寒。雷公。桐君。苦無毒。黃帝。苦有毒。葉如蓬相。值根如柏。黑中有核。二月采。八月采。暴乾。人食之。輕身益壽。

名醫曰。生巴郡及漢中。二月八月采根陰乾。

案。廣雅云。白茱。牡丹也。范子計然云。牡丹出漢中。河內。赤色者亦善。

馬先蒿。味平。主寒熱鬼注。中風溼痺。女子帶下病無子。一名馬屎蒿。生川澤。

名醫曰。生南陽。

案。說文云。蔚。牡蒿也。廣雅云。因塵。馬先也。爾雅云。蔚。牡蒿。郭璞云。無子者。毛詩云。匪莪伊蔚。傳云。蔚。牡蒿也。陸璣云。三月始生。七月華。華似胡麻華而紫赤。八月爲角。角似小豆。角銳而長。一名馬新蒿。按。新。先聲相近。積雪草。味苦寒。主大熱惡創。癰疽浸淫赤爛。皮膚赤身熱。生川谷。

名醫曰。生荊州。

案。陶宏景云。荊楚人以葉如錢。謂爲地錢草。徐儀藥圖名連錢草。本草圖經云。咸洛二京亦有。或名胡薄荷。

女莞。御覽作苑味辛溫。主風洗洗。霍亂洩利。腸鳴上下無常處。驚癇寒熱百疾。生川谷或山陽。

吳普曰。女莞一名白莞。一名織女莞。御覽

名醫曰。一名白苑。一名織女苑。一名荈。生漢中。正月二月采陰乾。案。廣雅云。女腸。女苑也。

王孫。味苦平。主五藏邪氣。寒溼痺。四肢疼酸。鄒冷痛。生川谷。

吳普曰。黃孫一名王孫。一名蔓延。一名公草。一名海孫。神農、雷公、苦無毒。黃帝、

甘無毒。生西海山谷。及汝南城郭垣下。蔓延赤文。莖葉相當。覽御

名醫曰。吳名白功草。楚名王孫。齊名長孫。一名黃孫。一名黃昏。一名海孫。一名

蔓延。生海西及汝南城郭下。

案。陶宏景云。今方家皆呼黃昏。又云牡蒙。

蜀羊泉。味苦微寒。主頭禿惡創。熱氣。疥搔。痂癬。蟲療。齩齒。生川谷。

名醫曰。一名羊泉。一名羊飴。生蜀郡。

案。廣雅云。漆姑。艾但。鹿何。澤鞠也。唐本注云。此草一名漆姑。

爵牀。味鹹寒。主腰脊痛。不得著牀。俛仰艱難。除熱。可作浴湯。生川谷及田野。

吳普曰。爵牀一名爵卿。覽御

名醫曰。生漢中。

案。別本注云。今人名爲香蘇。

假蘇。味辛溫。主寒熱鼠瘻。癰癰生創。破結聚氣。下瘀血。除溼痺。一名鼠黃。生川澤。

舊在菜部今移

吳普曰。假蘇一名鼠實。一名薑芥。御覽一名荆芥。葉似落黎而細。蜀中生噉之。本

注名醫曰。一名薑芥。生漢中。

案陶宏景云。即荆芥也。薑荆聲譌耳。先居草部中。今人食之。錄在菜部中也。

翹根味甘寒平。御覽作主下熱氣。益陰精。令人面說好明目。久服輕身耐老。生平

澤。舊在唐本退中今移

吳普曰。翹根。神農、雷公、甘有毒。三月八月采。以作蒸飲酒病人。

名醫曰。生嵩高。二月八月采。

案陶宏景云。方藥不復用。俗無識者。

右草中品四十九種。舊四十六種。攷菜部假蘇及唐本退中翹根宜入此。

桑根白皮。味甘寒。主傷中五勞六極羸瘦。崩中脈絕。補虛益氣。葉主除寒熱出汗。桑耳黑者。主女子漏下赤白汁。血病癥瘕積聚。陰痛陰陽寒熱無子。五木耳名櫛。益氣不飢。輕身強志。生山谷。



名醫曰。桑耳一名桑菌。一名木麥。生犍爲。六月多雨時采。卽暴乾。

案。說文云。桑。蠶所食葉。木莢。木耳也。蕈。桑莢。爾雅云。桑。辦有甚。梔。舍人云。桑樹一半有甚。半無甚。名梔也。郭璞云。辦。半也。又女桑。槎桑。郭璞云。今俗呼桑樹小而條長者爲女桑樹。又壓山桑。郭璞云。似桑。材中作弓及車轂。又桑柳。槐條。郭璞云。阿那垂條。

竹葉。味苦平。主欬逆上氣。溢筋急惡瘍。殺小蟲。根作湯。益氣止渴。補虛下氣。汁主風痊。實通神明。輕身益氣。

名醫曰。生益州。

案。說文云。竹。冬生草也。象形下。𦵏者。箬。箬也。

吳茱萸。御覽引無味辛溫。主溫中下氣止痛。欬逆寒熱除溼。血痺逐風邪。開溱舊作。倭是理根殺三蟲。一名藪。生山谷。

名醫曰。生冤句。九月九日采。陰乾。

案。說文云。茱。茱萸。茱屬萸。茱萸也。藪。煎茱萸。漢律會稽獻藪一斗。廣雅云。梔。檉。檉。茱萸也。三蒼云。茱。茱萸也。御覽爾雅云。椒。檉。醜。茱。郭璞云。茱萸子聚生成。

房貌。今江東亦呼茱櫟。似茱萸而小赤色。禮記云。三牲用藟。鄭云。藟煎。茱萸也。漢律會稽獻焉。爾雅謂之櫟。范子計然云。茱萸出三輔。陶宏景云。禮記名藟。而俗中呼爲藟子。當是不識藟字似藟字。因以相傳。

后舊作梔。梔。文類聚。及御覽。引作支。是。子。味苦寒。主五內邪氣。胃中熱氣。面赤酒泡。鼓鼻。白癩。赤癩。創瘍。一名木丹。生川谷。

名醫曰。一名越桃。生南陽。九月采。實暴乾。

案。說文云。梔。黃木可染者。廣雅云。梔子。楸桃也。史記貨殖傳云。巴蜀地饒后。集解云。徐廣曰。音支。烟支也。紫赤色也。據說文。當爲梔。

蕪荑。味辛。主五內邪氣。散皮膚骨節中淫淫溫行毒。去三蟲。化食。一名無姑。一名御覽。引云。逐寸白散。腹中。溫溫喘息。大觀本。作黑字。生川谷。

名醫曰。一名蕪漬。生晉山。三月采。實陰乾。

案。說文云。梗。山枌榆有束莢。可爲蕪荑者。廣雅云。山榆母估也。爾雅云。苾蕪。藟。牆。郭璞云。一名白蕪。又無姑。其實夷。郭璞云。無姑。姑榆也。生山中。葉圓而厚。剝取皮合漬之。其味辛香。所謂蕪荑。范子計然云。蕪荑在地赤心者善。

枳實。味苦寒。主大風在皮膚中。如麻豆苦痒。御覽作癢非除寒熱結止利。舊作利是御長

肌肉利五藏。益氣輕身。生川澤。  
吳普曰。枳實苦。雷公。酸無毒。李氏。大寒。九月十月采陰乾。御覽

名醫曰。生河內。九月十月采陰乾。  
案。說文云。枳木似橘。周禮云。橘踰淮而化為枳。沈括補筆談云。六朝以前。醫方

唯有枳實。無枳殼。後人用枳之小嫩者為枳實。大者為枳殼。  
厚朴。味苦溫。主中風傷寒。頭痛寒熱。驚悸氣血痺死肌。去三蟲。

吳普曰。厚朴。神農。岐伯。雷公。苦無毒。李氏。小溫。御覽引云一名厚皮生交趾  
名醫曰。一名厚皮。一名赤朴。其樹名榛。其子名逐。生交趾。冤句。九月十月采皮

陰乾。

案。說文云。朴。木皮也。榛。木也。廣雅云。重皮。厚朴也。范子計然云。厚朴出宏農。按  
今俗以榛為栗。不知是厚朴。說文。榛。栗字作栗。

秦皮。味苦微寒。主風寒溼痺。洗洗寒氣。除熱。目中青翳白膜。久服頭不白。輕身。生  
川谷。

吳普曰。岑皮一名秦皮。神農、雷公、黃帝、岐伯、酸無毒。李氏、小寒。或生冤句水邊。二月八月采。御覽

名醫曰。一名岑皮。一名石檀。生廬江及冤句。二月八月采皮陰乾。

案。說文云。梣青皮木。或作梣。淮南子。倣真訓云。梣木色青翳。高誘云。梣木、苦歷木也。生于山。剝取其皮。以水浸之。正青皮。洗眼愈人目中膚翳。據吳普云。岑皮名秦皮。本經作秦皮者。後人以俗稱改之。當爲岑皮。

秦菜。味辛溫。主風邪氣。溫中除寒痺。堅齒髮明目。久服輕身好顏色。耐老增年通神。生川谷。

名醫曰。生太山及秦嶺上。或琅邪。八月九月采實。

案。說文云。菜菜菜。菜檄實裏如裘者。椒似菜莢。出淮南。廣雅云。檄。栳菜莢也。北山經云。景山多秦椒。郭璞云。子似椒而細。葉草也。爾雅云。檄大椒。郭璞云。今椒樹叢生實大者。名爲檄。又椒檄醜菜。郭璞云。菜莢子聚成房貌。今江東亦呼菜檄。似菜莢而小赤色。毛詩云。椒聊之實。傳云。椒聊。椒也。陸璣云。椒樹似菜莢。有鍼刺。葉堅而滑澤。蜀人作茶。吳人作茗。皆合煮其葉以爲香。范子計然云。秦

椒出天水、隴西。細者善。淮南子人間訓云。申椒杜茝。美人之所懷服。舊作椒。非。據山海經有秦椒。生聞喜景山。則秦非秦地之秦也。

山茱萸。味酸平。主心下邪氣寒熱。溫中逐寒溼痺。去三蟲。久服輕身。一名蜀棗。生山谷。

吳普曰。山茱萸一名魃實。一名鼠矢。一名雞足。神農、黃帝、雷公、扁鵲、酸無毒。歧伯辛。一經酸。或生冤句琅邪。或東海承縣。葉如梅有刺毛。二月華如杏。四月實如酸棗。赤。五月采實。覽御

名醫曰。一名雞足。一名魏實。生漢中及琅邪冤句東海承縣。九月十月采實陰乾。

紫葳。味酸。作鹹微寒。主婦人產乳餘疾。崩中癥瘕血閉。寒熱羸瘦養胎。生川谷。

吳普曰。紫葳一名武葳。一名瞿麥。一名陵居腹。一名鬼目。一名茺華。神農、雷公、酸。歧伯辛。扁鵲苦鹹。黃帝甘無毒。如麥根黑。正月八月采。或生真定。覽御

名醫曰。一名陵苕。一名茺華。生西海及山陽。案廣雅云。茺葳。陵苕。蘧麥也。爾雅云。苕。陵苕。郭璞云。一名陵時。本草云。又黃華。



蕒。白華。芡。郭璞云。茗華色異。名亦不同。毛詩云。茗之華。傳云。茗陵。茗也。范子計然云。紫葳出三輔。李當之云。是瞿麥根。據李說。與廣雅合。而唐本注引爾雅注。有一名陵霄四字。謂卽陵霄花。陸璣以爲鼠尾。疑皆非。故不采之。

豬苓。味甘平。主痰瘧。解毒蠱注。御覽作不祥。利水道。久服輕身耐老。御覽作能老。一名猥

豬。生山谷。

吳普曰。豬苓。神農甘。雷公苦。無毒。御覽引云。如茯苓。或生冕句。八月采。

名醫曰。生衡山及濟陰冤句。二月八月采。陰乾。

案。莊子云。豕零。司馬彪注。作豕囊。云。一名豬苓。根似豬卵。可以治渴。

白棘。味辛寒。主心腹痛。癰腫潰膿止痛。一名棘鍼。生川谷。

名醫曰。一名棘刺。生雍州。

案。說文云。棘。小棗叢生者。爾雅云。髦顛棘。孫炎云。一名白棘。李當之云。此是酸

棗樹鍼。今人用天門冬苗代之。非是真也。按經云。天門冬一名顛勒。勒棘聲相

近。則今人用此。亦非無因也。

龍眼。味甘平。主五藏邪氣。安志厭食。久服強魂聰明。輕身不老。通神明。一名益智。

生山谷。

吳普曰。龍眼一名益智。要術一名比目。覽御

名醫曰。其大者似板榔。生南海。松樹上五月採。陰乾。

案。廣雅云。益智。龍眼也。劉達注。吳都賦云。龍眼如荔枝而小。圓如彈丸。味甘勝

荔枝。蒼梧交趾。南海合浦皆獻之。山中人家亦種之。

松羅。味苦平。主瞋怒邪氣。止虛汗頭風。女子陰寒腫病。一名女蘿。生山谷。

名醫曰。生熊耳山松樹上。五月採。陰乾。

案。廣雅云。女蘿。松蘿也。毛詩云。烏與女蘿。傳云。女蘿。菟絲。松蘿也。陸璣云。松蘿

自蔓松上枝。正青與兔絲異。

衛矛。味苦寒。主女子崩中下血。腹滿汗出。除邪殺鬼毒蠱。注。一名鬼箭。生山谷。

吳普曰。鬼箭一名衛矛。神農。黃帝。桐君。苦無毒。葉如桃如羽。正月二月七月採

陰乾。或生野田。覽御

名醫曰。生霍山。八月採。陰乾。

案。廣雅云。鬼箭。神箭也。陶宏景云。其莖有三羽。狀如箭羽。

合歡味甘平。主安五藏。利心志。藏文類聚作和心。志御覽作和心。氣令人歡樂無憂。久服輕身明目。得所欲。生山谷。

名醫曰。生益州。

案唐本注云。或曰合昏。歡昏音相近。日華子云。夜合。

右木中品一十七種。舊同。

白馬莖味甘平。主傷中。脈絕陰不起。強志益氣。長肌肉。肥健生子。眼主驚癇。腹滿瘧疾。當殺用之。懸蹄主驚邪。瘕瘕乳難。辟惡氣。鬼毒。蠱注不祥。生平澤。

名醫曰。生雲中。

鹿茸味甘溫。主漏下惡血。寒熱驚癇。益氣強志。生齒不老。角主惡創。癰腫。逐邪惡氣。留血在陰中。

名醫曰。茸四月五月解角時取陰乾。使時燥。角七月采。

牛角鰓下閉血。瘀血疼痛。女人帶下血髓。補中填骨髓。久服增年。膽可丸藥。

案說文云。鰓。角中骨也。

羚羊角味甘平。主青盲明目。殺疥蟲。止寒洩。辟惡鬼虎狼。止驚悸。久服安心益氣。

輕身。生川谷。

名醫曰。生河西。取無時。

案。說文云。羖。夏羊。牝曰羖。爾雅云。羊羖。郭璞云。牂。今人便以牝羖爲黑白羊名。牡狗陰莖。味鹹平。主傷中陰痿不起。令強熱大生子。除女子帶下十二疾。一名狗精。膽主明目。

名醫曰。六月上伏取陰乾百日。

羖羊角。味鹹寒。主明目益氣起陰。去惡血注下。辟蠱毒惡鬼不祥。安心氣。常不厭寐。生川谷。

名醫曰。生石城及華陰山。采無時。

案。說文云。羖。大羊而細角。廣雅云。美皮冷角。爾雅云。羖。大羊。郭璞云。羖羊似羊而大。角圓銳。好在山崖間。陶宏景云。爾雅名羖羊。據說文云。羖。山羊細角也。爾雅云。羖如羊。郭璞云。羖似吳羊而大。角。角。角。出西方。羖卽羖正字。然本經羖字實羖字。俗寫當以羖爲是。爾雅釋文。引本草作羖。

犀角。味苦寒。主百毒蠱注。邪鬼障氣。殺鈎吻鳩羽蛇毒。除迷惑不厭寐。久服輕身。

生山谷。

名醫曰。生永昌及益州。

案。說文云。犀南徼外牛。一角在鼻。一角在頂。似豕。爾雅云。犀似豕。郭璞云。形似水牛。豬頭大腹。痺脚。脚有三蹄。黑色三角。一角頂上。一角鼻上。一角額上。鼻上者。卽食角也。小而不脣。好食棘。亦有一角者。山海經云。琴鼓之山多白犀。郭璞云。此與辟寒。蠲忿。辟塵。辟暑。諸犀皆異種也。范子計然云。犀角出南郡。上價八千中三千下一千。

右獸中品七種舊同。

燕屎。味辛平。主蠱毒鬼注。逐不祥邪氣。破五癰。利小便。生平谷。

名醫曰。生高山。

案。說文云。燕。元鳥也。籀曰。布狻枝尾象形。作巢避戍己。乙。元鳥也。齊魯謂之乙。取其名自呼。象形或作𪚩。爾雅云。鳳燕。夏小正云。二月來降燕。乃睇。傳云。燕。乙也。九月陟。元鳥蟄。傳云。元鳥者燕也。天鼠屎。味辛寒。主面癰腫。皮膚洗洗時痛。腹中血氣。破寒熱積聚。除驚悸。一名鼠



云。一名石肝。生山谷。

名醫曰。生合浦。十月十二月取。

案。李當之云。卽伏翼屎也。李云天鼠。方言。一名僂鼠。

案。今本方言云。或謂之老鼠。當爲天字之誤也。

右禽中品二種。舊同。

蝟皮。味苦平。主五痔陰蝕下血。赤白五色血汁不止。陰腫痛引腰背。酒煮殺之。生

川谷。

名醫曰。生楚山田野。取無時。

案。說文云。鼯似豪豬者。或作蝟。廣雅云。虎王蝟也。爾雅云。鼯毛刺。郭璞云。今謂

狀似鼠。淮南子說山訓云。鵠矢中蝟。

露蜂房。味苦平。主驚癇瘕瘕。寒熱邪氣。瘧疾鬼精蠱毒。腸痔。火熬之良。一名蜂腸。

生山谷。

名醫曰。一名白穿。一名蜂勦。生牂柯。七月七日采陰乾。

案。淮南子汜論訓云。蜂房不容卵。高誘云。房。巢也。

鼈甲。味鹹平。主心腹癥瘕。堅積寒熱。去痞息肉。陰蝕痔惡肉。生池澤。

名醫曰。生丹陽。取無時。

案。說文云。鼈甲蟲也。

蟹。味鹹寒。主胸中邪氣熱結痛。喎僻面腫敗瘰。燒之致鼠。生池澤。

名醫曰。生伊洛諸水中。取無時。

案。說文云。蟹有二敖。八足旁行。非蛇鱗之穴無所庇。或作鱉。蟹也。荀子勸學篇云。蟹六跪而二螯。非蛇蠘之穴無所寄託。廣雅云。蚶。蟹也。爾雅云。蟹。小者。郭璞云。或曰。即蟹。似蟹而小。

柞蟬。味鹹寒。主小兒驚癇。夜啼。瘕病寒熱。生楊柳上。

名醫曰。五月采。蒸乾之。

案。說文云。蟬以旁鳴者。蛭蟬也。廣雅云。蛭。蛭蟬也。復育蛭也。舊作蛭蟬。別錄云。蛭者。鳴蛭也。蛭一名蛭蟬。又名伏蛭。按蛭。即柞字。周禮考工記云。侈則柞。鄭元云。柞讀爲蛭。蛭然之。聲大外也。說文云。諧。大聲也。音同柞。今據作柞。柞蟬。即五月鳴蛭之蛭。夏小正云。五月良蛭鳴。傳蛭蛭也。五采具。爾雅云。蛭。蛭蛭。毛詩

云。如蜩。傳云。蜩。蟬也。方言云。楚謂之蜩。宋衛之間謂之螳蜩。陳鄭之間謂之蜎蜩。秦晉之間謂之蟬。海岱之間謂之螭。論衡云。蟬生於復育。開背而出。而玉篇云。蚱蟬七月生。陶宏景音蚱作笮。云啞蟬。是為月令之寒蟬。爾雅所云蜺也。唐本注非之。

蟻。味鹹微溫。主惡血。血瘀。御覽作瘰氣。破折血在脅下。堅滿痛。月閉。目中淫膚。青翳白膜。一名蟻蟻。生平澤。

名醫曰。一名肥齊。一名敦齊。生河內人家積糞草中。取無時。反行者良。

案。說文云。齋。齋蠹也。螭。螭齋也。蜩。螭齋也。廣雅云。蛭。蛭。蜚蠊。地蠶。蠹。蟻。蟻。爾雅云。蟻。蟻。郭璞云。在糞土中。又螭。蟻。蜩。郭璞云。在木中。今雖通名蜩。所在異。又蜩。蜩。郭璞云。木中蠹蟲。蜩。桑蠹。郭璞云。即拮搨。毛詩云。領如蜩蟻。傳云。蜩。蟻。蜩蟲也。方言云。蟻。蟻謂之蟻。自關而東。蟻之謂蟻。或謂之蜚蠊。或謂之蜎。穀梁益之間謂之蜎。或謂之蜎。蜎。秦晉之間謂之蠹。或謂之天蠹。列子天瑞篇云。為足根為蟻。博物志云。蟻。蟻以背行。快於用足。說文無蟻字。當借蜎為之。聲相近。字之誤也。

烏賊魚骨。味鹹微溫。主女子漏下赤白經汁。血閉陰蝕腫痛。寒熱癥瘕無子。生池澤。

名醫曰。生東海。取無時。

案。說文云。鰾。烏鰾魚名。或作鰾。左思賦有烏賊。劉逵注云。烏賊魚腹中有墨。陶宏景云。此是鸛鳥所化作。今其口脚具存。猶相似爾。

白僵蠶。味鹹。主小兒驚癇夜啼。去三蟲。滅黑𦘔。令人面色好。男子陰瘍病。生平澤。名醫曰。生潁川。四月取自死者。

案。說文云。蠶。任絲也。淮南子說林訓云。蠶食而不飲。二十二日而化。博物志云。蠶三化。先孕而後交。不交者亦生子。子後爲𧈧。皆無眉目。易傷。收采亦薄。玉篇作蠶。蠶。正當爲僵。舊作蠶。非。

鮀魚甲。味辛微溫。主心腹癥瘕。伏堅積聚寒熱。女子崩中下血五色。小腹陰中相引痛。創疥死肌。生池澤。

名醫曰。生南海。取無時。

案。說文云。鱣。魚名。皮可爲鼓。鼉。水蟲。似蜥蜴。長大。陶宏景云。鮀卽鼉甲也。

樗雞。味苦平。主心腹邪氣。陰痿。益精強志。生子好色。補中輕身。生川谷。

名醫曰。生河內樗樹上。七月采暴乾。

案。廣雅云。樗鳩。樗雞也。爾雅云。鵪。天雞。李巡云。一名酸雞。郭璞云。小蟲黑身赤頭。一名莎雞。又曰。樗雞。毛詩云。六月中飛而振羽。陸璣云。莎雞如蝗而班色。毛翅數重。其翅正赤。或謂之天雞。六月中飛而振羽。索索作聲。幽州謂之蒲錯是也。活螭。味鹹寒。主賊風。喎僻。軼筋及脫肛。驚癇。攣縮。一名陵蠹。生池澤。

名醫曰。一名土蝸。一名附蝸。生大山及陰地沙石垣下。八月取。

案。說文云。螭。虎螭也。贏。一名虎螭。廣雅云。贏。蠹。蝸牛。螭螭也。中山經云。青要之山是多僕蠹。郭璞云。僕蠹。蝸牛也。周禮鼈人祭祀供贏。鄭云。贏。螭螭。爾雅云。蚘。贏。螭螭。郭璞云。即蝸牛也。名醫又別出蝸牛條。非舊作蛞。說文所無據。玉篇云。蛞。蛞。東知。即活東異文。然則當爲活。

石龍子。味鹹寒。主五癰邪結氣。破石淋下血。利小便水道。一名蜥蜴。生川谷。

吳普曰。石龍子。一名守宮。一名石蜴。一名石龍子。

名醫曰。一名山龍子。一名守宮。一名石蜴。生平澤及荆山石間。五月取著石上。



令乾。

案說文云。蜥蟲之蜥易也。易蜥易。蜥蜴守宮也。象形。蜥在壁曰蜥蜴。在草曰蜥。易或作蠹。蜥榮。蜥蛇。醫以注鳴者。廣雅云。蛤解。蠹蠹。蚘蠹。蜥蜴也。爾雅云。蜥蜴。蜥蜴。蜥蜴。蜥蜴。守宮也。毛詩云。胡爲虺蜴。傳云。蜴蜥也。陸璣云。虺蜴一名蜥蜴。蜥也。或謂之蛇。醫如蜥蜴。青綠色。大如指。形狀可惡。方言云。守宮。秦晉西夏謂之守宮。或謂之蠹蠹。或謂之蜥易。其在澤中者。謂之蜥蜴。南楚謂之蛇醫。或謂之蜥蜴。東齊海岱謂之蜥蜴。北燕謂之祝蜴。桂林之中。守宮大而能鳴者。謂之蛤解。

木蜥。味苦平。主目赤痛。皆傷淚出。瘀血血閉。寒熱酸慄無子。一名魂常。生川澤。

名醫曰。生漢中。五月取。

案說文云。蠹。蠹人飛蟲。廣雅云。蠹。蠹蟲也。此省文。淮南子云。齊俗訓云。水蠹爲蠹。高誘云。青蛉也。又說山訓云。蠹散積血。

蜥蜴。味苦微寒。主逐瘀血。破下血。積堅痞癥瘕。寒熱通利血脈及九竅。生川谷。名醫曰。生江夏。五月取。腹有血者良。

蜚廉、味鹹寒。主血瘀。御覽引云癥堅寒熱。破積聚喉咽痺。內寒無子。生川澤。

吳普云。蜚廉蟲。神農黃帝云。治婦人寒熱。御覽

名醫曰。生普陽及人家屋間。立秋采。

案。說文云。蜚。盧蜚也。蜚。臭蟲。負蟊也。蟊。自蟊也。廣雅云。飛蟊。飛蟊也。爾雅云。蜚

蠃。郭璞云。即負盤臭蟲。唐本注云。漢中人食之下氣。名曰石薑。一名盧蜚。一

名負盤。舊作蟊。據邢昺疏引此作廉。

蠃蟲。味鹹寒。主心腹寒熱。洗洗。血積癥瘕。破堅下血。閉。生子大良。一名地鼈。生川澤。

吳普曰。蠃蟲一名土鼈。御覽

名醫曰。一名土鼈。生河東及沙中。人家牆壁下土中溼處。十月暴乾。

案。說文云。蠃蟲屬蟊。自蟊也。廣雅云。負蟊。蟊也。爾雅云。草蟲負蟊。郭璞云。常羊

也。毛詩云。嚶嚶草蟲。傳云。草蟲。常羊也。陸機云。小大長短如蝗也。奇音青色。好

在茅草中。

伏翼。味鹹平。主目瞑明目。夜視有精光。久服令人喜樂。媚好無憂。一名蝙蝠。生川

谷。

舊在禽部今移

吳普曰。伏翼或生人家屋間。立夏後陰乾。治目冥令人夜視有光。類聚文

名醫曰。生太山及人家屋間。立夏後采陰乾。

案。說文云。蝙蝠。蝙蝠也。蝠。蝙蝠服翼也。廣雅云。伏翼。飛鼠。僊鼠。蜚蠊也。爾雅云。蝠。

蝠服翼。方言云。蝙蝠。自關而東謂之伏翼。或謂之飛鼠。或謂之老鼠。或謂之仙。

鼠。自關而西秦隴之間謂之蝠。蝠。北燕謂之蠟。蠟。李當之云。即天鼠。

右蟲魚中品一十七種。舊十六種。考禽部伏翼宜入此。

梅實。味酸平。主下氣除熱煩滿安心。肢體痛。偏枯不仁。死肌。去青黑志惡疾。生川

谷。

吳普曰。梅實。大觀本草作核本明目益氣。御覽不飢。吳氏本草引

名醫曰。生漢中。五月采火乾。

案。說文云。蓀。乾梅之屬。或作蓀。某。酸果也。以梅為枏。爾雅云。梅枏。郭璞云。似杏。

實酢。是以某注梅也。周禮籩人饋食。籩其實乾蓀。鄭云。乾蓀。乾梅也。有桃諸梅。

諸是其乾者。毛詩疏云。梅暴為腊。羹臠藟中。人含之以香口。

右果中品一種。舊同。

大豆黃卷味甘平。主溼痺筋攣。鄒痛。生大豆塗癰腫。煮汁飲。殺鬼毒止痛。赤小豆主下水。排癰腫膿血。生平澤。

吳普曰。大豆黃卷。神農黃帝雷公無毒。采無時。去面黥。得前胡。烏啄。杏子。牡蠣。天雄。鼠屎。共蜜和住。不欲海藻。龍膽。此法大豆初出黃土芽是也。生大豆神農岐伯生熟寒。九月采。殺烏頭毒。並不欲元參。赤小豆神農黃帝鹹。雷公甘。九月采。

名醫曰。生太山。九月采。覽御

案說文云。尗豆也。象豆生之形也。荅小尗也。藿尗之少也。廣雅云。大豆尗也。小豆荅也。豆角謂之莢。其葉謂之藿。爾雅云。戎叔謂之荏。叔孫炎云。大豆也。粟米味鹹微寒。主養腎氣。去胃脾中熱。益氣。陳者味苦。主胃熱消渴。利小便。

大觀本草作黑字據吳普增

吳普曰。陳粟神農黃帝苦無毒。治脾熱渴。粟養腎氣。覽御案說文云。粟嘉穀實也。孫炎注爾雅黍稷云。粟也。今關中人呼小米爲粟米是。

黍米味甘溫。主益氣補中。多熱令人煩。大觀本作黑字據吳普增

吳普曰。黍神農甘無毒。七月取陰乾。益中補氣。覽御

案說文云。黍禾屬而黏者。以大暑而種。故謂之黍。孔子曰。黍可爲酒。禾入水也。

廣雅云。黍黍稻其采謂之禾。齊民要術引汜勝之書曰。黍忌丑。又曰。黍生於巳。

壯於酉。長於戌。老於亥。死於丑。惡於丙午。忌於丑寅卯。按黍卽糜之種也。

右米穀中品三種。舊二種。大小豆爲二。無粟米黍米。今增。

蓼實味辛溫。主明目溫中。耐風寒。下水氣。面目浮腫。癰瘍。馬蓼去腸中蛭蟲。輕身。

生川澤。

吳普曰。蓼實一名天蓼。一名野蓼。一名澤蓼。類聚文

名醫曰。生雷澤。

案說文云。蓼辛菜。蓼虞也。蓼蓼虞也。廣雅云。葑龍藟。馬蓼也。爾雅云。蓼虞蓼。郭

璞云。虞蓼澤蓼。又葑龍古其大者歸。郭璞云。俗呼葑草爲龍鼓。語轉耳。毛詩云。

隰有游龍。傳云。龍紅草也。陸璣云。一名馬蓼。葉大而赤色。生水中。高丈餘。又以

蓼茶蓼。傳云。蓼水草也。



葱實。味辛溫。主明目補不足。其莖可作湯。主傷寒寒熱出汗。中風面目腫。薺味辛溫。主金創創敗。輕身不飢耐老。生平澤。

名醫曰。生魯山。

案。說文云。薺。菜也。葉似韭。廣雅云。韭薺。薺其華謂之菁。爾雅云。薺。鴻薺。郭璞云。即薺菜也。又勁山薺。陶宏景云。葱薺異物。而今共條。本經既無韭。以其同類故也。

水蘇。味辛微溫。主下氣。辟口臭。去毒辟惡。久服通神明。輕身耐老。生池澤。

吳普曰。芥菹一名水蘇。一名勞祖。

御覽

名醫曰。一名雞蘇。一名勞祖。一名芥菹。一名芥苴。生九真。七月采。

案。說文云。蘇。桂荏也。廣雅云。芥菹。水蘇也。爾雅云。蘇。桂荏。郭璞云。蘇。荏類。故名桂荏。方言云。蘇亦荏也。關之東西。或謂之蘇。或謂之荏。周鄭之間。謂之公蕢。沅湘之南。謂之薺。其小者。謂之釀柔。按釀柔。即香薺也。亦名香菜。名醫別出香薺條。非。今紫蘇。薄荷等。皆蘇類也。名醫俱別出之。

右。菜中品三種。舊四種。考葱實。宜與薺同條。今并假蘇。宜入草部。

神農本草經 卷二 中經

# 神農本草經

## 卷三 下經

下藥一百二十五種。為左使。主治病以應地。多毒不可久服。欲除寒熱邪氣破積聚愈疾者。本下經。

魏	清	清
吳	陽湖	建德
普	孫星	周學
等	翼	海校
述	斲	正
	同	
	輯	

鄞縣 曹炳章 圈點

石	灰	礬	石	鉛	丹	粉	錫	錫	鏡	鼻	代	赭	石
戎	鹽	白	堊	冬	灰	青	琅	玕					
右、玉石	下品	八種。	舊一十二種。										
附	子	烏	頭	天	雄	半	夏	虎	掌	鳶	尾		

大黃	亭歷	桔梗	葇蕒子	草蒿	旋復花
藜蘆	鉤吻	射干	蛇合	恆山	蜀漆
甘遂	白欬	青箱子	藿菌	白及	大戟
澤漆	茵芋	貫衆	菟華	牙子	羊躑躅
商陸	羊蹄	篇蓄	狼毒	白頭翁	鬼臼
羊桃	女青	連翹	蘭茹	烏韭	鹿藿
蚤休	石長生	陸英	蓋草	牛蒡	夏枯草
羌華					

右、草下品四十九種。舊四十八種。

巴豆	蜀茺	阜茨	柳華	棟實	郁李仁
莽草	雷丸	桐葉	梓白皮	石南	黃環
深疏	鼠李	藥實根	藥華	蔓茺	

右、木下品一十七種。舊一十八種。

豚卵 麋脂 騶鼠 六畜毛蹄甲

右、獸下品四種。舊同。

蝦蟇 馬刀

蛇 蛻

邱 蚓

蠐 螭

吳 蚣

水蛭 斑苗

貝子

石蠶

雀甕

蜣螂

螻蛄 馬陸

地膽

鼠婦

熒火

衣魚

右、蟲魚下品十八種。舊同。

桃核仁 杏核仁

右、木下品二種。舊同。

腐婢

右、穀米下品一種。舊同。

苦瓠 水蘄

右、菜下品二種。舊同。

彼子

右、一種。未詳。

石灰味辛溫。主疽瘍疥搔。熱氣惡創癩疾。死肌墮眉。殺痔蟲。去黑子息肉。一名惡



灰。生山谷。

名醫曰。一名希灰。生中山。

案惡灰疑當爲聖灰。希石聲之緩急。

礬石。味辛大熱。主寒熱鼠瘻蝕創。死肌風痺。腹中堅。一名青分石。一名立制石。一

名固羊石。御覽引云除熱殺百獸大觀本作黑字出山谷。

吳普曰。白礬石。一名鼠鄉。神農岐伯辛有毒。桐君有毒。黃帝甘有毒。李氏云。或

生魏興。或生少室。十二月采。御覽引云一名太白一名澤乳一名食鹽又云李氏大寒主溫熱

名醫曰。礬石一名白礬石。一名太白石。一名澤乳。一名食鹽。生漢中及少室。采

無時。

案說文云。礬毒石也。出漢中。西山經云。皋塗之山有白石焉。其名曰礬。可以毒

鼠。范子計然云。礬石出漢中。色白者善。淮南子地形訓云。白天九百歲生白礬。

高誘云。白礬礬石也。又說林訓云。人食礬石而死。蠶食之而肥。高誘云。礬石出

陰山。一曰能殺鼠。按西山經云。毒鼠。卽治鼠瘻也。

鉛丹。味辛微寒。主上御覽引云久服成仙逆胃反驚癇瘕疾。除熱下氣。鍊化還成九元。

久服通神明。生平澤。

名醫曰。一名鉛華。生蜀郡。

案。說文云。鉛。青金也。陶宏景云。卽今熬鉛所作黃丹也。

粉錫。味辛寒。主伏尸毒螫。殺三蟲。一名解錫。錫鏡鼻主女子血閉癥瘕。伏腸絕孕。

生山谷。舊作井

名醫曰。生桂陽。

案。說文云。錫。銀鉛之間也。

代赭。味苦寒。主鬼注賊風蠱毒。殺精物惡鬼。腹中毒邪氣。女子赤沃漏下。一名須

丸。生山谷。

名醫曰。一名血師。生齊國。赤紅青色。如雞冠有澤。染爪甲不渝者良。采無時。

案。說文云。赭。赤土也。北山經云。少陽之山。其中多美赭。管子地數篇云。山上有

赭者。其下有鐵。范子計然云。石赭出齊郡。赤色者善。蜀赭出蜀郡。據元和郡縣

志云。少陽山在交城縣。其地近代也。

戎鹽。主明目目痛。益氣堅肌骨。去毒蠱。大鹽令人吐。御覽引云。主腸胃結。鹵鹽。味

苦寒。主大熱消渴。狂煩除邪。及下蠱毒。柔肌膚。

御覽引云一名生池澤。舊作井。

名醫曰。戎鹽一名胡鹽。生胡鹽山及西羌北地。酒泉福祿城東南角。北海青南

海赤。十月采。大鹽生邯鄲。又河東鹵鹽。生河東鹽池。

案說文云。鹽鹹也。古者宿沙初作煮海鹽。鹵西方鹹地也。从西省象鹽形。安定

有鹵縣。東方謂之斥。西方謂之鹵。鹽河東鹽池。袤五十一里。廣七里。周百十六

里。北山經云。景山南望鹽販之澤。郭璞云。卽解縣鹽池也。今在河東猗氏縣。按

在山西安邑運城。

白堊。味苦溫。主女子寒熱癥瘕。月閉積聚。生山谷。

吳普曰。白堊一名白蟻。一經切音義

名醫曰。一名白善。生邯鄲。采無時。

案說文云。堊。白涂也。中山經云。蔥龍之山。是多白堊。

冬灰。味辛微溫。主黑子。去疣息肉。疽蝕疥搔。一名藜灰。生川澤。

名醫曰。生方谷。

青琅玕。味辛平。主身痒火創。癰傷疥搔死肌。一名石珠。生平澤。

名醫曰。一名青珠。生蜀郡。采無時。

案說文云。琅玕似珠者。古文作瑯。禹貢云。雍州貢璆琳琅玕。鄭云。琅玕珠也。

右。玉石下品九種。舊十二種。粉錫。錫鏡鼻爲二。戎鹽。大鹽。鹵鹽爲三。非攷當各

爲一。

附子。味辛溫。主風寒欬逆邪氣。溫中金創。破癥堅積聚血痕。寒溼痿痺。拘攣

鄰痛。不能行步。御覽引云。爲百藥之長。大觀本作黑字。生山谷。

吳普云。附子一名葺。神農辛。歧伯。雷公。甘有毒。李氏。苦有毒。大溫。或生廣漢。八

月采。皮黑肥白。御覽

名醫曰。生犍爲及廣漢。冬月采爲附子。春采爲烏頭。御覽

案。范子計然云。附子出蜀武都。中白色者善。

烏頭。味辛溫。主中風惡風。洗洗出汗。除寒溼痺。欬逆上氣。破積聚寒熱。其汁煎之

名射罔。殺禽獸。一名奚毒。一名卽子。一名烏喙。生山谷。

吳普曰。烏頭一名葺。一名千狄。一名毒公。一名卑負。御覽作一名耿子。神農。雷

公。桐君。黃帝。甘有毒。正月始生。葉厚莖方中空。葉四四相當。與蒿相似。

又云烏喙。神農、雷公、桐君、黃帝有毒。李氏、小寒。十月采。形如烏頭。有兩歧相合。如烏之喙。名曰烏喙也。所畏惡使。盡與烏頭同。又煎子。一名葇。神農、岐伯有大毒。李氏大寒。八月采陰乾。是附子角之大者。畏惡與附子同。御覽大觀本節文

名醫曰。生朗陵。正月二月采陰乾。長三寸已上為天雄。

案。說文云。煎。烏喙也。爾雅云。葇。莖草。郭璞云。即烏頭也。江東呼為莖。范子計然云。烏頭出三輔。中白者善。國語云。驪姬置莖于肉。韋昭云。莖。烏頭也。淮南子主術訓云。莫凶于雞毒。高誘云。雞毒。烏頭也。案雞毒即奚毒。即子即煎子。側子也。名醫別出側子。條非。

天雄。味辛溫。主大風寒溼痺。歷節痛。拘攣緩急。破積聚邪氣。金創。強筋骨。輕身健行。一名白幕。御覽引云。長陰氣。強志。令人武。生山谷。

名醫曰。生少室。二月采根陰乾。

案。廣雅云。蘘。奚毒。附子也。一歲為煎子。二歲為烏喙。三歲為附子。四歲為烏頭。五歲為天雄。淮南子繆稱訓云。天雄。烏喙。藥之凶毒也。良醫以活人。半夏。味辛平。主傷寒寒熱。心下堅。下氣。喉咽腫痛。頭眩胸張。欬逆腸鳴。止汗。一名



地文一名水玉。肥上黑字生川谷。

吳普曰。半夏一名和姑。生微邱或生野中。葉三三相偶。二月始生。白華員上。覽御

名醫曰。一名示姑。生槐里。五月八月采根暴乾。

案。月令云。五月半夏生。范子計然云。半夏出三輔。色白者善。列仙傳云。赤松子

服水玉以教神農。疑卽半夏別名。

虎掌。味苦溫。主心痛寒熱。結氣積聚。伏梁。傷筋痿拘緩。利水道。生山谷。

吳普曰。虎掌。神農。雷公。苦無毒。歧伯。桐君。辛有毒。立秋九月采之。御覽引云或生

宛胸

名醫曰。生漢中及宛句。二月八月采陰乾。

案。廣雅云。虎掌瓜屬也。

鳶尾。味苦平。主蠱毒邪氣。鬼注諸毒。破癥瘕積聚。去水下三蟲。生山谷。

吳普曰。鳶尾治蠱毒。覽御

名醫曰。一名烏園。生九疑山。五月采。

案。廣雅云。鳶尾。烏菴。射干也。疑當作鳶尾。烏圓也。唐本注云。與射干全別。

大黃。味苦寒。主下瘀血。血閉。寒熱。破癥瘕積聚。留飲宿食。蕩滌腸胃。推陳致新。通利水穀。御覽此下有道字調中化食。安和五藏。生山谷。

吳普曰。大黃一名黃良。一名火參。一名膚如。神農。雷公。苦有毒。扁鵲。苦無毒。李氏。小寒。爲中將軍。或生蜀郡北部。或隴西。二月始生。花黃赤。葉四四相當。黃莖高三尺許。三月花黃。五月實黑。三月采根。根有黃汁。切陰乾。

名醫曰。一名黃良。生河西及隴西。二月八月采根。火乾。

案廣雅云。黃良。大黃也。

亭歷。舊作葶蘆。蘆御

味辛寒。主癥瘕積聚。結氣。飲食寒熱。破堅。一名大室。一名大適。

生平澤及田野。

名醫曰。一名丁歷。一名葶蒿。生葦城。立夏後采。實陰乾。得酒良。

案說文云。葶。亭歷也。廣雅云。狗薺。大室。亭歷也。爾雅云。葶。亭歷。郭璞云。實葉皆似芥。淮南子。繆稱訓云。亭歷。愈張。西京雜記云。亭歷。死於盛夏。

桔梗。味辛微溫。主胸脇痛如刀刺。腹滿腸鳴。幽幽。驚恐悸氣。御覽引云。一名利生山谷。

吳普曰。桔梗一名符尾。一名白藥。一名利如。一名梗草。一名盧如。神農、醫和、苦無毒。扁鵲、黃帝鹹。歧伯、雷公、甘無毒。李氏大寒。葉如薺芩。莖如筆管。紫赤。二月生。覽御

名醫曰。一名利如。一名房圖。一名白藥。一名梗草。一名薺芩。生蒿高及冤句。二八月采根暴乾。

案說文云。桔。桔梗藥名。廣雅云。犁如桔梗也。戰國策云。今求柴胡桔梗于沮澤。則累世不得一焉。及之。畢黍梁父之陰。則郅車而載耳。爾雅云。芩。薺芩。郭璞云。薺芩。據名醫云。是此別名。下又出薺芩條。非。然陶宏景亦別爲二矣。

芩。蕩子。味苦寒。主齒痛。出蟲。肉痺拘急。使人健行。見鬼。多食令人狂走。久服輕身。走及奔馬。強志益力。通神。一名橫唐。生川谷。

名醫曰。一名行唐。生海濱及雍州。五月采子。

案廣雅云。薺。薺芩。蕩也。陶宏景云。今方家多作狼薺。舊作薺。

案說文無薺。舊字。史記淳于意傳云。菑川王美人懷子而不乳。飲以薺蕩藥一撮。本草圖經引作浪蕩是。

草蒿。味苦寒。主疥搔痂痒惡創殺蟲。留熱在骨節間。明目。一名青蒿。一名方漬。生川澤。

名醫曰。生華陰。

案。說文云。蒿。蒿也。蒿。香蒿也。或作堅。爾雅云。蒿。蒿也。郭璞云。今人呼青蒿。香中灸啖者為蒿。史記司馬相如傳菴蘭注。漢書音義曰。菴蘭。蒿也。陶宏景云。即今青蒿。

旋復花。味鹹溫。主結氣脇下滿。驚悸除水。去五藏間寒熱。補中下氣。一名金沸草。一名盛堪。生川谷。

名醫曰。一名戴堪。生平澤。五月采花日乾。二十日成。

案。說文云。葎。盜庚也。爾雅云。葎。盜庚。郭璞云。旋復似菊。

藜蘆。御覽作梨蘆。味辛寒。主蠱毒欬逆。洩利腸澼。頭瘍疥搔惡創。殺諸蠱毒。去死肌。一

名葱苒。生山谷。

吳普曰。藜蘆一名葱葵。一名豐蘆。一名蕙葵。御覽引一名公苒。神農雷公辛有毒。

御覽引云。黃帝有毒。岐伯鹹有毒。李氏大寒大毒。扁鵲苦有毒寒。大葉根小相連。御覽引

根采

名醫曰。一名葱蒨。一名山葱。生太山。三月采根陰乾。

案廣雅云。藜蘆葱蒨也。范子計然云。藜蘆出河東。黃白者善。爾雅云。茗山葱疑非此。

鉤吻作御覽味辛溫。主金創乳瘻。中惡風。欬逆上氣。水腫殺鬼注舊作注庄是御覽毒。一名野葛。生山谷。

吳普曰。秦鉤吻。一名毒根。一名野葛。神農辛。雷公有毒殺人。生南越山或益州。葉如葛。赤莖大如箭。方根黃色。或生會稽東治。正月采御覽。

名醫曰。生傅高山及會稽東野。

案廣雅云。葇。鉤吻也。淮南子說林訓云。蝮蛇螫人。傅以和莖則愈。高誘云。和莖野葛毒藥。博物志云。鉤吻毒。桂心葱葉沸解之。陶宏景云。或云鉤吻是毛葇。沈括補筆談云。閩中人呼爲吻芥。亦謂之野葛。嶺南人謂之胡蔓。俗謂之斷腸草。此草人間至毒之物。不入藥用。恐本草所出。別是一物。非此鉤吻也。射干。味苦平。主欬逆上氣。喉痺咽痛。不得消息。散結氣。腹中邪逆。食飲大熱。一名



烏扇。一名烏蒲。生川谷。

吳普曰。射干一名黃遠也。覽御

名醫曰。一名烏嬰。一名烏吹。一名草薑。生南陽田野。三月三日采根陰乾。

案廣雅云。鴛尾烏薹射干也。荀子勸學篇云。西方有木焉。名曰射干。莖長四寸。

范子計然云。射干根如□□□安定。

蛇合。原注云合是含字

味苦微寒。主驚癇。寒熱。邪氣。除熱。金創。疽痔。鼠瘻。惡創。頭瘍。一名

蛇銜。生山谷。

名醫曰。生益州。八月采陰乾。

案本草圖經云。或云是雀瓢。即是蘿摩之別名。據陸璣云。芄蘭一名蘿摩。幽州

謂之雀瓢。則即爾雅藿芄蘭也。唐本草別出蘿摩條。非。又見女青。

恆山。舊作常山御覽作恆山是味苦寒。主傷寒寒熱。熱發溫瘧。鬼毒。胸中痰結吐逆。一名互草。

生川谷。

吳普曰。恆山一名漆葉。神農岐伯苦。李氏大寒。桐君辛有毒。二月八月采。

名醫曰。生益州及漢中。八月采根陰乾。

案、後漢書華佗傳云。佗授以漆葉青黏散。漆葉屑一斗。青黏十四兩。以是爲率。言久服去三蟲。利五藏。輕體。使人頭不白。

蜀漆。味辛平。主瘧及欬逆寒熱。腹中癥堅。痞結積聚。邪氣蠱毒。鬼注。舊作注。御覽作蛀。生川谷。

吳普曰。蜀漆葉。一名恆山。神農、岐伯、雷公、辛有毒。黃帝、辛。一經、酸。如漆葉藍菁相似。五月采。御覽

名醫曰。生江陵山及蜀漢中。常山苗也。五月采葉陰乾。

案、廣雅云。恆山。蜀漆也。范子計然云。蜀漆出蜀郡。

甘遂。味苦寒。主大腹疝瘕。腹滿。面目浮腫。留飲宿食。破癥堅積聚。利水穀道。一名主田。生川谷。

吳普曰。甘遂一名主田。一名白澤。一名重澤。一名鬼醜。一名陵藁。一名甘藁。一

名甘澤。神農、桐君、苦有毒。岐伯、雷公、有毒。須二月八月采。御覽

名醫曰。一名甘藁。一名陵藁。一名重澤。生中山。二月采根陰乾。

案、廣雅云。陵澤。甘遂也。范子計然云。甘遂出三輔。

白欬。味苦平。主癰腫疽創。散結氣止痛。除熱。目中赤。小兒驚癇溫瘧。女子陰中腫痛。一名兔核。一名白草。生山谷。

名醫曰。一名白根。一名崑崙。生衡山。二月八月采根暴乾。

案。說文云。蕞。白蕞也。或作蕞。毛詩云。蕞蔓于野。陸璣疏云。蕞似栝樓。葉盛而細。其子正黑如燕薹。不可食也。幽人謂之烏服。其莖葉煮以哺牛除熱。爾雅云。蕞。菟荻。郭璞云。未詳。據玉篇云。蕞。白蕞也。經云。一名菟核。核與荻聲相近。卽此矣。青箱子。味苦微寒。主邪氣皮膚中熱。風搔身痒。殺三蟲。子名草決明。療脣口青。一名草蒿。一名萋蒿。生平谷。

名醫曰。生道傍。三月三日采莖葉陰乾。五月六日采子。

案。魏略云。初平山有青牛先生。常服青箱子。箱當作箱字。

藿菌。味鹹平。主心痛溫中。去長蟲。白癰螻蟲蛇螫毒。癰瘕諸蟲。一名藿蘆。生池澤。

名醫曰。生東海及渤海章武。八月采陰乾。

案。爾雅云。漚灌茵芝。文選注引作茵。聲類云。漚灌。茵芝也。疑卽此漚菌。或一名漚。一名芝。未敢定之。

白及御覽作芡味苦平。主癰腫惡創。敗疽傷陰死肌。胃中邪氣。賊風鬼擊。痲緩不收。一名甘根。一名連及草。生川谷。

吳普曰。神農苦。黃帝辛。李氏大寒。雷公辛無毒。莖葉似生薑。藜蘆。十月花直上紫赤。根白連。二月八月九月采。

名醫曰。生北山及冤句及越山。

案。隋羊公服黃精法云。黃精一名白及。亦爲黃精別名。今名醫別出黃精條。

大戟味苦寒。主蠱毒。十二水腫。滿急痛積聚。中風。皮膚疼痛吐逆。一名印鉅。案此川澤三字者古或與澤漆爲一條

名醫曰。生常山。十二月采根陰乾。

案。爾雅云。蓐。印鉅。郭璞云。今藥草大戟也。淮南子繆稱訓云。大戟去水。

澤漆味苦微寒。主皮膚熱。大腹水氣。四肢面目浮腫。丈夫陰氣不足。生川澤。

名醫曰。一名漆莖。大戟苗也。生太山。三月三日七月七日采莖葉陰乾。

案。廣雅云。漆莖澤漆也。

苗芋味苦溫。主五臟邪氣。心腹寒熱羸瘦如瘡狀。發作有時。諸關節風濕痺痛。生

川谷。

吳普曰。苗芋一名卑共。微溫有毒。狀如莽草而細軟。御覽

名醫曰。一名莞草。一名卑共。生太山。三月三日采葉陰乾。

貫衆。味苦微寒。主腹中邪熱氣諸毒蟲。三蟲。一名貫節。一名貫渠。一名百頭。御覽

一名虎卷。一名扁符。生山谷。

吳普曰。貫衆一名貫來。一名貫中。一名渠母。一名貫鍾。一名伯芹。一名藥藻。一

名扁符。一名黃鍾。神農歧伯苦有毒。桐君扁鵲苦。一經甘有毒。黃帝鹹酸。一經

苦無毒。葉黃兩兩相對。莖黑。毛聚生。冬夏不老。四月花。八月實黑聚相連卷。旁

行生。三月八月采根。五月采葉。御覽

名醫曰。一名伯萍。一名藥藻。此謂草鴟頭。生元山及冤句少室山。二月八月采

根陰乾。

案說文云。葍。草也。廣雅云。貫節。貫衆也。爾雅云。藥。貫衆。郭璞云。葉圓銳莖。毛黑

布地。冬夏不死。一名貫渠。又上云。扁符止。郭璞云。未詳。據經云。一名扁符。卽此

也。爾雅當云。扁符止。藥。貫衆。



莧花。味苦平寒。主傷寒溫瘧。下十二水。破積聚大堅癥瘕。蕩滌腸胃中留癖飲食。寒熱邪氣。利水道。生山谷。

名醫曰。生咸陽及河南中牟。六月采花陰乾。

牙子。味苦寒。主邪氣熱氣。疥搔惡瘍創痔。去白蟲。一名狼牙。生川谷。

吳普曰。狼牙一名支蘭。一名狼齒。一名犬牙。一名抱子。神農黃帝苦有毒。桐君或鹹。岐伯雷公扁鵲苦無毒。生冤句。葉青根黃赤。六月七月花。八月實黑。正月

八月采根。覽御

名醫曰。一名狼齒。一名狼子。一名犬牙。生淮南及冤句。八月采根暴乾。

案。范子計然云。狼牙出三輔。色白者善。

羊躑躅。味辛溫。主賊風在皮膚中淫淫痛。溫瘧惡毒諸痺。生川谷。

吳普曰。羊躑躅花。神農雷公辛有毒。生淮南。治賊風惡毒諸邪氣。覽御

名醫曰。一名玉支。生太行山及淮南山。三月采花陰乾。

案。廣雅云。羊躑躅。莢光也。古今注云。羊躑躅花黃。羊食之則死。羊見之則躑躅分散。故名羊躑躅。陶宏景云。花似苗鹿蔥。

商陸。味辛平。主水腫。張疝。癰瘕。除癰腫。殺鬼精物。一名蔦根。一名夜呼。生山谷。

名醫曰。如人形者有神。生成陽。

案。說文。蔦。草枝枝相值。葉葉相當。廣雅云。常蔦。馬尾蔦。陸也。爾雅云。蔦。蔦。馬尾。郭璞云。今關西亦呼爲蔦。江東爲當陸。周易夬云。莧陸夬夬。鄭元云。莧。陸。商陸也。蓋蔦即蔦。俗字商即蔦假音。

羊蹄。味苦寒。主頭禿。疥搔。除熱。女子陰蝕。御覽此四字作黑一名東方宿。一名連蟲陸。一名鬼目。生川澤。

名醫一名蓄。生陳留。

案。說文云。莧。草也。讀若釐。蔦。釐草也。莧。莧草也。廣雅云。莧。羊蹄也。毛詩云。言采其蔦。箋云。蔦。牛薺也。陸德明云。本又作蓄。陸璣云。今人謂之羊蹄。陶宏景云。今人呼禿菜。即是蓄音之譌。詩云。言采其蓄。按陸英疑即此草之花。此草一名連蟲。陸又陸英。即莧蔦。一名莧也。亦苦寒。

蔦蓄。味辛平。主浸淫。疥搔。疽痔。殺三蟲。御覽引云。一名蔦。竹大觀本黑字。生山谷。

吳普曰。蔦蓄一名蓄辯。一名蔦蔦。御覽

名醫曰。生東萊。五月采陰乾。

案說文云。篇。篇莧也。莧。篇莧也。薄水篇莧。讀若督。爾雅云。竹。篇蓄。郭璞云。似小藜赤莖節。好生道旁可食。又殺蟲。毛詩云。綠竹猗猗。傳云。竹。篇竹也。韓詩薄云。薄篇莧也。石經同。

狼毒。味辛平。主欬逆上氣。破積聚飲食。寒熱水氣。惡創鼠瘻疽蝕。鬼精蟲毒。殺飛鳥走獸。一名續毒。生山谷。

名醫曰。生秦亭及奉高。二月八月采根陰乾。

案廣雅云。狼毒也。疑上脫續毒二字。中山經云。大隗之山有草焉。其狀如蓍而毛。青花而白實。其名曰狼。服之不夭。可以爲腹病。

白頭翁。味苦溫。主溫瘧狂易。寒熱癰瘕。積聚瘕氣。逐血止痛。療金瘡。一名野丈人。一名胡王使者。生山谷。

吳普曰。白頭翁一名野丈人。一名奈河草。神農。扁鵲。苦無毒。生蒿山川谷。破氣

狂寒熱止痛。

御覽

名醫曰。一名奈河草。生高山及田野。四月采。

案陶宏景云。近根處有白茸。狀似人白頭。故以爲名。

鬼臼。味辛溫。主殺蟲毒。鬼注精物。辟惡氣不祥。逐邪解百毒。一名爵犀。一名馬目毒公。一名九臼。生山谷。

吳普曰。一名九臼。一名天血。一名雀犀。一名馬目公。一名解毒。生九真山谷及冤句。二月八月采根。御覽

名醫曰。一名天臼。一名解毒。生九真及冤句。二月八月采根。

羊桃。味苦寒。主燔熱身暴赤色。風水積聚惡瘍。除小兒熱。一名鬼桃。一名羊腸。生山谷。

名醫曰。一名萇楚。一名御弋。一名鉋弋。生山林及田野。二月采陰乾。

案說文云。萇萇楚鉋弋。一名羊桃。廣雅云。鬼桃。鉋弋。羊桃也。中山經云。豐山多羊桃。狀如桃而方莖。可以爲皮張。爾雅云。長楚姚苳。郭璞云。今羊桃也。或曰鬼桃。葉似桃花。白子如小麥。亦似桃毛。詩云。隰有萇楚。傳云。萇楚。鉋弋也。陸璣云。今羊桃是也。葉長而狹。花紫赤色。其枝莖弱過一尺。引蔓於草上。今人以爲汲灌。重而善沒。不如楊柳也。近下根刀切其皮。著熱灰中。脫之可韜筆管。

女青。味辛平。主蠱毒。逐邪惡氣。殺鬼。溫瘧。辟不祥。一名雀瓢。御覽作瓢

吳普曰。女青一名霍由祗。神農黃帝辛。御覽

名醫曰。蛇銜根也。生朱崖。八月采。陰乾。

案廣雅云。女青。烏葛也。爾雅云。藿。芄蘭。郭璞云。藿。芄蔓生。斷之有白汁可啖。毛

詩云。芄蘭之支。傳云。芄蘭草也。陸璣云。一名蘿摩。幽州人謂之雀瓢。別錄云。雀

瓢。白汁。主蟲蛇毒。即女青苗汁也。唐本草別出蘿摩條。非。

連翹。味苦平。主寒熱。鼠瘻。癰瘰。癰腫。惡創。癰瘤。結熱。蠱毒。一名異翹。一名蘭華。一

名軹。一名三廉。生山谷。

名醫曰。一名折根。生太山。八月采。陰乾。

案爾雅云。連異翹。郭璞云。一名連若。又名連草。

蘭茹。御覽作蘭。味辛寒。主蝕惡肉。敗創死肌。殺疥蟲。排膿惡血。除大風熱氣。善忘不

樂。生川谷。

吳普曰。閭茹一名離樓。一名屈居。神農辛。歧伯酸鹹有毒。李氏大寒。二月采。葉  
員黃。高四五尺。葉四四相當。四月華黃。五月實黑。根黃有汁。亦同黃。三月五月



采根。黑頭者良。御覽

名醫曰。一名屈据。一名離婁。生代郡。五月采陰乾。

案廣雅云。屈居。蘆茹也。范子計然云。閭茹出武都。黃色者善。

為韭。味甘寒。主皮膚往來寒熱。利小腸。旁光氣。生山谷石上。

案廣雅云。昔邪。為韭也。在屋曰昔邪。在牆曰垣衣。西山經云。草蓐狀如為韭。唐

本注云。即石衣也。亦名石苔。又名石髮。案廣雅又云。石髮石衣也。未知是一否。

鹿藿。味苦平。主蠱毒。女子腰腹痛不樂。腸癰瘰癧。御覽作歷。瘍氣。生山谷。

名醫曰。生汶山。

案說文云。藿。鹿藿也。讀若剽。廣雅云。藿。鹿藿也。爾雅云。藿。鹿藿。其實蒞。郭璞云。

今鹿豆也。葉似大豆。根黃而香。蔓延生。

蚤休。味苦微寒。主驚癇。搖頭弄舌。熱氣在腹中。瘕疾。癰創陰蝕。下三蟲。去蛇毒。一

名蚤休。生川谷。

名醫曰。生山陽及冤句。

案鄭樵云。蚤休曰螫休。曰重樓金線。曰重臺。曰草甘遂。今人謂之紫河車。服食

家所用。而莖葉亦可愛。多植庭院間。

石長生。味鹹微寒。主寒熱惡創。火熱辟鬼氣不祥。御覽作辟惡一名丹草。云丹引

草生山谷。

吳普曰。石長生。神農。苦。雷公。辛。一經。甘。生咸陽。覽御

名醫曰。生咸陽。

陸英。味苦寒。主骨間諸痺。四肢拘攣疼酸。瘧寒痛。陰痿。短氣不足。脚腫。生川谷。

名醫曰。生熊耳及冤句。立秋采。又曰蒟藿。味酸溫有毒。一名莖。今本誤一名芡。

生田野。春夏采葉。秋冬采莖根。

案。說文云。莖草也。讀若釐。芡。莖草也。讀若急。藿。釐草也。廣雅云。篋盆。陸英。莓也。爾雅云。芡。莖草。唐本注。陸英云。此物蒟藿是也。後人不識。浪出蒟藿條。今注云。

陸英。味苦寒無毒。蒟藿。味酸溫有毒。既此不同。難謂一種。蓋其類爾。

藿草。味苦平。主久欬上氣。喘逆久寒。驚悸痂疥。白禿瘍氣。殺皮膚小蟲。生川谷。

吳普曰。王芻一名黃草。神農。雷公。□。生太山山谷。治身熱邪氣。小兒身熱氣。覽御

名醫曰。可以染黃作金色。生青州。九月十月采。

案、說文云。藎草也。藎王、芻也。爾雅云。藎王芻。郭璞云。藎、蓐也。今呼鷓鴣脚莎。毛詩云。綠竹猗猗。傳云。藎王、芻也。唐本注云。藎草、俗名藎蓐草。爾雅所謂王芻。牛扁、味苦微寒。主身皮創熱氣。可作浴湯。殺牛蟲小蟲。又療牛病。生川谷。

名醫曰。生桂陽。

案、陶宏景云。太常貯名扁特。或名扁毒。

夏枯草、味苦辛。主寒熱瘰癧鼠瘻頭創。破癥散癭結氣。脚腫濕痺輕身。一名夕句。一名乃東。生川谷。

名醫曰。一名燕面。生蜀郡。四月采。

芫華、味辛溫。主欬逆上氣。喉鳴喘急。咽腫短氣。蠱毒鬼瘧。疝瘕癰腫。殺蟲魚。一名去水。生川谷。舊在木部非

吳普曰。芫華一名去水。一名敗華。一名兒草根。一名黃大戟。神農、黃帝、有毒。扁鵲、歧伯、苦。李氏、大寒。二月生。葉青。加厚則黑。花有紫赤白者。三月花落盡。葉乃生。三月三日采花。芫花根一名赤芫根。神農、雷公、苦有毒。生邯鄲。九月八月采。陰乾久服令人洩。可用毒魚。御覽亦見圖經節文

名醫曰。一名毒魚。一名杜荒。其根名蜀桑。可用毒魚。生淮南。三月三日采花陰乾。

案說文云。荒。魚毒也。爾雅云。杭。魚毒。郭璞云。杭。大木子似栗。生南方。皮厚汁赤。中藏卵果。范子計然云。荒華出三輔。史記倉公傳。臨菑女子病蠅瘕。飲以荒花。一撮。出蠅可數升。病已。顏師古注。急就篇云。郭景純說誤耳。其生南方。用藏卵果。自別一荒木。乃左思所云。綿杭。枕櫨者耳。非毒魚之杭。

右。草下品四十九種。舊四十八種。考木部。荒華。宜入此。

巴豆。味辛溫。主傷寒溫瘧寒熱。破癥瘕結聚。堅積留飲。痰癖大腹水張。蕩練五臟六府。開通閉塞。利水穀道。去惡肉。除鬼毒。蠱注邪物。御覽作鬼殺蟲魚。一名巴叔。

舊作菽。御覽作菽。

生川谷。

吳普曰。巴豆一名巴菽。神農、岐伯、桐君、辛有毒。黃帝、甘有毒。李氏、熱。主寒溫。葉如大豆。八月采。御覽

名醫曰。生巴郡。八月采。陰乾。用之去心皮。

案廣雅云。巴朮。巴豆也。列仙傳云。元俗餌巴豆。淮南子說林訓云。魚食巴菽而

死。人食之而肥。

蜀菜，味辛溫。主邪氣欬逆。溫中逐骨節皮膚死肌寒溼痺痛。下氣。久服之。頭不白。輕身增年。生川谷。

名醫曰。一名巴椒。一名蓐藪。生武都及巴郡。八月采實陰乾。

案范子計然云。蜀椒出武都。赤色者善。陸璣云。蜀人作茶。又見秦椒。卽爾雅菜。陶宏景云。俗呼爲樛。

阜莢，味辛鹹溫。主風痺死肌。邪氣風頭淚出。利九竅。殺精物。生川谷。

名醫曰。生雍州及魯鄒縣。如豬牙者良。九月十月采陰乾。

案說文云。莢草實。范子計然云。阜莢出三輔。上價一枚一錢。廣志曰。雞栖子阜莢也。御覽阜卽草省文。

柳花，味苦寒。主風水黃疸面熱黑。一名柳絮。葉主馬疥痂創。實主潰癰逐膿血。子汁療渴。生川澤。

名醫曰。生琅邪。

案說文云。柳小楊也。樛河柳也。楊木也。爾雅樛河柳。郭璞云。今河旁赤莖小楊。



又旄澤柳。郭璞云。生澤中者。又楊蒲柳。郭璞云。可以爲箭。左傳所謂董澤之蒲。毛詩云。無折我樹杞。傳云。杞木名也。陸璣云。杞柳屬也。

棟實。味苦寒。主溫疾傷寒。大熱煩狂。殺三蟲疥瘍。利小便水道。生山谷。

名醫曰。生荆山。

案。說文云。棟木也。中山經云。其實如棟。郭璞云。棟木名。子如指頭。白而黏。可以浣衣也。淮南子時則訓云。七月其樹棟。高誘云。棟實鳳皇所食。今雒城旁有棟樹實。秋熟。

郁李仁。味酸平。主大腹水腫。面目四肢浮腫。利小便水道。根主齒齬。齬齒堅齒。一名爵李。生川谷。

吳普曰。郁李一名雀李。一名車下李。一名棟。見

名醫曰。一名車下李。一名棟。生高山及邱陵上。五月六月采根。

案。說文云。棟。白棟也。廣雅云。山李雀其酸也。爾雅云。常棟。棟。郭璞云。今關西有棟樹。子如櫻桃可食。毛詩云。六月食鬱。傳云。鬱。棟屬。劉楨毛詩義問云。其樹高五六尺。其實大如李。正赤。食之甜。又詩云。常棟之華。傳云。常棟。棟也。陸璣云。奧

李一名雀李。一曰車下李。所在山中皆有。其花或白或赤。六月中子熟。大如李子。可食。沈括補筆談云。晉宮閣銘曰。華林園中有車下李三百一十四株。莫李一株。

莽草。味辛溫。主風頭癰腫。乳癰。疔瘻。除結氣。疥搔。御覽有疽創二字殺蟲魚。生山谷。

莽草。味辛溫。主風頭癰腫。乳癰。疔瘻。除結氣。疥搔。御覽有疽殺蟲魚。生山谷。  
吳普曰。莽草一名春草。神農辛。雷公。桐君。苦有毒。生上谷。山谷中。或冤句。五月采。治風。御覽

名醫曰。一名蒺。一名春草。生上谷及冤句。五月采葉陰乾。

案中山經云。朝歌之山有草焉。名曰莽草。可以毒魚。又蕞山有木焉。其狀如棠而赤葉。可以毒魚。爾雅云。蒺。春草。郭璞云。一名芒草。本草云。周禮云。翦氏掌除蠹物。以莽草薰之。范子計然云。莽草出三輔者善。陶宏景云。字亦作蒺。

雷丸。御覽作雷公丸。味苦寒。主殺三蟲。逐毒氣。胃中熱利。丈夫不利。女子作摩膏。除小兒百病。御覽引云一名雷矢。十觀木作黑字。生山谷。

吳普曰。雷丸。神農。苦。黃帝。歧伯。桐君。甘有毒。扁鵲。甘無毒。李氏。大寒。御覽引云。一名雷實。

名醫曰。一名雷矢。一名雷實。生石城及漢中土中。八月采根暴乾。

案。范子計然云。雷矢出漢中。色白者善。

桐葉。味苦寒。主惡蝕創。著陰皮。主五痔。殺三蟲。華主傳豬創。飼豬肥大三倍。生山谷。

名醫曰。生桐柏山。

案。說文云。桐。榮也。梧。梧桐木。一名櫬。爾雅云。櫬。梧。郭璞云。今梧桐。又榮桐木。郭

璞云。卽梧桐。毛詩云。梧桐生矣。傳云。梧桐柔木也。

梓。白皮。味苦寒。主熱去三蟲。葉擣。傅豬創。飼豬肥大三倍。生山谷。

名醫曰。生河內。

案。說文云。梓。楸也。或作梓。椅梓也。楸。梓也。櫬。楸也。爾雅云。槐小葉曰櫬。郭璞云。

槐當爲楸。楸。細葉者爲櫬。又大而鼓。楸。郭璞云。老乃皮粗。鼓者爲楸。又椅梓。郭

璞云。卽楸。毛詩云。椅桐梓漆。傳云。椅。梓屬。陸璣云。梓者。楸之疏理。白色而生子

者曰梓。梓實。桐皮曰椅。

石南。味辛苦。主養腎氣。內傷陰衰。利筋骨。皮毛。實殺蟲毒。破積聚。逐風痺。一名鬼

目。生山谷。

名醫曰。生華陰。二月四月采實陰乾。

黃環。味苦平。主蠱毒鬼注。鬼魅邪氣。在臧中。除欬逆寒熱。一名凌泉。一名大就。生山谷。

吳普曰。蜀黃環。一名生芻。一名根韭。神農、黃帝、岐伯、桐君、扁鵲、辛。一經。味苦有毒。二月生。初出正赤。高二尺。葉黃圓端大。莖葉有汁黃白。五月實員。三月采根。根黃從理如車輻。解治蠱毒。見御覽

名醫曰。生蜀郡。三月采根陰乾。

案。蜀都賦有黃環。劉逵云。黃環出蜀郡。沈括補筆談云。黃環卽今朱藤也。天下皆有。葉如槐。其花穗懸紫色。如葛花。可作菜食。火不熟亦有小毒。京師人家園圃中作大架種之。謂之紫藤花者是也。

深疏。味辛寒。主身皮膚中熱。除邪氣。止遺溺。可作浴湯。生山谷及田野故邱虛地。名醫曰。一名巨骨。生熊耳山。四月采。

案。李當之云。深疏一名楊榼。一名牡荊。一名空疏。皮白中空。時時有節子。似枸

杞。冬日熟。色赤。味甘苦。

鼠李。主寒熱瘰癧創。生田野。

吳普曰。鼠李一名牛李。覽御

名醫曰。一名牛李。一名鼠梓。一名棹。采無時。

案。說文云。桼鼠梓木。爾雅云。桼鼠梓。郭璞云。楸屬也。今江東有虎梓。毛詩云。北山有桼。傳云。桼鼠梓。據名醫名鼠梓。未知是此否。唐本注云。一名趙李。一名阜李。一名烏槎。

藥實根。味辛溫。主邪氣諸痺疼酸。續絕傷。補骨髓。一名連木。生山谷。

名醫曰。生蜀郡。采無時。

案。廣雅云。貝父藥實也。

藥華。味苦寒。主目痛淚出。傷皆消。目腫。生川谷。

名醫曰。生漢中。五月采。

案。說文云。藥木似欄。山海經云。雲雨之山。有木名藥。黃木赤枝青葉。羣帝焉取藥。白虎通云。諸侯墓樹柏。大夫藥。士槐。沈括補筆談云。藥有一種樹生。其實可



作數珠者。謂之木欒。本草欒花是也。

蔓椒。味苦。主風寒溼痺。歷節疼。除四肢厥氣。郛痛。一名豕椒。生川谷及邱冢間。

名醫曰。一名豬椒。一名蕘椒。一名狗椒。生雲中。采莖根。煮釀酒。

案。陶宏景云。俗呼爲樛。以椒薰小。不香爾。一名豨椒。可以蒸病出汗也。

右。木下品一十七種。舊十八種。今移芫花入草。

豚卵。味苦溫。主驚癇瘕疾。鬼注蟲毒。除寒熱貫豚。五癰邪氣。攣縮。一名豚顛。懸蹄主五痔。伏熱在腸。腸癰內蝕。

案。說文云。豨。小豚也。從豕省。象形。從又。持肉以給祭祀。篆文作豚。方言云。豬其予。或謂之豚。或謂之豨。吳揚之間。謂之豬子。

麋脂。味辛溫。主癰腫惡創死肌。風寒溼痺。四肢拘緩不收。風頭腫氣。通腠理。一名官脂。生山谷。

名醫曰。生南山及淮海邊。十月取。

案。說文云。麋。鹿屬。冬至解其角。漢書云。劉向以爲麋之爲言迷也。蓋牝獸之淫者也。

鰕鼠主墮胎令人產易生平谷。

名醫曰生山谷。

案說文云鰕鼠形飛走且乳之鳥也。籀文作鰕。廣雅云鵲鵲飛鵲也。陶宏景云是鰕鼠一名飛生見爾雅云鰕鼠夷由也。舊作鰕非。

六畜毛蹄甲味鹹平主鬼注蟲毒寒熱驚癇瘕瘕狂走駱駝毛尤良。

案陶宏景云六畜謂馬牛羊豬狗雞也蹄即躡省文。

右獸下品四種舊同。

蝦蟆味辛寒主邪氣破癥堅血癰腫陰創服之不患熱病生池澤。

名醫曰一名蟾蜍一名鰕一名去甫一名苦蠶生江湖五月五日取陰乾東行者良。

案說文云蝦蝦蟆也。蟆蝦蟆也。鰕蝦蟆也。鰕光鰕詹諸也。其鳴詹諸。其皮鰕鰕。其行光光。或作鰕鰕。鰕鰕詹諸也。夏小正傳云蜮也者長股也。或曰屈造之屬也。詩曰得此鰕鰕言其行鰕鰕。鰕鰕詹諸以脰鳴者。廣雅云蚊苦蠶胡鰕蝦蟆也。爾雅云鰕鰕蟾諸。郭璞云似蝦蟆居陸地淮南謂之去蚊。又蟄蟆。郭璞云蛙。

類。周禮云。蝮氏。鄭司農云。蝮讀爲蜮。蜮。蝦蟆也。元謂蝮。今御所食蛙也。月令云。仲夏之月。反舌無聲。蔡邕云。今謂之蝦蟆。薛君韓詩注云。戚施蟾蜍。高誘注。淮南子云。蟾蜍蟾也。又蝮蝦蟆也。又蟾蜍蝦蟆。又鼓造。一曰蝦蟆。抱朴子內篇云。或問魏武帝曾收左元放而桎梏之。而得自然解脫。以何法乎。抱朴子曰。以自解去父血。

馬刀。味辛微寒。

御覽有補中二字。大觀本黑字。

主漏下赤白。寒熱。破石淋。殺禽獸賊鼠。生池澤。

吳普曰。馬刀一名齊蠶。神農岐伯桐君。鹹有毒。扁鵲小寒大毒。生池澤江海。采無時也。御覽

名醫曰。一名馬蛤。生江湖及東海。采無時。

案范子計然云。馬刀出河東。藝文類聚引本經云。文蛤表有文。又曰馬刀。一曰名蛤。則豈古本與文蛤爲一邪。

蛇蛻。味鹹平。主小兒百二十種驚癇。瘕瘕瘕疾。寒熱腸痔。蟲毒蛇癰。火熬之良。一名龍子衣。一名蛇符。一名龍子單衣。一名弓皮。生川谷及田野。吳普曰。蛇蛻一名龍子單衣。一名弓皮。一名蛇附。一名蛇筋。一名龍皮。一名龍

單衣。見御覽

名醫曰。一名龍子皮。生荊州。五月五日十五日取之良。

案。說文云。它。蟲也。从虫而長。象冤曲。𧈧尾形。或作蛇。蛇。蛻蟬所解皮也。廣雅云。蝮。蛻蛻也。中山經云。來山多空奪。郭璞云。卽蛇皮脫也。

邱蚓。味鹹寒。主蛇瘕。去三蟲。伏尸鬼注。蠱毒。殺長蟲。仍自化作水。生平土。

吳普曰。蚯蚓一名白頸螻蛄。一名附引。見御覽

名醫曰。一名土龍。二月取。陰乾。

案。說文云。蟻行者。或作蚓。蟻。蟻也。廣雅云。蚯蚓。蛻蟬引長也。爾雅云。蟻。蟻。蟻。蟻。郭璞云。卽蜚蠊也。江東呼寒蚓。舊作蚯。非。呂氏春秋淮南子。邱蚓出。不从虫。又說山訓云。蟻無筋骨之強。高誘注。蟻一名蜷端也。舊又有白頸二字。據吳普古本當無也。

蟻。味辛平。主久聾。欬逆毒氣。出刺出汗。生山谷。

名醫曰。一名土蜂。生熊耳及牂柯。或人屋間。

案。說文云。蟻。蟻。蟻。蟻。細腰土蜂也。或作蝼。蟻。蟻。蟻。蟻。廣雅云。土蜂。蟻。蟻也。爾

雅土蜂。毛詩云。螟蛉有子。蜾蠃負之。傳云。蜾蠃蒲盧也。禮記云。夫政也者。蒲盧也。鄭云。蒲盧。蜾蠃。謂土蜂也。方言云。蠶其小者。謂之蠶蟪。或謂之蚴蛻。說文無蠶字。或當爲醫。

吳蚣。味辛溫。主鬼注。蠱毒。噉諸蛇蟲魚毒。殺鬼物。老精溫瘧。去三蟲。御覽引云。一本在水。生川谷。

名醫曰。生大吳江南。赤頭足者良。

案。廣雅云。蜉蝣。吳公也。

水蛭。味鹹平。主逐惡血。瘀血。月閉。御覽作水閉。破血瘕積聚。無子。利水道。生池澤。

名醫曰。一名蚊。一名至掌。生雷澤。五月六月采。暴乾。

案。說文云。蛭。蟻也。蛭。至掌也。爾雅云。蛭。蟻。郭璞云。今江東呼水中蛭蟲。入

人肉者爲蟻。又蛭。蛭至掌。郭璞云。未詳。據名醫。即蛭也。

班苗。味辛寒。主寒熱。鬼注。蠱毒。鼠瘻。惡創。疽蝕死肌。破石瘻。一名龍尾。生川谷。

吳普曰。班猫。一名班蚝。一名龍蚝。一名班苗。一名勝髮。一名盤蚤。一名晏青。神

農辛。歧伯。鹹。桐君。有毒。扁鵲。甘。有大毒。生河內川谷。或生水石。



名醫曰。生河東。八月取陰乾。

案說文云。蟹。蟹。毒蟲也。廣雅云。蟹。蟹。晏清也。名醫別出荒青條。非。荒。晏音相近也。舊作猫。俗字。據吳氏云。一名班苗是也。

貝子。味鹹平。主目翳。鬼注。蠱毒。腹痛下血。五癰。利水道。燒用之良。生池澤。

名醫曰。一名貝齒。生東海。

案說文云。貝。海介蟲也。居陸名蜃。在水名蜃。象形。爾雅云。貝小者蜃。郭璞云。今細貝亦有紫色。出日南。又蜃小而精。郭璞云。即上小貝。

石蠶。味鹹寒。主五癰。破石淋。墮胎。內解結氣。利水道。除熱。一名沙蟲。生池澤。

吳普曰。石蠶一名沙蟲。神農。雷公。酸無毒。生漢中。治五淋。破腹內結氣。利水道。除熱。御覽

名醫曰。生江漢。

案廣雅云。沙蟲。蜃蛻也。淮南萬畢術云。沙蟲一名蓬活。一名地脾。御覽蟲豸部引李當之云。類蟲形如老蠶。生附石。廣志云。沙蟲背色赤。大過蟻。在水中入人皮中殺人。與李氏不同。



時則訓云。孟夏之月。螻蛄鳴。高誘云。螻、螻蛄也。方言云。蛄。蛄謂之杜格。螻蛄謂之螻蛄。或謂之螻蛄。南楚謂之杜狗。或謂之蛄螻。陸璣詩疏云。本草又謂螻蛄。爲石鼠。今無文。

馬陸。味辛溫。主腹中大堅癥。破積聚。息肉。惡創白禿。一名百足。生川谷。

吳普曰。一名馬軸。覽御

名醫曰。一名馬軸。生元菟。

案說文云。蠋。馬蠋也。从虫。𠂔聲。𠂔象形。明堂月令曰。腐草爲蠋。廣雅云。蛆蟪。馬蠋。馬蠋也。又馬踐。蠋蛆也。爾雅云。蝦。馬踐。郭璞云。馬蠋。𠂔。俗呼馬蠋。淮南子。時則訓云。季夏之月。腐草化爲蛆。高誘云。蛆。馬蠋也。幽冀謂之秦渠。又汜論訓云。蛆足衆而走不若蛇。又兵略訓云。若蛆之足。高誘云。蛆。馬蠋也。方言云。馬蠋。北燕謂之蛆渠。其大者謂之馬蠋。博物志云。馬蠋。一名百足。中斷成兩段。各行而去。

地膽。味辛寒。主鬼注寒熱鼠瘻。惡創死肌。破癥瘕。墮胎。一名玩青。生川谷。

吳普曰。地膽一名元青。一名杜龍。一名青虹。覽御

名醫曰。一名青蛙。生汶山。八月取。

案。廣雅云。地膽。蛇要。青蠶。青蠟也。陶宏景云。狀如大馬蟻有翼。僞者即斑猫所化。狀如大豆。

鼠婦。味酸溫。主氣癰。不得小便。婦人月閉。血癥瘕。寒熱利水道。一名負蟠。一名蟬威。生平谷。

名醫曰。一名蜚蠊。生魏郡及人家地上。五月五日取。

案。說文云。蚘。蚘威。委。委。委。鼠婦也。蟠。鼠婦也。爾雅云。蟠。鼠負。郭璞云。瓮器底

蟲。又蚘威。委。委。郭璞云。舊說鼠婦。別名毛詩云。伊威在室。傳云。伊威。委。委也。陸

璣云。在壁根下。甕底中。生似白魚。

熒火。味辛微溫。主明目。小兒火創。傷熱氣。蠱毒鬼注。通神。一名夜光。御覽引云一名

柳作黑字生池澤。

吳普曰。一名夜炤。一名熠燿。一名救火。一名景天。一名據火。一名挾火。藝文

名醫曰。一名放光。一名熠燿。一名即炤。生階地。七月七日收陰乾。

案。說文云。爚。兵死及牛馬之血為爚。鬼火也。从炎舛。爾雅云。熒火即炤。郭璞云。

夜飛腹下有火。毛詩云。熠燿宵行。傳云。熠燿、燐也。燐、螢火也。月令云。季夏之月。腐草化為螢。鄭元云。螢、飛蟲。螢火也。據毛萇以螢為燐是也。說文無螢字。當以燐為之。爾雅作燐亦是。舊作螢。非。又按月令腐草為螢。當是燭字假音。

衣魚。味鹹溫無毒。主婦人疝瘕。小便不利。御覽作小兒中風。御覽作項強。御覽作彊背。

起摩之一名白魚。生平澤。

吳普曰。衣中白魚一名蟬。御覽

名醫曰。一名蟬。生咸陽。

案說文云。蟬、白魚也。廣雅云。白魚、蛎魚也。爾雅云。蟬、白魚。郭璞云。衣書中蟲。一

名蛎魚。

右蟲魚下品一十八種。舊同。

桃核仁。味苦平。主瘀血血閉。瘕邪。殺小蟲。桃花殺注惡鬼。令人好顏色。桃鳧微溫。主殺百鬼精物。初學記引云。集桃在樹不落。殺百鬼。桃毛主下血瘕。寒熱積寒無子。桃蠹殺鬼邪惡。不祥。生川谷。

名醫曰。桃核七月采取。仁陰乾。花三月三日采。陰乾。桃鳧一名桃奴。一名集景。



是實著樹不落實中者。正月采之。桃蠹食桃樹蟲也。生太山。

案說文云。桃果也。玉篇云。桃毛果也。爾雅云。桃李醜核。郭璞云。子中有核仁。孫炎云。桃李之實類皆有核。

杏核仁味甘溫。主欬逆上氣。雷鳴喉痺。下氣產乳。金創寒心。黃豚。生川谷。

名醫曰。生晉山。

案說文云。杏果也。管子地員篇云。五沃之土。其木宜杏。高誘注淮南子云。杏有竅在中。

右果下品二種。舊同。

腐婢味辛平。主疥癰寒熱邪氣。洩利陰不起。病酒頭痛。生漢中。

吳普曰。小豆花一名腐婢。舊作付神農甘毒。七月采陰乾。四十日。治頭痛止渴。

覽御

名醫曰。生漢中。即小豆花也。七月采陰乾。

右米穀下品一種。舊同。

苦瓠味苦寒。主大水面目四肢浮腫。下水令人吐。生川澤。

名醫曰。生晉地。

案。說文云。瓠。匏。瓠也。廣雅云。匏。瓠也。爾雅云。瓠。棲。辨。毛詩云。匏有苦葉。傳云。匏。謂之瓠。又八月斷壺。傳云。壺。瓠也。古今注云。瓠。壺。蘆也。壺。蘆。瓠之無柄者。瓠有柄者。又云。瓢。瓠也。其總曰匏。瓠則別名。

水斷。味甘平。主女子赤沃。止血養精。保血脈。益氣。令人健嗜食。一名水英。生池澤。

名醫曰。生南海。

案。說文云。芹。楚葵也。苳。菜類也。周禮有苳苳。爾雅云。芹。楚葵。郭璞云。今水中芹。菜。字林云。琴草。生水中。根可緣器。又云。苳菜似蒜。生水中。

右。菜下品二種。舊同。

彼子。味甘溫。主腹中邪氣。去三蟲。蛇螫蟲毒。鬼注。伏尸。生川谷。舊在唐本退中

名醫曰。生永昌。

案。陶宏景云。方家從來無用此者。古今諸醫及藥家。了不復識。又一名鰕子。不知其形何類也。掌禹錫云。樹似杉。子如檳榔。本經蟲部云。彼子。蘇注云。彼子。合從木。爾雅云。彼。一名排。

三品合三百六十五種。法三百六十五度。一度應一日。以成一歲。倍其數合七百三十名也。

掌禹錫云。本草例神農本經以朱書。名醫別錄以墨書。神農藥三百六十五種。今此言倍其數合七百三十名。是併名醫別錄副品而言也。則此下節別錄之文也。當作墨書矣。蓋傳寫浸久。朱墨錯亂之所致耳。

案禹錫說是也。改爲細字。

藥有君臣佐使。以相宣攝合和。宜用一君二臣三佐五使。又可一君三臣九佐使。藥有陰陽配合。子母兄弟。根莖華實。草石骨肉。有單行者。有相須者。有相使者。有相畏者。有相惡者。有相反者。有相殺者。凡此七情。合和視之。當用相須相使者。良勿用相惡相反者。若有毒宜制。可用相畏相殺者。不爾勿合用也。

藥有酸鹹甘苦辛五味。又有寒熱溫涼四氣。及有毒無毒。陰乾暴乾。采造時月。生熟土地所出。真僞陳新。並各有法。

藥性有宜丸者。宜散者。宜水煮者。宜酒漬者。宜膏煎者。亦有一物兼宜者。亦有不

可入湯酒者。並隨藥性。不得違越。欲療病。先察其原。先候病機。五藏未虛。六府未竭。血脈未亂。精神未散。服藥必活。

若病已成。可得半愈。病勢已過。命將難全。

若用毒藥療病。先起如黍粟。病去即止。不去倍之。不去十之。取去爲度。

療寒以熱藥。療熱以寒藥。飲食不消。以吐下藥。鬼注蟲毒。以毒藥。癰腫創瘡。以創藥。風溼以風溼藥。各隨其所宜。

病在胸膈以上者。先食後服藥。病在心腹以下者。先服藥而後食。病在四肢血脈者。宜空腹而在旦。病在骨髓者。宜飽滿而在夜。

夫大病之主。有中風傷寒。寒熱溫瘧。中惡霍亂。大腹水腫。腸澼下利。大小便不通。貴肫上氣欬逆。嘔吐黃疸消渴。留飲癖食。堅積癥瘕。驚邪癰疽。鬼注喉痺。齒痛耳聾。目盲。金創踠折。癰腫惡創。痔瘻癰瘤。男子五勞七傷。虛乏羸瘦。女子帶下崩中。血閉陰蝕。蟲蛇蠱毒所傷。此大略宗兆。其間變動枝葉。各宜依端緒以取之。

右序例白字

## 本草經佚文

上藥令人身安命延。昇天神仙。遨遊上下。役使萬靈。體生毛羽。行廚立至。抱朴子內篇引

神農經據太  
平御覽校

中藥養性。下藥除病。能令毒蟲不加。猛獸不犯。惡氣不行。衆妖併辟。引抱朴子內篇

太一子曰。凡藥上者養命。中者養性。下者養病。引藝文類聚

太一子曰。凡藥上者養命。中藥養性。下藥養病。神農乃作赭鞭鉤鋤。尺制從六陰

陽。與太乙外字巡五岳四瀆。土地所生。草石骨肉心灰皮毛羽萬千類。皆鞭問之。得

其所能治主。當其五味。一日誤作百七十毒。引太平御覽

神農稽首再拜。問於太乙子曰。曾聞之時壽過百歲。而徂落之咎。獨何氣使然也。

太乙子曰。天有九門。中道最良。神農乃從其嘗藥。以拯救人命。神農本草經引

按此諸條。與今本經卷上文略相似。諸書所引。較本經文多。又云是太乙子說。

今無者。疑後節之。其云赭鞭鉤鋤。當是煮辨候製之假音。鞭問之。即辨問之。無

怪說也。

藥物有大毒。不可入口。鼻耳目者。即殺人。一曰鉤吻。盧氏曰陰地黃精不相二曰

鵠。狀如雞三曰陰命。赤色著木懸四曰內童。狀如鷺亦五曰鳩羽。如雀墨六曰

螭。生山中七曰螭。生海中八曰螭。生海中九曰螭。生海中十曰螭。生海中



藥種有五物。一曰狼毒。古斯解之。二曰巴頭。薑汁解之。三曰黎蘆。湯解之。四曰天雄。為頭。大豆解之。五曰班茅。戎鹽解之。毒菜害小兒。乳汁解。先食飲二升。博物志引神農經五芝及餌丹砂。玉札。曾青。雄黃。雌黃。雲母。太乙。禹餘糧。各可單服。皆令人飛行長生。抱朴子內篇引神農四經

春夏為陽。秋冬為陰。文選注引神農本草

春為陽。陽溫生萬物。同上

黃精與朮餌之。却粒。或遇凶年。可以絕粒。謂之米脯。太平御覽引抱朴子神農經

五味養精神。強魂魄。五石養髓。肌肉肥澤。諸藥其味酸者。補肝養心。除腎病。其味苦者。補心養脾。除肝病。其味甘者。補肺養脾。除心病。其味辛者。補肺養腎。除脾病。其味鹹者。補肺除肝病。故五味應五行。四體應四時。夫人性生於四時。然後命於五行。以一補身不死。命神以母養子。長生延年。以子守母。除病究年。太平御覽引神農經

案此諸條。當是玉石草木三品前總論。而後人節去。

## 附吳氏本草十一條

龍眼一名益智。一名比目。齊民要術

鼠尾一名勁。一名山陵翹。治痢也。太平御覽

滿陰實。生平谷。或圃中。延蔓如瓜。葉實如桃。七月采。止渴延年。太平御覽

千歲垣中膚皮。得薑赤石脂治。太平御覽

小華一名結草。太平御覽

木瓜生夷陵。太平御覽

穀樹皮治喉閉。一名楮。太平御覽

櫻桃味甘。主調中益氣。令人好顏色。美志氣。一名朱桃。一名麥英也。藝文類聚

李核治仆僵。花令人好顏色。太平御覽

大麥一名穰麥。五穀之盛無毒。治消渴除熱益氣。食蜜爲使。麥種一名小麥無毒。

治利而不中口。太平御覽

豉益人氣。太平御覽

暉日一名鳩羽。太平御覽

附諸藥制使

唐慎微曰。神農本經相使正各一種。兼以藥對參之。乃有兩三。

玉石上部

玉泉畏款冬花。

玉屑惡鹿角。

丹砂惡磁石。畏鹹水。

曾青畏菟絲子。

石膽。水英爲使。畏牡桂、茵桂、芫花、辛夷、白微。

鐘乳。蛇牀子爲使。惡牡丹、牡蒙、元參、人參、朮、羊血。畏紫石英、藜蘆。

雲母。澤瀉爲使。畏鮫甲及流水。

消石。火爲使。惡苦參、苦菜。畏女苑。

朴消。畏麥句薑。

芒消。石葦爲使。惡麥句薑。

礬石。甘草爲使。畏牡蠣。

滑石。石葦爲使。惡曾青。

紫石英。長石爲使。畏扁青、附子。不欲鮫甲、黃連、麥句薑、白石英。惡馬目、毒公。

赤石脂。惡大黃。畏荒花。

黃石脂。曾青爲使。惡細辛。畏蜚蠊。

太一餘糧。杜仲爲使。畏鐵落、菖蒲、貝母。

玉石中部

水銀。畏磁石。

殷孽。惡防己。畏朮。

孔公孽。木蘭爲使。惡細辛。

陽起石。桑螵蛸爲使。惡澤瀉、茵桂、雷丸、蛇脫皮。畏菟絲子。

石膏。鷄子爲使。惡莽草、毒公。

凝水石。畏地榆。解巴豆毒。

磁石。柴胡爲使。畏黃石脂。惡牡丹、莽草。

元石。惡松脂、柏子仁、茵桂。

玉石下部

礬石得火良。棘鍼爲使。惡虎掌、毒公、驚屎、細辛、水。  
青琅玕得水銀良。畏雞骨、殺錫毒。  
特生礬石得火良。畏水。  
代赭畏天雄。  
方解石惡巴豆。  
大鹽漏蘆爲使。

草藥上部

六芝。薯蕷爲使。得髮良。惡常山。畏扁青、茵陳。  
朮。防風、地榆爲使。  
天門冬。垣衣、地黃爲使。畏曾青。  
麥門冬。地黃、車前爲使。惡款冬、苦瓠。畏苦參、青蘘。  
女萎。畏鹵。  
乾地黃。得麥門冬、清酒良。惡貝母。畏蕪夷。  
昌蒲。秦艽、秦皮爲使。惡地膽麻黃。



澤瀉畏海蛤、文蛤。

遠志得茯苓、冬葵子、龍骨、良。殺天雄、附子毒。畏珍珠、蜚廉、藜蘆。

齊蛤、薯蕷、紫芝爲使。惡甘遂。

石斛、陸英爲使。惡凝水石、巴豆。畏白殭蠶、雷丸。

菊花、朮、枸杞根、桑根白皮爲使。

甘草、朮、乾漆、苦參爲使。惡遠志。反甘遂、大戟、芫花、海藻。

人參、茯苓爲使。惡深疏。反藜蘆。

牛薢、惡熒火、龜、陸英。畏白前。

細辛、曾青、東根爲使。惡狼毒、山茱萸、黃耆。畏滑石、消石。反藜蘆。

獨活、蠱石爲使。

柴胡、半夏爲使。惡阜莢。畏女苑、藜蘆。

菴藷子、荊子、薏苡仁爲使。

枳實子得荊子、細辛、良。惡乾薑、苦參。

龍膽、貫衆爲使。惡防葵、地黃。

菟絲子得酒良。薯蓣、松脂爲使。惡藟菌。  
巴戟天、覆盆子爲使。惡朝生、雷丸、丹參。  
蒺藜子爲頭爲使。

沙參惡防己。反藜蘆。

防風惡乾薑、藜蘆、白欬、芫花。殺附子毒。

絡石、杜仲、牡丹爲使。惡鐵落、畏菖蒲、貝母。

黃連、黃芩、龍骨、理石爲使。惡菊花、芫花、元參、白鮮皮。畏款冬。勝烏頭解巴豆毒。

丹參畏鹹水。反藜蘆。

天名精、垣衣爲使。

決明子、薯蓣爲使。惡大麻子。

續斷、地黃爲使。惡雷丸。

芎藭、白芷爲使。

黃耆惡龜甲。

杜若得辛夷、細辛良。惡柴胡、前胡。

蛇牀子惡牡丹、巴豆、貝母。

茜根畏鼠姑。

飛廉得烏頭良。惡麻黃。

薇銜得秦皮良。

五味子、菴蓉爲使。惡委蕤。勝烏頭。

草藥中部

當歸惡藺茹。畏菖蒲、海藻、牡蒙。

秦艽、昌蒲爲使。

黃芩、山茱萸、龍骨爲使。惡蔥實。畏丹砂、牡丹、藜蘆。

芍藥、須丸爲使。惡石斛、芒消。畏消石、鼈甲、小蘄。反藜蘆。

乾薑、秦椒爲使。惡黃連、黃芩、天鼠屎。殺半夏、葶藶毒。

藜蘆本畏藺茹。

麻黃、厚朴爲使。惡辛夷、石韋。

葛根殺野葛、巴豆、百藥毒。

前胡。半夏爲使。惡阜莢。畏藜蘆。

貝母。厚朴。白薇爲使。惡桃花。畏秦艽。礬石。莽草。反烏頭。

括樓。枸杞爲使。惡乾薑。畏牛膝。乾漆。反烏頭。

元參。惡黃耆。乾薑。大棗。山茱萸。反藜蘆。

苦參。元參爲使。惡貝母。漏蘆。菴絲子。反藜蘆。

石龍芮。大戟爲使。畏蛇蛻。吳茱萸。

草薺。薏苡爲使。畏葵根。大黃。柴胡。牡蠣。前胡。

石韋。滑石。杏仁爲使。得菖蒲良。

狗脊。草薺爲使。惡敗醬。

瞿麥。蘘草。牡丹爲使。惡螻蛄。

白芷。當歸爲使。惡旋覆花。

紫菀。款冬爲使。惡天雄。瞿麥。雷丸。遠志。畏茵陳。

白鮮皮。惡螻蛄。桔梗。茯苓。草薺。

白薇。惡黃耆。大黃。大戟。乾薑。乾漆。大棗。山茱萸。

紫參畏辛夷。

淫羊霍。薯蕷爲使。

款冬花。杏仁爲使。得紫苑良。惡阜莢、消石、元參、畏貝母、辛夷、麻黃、黃芩、黃連、黃耆、青柏。

牡丹畏菟絲子。

防己。殷孽爲使。惡細辛。畏葶藶。殺雄黃毒。

女苑畏鹵鹹。

澤蘭。防己爲使。

地榆得髮良。惡麥門冬。

海藻反甘草。

草藥下部

大黃。黃芩爲使。

桔梗。橘皮爲使。畏白及。反龍膽、龍眼。

甘遂。瓜蒂爲使。惡遠志。反甘草。



葶藶。榆皮爲使。得酒良。惡蠶蠶、石龍芮。

芫花。決明爲使。反甘草。

澤漆。小豆爲使。惡薯蕷。

大戟。反甘草。

鉤吻。半夏爲使。惡黃芩。

藜蘆。黃連爲使。反細辛、芍藥、五參。惡大黃。

烏頭。烏喙、莽草爲使。反半夏、栝樓、貝母、白斂、白及。惡藜蘆。

天雄。遠志爲使。惡腐婢。

附子。地膽爲使。惡蜈蚣。畏防風、甘草、黃耆、人參、烏韭、大豆。

貫衆。藿菌爲使。

半夏。射干爲使。惡皂莢。畏雄黃、生薑、乾薑、秦皮、龜甲。反烏頭。

蜀漆。栝樓爲使。惡貫衆。

虎掌。蜀漆爲使。畏莽草。

狼牙。蕪荑爲使。惡棗棘、地榆。

常山畏玉札。

白及。紫石英爲使。惡理石、李核仁、杏仁。

白斂。代赭爲使。反烏頭。

藺菌。得酒良。畏雞子。

藺茹。甘草爲使。惡麥門冬。

藎草。畏鼠婦。

夏枯草。土瓜爲使。

狼毒。大豆爲使。惡麥句薑。

鬼臼。畏垣衣。

木藥上部

茯苓。茯神、馬蘭爲使。惡白斂。畏牡蒙、地榆、雄黃、秦艽、龜甲。

杜仲。惡蛇蛻。元參。

柏實。牡蠣、桂心、瓜子爲使。畏菊花、羊蹄、諸石、麴麴。

乾漆。半夏爲使。畏雞子。

蔓荆子惡烏頭、石膏。

五加皮、遠志爲使。畏蛇皮、元參。

柏木惡乾漆。

辛夷、芎藭爲使。惡五石脂、畏昌蒲、蒲黃、黃連、石膏、黃環、酸棗仁。反防己。

槐子、景天爲使。

牡荊實、防己爲使。惡石膏。

### 木藥中部

厚朴、乾薑爲使。惡澤瀉、寒水石、消石。

山茱萸、蓼實爲使。惡桔梗、防風、防己。

吳茱萸、蓼實爲使。惡丹參、消石、白堊、畏紫石英。

秦皮、大戟爲使。惡茱萸。

占斯解狼毒。

梔子解躑躅毒。

秦椒惡括樓、防葵、畏雌黃。

桑根白皮。續斷、桂心、麻子爲使。

木藥下部

黃環。鳶尾爲使。惡茯苓、防己。

石南。五加皮爲使。

巴豆。芫花爲使。惡藁草。畏大黃、黃連、蘆薈。殺班貓毒。

欒華。決明爲使。

蜀椒。杏仁爲使。畏款冬。

深疏。漏蘆爲使。

阜茨。柏實爲使。惡麥門冬。畏空青、人參、苦參。

雷丸。荔實、厚朴爲使。惡葛根。

獸上部

龍骨。得人參、牛黃、良。畏石膏。

龍角。畏乾漆、蜀椒、理石。

牛黃。人參爲使。惡龍骨、地黃、龍膽、蜚蠊。畏牛膝。

白膠得火良。畏大黃。  
阿膠得火良。畏大黃。

獸中部

犀角。松脂爲使。惡藿菌、雷丸。

羖羊角。兔絲子爲使。

鹿茸。麻勃爲使。

鹿角。杜仲爲使。

獸下部

麋脂。畏大黃。

伏翼。莧實、雲實爲使。

天鼠屎。惡白斂、白微。

蟲魚上部

蜜蠟。惡芫花、齊蛤。

蜂子。畏黃芩、芍藥、牡蠣。



牡蠣。貝母爲使。得甘草、牛膝、遠志、蛇牀良。惡麻黃、吳茱萸、辛夷。

桑螵蛸畏旋覆花。

海蛤。蜀漆爲使。畏狗膽、甘遂、芫花。

龜甲惡沙參、蜚蠊。

蟲魚中部

蛻皮得酒良。畏桔梗、麥門冬。

蜥蜴惡硫黃、班貓、蕪荑。

露蜂房惡乾薑、丹參、黃芩、芍藥、牡蠣。

蠱蟲畏阜茨、菖蒲。

蟻螬。蜚蠊爲使。惡附子。

鼈甲惡礬石。

蟹殺葭蓍毒、漆毒。

鮀魚甲。蜀漆爲使。畏狗膽、甘遂、芫花。

烏賊魚骨惡白斂、白及。

蟲魚下部

蜣螂畏羊角、石膏。

蛇蛻畏磁石、及酒。

斑猫、馬刀爲使。畏巴豆、丹參、空青、惡膚青。

地膽惡甘草。

馬刀得水良。

果上部

大棗殺烏頭毒。

果下部

杏仁得火良。惡黃耆、黃芩、葛根。解錫胡粉毒。畏藜蘆草。

菜上部

冬葵子。黃芩爲使。

蔥實解藜蘆毒。

米上部

麻蕒、麻子、畏牡蠣、白微、惡茯苓。

米中部

大豆及黃卷、惡五參、龍膽、得前胡、烏喙、杏仁、牡蠣、良、殺烏頭毒。  
大麥、蜜爲使。

右二百三十一種。有相制使。其餘皆無。三十四種續添案

立冬之日。菊、卷柏先生時。爲陽起石、桑螵蛸。凡十物使主。二百草爲之長。

立春之日。木蘭、射干先生。爲柴胡、半夏使主。頭痛四十五節。

立夏之日。蜚蠊先生。爲人參、茯苓使主。腹中七節、保神守中。

夏至之日。豕首、茱萸先生。爲牡蠣、烏喙使主。四肢三十三節。

立秋之日。白芷、防風先生。爲細辛、蜀漆使主。胸背二十四節。原注右此五條出藥對中義旨淵深

非俗所究雖莫可遵用而  
是主統之本故亦載之

神農本草經終

〔元〕 李東垣 原編  
〔清〕 王晉三 重訂

珍珠囊補遺藥性賦

中國醫學大成





## 藥性賦提要

元李杲明之撰。是書撰成對語。原供初學醫者誦讀之需。如卷一總賦。列寒性藥六十六種。熱性藥六十種。溫性藥五十四種。平性藥六十八種。總記三百二十種。皆爲日用之藥。次用藥發明。藥性陰陽。標本用藥法。藥性升降浮沉補瀉法。五臟所欲。五臟所苦。五臭。五藏。五行。五色。五味。五走。五藏主禁例。手足三陽表裏引經主治例。諸藥瀉諸經之火邪。諸藥相反例。十八反歌。十九畏歌。六陳歌。五藏補瀉主治例。用藥凡例。卷二諸治指掌逐段錦。凡九十種。用藥須知。用藥法象。四時用藥法。用藥丸散。藥本五味歌。炮製藥歌。妊娠服藥禁忌歌。卷三列藥性。玉石部。草部。卷四。列木部。人部。禽獸部。蟲魚部。果品部。米穀部。蔬菜部。皆當熟讀強記。爲熟諳藥性之初步。不可以其淺陋而不重視也。

藥性賦 提要

# 序

往嘗向學。以未博醫爲欠事。一日。思取古人。旣目醫類爲小道。又謂人不可以不知醫。噫嘻。醫不可以不知也。亦不必於盡知也。非盡知不可也。顧吾所事者大。其餘所謂醫者。精神有分數。日月不長居也。君子於醫。苟知其概。以知之者付之專之者。斯固不害爲知也。此吾有取於藥性賦也。雖然。吾爲專於大者言也。苟有奇世之人。囊小大而無不知者。奚必盡守乎吾言。或曰。斯人也。吾見亦罕矣。此吾有取於藥性賦也。元山道人識。

藥性賦  
序

# 藥性賦目錄

## 卷一 總賦

寒性六十六種	一
熱性六十種	三
溫性五十四種	四
平性六十八種	六
用藥發明	八
用藥法	九
藥性升降浮沈補瀉法	一二
五臟所欲	一三
五臟所苦	一三
五氣湊五臟例	一四

五行五色五味走五臟主禁例	一四
手足三陽表裏引經主治例	一五
諸藥瀉諸經之火邪	一五
諸藥相反例	一五
十八反歌	一六
十九畏歌	一六
六陳歌	一六
五臟補瀉主治例	一七
用藥凡例	一八

## 卷二



主治指掌	一
用藥須知	二〇

卷二

玉石部	一
草部上	九
草部中	一四
草部下	二二

卷四

木部	一
人部	一〇
禽獸部	一一
蟲魚部	一四

果品部	一九
米穀部	二二
蔬菜部	二三

藥性賦目錄

卷一 總賦

寒性六十六種

犀角	微寒無毒	犀角	微寒無毒	羚羊角	寒無毒	澤瀉	寒無毒
海藻	寒無毒	海藻	寒無毒	菊花	寒無毒	射干	溫有毒
薏苡仁	寒無毒	薏苡仁	寒無毒	藕節	寒無毒	栝蒌子	無毒
車前子	寒無毒	車前子	寒無毒	黃蘗	無毒	兜鈴	無毒
地骨皮	無毒	地骨皮	無毒	薄荷葉	溫無毒	枳殼	寒無毒
枳實	微寒無毒	枳實	微寒無毒	乾葛	無毒	柴胡	無毒
百部	溫無毒	百部	溫無毒	梔子	無毒	元參	寒無毒
升麻	微寒無毒	升麻	微寒無毒	膩粉	無毒	金箔	無毒
茵陳	寒無毒	茵陳	寒無毒	瞿麥	寒無毒	朴硝	大寒無毒

石膏 味甘辛大 寒無毒

天門冬 味苦甘平 大寒無毒

大黃 味苦鹹大 寒無毒

茅根 味甘寒 無毒

生地黄 氣味 同寒上

牽牛 味苦寒 有毒

萱草根 味甘涼 無毒

地蘂子 味苦寒 無毒

旋覆花 味甘溫 無毒

地榆 味苦甘酸 微寒無毒

牡丹皮 味辛苦寒 微寒無毒

貝母 味辛苦平 微寒無毒

槐花 味苦平 無毒

熱性 六十種

前胡 味苦微 寒無毒

麥門冬 味甘平微 寒無毒

宣黃連 味苦甘微 寒無毒

石韋 味苦甘 平無毒

赤芍藥 味苦酸平微 寒有小毒

黃蘗 味苦微 寒有毒

側柏葉 味苦微 溫無毒

山豆根 味甘寒 無毒

荊芥穗 味辛苦 溫無毒

昆布 味辛酸 寒無毒

知母 味苦寒 無毒

桔梗 味辛苦微 寒無毒

常山 味苦辛 有毒

滑石 味甘鹹大 寒無毒

竹茹 味苦微 寒無毒

淫羊藿 味辛寒 無毒

熟地黄 味甘苦 寒無毒

白芍藥 氣味 同寒上

金鈴子 味酸苦 寒無毒

香附子 味甘微 寒無毒

白蘚皮 味苦鹹 無毒

栝蘂根 味苦寒 無毒

淡竹葉 味辛平大 寒無毒

牡蠣 味鹹平微 寒無毒

黃芩 味苦平大 寒無毒

葶藶 味辛苦大 寒無毒

麝香	無味辛溫	米醋	無味酸溫	虎骨	熱無辛微	紅豆蔻	溫味辛大	附子	熱有辛甘溫大	萆澄茄	無味辛溫	秦椒	熱寒有辛生溫	肉苳蓉	微溫甘酸鹹	菖蒲	無味辛溫	葫蘆巴	無味苦溫	天雄	溫有辛甘大	麻黃	溫無苦微	臘肭臍	熱無鹹性	萆撥	溫無辛大
生薑	溫味辛微	川芎	無味辛溫	韭子	無味辛溫	川椒	熱有辛溫	生卷柏	微寒辛甘溫平	丁香	無味辛溫	石硫黃	熱有酸溫大	吳茱萸	熱有辛溫大	蓬莪朮	溫味苦辛	白豆蔻	溫味辛大	乾漆	有微辛溫	檀香	無味辛熱	紫蘇	無味辛溫	五靈脂	無味甘溫
五味子	無味酸溫	斷續	溫無苦辛微	川烏	有辛熱	乾薑	熱無辛溫大	白朮	無味甘溫	良薑	熱無辛苦大	胡椒	無味辛溫	靈砂	無味甘溫	緒砂	無味辛溫	乳香	有微辛熱	鹿茸	溫無甘酸微	鹿角	無味鹹溫	藕豆	溫無味甘微	麒麟竭	有小甘鹹平

麋茸 味甘溫 無毒

鹿角膠 味鹹溫 無毒

烏藥 味辛溫 無毒

獨活 味苦甘平 微溫無毒

厚朴 味苦辛大 溫無毒

代赭 味苦甘 寒無毒

溫性五十四種

木香 味苦辛 熱無毒

蘿蔔 味辛甘 溫無毒

山藥 味甘溫 平無毒

陽起石 味酸微 溫無毒

蒼耳子 味甘溫 有小毒

艾葉 味苦微 溫無毒

紅藍花 味辛溫 無毒

當歸 味甘辛大 溫無毒

白花蛇 味甘鹹 溫有毒

禹餘糧 味甘寒 平無毒

山茱萸 味酸平微 溫無毒

肉桂 味甘辛大 熱有小毒

沉香 味辛微 溫無毒

半夏 味辛平微 寒溫有毒

鍾乳粉 味甘溫 無毒

阿膠 味甘平微 溫無毒

紫苑 味苦辛 溫無毒

威靈仙 味苦溫 無毒

羌活 味苦甘平 微溫無毒

劉寄奴 味苦溫 無毒

烏賊骨 味鹹微 溫無毒

烏梢蛇 味甘平 有小毒

巴豆 味辛生溫熱 寒有大毒

白石英 味甘辛 溫無毒

鯽魚 味甘溫 無毒

橘皮 味辛溫 無毒

蒼朮 味甘溫 無毒

青鹽 味鹹溫 無毒

赤石脂 味甘酸辛 大溫無毒

防風 味甘辛 溫無毒

細辛 味辛溫 無毒

白芷 味辛溫 無毒

苗芽葉 味苦微 溫有毒



骨碎補	味苦溫無毒	巴戟天	味甘微溫無毒	肉豆蔻	味辛溫無毒	薑黃	味苦辛大寒無毒	仙茅	味辛溫無毒	杏仁	味甘苦溫令利有毒	秦艽	味苦辛平溫無毒	紫石英	味甘平溫無毒	紫蘇子	味辛溫無毒	益智	味辛溫無毒	狗脊	味苦甘平微溫無毒	平性六十八種			
藿香葉	味苦辛微溫無毒	玄胡索	味辛溫無毒	撫芎	味辛溫無毒	防己	味辛苦平溫無毒	破故紙	味辛大溫無毒	茴香	味辛平無毒	檳榔	味辛溫無毒	橘核仁	味甘酸無毒	淡豆豉	味苦寒無毒	麻仁	味甘平無毒	兔絲子	味辛甘平無毒	龍齒	味饒大寒無毒	木賊草	味甘微苦無毒
草果仁	味辛溫無毒	款冬花	味辛甘溫無毒	何首烏	味苦澀微溫無毒	萊本	味辛苦微寒無毒	宣木瓜	味酸溫無毒	訶子	味苦溫無毒	杜仲	味辛甘平溫無毒	金櫻子	味酸澀平溫無毒	大小薊	味甘溫有毒	黃耆	味甘微溫無毒	馬蘭花	味甘平溫無毒	青皮	味辛溫無毒	花蕊石	味平無毒

決明味微鹹苦甘平

石斛味無毒甘平

琥珀味無毒甘平

龍骨味寒無毒甘平微

人參味微溫無毒寒

三稜味無毒苦平

桑螵蛸味鹹甘平無毒

牛蒡味無毒辛平

桑寄生味苦甘平無毒

遠志味無毒苦溫

蓮肉味寒無毒甘平

茯神味無毒甘平

麥蘖味溫無毒鹹

大腹皮味溫無毒辛微

天麻味無毒辛平

商陸味平有辛酸毒

硃砂味寒無毒甘微

甘松味無毒甘溫

蒲黃味無毒甘

沒石味無毒苦溫

鴨頭血味平無毒甘溫

全蠍味有甘平毒

大腹子味溫無辛微毒

木通味無毒甘平

沒藥味無毒甘平

白茯苓味無毒甘平

小麥味寒無毒甘微

椿白皮味有甘苦毒

甘草味無毒甘平

覆盆味平無酸鹹毒

牛膝味平無苦酸毒

蒺藜味寒無毒辛溫

南星味有苦辛毒

皂角味有小辛鹹溫毒

蛤蚧味有小鹹平毒

酸棗仁味無毒酸平

小草味無毒苦溫

猪苓味平無甘苦毒

郁李仁味無毒酸平

赤茯苓氣味同上

白附子味溫無毒甘平微

桑白皮味無毒甘寒

卷二 主治指掌

桃仁	平	味苦甘溫	神麴	無毒	味甘溫	五加皮	微寒	味甘苦溫
柏子仁	平	味甘辛	安息香	平	味辛苦	冬瓜仁	寒	味甘平
殭蠶	平	味鹹辛	百合	無毒	味甘平	赤小豆	平	味甘酸
枇杷葉	無毒	味苦平	連翹	無毒	味苦平	石楠葉	寒	有毒
穀蘖	無毒	味甘溫	阿魏	無毒	味辛平	紫河車	寒	無毒
大棗	無毒	味甘平	鼈甲	無毒	味鹹平	龜甲	無毒	味苦
烏梅	無毒	味酸平	竹瀝	無毒	大寒			

以上寒熱溫平總計三百二十味

用藥發明 藥性陰陽論 標本論 用藥法 藥性升降浮沉補瀉法  
五臟所欲 五臟所苦 五臭湊五臟例 五行五色五味五走五臟主禁  
例 手足三陽表裏引經主治例 諸藥瀉諸經之火邪 諸藥相反例  
十八反歌 十九畏歌 六陳歌 五臟補瀉主治例 用藥凡例

逐段錦 凡九十種

羌活 微溫 苦甘 平 無毒

白芷 無毒 辛溫

獨活 微溫 苦甘 平 無毒

吳茱萸 有微毒 辛熱

黃連 無毒 苦寒

黃蘗 無毒 苦寒

人參 無毒 甘溫

半夏 有微毒 辛平

枳殼 寒 無毒 酸苦 微

知母 無毒 苦寒

熟地黃 溫 無毒 甘苦

白芍藥 有微毒 酸寒

薄荷葉 無毒 辛涼

升麻 寒 無毒 苦平 微

防風 溫 無毒 甘平

木香 溫 無毒 苦辛 微

藿香葉 無毒 甘溫

黃芩 無毒 苦平

玄明粉 微溫 無毒 酸辛

黃耆 無毒 甘溫

陳皮 溫 無毒 辛苦

枳實 寒 無毒 酸微

藁本 溫 無毒 辛微

五味子 無毒 酸溫

白茯苓 溫 無毒 甘淡

麻黃 溫 無毒 苦甘

柴胡 寒 無毒 苦平 微

當歸 溫 無毒 甘辛

檳榔 溫 無毒 苦辛

川芎 無毒 辛溫

大黃 無毒 苦寒

白朮 無毒 甘溫

甘草 無毒 甘平

青皮 無毒 苦寒

桔梗 溫 有微毒 辛微

生地黃 寒 無毒 甘苦

川烏 有毒 辛熱

澤瀉 寒 無毒 甘鹹

厚朴 溫 無毒 苦辛

杏仁	溫味苦甘 有毒	蒼朮	無味苦溫 有毒	白豆蔻	無味苦平 有毒	阿膠	溫無甘平微 有毒	石膏	大味辛甘性 寒無毒	梔子	寒味苦性大 無毒	豬苓	性味淡甘平 溫無毒	蘇木	性味寒鹹平 寒無毒	麥門冬	寒味甘平性 寒無毒	桑白皮	寒味甘性 寒無毒	赤石脂	溫無甘酸性 無毒	川椒	熱有辛性 有毒	白頭翁	無味苦寒 有毒	南星	溫有苦辛 有毒
巴豆	有大辛熱 有毒	秦艽	無味苦平 有毒	地榆	微味苦甘酸 寒無毒	桃仁	平味苦甘 無毒	桂	熱有辛性 有毒	葛根	寒味甘平性 寒無毒	乾薑	炮生則味苦辛 則味苦辛	杜仲	性味溫甘平 寒無毒	木通	寒味甘平性 寒無毒	甘菊花	微味苦甘平性 寒無毒	通草	寒無甘平微 有毒	萎蕤	有味甘平 有毒	牡蠣	無味酸平 有毒	商陸	平有酸辛 有毒
黑附子	有大辛熱 有毒	白僵蠶	無味鹹平 有毒	連翹	寒無苦平微 有毒	生薑	溫無辛性 無毒	細辛	溫無辛性 無毒	栝蠆根	寒無苦性 寒無毒	草龍膽	寒無苦性 寒無毒	天門冬	大味苦平性 寒無毒	地骨皮	寒無苦平性 寒無毒	紅花	溫無辛性 寒無毒	烏梅	無味酸平 有毒	秦皮	無味苦寒 有毒	乾漆	有苦辛平 有毒	葶藶	無味苦寒 無毒



海藻

味苦鹹  
寒無毒

竹葉

味苦辛  
平無毒

葱白

味辛溫  
無毒

天麻

味辛平  
無毒

大棗

味甘溫  
無毒

威靈仙

味苦溫  
無毒

鼠黏子

味辛平  
無毒

草豆蔻

味辛溫  
無毒

玄胡索

味苦辛  
溫無毒

用藥須知 用藥法象

四時用藥法

用藥丸散 藥本五味歌

炮製

藥歌 妊娠服藥禁歌

卷二

玉石部

金屑

玉屑

辰砂

石牀

生銀屑

鍾乳粉

代赭石

伏龍肝

雲母石

水銀

礬石

禹餘糧

朴硝

硝石

空青

紫英石

寒水石

石硫黃

磁石	石灰	胡粉	無名異	靈砂	黑鉛	花蕊石	信石	玄精石	雌黃	草部上	菖蒲	甘草	生地黃
食鹽	石膏	銅青	硼砂	白堊	黃丹	自然銅	梁上塵	鐵粉			菊花	白朮	熟地黃
輕粉	滑石	蜜陀僧	膽礬	石燕	礬石	礬砂	井泉石	雄黃			人參	蒼朮	天門冬

麥門冬  
菟絲子  
柴胡  
菴藷子  
黃精  
翦金花  
川芎  
續斷  
羌活  
薯蕷  
黃耆  
防風  
肉蓯蓉  
丹參

地膚子  
巴戟天  
草決明  
茵陳蒿  
五味子  
慎火草  
石斛  
茜根  
獨活  
薏苡仁  
忍冬草  
蒺藜  
黃連

車前子  
牛膝  
龍膽草  
遠志  
木香  
絡石  
升麻  
蛇牀子  
細辛  
萎蕤  
澤瀉  
蒲黃  
漏蘆

草部中

芍藥

栝蒌根

苦參

白薇

麻黃

小青

蓬莪朮

鬱金

薑黃

翦草

馬蘭子

黃芩

紫草

薑

葛根

蒼耳子

貝母

白芷

大薊

大青

白豆蔻

藁本

華撥

王瓜

百合

紫菀

石韋

瞿麥

玄參

知母

當歸

小薊

京三稜

華澄茄

前胡

高良薑

木通

秦艽

澤蘭

防己

肉豆蔻

款冬花

淫羊藿

補骨脂

蘆薈

牛蒡子

海藻

水萍

艾

阿魏

敗醬

酸漿草

茴香

昆布

百部

天麻

牡丹皮

地榆

香附

縮砂

狗脊

萆薢

紅花

白蘚皮

石龍芮

胡黃連

白茅花

玄胡索

甘松

使君子

草部下

附子

烏頭

天雄

半夏

大黃

木賊草

青箱子

羊蹄

鶴蝨



山茨菇	夏枯草	金星草	萱草	威靈仙	草蒿	商陸	海金沙	葇蓉子	葶藶	白頭翁	劉寄奴	白芨	甘遂
仙茅	天南星	狼毒	燈心	馬鞭草	旋覆花	藜蘆	穀精草	連翹	射干	何首烏	續隨子	羊躑躅	大戟
苧根	牽牛	稀莨	山豆根	葫蘆巴	蓖麻子	貫衆	草河車	桔梗	常山	骨碎補	白附子	馬兜鈴	白藜

茵芋

屋遊

卷四

木部

桂

槐角

松脂

柏葉

柏子仁

枸杞子

地骨皮

茯苓

乾漆

茯神

琥珀

酸棗仁

榆皮

蔓荊子

桑寄生

訶子

辛夷

烏藥

沒藥

秦椒

蜀椒

莽草

櫻櫚

巴豆

芫花

木鼈子

雷丸

石楠

海桐皮

牡荊子

郁李仁 楮實 梧桐泪 檳榔 龍腦 杜仲 蕪荑 沒石子 五倍子 桑白皮 冬青子 秦皮 鈎藤 丁香

密蒙花 竹皮 枳殼 厚朴 黃蘗 衛茅 蕤仁 益智 吳茱萸 大腹皮 蘇合香 黃蘗 麒麟竭 沉香

蘇方木 樗白皮 山梔子 豬苓 紫威 虎杖 皂莢 川練子 山茱萸 金櫻子 安息香 苦菜 五加皮 檀香

藿香

乳香

天竺黃

胡椒

人部

天靈蓋

人糞汁

童男溺

乳汁

裊襠

血餘

人中白

禽獸部

鹿角

麝香

牛黃

龍骨

牛乳

獺肝

象牙

熊膽

羚羊角

膈肭臍

阿膠

犀角

鹿茸

虎骨

兔頭骨

牛角腮

瓦雀肉

雄雞

蝙蝠

蟲魚部

全蠍

珍珠

鼠婦

衣魚

地龍

蛤蚧

鰻鱺魚

鱉甲

蟬退

鯽

土狗

原蠶

五靈脂

斑貓

水蛭

蟲蟲

蜣螂

蝸牛

牡蠣

石龍子

蛻皮

鯉魚

蛙

石決明

殭蠶

海蛤

田螺

蛇蛻

蝦蟆

蟾蜍

烏賊骨

穿山甲

蜘蛛

蟹

蜈蚣

桑螵蛸

白花蛇



果品部

橘皮

覆盆子

橄欖

桃仁

木瓜

草果

米穀部

粳米

黑豆

胡麻

小麥

麥麩

蔬菜部

大棗

柿乾

石榴

杏仁

枇杷葉

秫米

白豆

赤小豆

大麥

萊豆

芡實

梨實

藕實

烏梅

胡桃

陳倉米

米粟

白扁豆

麥蘖

甜瓜

葱  
胡荽  
冬葵子  
茄子  
馬齒莧  
薄荷  
醋

韭  
冬瓜  
香薷  
豆芽  
草薺  
飴糖  
酒

萊菔子  
白芥子  
芸薹菜  
荊芥  
蘇葉  
神麴  
香豉

藥性賦 目錄

# 藥性賦

元 真定 李 杲東垣原編

吳門 王子接晉三重訂  
鄞縣 曹赤電炳章校點

## 卷一

### 總賦

#### 寒性

諸藥賦性。此類最寒。犀角解乎心熱。羚羊清乎肺肝。澤瀉利水通淋而補陰不足。海藻散癭破氣而治疝何難。聞之菊花能明目而清頭風。射干療咽閉而消癰毒。薏苡理脚氣而除風濕。藕節消瘀血而止吐衄。瓜蒌子下氣潤肺喘兮。又且寬中。車前子止瀉利小便兮。尤能明目。是以黃蘗瘡用。兜鈴嗽醫。地骨皮有退熱除蒸。

之效。薄荷葉宜消風清腫之施。寬中下氣。枳殼緩而枳實速也。療肌解表。乾葛先而柴胡次之。百部治肺熱。咳嗽可止。梔子涼心腎。鼻衄最宜。玄參治結熱毒癰。清利咽膈。升麻消風熱腫毒。發散瘡癢。嘗聞膩粉抑肺而斂肛門。金箔鎮心而安魂魄。茵陳主黃疸而利水。瞿麥治熱淋之有血。朴硝通大腸。破血而止痰癖。石膏治頭疼。解肌而消煩渴。前胡除內外之痰實。滑石利六腑之滯結。天門冬止嗽。補血冷而潤肝心。麥門冬清心。解煩渴而除肺熱。又聞治虛煩。除噦嘔。須用竹茹。通秘結。導瘀血。必資大黃。宣黃連治冷熱之痢。又厚腸胃而止瀉。淫羊藿療風寒之痺。且補陰虛而助陽。茅根止血與吐衄。石韋通淋於小腸。熟地黃補血且療虛損。生地黃宣血更醫眼瘡。赤芍藥破血而療腹疼。煩熱亦解。白芍藥補虛而生新血。退熱尤良。若乃消腫滿。逐水於牽牛。除毒熱。殺蟲於貫衆。金鈴子治疝氣而補精血。萱草根治五淋而消乳腫。側柏葉治血山崩漏之疾。香附子理血氣婦人之用。地膚子利膀胱。可洗皮膚之風。山豆根解熱毒。能止咽喉之痛。白蘚皮去風治筋弱。而療足頑痺。旋覆花明目治頭風。而消痰嗽壅。又況荊芥穗清頭目。便血疎風散瘡之用。瓜蔓根療黃疸毒癰。消渴解痰之憂。地榆療崩漏。止血止痢。昆布破疝氣。



散癭散瘤。療傷寒、解虛煩、淡竹葉之功倍。除結氣、破瘀血、牡丹皮之用同。知母止嗽而骨蒸退。牡蠣潛精而虛汗收。貝母清痰止欬嗽而利心肺。桔梗下氣利胸膈而治咽喉。若夫黃芩治諸熱。兼主五淋。槐花治腸風。亦醫痔痢。常山理痰結而治溫瘧。葶藶瀉肺喘而通水氣。此六十六種藥性之寒。又當考圖經以博其所治。觀夫方書以參其所用焉。其庶幾矣。

### 熱性

藥有溫熱。又當審詳。欲溫中以葦撥。用發散以生薑。五味子止嗽痰。且滋腎水。膈胸臍療勞瘵。更壯元陽。原夫川芎祛風濕。補血清頭。續斷治崩漏。益筋強脚。麻黃表汗以療欬逆。韭子助陽而醫白濁。川烏破積。有消痰治風痺之功。天雄散寒。爲去濕助精陽之藥。觀夫川椒達下。乾薑煖中。葫蘆巴治虛冷之疝氣。生卷柏破癥瘕而血通。白朮消痰壅。溫胃兼止吐瀉。菖蒲開心氣。散冷更治耳聾。丁香快脾胃而止吐逆。良薑止心氣痛之攻衝。肉蓯蓉填精益腎。石硫黃煖胃驅蟲。胡椒主去痰而除冷。秦椒主攻痛而治風。吳茱萸療心腹之冷氣。靈砂定心臟之怔忡。蓋夫

散腎冷、助脾胃、須葦澄茄。療心疼、破積聚、用蓬莪朮。縮砂止吐瀉、安胎。化酒食之劑。附子療虛寒、翻胃。壯元陽之力。白豆蔻治冷瀉。療癰止痛於乳香。紅豆蔻止吐酸。消血殺蟲於乾漆。豈不知鹿茸生精血。腰脊崩漏之均補。虎骨壯筋骨。寒濕毒風之並祛。檀香定霍亂。而心氣之痛愈。鹿角秘精髓。而腰脊之疼除。消腫益血於米醋。下氣散寒於紫蘇。藕豆助脾。則酒有行藥。破血之用。麝香開竅。則葱爲通中發汗之需。嘗觀五靈脂治崩漏。理血氣之刺疼。麒麟竭止血出。療金瘡之傷折。麋茸壯陽以助腎。當歸補虛而養血。烏賊骨止帶下。且除崩漏目翳。鹿角膠住血崩。能補虛羸勞絕。白花蛇治癰瘰。除風癢之癬疹。烏梢蛇療不仁。去瘡瘍之風熱。圖經云。烏藥有治冷氣之理。禹餘糧乃療崩漏之因。巴豆利痰水。能破積熱。獨活療諸風。不論久新。山茱萸治頭暈遺精之藥。白石英醫欬吐膿之人。厚朴溫胃而去嘔脹。消痰亦驗。肉桂行血而療心痛。止汗如神。是則鯽魚有溫胃之功。代赭迺鎮肝之劑。沉香下氣補腎。定霍亂之心疼。橘皮開胃去痰。導壅滯之逆氣。此六十種藥性之熱。又當博本草而取治焉。

溫性

溫藥總括。醫家素諳。木香理乎氣滯。半夏主於風痰。蒼朮治目盲燥脾去濕。宜用  
蘿蔔去膨脹。下氣製麴尤堪。況夫鍾乳粉補肺氣。兼療肺虛。青鹽治腹疼。且滋腎  
水。山藥而腰濕能醫。阿膠而痢嗽皆止。赤石脂治精濁而止瀉。兼補崩中。陽起石  
煖子宮以壯陽。更療陰痿。誠以紫苑治嗽。防風祛風。蒼耳子透腦止涕。藏靈仙宣  
風通氣。細辛去頭風。止嗽而療齒痛。艾葉治崩漏。安胎而醫痢紅。羌活明目驅風。  
除濕毒腫痛。白芷止崩治腫。療痔漏瘡癰。若乃紅藍花通經。治產後惡血之餘。劉  
寄奴散血。療湯火金瘡之苦。滅風濕之痛。則茵芋葉療折傷之症。則骨碎補。藿香  
葉辟惡氣而定霍亂。草果仁溫脾胃而止嘔吐。巴戟天治陰疝白濁。補腎尤滋。玄  
胡索理氣痛血凝。調經有助。嘗聞款冬花潤肺。去痰嗽以定喘。肉豆蔻溫中。止霍  
亂而助脾。撫芎走經絡之痛。何首烏治瘡疥之資。薑黃能下氣。破惡血之積。防己  
宜消腫。去風濕之施。藁本除風。主婦人陰痛之用。仙茅益腎。扶元氣虛弱之衰。乃  
若破故紙溫腎。補精髓與勞傷。宣木瓜入肝。療腳氣并水腫。杏仁潤肺燥。止嗽之  
劑。茴香治疝氣腎疼之用。訶子生精止渴。兼療滑泄之疴。秦艽攻風逐水。又除肢  
節之痛。檳榔豁痰而逐水。殺寸白蟲。杜仲益腎而添精。去腰膝重。當知紫石英療

驚悸崩中之疾。橘核仁治腰疼疝氣之瘕。金櫻子兮澀遺精。紫蘇子兮下氣涎。淡豆豉發傷寒之表。大小薊除諸血之鮮。益智安神。治小便之頻數。麻仁潤肺。利六腑之燥堅。抑又聞補虛弱。排瘡膿。莫若黃耆。強腰脚。壯筋骨。無如狗脊。兔絲子補腎以明目。馬蘭花治疝而有益。此五十四種藥性之溫。更宜參圖經而默識也。

## 平性

詳論藥性平和。惟在以礬砂而去積。用龍齒以安魂。青皮快膈除膨脹。且利脾胃。芡實益精治白濁。兼補真元。原夫木賊草去目翳。崩漏亦醫。花蕊石治金瘡。血行則却。決明和肝氣治眼之劑。天麻主脾濕祛風之藥。甘草和諸藥而解百毒。蓋以性平。石斛平胃氣而補腎虛。更醫脚弱。觀夫商陸治腫。覆盆益精。琥珀安神而破血。硃砂鎮心而有靈。牛膝強足補精。兼療腰痛。龍骨止汗住泄。更治血崩。甘松理風氣而痛止。蒺藜療風瘡而目明。人參潤肺寧心。開脾助胃。蒲黃止崩治衄。消瘀調經。豈不以南星醒脾。去驚風痰吐之憂。三稜破積。除血塊氣滯之症。沒石主泄瀉而神效。皂角治風痰而響應。桑螵蛸療遺精之洩。鴨頭血醫水腫之盛。蛤蚧治



勞嗽。牛蒡子疎風壅之痰。全蠍主風癰。酸棗仁去怔忡之病。嘗聞桑寄生益血安胎。且止腰痛。大腹子去膨下氣。亦令胃和小草遠志俱有寧心之妙。木通猪苓尤爲利水之多。蓮肉有清心醒脾之用。沒藥任治瘡散血之科。郁李仁潤腸宣水。去浮腫之疾。茯神寧心益智。除驚悸之疴。白茯苓補虛勞。多在心脾之有胄。赤茯苓破結血。獨利水道以無毒。因知麥蘖有助脾化食之功。小麥有止汗養心之力。白附子去面風之遊走。大腹皮治水腫之泛溢。椿根白皮主瀉血。桑根白皮主喘息。桃仁破瘀血兼治腰疼。神麴健脾胃而進飲食。五加皮堅筋骨以立行。柏子仁養心神而有益。抑又聞安息香辟惡。且止心腹之痛。冬瓜仁醒脾。實爲飲食之資。殭蠶治諸風之喉閉。百合斂肺勞之嗽。萎赤小豆解熱毒。瘡腫宜用。枇杷葉下逆氣。噦嘔可醫。連翹排瘡膿與腫毒。石楠葉利筋骨與毛皮。穀蘖養脾。阿魏除邪氣而破積。紫河車補血。大棗和藥性以開脾。然而驚甲治勞瘡。兼破癥瘕。龜甲堅筋骨。更療崩疾。烏梅主便血瘕痢之用。竹瀝治中風聲音之失。此六十八種平和之藥。更宜參本草而求其詳悉也。

以上彙諸藥品。總括成章。性分寒熱溫平。味主抑揚。主治隨症。對藥辭義了然。在習醫者固當審詳而保身者亦宜熟讀。庶幾無夭札之虞矣。



## 用藥發明

### 藥性陰陽論

夫藥有寒熱溫涼之性。酸苦辛鹹甘淡之味。升降浮沉之能。厚薄輕重之用。或氣一而味殊。或味同而氣異。合而言之。不可混用。分而言之。各有所能。本乎天者親上。本乎地者親下。輕清成象。重濁成形。清陽發腠理。濁陰走五臟。清中清者。榮養精神。濁中濁者。堅強骨髓。辛甘發散爲陽。酸苦涌泄爲陰。氣爲陽。氣厚爲陽中之陽。氣薄爲陽中之陰。薄則發泄。厚則發熱。味爲陰。味厚爲陰中之陰。味薄爲陰中之陽。薄則疏通。厚則滋潤。升降浮沉之辨。豁然貫通。始可以言醫。而司人命矣。人徒知藥之神者。乃藥之力也。殊不知乃用藥者之力也。人徒知辨真偽識藥之爲難。殊不知分陰陽用藥之爲尤難也。

### 標本論

夫用藥者。當知標本。以身論之。外爲標。內爲本。氣爲標。血爲本。陽爲標。陰爲本。六

腑屬陽爲標。五臟屬陰爲本。以病論之。先受病爲本。後傳變爲標。凡治病者。先治其本。後治其標。雖有數病。靡弗去矣。若先治其標。後治其本。邪氣滋甚。其病益堅。若有中滿。無問標本。先治其滿。謂其急也。若中滿後有大小便不利。亦無問標本。先治大小便。次治中滿。謂尤急也。又如先病發熱。後病吐瀉。飲食不下。則先定嘔吐。後進飲食。方兼治瀉。待元氣稍復。乃攻熱耳。此所謂緩則治其本。急則治其標也。除大小便不利及中滿吐瀉之外。皆先治其本。不可不知也。假令肝受心火之邪。是從前來者爲實邪。實則瀉其子。然非直瀉其火。入肝經藥爲之引。用瀉火爲君。是治實邪之病也。假令肝受腎邪。是從後來者爲虛邪。虛則補其母。入腎經藥爲引。用補肝藥爲君。是也。標本已得。邪氣乃服。醫之神良。莫越乎此。

## 用藥法

夫用藥之法。貴乎明變。如風會有古今之異。地氣有南北之分。天時有寒暑之更。稟賦有厚薄之別。受病有新舊之差。年壽有老少之殊。居養有貴賤之別。用藥之際。勿好奇。勿執一。勿輕妄。勿迅速。須慎重精詳。圓融活變。不妨沉會。以期必妥。藥

於是乎功成。昔先賢未有發明。後學因而弗講。其誤世也不既多乎。

夫病有宜補。以瀉之之道補之。病有宜瀉。以補之之道瀉之。病有宜寒劑者。以熱劑爲嚮導之兵。病有宜熱劑者。以寒劑爲類從之引。病在上者治下。病在下者治上。病同也而藥異。病異也而藥同。其義至微。學者最宜深究。

用藥之忌。在乎欲速。欲速則寒熱溫涼行散補瀉未免過當。功未獲奏。害已隨之。藥無次序。如兵無紀律。雖有勇將。適以勇而僨事。又如理絲。緩則可清其緒。急則愈堅其結矣。

藥有君臣佐使。味有輕重厚薄。人盡知之矣。及其用藥也。令人復煎其滓。不知既經煎沸。則輕且薄者。業已無味。重且厚者。不減初煎。君臣佐使之宜。果安在哉。病淺者猶無大害。病深者切勿爲之。

凡修丸劑。須每種各爲細末。以末之輕重合之。則分兩方準。不然。易細者一磨無遺。難碎者三復不盡。鹵莽若此。何怪其無功哉。

凡藥苦者直行而泄。辛者橫行而散。酸者束而收斂。鹹者止而軟堅。獨是甘之一味。可升可降。可浮可沉。可內可外。有和有緩。有補有泄。蓋土味作甘。土位居中。而

能兼乎五行也。

凡藥之在土者。中半以上爲根。其氣上行。病在中上焦者用之。中半以下爲梢。其氣下行。病在下焦者用之。藥之出土者。中半以上爲苗。其氣味上升。中半以下爲身爲幹。其氣味中守下達咸宜。因其病而酌之。使弗悖乎陰陽也。

凡藥在上者。不厭頻而少。在下者。不厭頓而多。少服則滋榮於上。多服則峻補於下。

凡病在上者。先食而後藥。病在下者。先藥而後食。病在四肢者。宜饑食而在晝。病在骨髓者。宜飽食而在夜。

凡煎藥用水。亦各有宜。如治溼腫浮脹之疾。而欲使利水道。則取長流水。以流長源遠。其性通達。直引四肢之間也。如治二便不通。及足脛以下風濕。則取急流水。以其湍縱峻急。其性速下也。如治痰飲鬱滯。而欲吐發升散。則取逆流水。以其性逆倒流。洄瀾湧決也。如治中氣不足。則取春雨水。有陽道發生之意也。如治下元不足。則取井水。蓋清晨井中天一之氣。浮結於面。以磁器輕取之。殊有補陰之功也。如治火熱陽證。則取雪水。能大退熱也。如治傷寒陰證。奔豚等疾。則取甘瀾水。

蓋盛之於缸。揚過千遍。水珠沫液。盈溢於面。其性柔順。其味甘溫。大能和氣也。如治脾胃虛弱。泄瀉不食等疾。則取池潦水。蓋土池中停蓄既久。不流不動。殊有土氣。能助脾元也。如治陰不升。陽不降。乖隔諸疾。則取陰陽水。河井各半。陰陽相成。可升可降。而使氣平者也。

古人用藥如羿之射的。不第諳其理。尤貴擇其道。地者製之盡善。不然。欲以濫惡之劑。冀其功驗。雖扁鵲再起。其可得乎。

凡藥有畏惡相反。所謂畏者。畏其制我。不得自縱。如半夏畏生薑之類是也。所謂惡者。惡其異我。不得自盡。如生薑惡黃芩之類是也。統而論之。彼所畏者。我必惡之。我所惡者。彼亦畏我。相畏相惡之中。亦有相成者。在因病制方。輕重多寡之間耳。若所謂相反。則各懷酷毒。兩仇不共。共則必害事也。然有大毒之疾。又須用大毒之藥以剗之。如古方感應丸。用巴豆、牽牛同劑。以爲攻堅破積之用。四物湯加人參、五靈脂以治血塊。二陳湯加藜蘆、細辛以吐風痰。丹溪治屍癰。蓮心散以甘草、芫花同劑。而謂妙處在此。顧良工用之何如耳。

藥性升降浮沉補瀉法



足厥陰肝經味辛補酸瀉。制所以氣溫補涼瀉。手少陰心經味鹹補甘瀉。制所以氣  
足少陽膽經足太陽脾經味甘補苦瀉。制所以氣溫補涼瀉。手太陽小腸經足陽明胃經味酸  
熱補寒瀉。足太陽脾經味甘補苦瀉。制所以氣溫補涼瀉。手太陽小腸經足陽明胃經味酸  
補辛瀉。制所以氣涼補溫瀉。足少陽膽經足太陽脾經味甘補苦瀉。制所以氣溫補涼瀉。手太陽小腸經足陽明胃經味酸  
五臟更相平也。一臟不平病。故曰安穀則昌。絕穀則亡。仲景云。水入於經。其血乃  
成。穀入於胃。脈道乃行。故血不可不養。衛不可不溫。血溫衛和。榮衛將行。常有天  
命矣。

## 五臟所欲

肝欲散。急食辛以散之。以辛補之。以酸瀉之。心欲栗。急食鹹以栗之。以鹹補之。  
以甘瀉之。脾欲緩。急食甘以緩之。以甘補之。以苦瀉之。肺欲收。急食酸以收  
之。以酸補之。以辛瀉之。腎欲堅。急食苦以堅之。以苦補之。以鹹瀉之。

## 五臟所苦

肝苦急。急食甘以緩之。脾苦濕。急食苦以燥之。心苦緩。急食酸以收之。腎

苦燥。急食辛以潤之。肺苦氣上。急食苦以泄之。

### 五氣湊五臟例

燥氣入肝。腥氣入肺。香氣入脾。焦氣入心。腐氣入腎。

### 五行五色五味走五臟主禁例

東方之木。其色青。其味酸。其臟肝。肝主筋。木曰曲直作酸。酸走肝。筋病人無多食酸。南方之火。其色赤。其味苦。其臟心。心主血。火曰炎上作苦。苦走心。血病人無多食苦。西方之金。其色白。其味辛。其臟肺。肺主氣。金曰從革作辛。辛走肺。氣病人無多食辛。中央之土。其色黃。其味甘。其臟脾。脾主肉。土曰稼穡作甘。甘走脾。肉病人無多食甘。

北方之水。其色黑。其味鹹。其臟腎。腎主骨。水曰潤下作鹹。鹹走腎。骨病人無多食鹹。

### 手足三陽表裏引經主治例

太陽	足 <small>膀胱</small> 手 <small>小腸</small>	上羌活	下黃柏	少陰	足 <small>腎</small> 手 <small>心</small>	上黃連	下知母
少陽	足 <small>膽</small> 手 <small>三焦</small>	上柴胡	下青皮	厥陰	足 <small>肝</small> 手 <small>包絡</small>	上青皮	下柴胡
陽明	足 <small>胃</small> 手 <small>大腸</small>	上 <small>升麻</small> 白芷	下石膏	太陰	足 <small>脾</small> 手 <small>肺</small>	上白芍	下桔梗

### 諸藥瀉諸經之火邪

黃連瀉心火。	梔子、黃芩瀉肺火。	白芍瀉脾火。	柴胡、黃連瀉肝膽火。	知母
瀉腎火。	木通瀉小腸火。	黃芩瀉大腸火。	柴胡、黃芩瀉三焦火。	黃柏瀉膀胱火。

### 諸藥相反例

甘草反大戟、芫花、甘遂、海藻。烏頭反半夏、瓜蒌、貝母、白芨、白藜。藜蘆反細辛、芍藥、人參、沙參、苦參、丹參、元參。

### 十八反歌

本草明言十八反。半蒴貝藜芫攻烏。藻戟遂芫俱戰草。諸參辛芍叛藜蘆。

### 十九畏歌

硫黃原是火中精。朴硝一見便相爭。水銀莫與砒霜見。狼毒最怕蜜陀僧。巴豆性烈最爲上。偏與牽牛不順情。丁香莫與鬱金見。牙硝難合京三稜。川烏草烏不順犀。人參最怕五靈脂。官桂善能調冷氣。若逢石脂便相欺。大凡修合看順逆。炮燬炙煨莫相依。

### 六陳歌

枳殼陳皮半夏齊。麻黃狼毒及茺萸。六般之藥宜陳久。入藥方知奏效奇。

## 五臟補瀉主治例

肝虛者。陳皮、生薑之類補之。虛則補其母。腎者肝之母也。熟地、地黃、黃柏補之。如無他症。錢氏地黃丸主之。實則白芍藥瀉之。如無他症。錢氏瀉青丸主之。實則瀉其子。以甘草瀉心。心者肝之子也。

心虛者。炒鹽補之。虛則補其母。肝者心之母也。以生薑補肝。如無他症。錢氏安神丸主之。實則甘草瀉之。如無他症。錢氏方中重則瀉心湯。輕則導赤散。

脾虛者。甘草、大棗之類補之。實則黃連、枳實瀉之。如無他症。錢氏益元散主之。虛則補其母。心乃脾之母。以炒鹽補心。實則瀉其子。肺乃脾之子。以桑白皮瀉肺。肺虛者。五味子補之。實則桑白皮瀉之。如無他症。錢氏阿膠散主之。虛則補其母。脾乃肺之母。以甘草、大棗補脾。實則瀉其子。腎者肺之子。以澤瀉瀉腎。腎虛者。熟地黃、黃柏補之。腎無實不可瀉。錢氏止有補腎地黃丸。無瀉腎藥。虛則補其母。肺乃腎之母。以五味子補肺。

以上五臟補瀉。素問藏氣法時論。備有之矣。欲究其詳。再著本論。



# 用藥凡例

頭角痛。須用川芎。血枯亦用。顛頂痛。須用藁本。徧身肢節痛。須用羌活。風濕亦用。腹中痛。須用白芍。厚朴。臍下痛。須用黃柏。青皮。心下痛。須用吳茱萸。胃脘痛。須用草豆蔻。脇下痛。須用柴胡。日晡潮熱寒熱往來亦用。莖中痛。須用生甘草梢。氣刺痛。須用枳殼。血刺痛。須用當歸。心下痞。須用枳實。胸中寒痞。須用去白陳皮。腹中窄。須用蒼朮。破血須用桃仁。活血須用當歸。補血須用川芎。調血須用玄胡索。補元氣須用人參。調諸氣須用木香。破滯氣須用枳殼。青皮。肌表熱須用黃芩。去痰亦用。去痰用半夏。去風痰須用南星。諸虛熱須用黃耆。盜汗亦用。脾胃受濕用白朮。去痰亦用。下焦濕腫。用漢防己。草龍膽。中焦濕熱用黃連。下焦濕熱用黃芩。煩渴須用白茯苓。葛根。嗽者用五味子。咳有聲無痰者。用生薑。杏仁。防風。欬有聲有痰者。用半夏。枳殼。防風。喘者。須用阿膠。天門冬。麥門冬。諸泄瀉。須用白芍。白朮。諸水瀉。用白朮。白茯苓。澤瀉。諸痢疾。須用當歸。白芍藥。上部見血用。

防風。中部見血用黃連。下部見血用地榆。眼暴發。須用當歸、黃連、防風。眼久昏暗。用熟地黃、當歸、細辛。解利傷風。須用防風爲君。白朮、甘草爲佐。解利傷寒。甘草爲君。防風、白朮爲佐。凡諸風。須用防風、天麻。諸瘡瘍。須用黃柏、知母爲君。茯苓、澤瀉爲佐。瘧疾。須用柴胡爲君。隨所發之時。所屬經部分。以引經藥導之。

以上諸藥。此大略言之。以爲處方之階。欲究其精。於第二卷主治指掌中求之。

藥性賦 卷一 總賦

# 藥性賦

元 真定 李 杲東垣原編

吳門 王子接晉三重訂  
鄞縣 曹赤電炳章校點

## 卷二

### 主治指掌

羌活君獨羌活氣細

羌活、味苦甘平。性微溫無毒。升也。陰中之陽也。其用有四。散肌表入風之邪。利周身入節之痛。排陰陽肉腐之疽。除新舊風濕之證。乃手足太陽表裏引經藥也。

升麻形細而黑極堅者佳形大者味薄不堪用

升麻、味苦平。性微寒無毒。升也。陰中之陽也。其用有四。引葱白散手陽明之風邪。引石膏止足陽明之齒痛。引諸藥遊行四經。升陽氣於至陰之下。因名之曰升麻。

柴胡半夏爲之使惡石莖畏女苑藜蘆

柴胡味苦平性微寒無毒升也陰中之陽也其用有四左右兩脇下痛日晡潮熱往來生在藏調經內主血在肌主氣上行經手足少陽表裏四經之藥也

白芷臣使惡旋覆花當歸爲之

白芷味辛性溫無毒升也陽也其用有四去頭面皮膚之風除皮膚燥癢之痺止足陽明頭痛之邪爲手太陰引經之劑

防風臣使惡乾薑藜蘆白芷花制附子毒

防風味甘辛性溫無毒升也陽也其用有二以氣味能瀉肺金以體用通療諸風

當歸臣使惡熱瘡海藻

當歸味甘辛性溫無毒可升可降陽也其用有四頭止血而上行身養血而中守梢破血而下流全活血而不走

獨活臣使惡實爲

獨活味苦甘平性微溫無毒升也陰中之陽也其用有二諸風掉眩頸項難伸風寒濕痺兩足不用乃爲足少陰之引經



木香君

木香、味苦辛。性溫無毒。降也。陰也。其用有二。調諸氣不可無。洩肺氣不可缺。

檳榔君

檳榔、味苦辛。性溫無毒。降也。陰也。其用有二。墜諸藥。性若鐵石。治後重。驗如奔馬。

吳茱萸

惡丹參硝石畏紫石英先可以用湯浸去辛味凡六七次然後可以用

吳茱萸、味苦辛。性熱有小毒。可升可降。陽也。其用有四。咽嗝寒氣噎塞而不通。胸中冷氣閉塞而不利。脾胃停冷腹痛而不住。心氣刺疼成陣而不止。

藿香葉

藿香葉、味甘性溫無毒。可升可降。陽也。其用有二。開胃口、能進飲食。止霍亂、仍除嘔逆。

川芎

川芎、味辛性溫無毒。升也。陽也。其用有二。上行頭角。助元陽之氣而止痛。下行血海。養新生之血以調經。

黃連

臣款惡菊荒花玄參畏款冬勝烏頭巴豆毒

黃連、味苦性寒無毒。沉也。陰也。其用有四。瀉心火。消心下痞滿之狀。主腸澼。除腸中混雜之物。治目疾暴發宜用。療瘡瘍首尾俱同。

黃芩臣砂惡蕪實畏

黃芩、味苦平。性寒無毒。可升可降。陰也。其用有四。中枯而飄者。瀉肺火。消痰利氣。細實而堅者。瀉大腸火。養陰退陽。中枯而飄者。除風濕留熱於肌表。細實而堅者。滋化源退熱於膀胱。

大黃使無所畏之

大黃、味苦性寒無毒。其性沉而不浮。其用走而不守。奪土鬱而通壅滯。定禍亂而致太平。因名之曰將軍。

黃蘗

黃蘗、味苦性寒無毒。沉也。陰也。其用有五。瀉下焦隱伏之龍火。安上焦虛噦之魃蟲。臍下痛則單製而能除。腎不足必炒用而能補。痿厥除熱藥中。誠不可闕。

玄明粉

玄明粉、味辛甘酸。性微溫無毒。沉也。陰也。其用有二。去胃中之實熱。蕩腸中之宿

垢。其效不可盡述。大抵用此而代益硝也。

白朮

君土炒服二朮忌食桃李雀蛤

白朮味甘性溫無毒可升可降。陽也。其用有四。利水道有除濕之功。強脾胃有進食之效。佐黃芩有安胎之能。君枳實有消痞之妙。

人參

君惡鹹。扶苓為之使。反藜蘆。

人參味甘性溫無毒升也。陽也。其用有三。止渴生津液。和中益元氣。肺寒則可服。肺熱還傷肺。

黃耆

惡龜甲白蘚皮蜜炒用。

黃耆味甘性溫無毒升也。陽也。其用有四。溫肉分而實腠理。益元氣而補三焦。內托陰證之瘡瘍。外固表虛之盜汗。

甘草

君藥用。惡遠志反大戟芫花甘遂海藻。忌豬肉及菰菜。

甘草味甘平無毒。生之則寒。炙之則溫。生則分身梢而瀉火。炙則健脾胃而和中。解百毒而有效。協諸藥而無爭。以其甘能緩急。故有國老之稱。

半夏

使乾薑畏皂莢惡雄黃生薑。

半夏、味辛平。生寒熟溫。有毒。降也。陽也。其用有四。除濕化痰涎。大和脾胃氣。痰厥及頭疼。非此莫能治。

陳皮

陳皮、味辛苦。性溫無毒。可升可降。陽中之陰也。其用有二。留白補胃和中。去白消痰泄氣。

青皮

青皮、味苦性寒無毒。沉也。陰也。其用有四。破滯氣愈低而愈效。削堅積愈下而愈良。引諸藥至厥陰之分。下飲食入太陰之倉。

枳殼使去瓢殼炒令熟用

枳殼、味酸苦。性微寒無毒。沉也。陰也。其用有四。消心下痞塞之痰。泄腹中滯塞之氣。推胃中隔宿之食。削腹內連年之積。

枳實臣陳久者佳凡用先去

枳實、味苦酸。性微寒無毒。沉也。陰也。其用有四。消胸中之虛痞。逐心下之停水。化日久之稠痰。削年深之堅積。

桔梗臣畏白芨  
龍眼龍膽

桔梗、味苦性微寒。有小毒。升也。陰中之陽也。其用有四。止咽痛。兼除鼻塞。利膈氣。仍治肺癰。一為諸藥之舟楫。一為肺部之引經。

知母君勿犯鐵器行  
經上頸酒炒用

知母、味苦性寒無毒。沉也。陰中之陰也。其用有四。瀉無根之實火。療有汗之骨蒸。止虛勞之陽勝。滋化源之陰生。

藁本臣畏青箱子  
惡蘭茹

藁本、味苦辛。性微溫無毒。升也。陰中之陽也。其用有二。大寒氣客於巨陽之經。苦頭疼流於顛頂之上。非此味不除。

生地黄

生地黄、味甘苦。性寒無毒。沉也。陰也。其用有四。涼心火之血熱。瀉脾土之濕熱。止鼻中之衄熱。除五心之煩熱。

熟地黄君惡貝母畏蕪荑忌鐵器犯之  
令人腎消亦忌食萊菔令人髮白

熟地黄、味甘苦。性溫無毒。沉也。陰也。其用有四。活血氣。封填骨髓。滋腎水。補益真



陰。傷寒後腰骨最痛。新產後臍腹難禁。

五味子

君 惡 萎 蕤 勝 烏 頭 之 使

五味子。味酸性溫。無毒。降也。陰也。其用有四。滋腎經不足之水。收肺氣耗散之金。除煩熱。生津止渴。補虛勞。益氣強陰。

川烏

川烏。味辛性熱有毒。浮也。陽中之陽也。其用有二。散諸風之寒邪。破諸積之冷痛。

白芍藥

臣 大 惡 石 斛 畏 硝 石 反 藜 蘆

白芍藥。味酸平。性寒有小毒。可升可降。陰也。其用有四。扶陽氣。大除腹痛。收陰氣。陡健脾經。墮其胎。能逐其血。損其肝。能緩其中。

白茯苓

臣 惡 醋 酸 惡 白 薇 密 蒙 地 榆 雄 黃 素 苧 龜 甲 之 物 中 有 筋 最 損 目 宜 去 之

白茯苓。味甘淡。性溫無毒。降也。陽中之陰也。其用有六。利竅而除溼。益氣而和中。小便多而能止。大便結而能通。心驚悸而能保。津液少而能生。白者入壬癸。赤者入丙丁。

澤瀉君

澤瀉。味甘鹹。性寒無毒。降也。陽中之陰也。其用有四。去胞垢而生新水。退陰汗而止虛煩。主小便淋瀝為仙藥。療水病濕腫為靈丹。

薄荷葉使

薄荷葉。味辛性涼無毒。升也。陽也。其用有二。清利六陽之會首。祛除諸熱之風邪。

麻黃臣三佛惡辛黃石葦凡用先煮去黃味否則令人煩悶

麻黃。味苦甘。性溫無毒。升也。陰中之陽也。其用有二。其形中空。散寒邪而發表。其節中閉。止盜汗而固虛。

厚朴臣入藥惡澤瀉寒水石硝石去粗皮生薑汁炒用

厚朴。味苦辛。性溫無毒。可升可降。陽中之陽也。其用有二。苦能下氣。去實滿而消腹脹。溫能益氣。除濕滿散結調中。

杏仁惡黃芩黃耆葛根凡用去皮尖熬炒

杏仁。味苦甘。性溫有毒。可升可降。陰中之陽也。其用有二。利胸中逆氣而喘促。潤大腸氣閉而難通。

巴豆使黃連惡甘草畏大黃連用之去皮心

巴豆、味辛性熱有大毒。浮也。陽中之陽也。其用有二。削堅積、蕩臟腑之沉寒。通閉塞、利水穀之道路。斬關奪門之將。不可輕用。

黑附子

地膽爲之使。惡蜈蚣畏防風。黑豆甘草黃耆人參烏韭。

黑附子、味辛性熱有大毒。浮也。陽中之陽也。其性浮而不沉。其用走而不息。除六腑之沉寒。定三陽之厥逆。

蒼朮

蒼朮、氣味主治與白朮同。補中除濕。力不及白朮。中發汗。功過於白。

秦艽

菖蒲爲之使。

秦艽、味苦辛平。性微溫無毒。可升可降。陰中之陽也。其用有二。除四肢風濕若神。療遍體骨疽如金。

白殭蠶

白殭蠶、味鹹辛平。性微溫無毒。升也。陰中之陽也。其用有二。去皮膚風動如蟲行。主面部黦生如漆點。

白豆蔻

白豆蔻。味辛。性溫。無毒。升也。陽也。其用有四。破肺中滯氣。退口中臭氣。散胸中冷氣。補上焦元氣。

地榆

地榆。味苦甘酸。性微寒。無毒。沉也。陰也。其用有二。主下部積熱之血痢。止下焦不禁之月經。

連翹使

連翹。味苦平。性微寒。無毒。升也。陰也。其用有二。瀉諸經之客熱。散諸腫之瘡瘍。

阿膠君 畏 大黃

阿膠。味甘平。性微溫。無毒。降也。陽也。其用有四。保肺益金之氣。止嗽蠲咳之膿。補虛而安姙胎。治痿而強骨力。

桃仁

桃仁。味苦甘平。性寒。無毒。降也。陰也。其用有二。潤大腸血閉之便難。破大腸久蓄之血結。

生薑使 惡黃芩黃連鼠糞去皮 則熱留皮則冷製半夏毒

生薑、味辛性溫無毒。升也。陽也。其用有四。製半夏有解毒之功。佐大棗有厚腸之益。溫經散表邪之風。益氣止翻胃之噦。

石膏

石膏、味辛甘。性大寒無毒。沉也。陰也。其用有二。制火邪、清肺氣、仲景有白虎之名。除胃熱、奪甘食、易老有大寒之劑。

桂君忌生  
用刮去外皮凡

桂、味辛性熱有毒。浮也。陽中之陽也。氣之薄者、桂枝也。氣之厚者、肉桂也。氣薄則發洩。桂枝上行而發表。氣厚則發熱。肉桂下行而補腎。此天地親上親下之道也。

細辛臣惡狼毒山茱萸黃芩  
耆畏硝石滑石反藜蘆

細辛、味辛性溫無毒。升也。陽也。其用有二。止少陰合病之頭痛。散三陽數變之風邪。

梔子

梔子、味苦。性大寒無毒。沉也。陰也。其用有二。療心中懊懣顛倒而不得眠。治臍下血滯小便而不得利。易老有云。輕飄而象肺。色赤而象火。又能瀉肺中之火。



葛根臣豆制野葛

葛根味甘平。性寒無毒。可升可降。陽中之陰也。其用有四。發傷寒之表邪。止胃虛之消渴。解中酒之奇毒。治往來之溫瘧。

瓜蒌根枸杞爲之使惡豆

瓜蒌根味苦性寒無毒。沉也。陰也。其用有二。止渴退煩熱。補虛通月經。

豬苓

豬苓味淡甘平。性溫無毒。降也。陽中之陰也。其用有二。除濕腫。體用兼備。利小水。氣味俱長。

乾薑臣黃連惡黃

乾薑生則味辛。炮則味苦。可升可降。陽也。其用有二。生則逐寒邪而發表。炮則除胃冷而溫中。

草龍膽實衆爲之使惡防葵地黃

草龍膽味苦性寒無毒。沉也。陰也。其用有二。退肝經之邪熱。除下焦之濕腫。

蘇木

蘇木、味甘鹹平。性寒無毒。可升可降。陰也。其用有二。破瘡瘍死血。非此無功。除產後敗血。用之立驗。

杜仲惡蛇蛻去絲

杜仲、味辛甘平。性溫無毒。降也。陽也。其用有二。強志壯筋骨。滋腎止腰痛。酥炙去其絲。功效如神應。

天門冬君去皮心畏曾青凡用

天門冬、味苦平。性大寒無毒。降也。陰也。其用有二。保肺氣不被熱擾。定喘促陡然康寧。

麥門冬君參凡用惡散冬花苦瓠畏苦

麥門冬、味甘平。性寒無毒。降也。陽中之陰也。其用有四。退肺中隱伏之火。生肺中不足之金。止煩躁。陰得其養。補虛勞。熱不能侵。

木通

木通、味甘平。性寒無毒。降也。陽中之陰也。其用有二。瀉小腸火積而不散。利小便熱閉而不通。瀉小腸火。無他藥可比。利小便閉。與琥珀同功。

地骨皮去骨用根皮

地骨皮。味苦平。性寒無毒。升也。陰也。其用有二。療在表無定之風邪。主傳屍有汗之骨蒸。

桑白皮

桑白皮。味甘性寒無毒。可升可降。陽中之陰也。其用有二。益元氣不足而補虛勞。瀉肺氣有餘而止欬嗽。

甘菊花野菊花味苦者名苦薏大傷胃不宜用又白菊花亦入藥

甘菊花。味苦甘平。性微寒無毒。可升可降。陰中之陽也。其用有二。散入風上注之頭眩。止兩目欲脫之淚出。

紅花

紅花。味辛。性溫無毒。陽也。其用有四。逐腹中惡血。而補血虛之血。除產後敗血。而止血暈之暈。

赤石脂

赤石脂。味甘酸。性溫無毒。降也。陽中之陰也。其用有二。固腸胃有收斂之能。下胎。

衣無推蕩之峻。

通草臣

通草。味甘平。性微寒。無毒。降也。陽中之陰也。其用有二。陰竅澀而不利。水腫閉而不行。澀閉兩俱立驗。因有通草之名。

烏梅

烏梅。味酸平。性溫無毒。可升可降。陰也。其用有二。收肺氣除煩止渴。主洩痢調胃和中。

川椒

川椒。味辛。性大熱有毒。浮也。陽中之陽也。其用有二。用之於上。退兩目之翳膜。用之於下。除六腑之沉寒。

萎蕤

萎蕤。味甘平。性溫無毒。降也。陽中之陰也。其用有四。風淫四肢不用。淚出兩目皆爛。男子溼注腰疼。女子面黑黧點。皆能療治。

秦皮

大戟爲之使  
惡吳茱萸

秦皮、味苦性寒無毒。沉也。陰也。其用有四。風寒邪合濕成痺。青白色幻翳遮睛。女子崩中帶下。小兒風熱驚癇。

### 白頭翁

白頭翁、味苦性溫無毒。可升可降。陰中之陽也。其用有四。消男子陰疝偏腫。治小兒頭禿羶腥。鼻衄非此不效。痢赤全賴收功。

### 牡蠣

牡蠣、味鹹平。性寒無毒。可升可降。陰也。其用有四。男子夢寐遺精。女子赤白崩中。榮衛往來虛熱。便滑大小腸同。

乾漆臣畏雞子又忌油脂見蟹黃則化水凡入藥搗碎妙用

乾漆、味辛平。性溫有毒。降也。陽中之陰也。其用有二。削年深堅結之沉積。破日久秘結之瘀血。

### 南星

南星、味苦辛。性溫有毒。可升可降。陰中之陽也。其用有二。墜中風不省之痰毒。主破傷如屍之身強。



商陸使忌犬肉

商陸、味酸辛平。性寒有毒。降也。陽中之陰也。其味酸辛。其形類人。其用療水。其效如神。

葶藶

葶藶、味苦性寒無毒。沉也。陰中之陰也。其用有四。除週身之浮腫。逐膀胱之留熱。定肺氣之喘促。療積飲之痰厥。

海藻甘草反

海藻、味苦鹹。性寒無毒。沉也。陰中之陰也。其用有二。利水道。通閉結之便。洩水氣。消遍身之腫。

竹葉薑竹淡竹爲上苦竹次之餘不入藥

竹葉、味苦辛平。性寒無毒。可升可降。陽中之陰也。其用有二。辟除新舊風邪之煩熱。能止喘促氣勝之上衝。

葱白忌與蜜同食

葱白、味辛性溫無毒。升也。陽也。其用有二。散傷風陽明頭痛之邪。主傷寒陽明下

痢之苦。

天麻其苗名定風草

天麻味辛平性溫無毒降也陽也其用有四療大人風熱頭眩治小兒風癇驚悸祛諸風麻痺不仁主癱瘓語言不遂。

大棗

大棗味甘平性溫無毒降也陽也其用有二助脈強神大和脾胃。

威靈仙忌茗

威靈仙味苦性溫無毒可升可降陰中之陽也其用有四推腹中新舊之滯消胸中痰涎之痞散疴癢皮膚之風利冷疼腰膝之氣。

鼠黏子

鼠黏子味辛平性微寒無毒降也陽也其用有四主風濕癰癤盈肌退寒熱咽喉不利散諸種瘡瘍之毒利腰膝凝滯之氣。

草豆蔻麵包煨熟用

草豆蔻味辛性溫無毒浮也陽也其用有二去脾胃積滯之寒邪止心腹新舊之

疼痛。

玄胡索

玄胡索、味苦辛。性溫無毒。可升可降。陰中之陽也。其用有二。活精血、能療產後之疾。調月水、亦主胎前之症。

以上凡藥九十品。品各賦以短章。既明以升降浮沉。復主以君臣佐使。或一味而內外兼攻。各係陰陽表裏。或一物而生熟互異。更分暑濕風寒。辭簡意周。幾無餘義。誠發前篇之所未盡也。其可不熟讀而詳記之乎。

### 用藥須知

#### 用藥法象

天有陰陽。風寒暑溼燥火。三陽三陰。上奉之。溫涼寒熱四氣是也。溫熱者、天之陽也。寒涼者、天之陰也。此乃天之陰陽也。地有陰陽。金木水火土。生長化收藏。下應之。辛甘淡酸苦鹹五味是也。辛甘淡者、地之陽也。酸苦鹹者、地之陰也。此乃地之陰陽也。

陰中有陽。陽中有陰。

平旦至日中。天之陽。陽中之陽也。日中至黃昏。天之陽。陽中之陰也。合夜至鷄鳴。天之陰。陰中之陰也。雞鳴至平旦。天之陰。陰中之陽也。

故人亦應之。人身之陰陽。外爲陽。內爲陰。背爲陽。腹爲陰。臟爲陰。腑爲陽。心肝脾肺腎五臟爲陰。膽胃大腸小腸膀胱三焦六腑爲陽。所以知陽中之陰。陰中之陽者。何也。如冬病在陰。夏病在陽。春病在陽。秋病在陰。知其所在。則施鍼藥也。背爲陽。陽中之陽。心也。背爲陽。陽中之陰。肺也。腹爲陰。陰中之陰。腎也。腹爲陰。陰中之陽。肝也。腹爲陰。陰中之至陰。脾也。此係陰陽表裏內外雌雄相輸應也。

#### 四時用藥法

不問所病。或溫或涼。或熱或寒。如春時有疾。於所用藥內加清涼之藥。夏月有疾。加大寒之藥。秋月有疾。加溫氣之藥。冬月有疾。加大熱之藥。是不絕生化之源也。內經曰。必先歲氣。無伐天和。是爲至治。又曰。無違時。無伐化。又曰。無伐生生之氣。此皆常道用藥之法。若反其常道而變生異症。則當從權施治。

## 用藥丸散

仲景云。剉如麻豆大。與呔咀同意。夫呔咀者。古之製也。古無鐵刃。以口咬細。令如麻豆。爲粗藥煎之。使藥水清。飲於腹中。則易升易散也。此所謂呔咀也。今人以刀器剉如麻豆大。此呔咀之易成也。若一概爲細末。不分清濁矣。經云。清陽發腠理。濁陰走五臟。果何謂也。又曰。清陽實四肢。濁陰歸六腑。是也。呔咀之法。取汁清。易循行經絡故也。若治至高之病。加酒煎。去濕。加生薑煎。補元氣。以大棗煎。發散風寒。以葱白煎。去膈上病。以蜜煎。散者。細末也。不循經絡。止去膈上病及臟腑之病。氣味厚者。白湯調服。氣味薄者。煎以和滓服。去下部之疾。其丸極大。而光且圓。治中焦者。次之。治上焦者。則極小。稠糊麵丸者。取其遲化。直至下焦。或酒或醋丸者。取其收散之意也。用半夏。南星。或去濕者。以生薑汁煮糊爲丸。制其毒也。稀糊丸者。取其易化也。水浸一宿。蒸餅爲丸。及滴水爲丸者。皆取易化也。煉蜜爲丸者。取其遲化而氣循經絡也。用蠟爲丸者。取其難化而旋旋收功也。大抵湯者。蕩也。去久病者。用之。散者。散也。去急病者。用之。丸者。緩也。不能速去其病。用藥徐緩而治。

之也。

## 藥本五味歌

酸爲木化氣本溫。能收能澀利肝經。苦爲火化氣終熱。能燥能堅心臍平。甘始土生氣化濕。能開緩滲從脾行。辛自金生氣帶燥。能散潤濡通肺竅。鹹從水化氣生寒。下走軟堅足腎道。淡味方爲五行本。運用須知造化要。

## 炮製藥歌

計六

芫花本利水。非醋不能通。萊豆本解毒。帶殼不見功。草果消膨效。連殼反脹胸。黑丑生利水。遠志苗毒逢。蒲黃生通血。熟補血運通。地榆醫血藥。連梢不住紅。陳皮專理氣。留白補胃中。附子救陰症。生用走皮風。草烏解風痺。生用使人蒙。人言燒燉用。諸石火烜紅。入醋堪研末。製度必須工。川芎炒去油。生用痺痛攻。炮燼當依法。方能專化工。知母桑皮天麥門。首烏生熟地黃分。偏宜竹片銅刀切。鐵器臨之便不馴。烏藥



門冬巴戟天。蓮心遠志五般全。並宜剔去心方妙。否則令人煩躁添。厚朴猪苓與茯苓。桑皮更有外皮生。四般最忌連皮用。去淨方能不耗神。益智麻仁柏子仁。更加草果四般論。並宜去殼方爲效。不去令人心痞增。何物還須湯泡之。蒼朮半夏與陳皮。更宜酒洗亦三味。茯苓地黃及當歸。

### 妊娠服藥禁忌歌

斑蝥水蛭及蟲蟲。烏頭附子配天雄。野葛水銀并巴豆。牛膝薏苡與蜈蚣。三稜芫花代赭麝。大戟蟬蛻黃雌雄。牙硝芒硝牡丹桂。槐花牽牛皂角同。半夏南星與通草。瞿麥乾薑桃仁通。硃砂乾漆蟹爪甲。地膽茅根都失中。

# 藥性賦

元 真定 李 杲東垣原編

吳門 王子接晉三重訂

鄞縣 曹赤電炳章校點

## 卷二

### 玉石部

藥能治病。醫乃傳方。當明藥品貴賤良毒之異。須嘗氣味酸鹹苦辣辛甘。

竊以金銀珠玉之貴。白堊石灰之賤。藥性之良則丹砂鍾乳。氣毒則信石礞砂。

至於五味。酸入肝。鹹入腎。苦入心。辛入肺。甘入脾。辣則有溫涼寒熱之異。

功力有急緩。性本有溫涼。

且如朴硝之性急。若煎作芒硝。性乃緩矣。

本草之作。肇始炎皇。

肇卽始也。炎皇神農氏也。本草之爲書。由神農嘗百草。一日而遇七十毒。始興醫藥相救之本草。

未言草木之品彙。且提玉石之紀綱。

倣本草圖經。以玉石部爲先。而草木之品次之。

金屑玉屑。辰砂石牀。能驅邪而逼鬼祟。可定魄而制癲狂。止渴除煩。安鎮靈臺。明耳目補精益氣。依經鍊服壽延長。

金屑。味辛平有毒。處處有之。梁益寧州最多。出水砂中得屑。謂之生金。若不鍊服之。殺人。玉屑。味甘平無毒。生藍田。丹砂。一名硃砂。味甘微寒無毒。惟辰州者最勝。故謂之辰砂。生深山石崖間。穴地數十尺。始見其苗。乃白石耳。謂之硃砂牀。卽石牀也。砂生石牀上。亦有淘土石中得之。非生於石者。又按本草石牀。自有本條。味甘溫無毒。謂鍾乳水下凝積。生如筍狀。漸長久。與上乳相接爲柱。出鍾乳堂中。謂之石牀。人心謂之靈臺。金屑玉屑辰砂石牀四品之性。主治相同。皆可依圖經法鍊服食。則延年不老。

生銀屑鎮驚安五臟。鍾乳粉補虛而助陽。

銀屑、味辛平有毒。生銀屑當取見成銀箔。以水銀消之爲泥。合硝石及鹽研爲粉。燒出水銀。淘去鹽石。爲粉極細用之。石鍾乳味甘溫無毒。道州者最佳。須鍊服之。不然使人病淋。治欬嗽。行乳道。補髓添精。強陽道。益肺家。宜慎用之。

代赭石能墮胎。而可攻崩漏。伏龍肝治產難。而吐血尤良。代赭石用火煨醋淬七遍。研水飛。味甘寒無毒。出代州。其色赤。故名代赭石。養血氣。強精辟邪。畏天雄附子。伏龍肝卽竈中土也。味辛溫微毒。消癰腫。催生下胎。止血崩。

雲母補勞傷兼明目。水銀除疥蝨與瘡瘍。

雲母石味甘平無毒。安五臟。堅肌止痢。局方有法煎雲母膏。治癰疽惡毒等瘡。水銀卽硃砂液。能消化金銀使成泥。味辛寒有毒。一名汞。畏磁石。難產可用催生。

治風喉、理鼻息、功全礬石。止漏下、破癥結、用禹餘糧。

礬石、味酸寒無毒。出晉州者佳。化痰止痢。攻陰蝕諸瘡漏。煨過謂之枯礬。亦可生用。禹餘糧、火煨醋淬七次。搗細水飛。味甘寒平無毒。出潞州。形如鵝鴨卵。

外有殼重疊者是。其中有黃細末如蒲黃者。謂之石中黃。

朴硝開積聚。化停痰。煎作芒硝功。卻緩。硝石止煩躁。除熱毒。煉之須掃地邊霜。

朴硝味苦辛。大寒無毒。生益州。初採掃得一煎而成。故曰朴硝。再取朴硝淋汁。煉之有細芒者。謂之芒硝。專治傷寒。硝石味辛苦寒無毒。即掃地霜淋汁煉成者。

打破瞳神。得空青而依然復舊。胎宮乏孕。紫石英有再弄之璋。

空青味甘酸寒無毒。生於有銅處。銅精氣熏則生。今信州時有之。其腹中空。破之有漿者。絕難得。大者如雞子。小者如豆子。治眼翳障爲最要。又有曾青。銅出處色理亦無異。但其彩纍纍連珠相綴。其中不空。與空青功效不相上下。紫石英味甘辛溫無毒。治女子風寒在子宮。絕孕十年無子。服之。又白石英。治風溼痺。安魂魄。強陰道。黃赤黑色。皆不入藥。

熱渴急求寒水石。壯陽須索石硫黃。

寒水石一名凝水石。味甘寒無毒。出汾州及邯鄲。即鹽之精也。治火燒丹毒。能解巴豆毒。畏地榆。硫黃味酸性溫大熱有毒。出廣州。治疥蟲蠹瘡。堅筋療老。



風秘。

腎臟既衰。煨磁石而強陽道。膀胱不利。炒食鹽以熨臍旁。

磁石。味辛鹹寒無毒。有鐵處則生。惡牡丹。畏黃石脂。能吸鐵。補益勞傷。兼治耳聾。食鹽。味鹹溫無毒。解州者勝。治霍亂痰癖。可用吐之。

水銀飛煉成輕粉。殺諸疥癬。善治兒疳。石灰風化方為勝。不堪服食。可療金瘡。

輕粉。即水銀粉。味辛冷無毒。畏磁石。忌一切血。風化石灰。五月五日採百草搗汁。調煨過石灰末。作團陰乾。專治金瘡刀斧傷處。不堪入藥。

石膏發汗解肌。去風寒熱。滑石除煩止渴。快利小腸。

石膏。味甘辛大寒無毒。與方解石相類。須用細理白澤者為真。治頭疼。解肌發汗。黃色者。服之使人淋。滑石。味甘寒無毒。用白色軟嫩者佳。能益精除熱。療

女人產難。

殺三蟲。破癥結。胡粉一名為粉錫。斂金瘡。治眼暗。銅青銅綠竟無雙。

胡粉。一名粉錫。一名定粉。俗名光粉。即今化鉛所作婦人容面者。味辛寒無毒。銅青。銅綠。以醋沃銅上即生。乃銅之精華也。微有毒。不可入湯藥。



吐痰抵痔蜜陀僧。兼抹黥斑。隨手沒。生肌止痛。無名異。折傷可理。并金傷。

蜜陀僧。即煅銀爐底也。味酸辛。有毒。無名異。味甘平。無毒。金傷。謂刀斧傷也。

硼砂。攻喉痺。止嗽消痰。直有理。膽礬除熱毒。諸癰痰。氣盡消詳。

硼砂。一名蓬砂。味苦辛。煖無毒。出南番者。色重褐。其味和。其效速。出西戎者。其

色白。其味雜。其功緩。不堪入藥。作金銀鐸藥用之。膽礬。圖經作石膽。味酸辛。

寒有毒。信州有之。生於銅坑中。採得煎煉而成。消熱毒。療諸風癰瘻。可吐風痰。

伏火靈砂。辟鬼邪。安魂魄。明目鎮心。通血脈。藏泥白堊。除洩利。破癥瘕。澀精止漏。

又為良。

靈砂。一名二氣砂。用水銀一兩。硫黃六銖。研細。二味先同炒作青砂頭。後入水。

火既濟。爐中抽之。如束針紋者。成就也。惡磁石。畏酸水。白堊。即善土。味苦辛。

溫無毒。處處有之。採無時。

石燕。治淋。催難產。黑鉛。安鎮。熨蛇創。創傷也。平聲。與瘡同。

石燕。產零陵州。形似蜡。其實石也。性涼無毒。女人產難。兩手各握一枚。胎立出。

黑鉛。味甘無毒。有銀坑處。皆有。粉錫。胡粉。光粉。皆化鉛所作。又鉛白霜。以鉛。

雜水銀煉作片。置醋釀中密封。經久成霜。謂之鉛白霜。性極冷。

黃丹乃是熬鉛作。生肌止痛。礬石特生非常熱。養就丹房。

黃丹。圖經作鉛丹。又名號丹。用時炒令赤色。研細。味辛微溫無毒。止吐逆。療癰癩。傅金瘡良。礬石。俗呼鎮風石。味辛甘大熱有毒。嚴寒置水中。水令不冰。性堅硬而拒火。燒之一日夜方解散。攻擊積聚痼冷之病最良。須真者。必取鸛巢中團卵而助煖氣者方真。乃修真煉丹之藥品。

血暈昏迷。法鍊廣生花蕊石。折傷排膿。火煨醋淬自然銅。

花蕊石。出陝州閿鄉縣。性至堅硬。保金瘡止血。局方以硫黃合和花蕊石。如法鍊成。專治產後血暈。去惡血。自然銅。味辛平無毒。出銅處有之。形方而大小不等。似銅寶石也。不從礦煉。自然而生。故曰自然銅也。

礞砂能破癥瘕積聚。若還生用爛心腸。信石可吐膈內風痰。倘中其毒促人亡。

礞砂。味鹹苦辛溫有毒。能消五金。入口腐人腸胃。生服之化人心爲血。信石。圖經名砒霜。信州者佳。故名信石。味苦酸有大毒。主諸瘧風痰在胸膈。可作吐藥用。不宜多服。能傷人命。若誤中礞砂砒霜二毒。急宜冷水調萊豆汁飲之可

解。

梁上塵消軟癰。通喉噎。橫生立產。井泉石性寒涼。攻火熱。除翳神方。

梁上塵一名烏龍尾。性微寒無毒。凡使須去烟火遠。高堂佛殿上者。拂下篩而用之。井泉石性大寒無毒。處處有之。以饒陽郡者爲勝。得菊花梔子最良。

除瘡冷。止頭疼。無遺太陰玄精石。安心志。制癲狂。誰知鐵粉和鐵漿。

玄精石出解州解縣。今解地積鹽倉中方有之。其色青白龜背者良。味鹹溫無毒。鐵味甘無毒。取鐵浸之。經久色青沫出。可染皂者爲鐵漿。治癲狂。鐵拍作片段。置醋糟中。積久生衣。刮取爲鐵粉。能安心志。

雄黃能殺虺蛇毒。妊娠佩帶。轉生男子。鍊之久服。自身輕。要生女子。佩帶雌黃。

雄黃雌黃同山所生。山陽處生雄黃。山陰有金處。金精熏則生雌黃。婦人覺有孕。以雄黃二兩。絳囊盛帶之。可轉女爲男。以雌黃半兩。素囊盛帶之。可轉男爲女。雌黃煉服。久則輕身。可入仙家。

備金石之品味。治病得以推詳。

總括上文諸藥。悉可對證而施治也。

## 草部上

觀夫天生蒸民。地生百草。人生不無札瘥之常。以致病於壽夭。草有治病之功。用別花苗實腦。

蒸衆也。實卽子。腦卽根。各有所宜也。

菖蒲開心明目。去濕痺風寒。菊花消濕散痺風。主頭眩痛攪。

菖蒲一名昌陽。須用生石磧上一寸九節者良。味辛溫無毒。菊花味苦甘平

無毒。主胸中煩熱。明目聰耳。

治渴補虛安五臟。快覓人參溫中解毒性平和。無如國老。卽甘

人參。一曰人葠。味甘微寒無毒。反藜蘆。甘草味甘平無毒。主解百毒。爲衆藥

之王。故號國老。反大戟芫花甘遂海藻。

白朮益脾止瀉嘔。若動氣不宜。蒼朮平胃壓山嵐。用米泔浸炒。

白朮味甘辛無毒。主風寒溼痺。益脾胃。補虛勞。消腫。傷寒有動氣者不宜服。

蒼朮用米泔浸一宿。換泔浸。炒乾去皮。味苦甘辛無毒。治傷寒痺痛。除溫瘧。可

發散。

生地黄能行血。兼止吐衄折傷。熟地黄能補血。更治虛勞焦躁。

生地黄大寒。亦治產後血攻心。及女人經水閉絕。熟地黄淨洗酒浸。蒸兩三次焙乾。味甘溫無毒。熟乾則溫補。生乾則平宣。熟者止崩漏。安魂魄。治驚悸。補內傷。

天門冬鎮心止吐血衄血。性寒而能補大虛。麥門冬解渴開結益心腸。勞熱可除。煩可保。

天門冬味苦甘平。大寒無毒。悅人顏色。麥門冬味甘平。微寒無毒。二味並去心。焙乾用。

地膚子車前子除熱去風明眼目。能使膀胱水穀分。兔絲子巴戟天添精補髓主延年。解去腰疼誠有效。

地膚子即落蒂子。味苦寒無毒。車前子味甘鹹寒無毒。能滑胎。止瀉痢。兔絲子味辛平無毒。水洗澄去砂土。酒浸一宿。蒸過乘熱搗成膏。焙乾再入藥方。可研末。巴戟天須連珠者。去心酒浸焙乾。味辛甘。微溫無毒。除風強筋益力。



治夢與鬼交。

牛膝補虛。攣膝痛。月經若閉亦能通。柴胡去熱治勞傷。主療傷寒功力到。

牛膝爲君。味苦酸平無毒。柴胡味苦平。性微寒無毒。治濕痺拘攣。可用煎湯浴之下。氣消痰止嗽。傷寒爲要藥。

草決明瀉肝熱。明目驅風兼鼻淵。草龍膽益肝虛。驚惕無憂疳蟲掃。

草決明味鹹苦甘平。微寒無毒。草龍膽味苦寒無毒。益肝明目。最治疳。

菴藺子性苦寒。風寒濕痺水皆寬。茵陳蒿性苦冷。時氣發黃淋可導。

菴藺處處有之。味苦微寒無毒。久服輕身明目。茵陳蒿味苦平微寒無毒。治淋難小便閉澀不通。

遠志一名小草。堪收夢裏遺精。黃精俗字山薑。久服延年不老。

遠志用去骨。以甘草湯浸煮炒乾。味苦溫無毒。苗名小草。一似麻黃。但無節。令人生智慧。定心驚。黃精俗呼爲山薑。味甘平無毒。然與鉤吻相似。但一善一惡。要仔細辨認。切勿誤用。鉤吻則傷人至死。

北五味補虛下氣。止嗽強筋。南木香止痢健脾。氣疼是寶。



五味子。味酸甘鹹苦辛。故名五味。性溫無毒。止渴消酒毒。木香。形如枯骨者。佳。不見火。味辛溫無毒。去膀胱冷氣。除癥瘕。止瀉痢。

金瘡止血。王不留行。是名翦金花。風疹赤丹。本草景天。即是慎火草。

王不留行。味苦平無毒。可催生。產利月經。景天。味苦酸平無毒。主勞煩大熱瘡。女人漏下。用花良。

絡石。治癰瘡。消熱毒。苗似龍鱗。川芎。醫頭痛。主筋攣。形如雀腦。

絡石。爲君。卽石鱗。又名龍鱗。薜荔。味苦溫微寒無毒。畏貝母菖蒲。川芎。一名

川驚。明目。瘡家止痛。味辛溫無毒。薤蕪。卽其苗也。白芷。爲之使。

金釵石斛。解使元陽壯。腰疼膝痛並皆驅。鬼臉升麻。能教百毒消。疹痘斑瘡寧可較。

石斛草。味甘平無毒。入腎壯陽。平胃氣。升麻。味苦平微寒無毒。能解一切毒。

除熱去風。爲傷寒時氣之要藥也。

烟塵續斷。安胎產。療金瘡。速不可遲。染絳茜根。理風寒。止吐血。須宜乎早。

續斷。味苦辛微寒無毒。最能接骨。因名續斷。茜根。一作蒨。卽今染絳茜草根。

也。味苦微寒。解中蠱毒。

虺牀蛇牀同一種。治風濕癢及陰瘡。羌活獨活本來同。頭痛筋攣風氣撓。

虺牀卽蛇牀。味苦辛甘平無毒。羌活獨活本同類。但紫色而節密者爲羌活。

黃色而作塊者爲獨活。味苦甘平。微溫無毒。

細辛薯蕷。能溫中下氣。仍主腦腰疼。薏苡菱蕤。治痺弱筋攣。并醫風濕症。

細辛。味辛溫無毒。主拘攣風痺。明目療痿。治婦人血閉。薯蕷。俗名山藥。味甘

溫平無毒。補心氣不足。鎮心神。薏苡仁。味甘寒無毒。主肺氣肺癰。菱蕤。葉

似黃精。味甘平無毒。切勿誤用鉤吻。誤用則傷人。

止瀉補虛收盜汗。黃耆奏莫大之功。消癰散腫有高能。忍冬是至賤之草。

黃耆。味甘微溫無毒。主虛勞。強筋。治耳聾。止痛排膿。忍冬草。卽鷺鷥藤。又名

金銀花。其蔓左纏。亦名左纏藤。味甘溫無毒。今處處有之。

澤瀉會除諸般瀉。弭渴疏淋。防風主治一切風。仍蠲痛腦。

澤瀉。味甘鹹寒無毒。止洩精。逐膀胱水。多服令人眼病。防風。味甘辛溫無毒

能解附子毒。明目止汗療崩。

蒺藜陰痛煎湯。頭痛煎酒。蒲黃行血用生。止血用炒。

蒺藜味苦辛溫。微寒無毒。破血催生。若風瘡陰瘡煎湯作浴。頭痛煎酒服。蒲黃味甘平無毒。生則味滑。炒熟則味澀。

菴蓉扶女子陰絕。與男子陽絕。補精養腎。生自馬精。黃連理大人諸熱。卻小兒疳熱。止痢厚腸。貴稱鷹爪。

肉菴蓉味甘酸鹹。微寒無毒。言是馬精落地所生。生時似肉。作羹補虛最佳。

黃連味苦寒無毒。點眼可除熱。更治消中口瘡。良。

漏蘆行乳汁。消瘰癧腸風。丹參補胎氣。利月經爲吉。

漏蘆味苦鹹寒無毒。醫瘡瘍。療眼。理損傷。續筋骨。丹參味苦微寒無毒。除積

聚。破癥瘕。益氣去煩滿。一名赤參。

更分佐使君臣。是曰神聖功巧。

望而知之謂神。聞而知之謂聖。問而知之謂功。切而知之謂巧。望聞問切。是謂醫家之四知。

草部中

抑又聞芍藥苦平。赤者破血通經。而白者可安胎止痛。辛薑大熱。生則嘔家聖藥。而乾者除霍亂肚疼。

芍藥爲臣。味苦酸平。微寒有小毒。惡石斛芒硝。畏硝石。反藜蘆。芍有赤白二種。白者補虛止汗。赤者除熱明目。薑爲使。有生用。有乾用。乾者味辛溫。大熱無毒。溫中止血。逐痺風濕。生者味辛。微溫無毒。處處有之。用熟卽去皮。用生卽留皮。發散傷寒下氣。爲嘔家聖藥。

葛根止渴解酲。發散傷寒。消熱毒。瞿麥開通關格。宣癰墮子。更催生。

葛根味甘寒無毒。瞿麥止用實殼。不用莖葉。味苦寒無毒。

栝蒌曰天瓜。實治乳癰。根可止渴。蒼耳卽葇耳。子能明目。葉解風纏。

栝蒌根。名天花粉。味苦寒無毒。實卽瓜蒌。蒼耳味甘溫有小毒。今處處有之。

主攣痺濕風寒。

玄參攻喉痛。苦參攻腸風。並可消痺破癥結。貝母人面瘡。知母潤心肺。皆能止嗽理傷寒。

玄參卽山麻。味苦鹹。微寒無毒。今處處有之。除風熱。明眼目。苦參味苦寒無

毒。殺疳蟲。治瘡毒。貝母。味辛苦平。微寒無毒。專治腿膝人面瘡。及諸癰毒。知母。味苦寒無毒。除熱止渴。

白薇。本消淋露。更治風狂。并除溫瘧。白芷。能除血崩。專攻頭痛。亦用排膿。

白薇。味苦鹹平。大寒無毒。如葱管者佳。白芷。味辛溫無毒。專治蛇咬。研末。搽咬處。或搗汁。浸傷處。並效。

當歸。主血補虛勞。止血用頭。破血用尾。麻黃。發散攻頭痛。發汗用莖。止汗用根。

當歸。酒浸焙。味苦辛溫無毒。麻黃。味苦溫無毒。

大薊。功同小薊。治癰腫血崩吐衄。小青。不如大青。療傷寒熱毒時行。

大薊。小薊。味甘溫。今處處有之。大青。小青。味苦大寒無毒。處處有之。古方只用大青。

京三稜。蓬莪朮。破血消癥。寧心脾腹痛。白豆蔻。華澄茄。溫脾健胃。能消食寬膨。

三稜。味苦平無毒。莪朮。又曰莪迷。味苦平溫無毒。白豆蔻。味辛大溫。華

澄茄。味辛溫無毒。

鬱金。勝似薑黃。行經下氣。川芎。貴乎藁本。頭痛皆痊。



鬱金、須用蜀中如蟬肚者佳。味苦辛寒無毒。薑黃、說見下文。川芎、解見草部上芎藭下。藁本、俗曰土芎。味辛微寒無毒。主風入四肢。畏青葙子。

前胡、柴胡。功無優劣。通醫熱病。主療傷寒。

前胡、味苦微寒無毒。下氣消痰。推陳致新。安胎止嗽。柴胡、見草部上。

薑黃、烈似鬱金。功下氣消癰。通經破血。萆撥、味如良薑辣。轉筋霍亂。心痛連顛。顛也。顛頂也。

薑黃、處處有之。味辛苦大寒無毒。鬱金、解見前。萆撥、味辛大寒無毒。溫中

下氣。高良薑、味辛溫大熱無毒。

翦草、入疥瘡之氣。王瓜、導乳汁之泉。

翦草、味苦平無毒。婺州產者最良。根名白藥。治金瘡。古方以翦草末蜜和。九蒸

九曬成膏。可醫一切失血。王瓜、一名落鴉瓜。一名土瓜。結子如彈丸。生青熟

赤。可噉。閩俗謂之毛桃。其根止渴。散癰除疽。消癥下血。

通草、元來即木通。治淋退腫。蠹實、一名馬蘭子。去濕醫崩。

通草、味辛甘平無毒。除寒熱。出音聲。治耳聾。馬蘭子、味甘平無毒。去風寒濕

痺。除喉痺。

百合寧心。可除咳痰有血。秦艽治疽。時行勞熱猶能。

百合味甘平無毒。除熱欬。攻發背瘡癰。消脹利大小便。

秦艽味苦平微溫無

毒。消浮腫。利小便。

黃芩解熱通淋。女子崩因熱者。紫菀化痰定喘。欬嗽吐有紅涎。

黃芩味苦平大寒無毒。治黃疸止痢。女子血崩。本性熱者用良。虛寒者不可用。

紫菀味苦辛溫無毒。補虛止渴。安五臟。通結氣滯胸中。紅涎痰中有血膿也。

澤蘭行損傷之血。紫草制痘疹之偏。

澤蘭味苦甘微溫無毒。消四肢浮腫。攻癰腫排膿。

紫草味苦寒無毒。通九竅。

退腫通淋。

石葦透膀胱小便。防己治風熱拘攣。

石葦味苦甘平無毒。去熱除邪。臨用刷去毛。不然令人欬嗽不已。防己味辛

苦平溫無毒。治水腫風腫。去濕止嗽。

肉豆蔻補脾止痢。猶調冷瀉。款冬花洗肝明目。勞嗽宜遵。

肉豆蔻。用麵裹煨熟。味辛溫無毒。解酒消食調中。兼治霍亂。款冬花。味辛甘溫無毒。定喘消痰。

淫羊藿。即仙靈脾。補腎虛。興陽絕不起。補骨脂。名破故紙。扶腎冷。絕夢洩精殘。

淫羊藿。味辛寒無毒。主治冷風勞氣。補骨脂。味辛大溫無毒。主血氣勞傷。

禁驚熱。殺疳蟲。蘆薈。俗呼爲象膽。解風纏。宣痘毒。牛蒡。元來號鼠黏。

蘆薈。味苦寒無毒。以其味苦。故名象膽。主癩癰痔瘡。牛蒡。一名惡實。又名鼠

黏。明目消瘡毒。手足拘攣。味辛平。處處有之。

海藻。海帶一般。疝氣癭瘤同有效。水萍。雖分三種。熱風癰疹並權衡。

海藻。洗去鹹水焙乾用。味苦鹹寒無毒。水萍。有三種。止渴治火瘡。通小便。消

水氣。味辛鹹寒無毒。

艾葉。可生可熟。漏血安胎。嘔吐衄紅還可止。阿魏。有真有假。殺蟲破積。傳屍亦可

保天年。

艾葉。處處有之。味苦溫無毒。生者治下痢。止嘔血。取汁用之。熟者治漏血。可爲丸灸百病。阿魏。味辛平無毒。難得真者。氣極臭而能止臭氣。

敗醬婦人產後用。酸漿催產易於生。

敗漿味苦鹹平無毒。因作敗腐豆漿氣。故名敗醬。陳良甫作婦人科方。說是苦薺菜。仲景方治腹癰。酸漿味酸平寒無毒。處處有之。卽酸醬草也。主熱除煩。通淋止崩。產難胎衣不下者。若吞其實卽出。

茴香治霍亂轉筋。更通腎氣。昆布消癭瘤結硬。水腫爲先。

茴香一名藎香子。味辛平無毒。開胃調中得酒良。昆布味鹹酸。性冷無毒。與海藻同科。治癭瘤。

百部除肺熱久年勞嗽。天麻逐諸風濕痺拘攣。

百部味苦微寒無毒。治疥癬去風。天麻味辛平無毒。益氣強筋。苗名赤箭。

牡丹可行經下血。地榆止血痢宜然。

牡丹味辛苦寒無毒。止痛除邪氣。療驚癇中風。續筋骨。破癰膿。地榆味苦甘酸。微寒無毒。惡麥門冬。止痛排膿。治金瘡。女人帶下良。

香附縮砂。消食化氣。煖胃溫脾。皆婦人要藥。狗脊萆薢。扶老補虛。腰疼脚弱。與濕痺牽纏。

香附子。卽莎草根。味甘微寒無毒。處處有之。縮砂。去皮取仁用。味辛溫無毒。止瀉痢炒過。除妊娠婦腹痛。狗脊。味苦甘平。微溫無毒。草薺。川中者爲道地。味苦甘平無毒。

紅花。本能行血。白薺。瘡疥利便。

紅花。本草作紅藍花。味辛溫無毒。主產後血暈昏迷。可作胭脂。治小兒聾耳。

白薺皮。味苦鹹寒無毒。除疽通淋。主風癱手足不仁。調經水。療陰痛。

風寒濕痺。腎冷與遺精。當知石龍芮。勞熱骨蒸。兼兒疳驚痢。須用胡黃連。

石龍芮。味苦平無毒。畏蛇蛻茱萸。平胃氣。主關節不通。胡黃連。味苦平無毒。

折斷起烟塵者是。

白茅花。能止吐衄血。玄胡索。可治腹心疼。

白茅根。味甘寒無毒。處處有之。通血除煩渴。治淋利小便。花。止吐衄血。茅針。搗

傅金瘡良。玄胡索。味辛溫無毒。治女人月水不下。行腎氣。

甘松青。浴體令香。專辟惡氣。使君子乃醫蟲藥。疳瀉如仙。

甘松。味甘溫無毒。善除惡氣。浴體香肌。治心腹痛。使君子。用熱灰中和殼煨。



去皮殼。取肉用。味甘溫無毒。消痞積。治瀉痢。除諸蟲。因郭使君用此。因名使君子。

斯迺稱爲中品。是誠藥性鈞玄。

### 草部下

因知性甘大熱。附子爲雄。可回陽而逐冷。祛風濕而建中。

附子。團圓平正。重一兩以上者佳。主心腹冷痛。攻欬逆。破癥結。墮胎止痢。除風寒濕痺。強陰道。烏頭與附子同種。以原種之母爲烏頭。破積除寒濕。及中風邪惡風。墮胎。攻腹痛。消積飲。天雄似附子。但廣身長三四寸許。有鬚。性烈一如烏附。逐痺除風助陽。附子爲雄。味並辛甘大熱有毒。

半夏止吐去痰。有毒。必須薑製。大黃通腸滌熱。快峻。因號將軍。

半夏。味辛平。生微寒。熟溫。並有毒。五月夏至生。故名半夏。健脾止嘔去痰涎。熟令人下。生令人吐。合生薑和煎。方制其毒。大黃。味苦寒。無毒。黃芩爲之使。無所畏。宣氣消癰。除結熱。通瘀血。蕩燥屎。推陳致新。性至快。

木賊青箱開眼翳。羊蹄鶴虱殺三蟲。

木賊味甘微苦無毒。攻積塊。腸風下痢。止女人赤白帶。

青箱子。味苦微寒無

毒。卽白雞冠花子。主皮膚熱。瀉肝熱。去風。除瘙癢。殺蟲。羊蹄。俗呼爲禿菜根。味苦寒無毒。攻疥癬。治女人陰蝕瘡痔。殺諸蟲。鶴虱。味苦寒有毒。卽火杓草。

主蛔蟲咬心痛。

與甘草相刑。甘遂能消腫破癥。大戟通利水道。兼除蟲毒。與烏頭相反。白藪治腸

風癰腫。白芨破癰疽。并合跟駝。

甘遂大戟。味並苦甘寒有毒。治病之功。不相上下。故並反甘草。白藪。白芨。味

並苦辛甘平無毒。同反烏頭。療疾大同小異。

風攻皮膚。羊躑躅。熱主嗽喘。馬兜鈴。

羊躑躅。味辛有毒。羊誤食其苗葉。則躑躅而死。故得名。消蟲毒。攻諸痺。賊風。

馬兜鈴。味苦寒無毒。治肺熱咳嗽喘促。兼癰瘡血痔。其根名土木香。又曰青木

香。結子如鈴狀。故名兜鈴。

劉寄奴破血行經。金瘡最妙。續隨子消癥蕩滯。蟲毒尤攻。

劉寄奴。味苦溫。治湯火傷及金瘡最妙。因劉裕小名寄奴。取此草以療金瘡得效。故名。續隨子。即聯步。味辛溫有毒。最治蛇傷。

祛風逐痰白附子。刮磨腸垢白頭翁。

白附子。味甘平溫無毒。能行藥勢。主心疼腹痛。白頭翁。處處有之。謂之老翁鬚。因其根有白茸。故名。仲景以此治溫瘧。又治金瘡衄血。

何首烏。久服延年。可消瘡腫。骨碎補折傷。克效及耳鳴聾。

何首烏。味苦澀微溫無毒。昔有老人姓何。見藤夜交。遂採其根食之。白髮變黑。因此名之。骨碎補。味苦溫無毒。一名猢猻薑。根生緣樹上。能補骨碎折傷。因名之。

瀉肺消痰。下水去浮。葶藶子。通經散腫。開喉明目。射干功。

葶藶。味辛苦寒無毒。生道旁處處有之。有甜苦二種。射干。味苦平微溫無毒。一名烏扇。俗曰仙人掌。

常山吐涎截瘧。葇若止搐攔風。

常山。味苦辛有毒。形如雞骨者佳。苗名蜀漆。葇若子。處處有之。味苦辛有毒。

一名天仙子。雖云有毒。得甘草升麻即解。

連翹除心熱。破癰瘤。堪行月水。桔梗瀉肺癰。清喉痛。止嗽寬胸。

連翹味苦平無毒。分大小二種。利小便。耑治癰疽發背。桔梗味辛苦微寒有小毒。又有一種名苦槁。藥性相同。

海金沙用日中收。攻傷寒熱病。穀精草從田中採。破翳膜遮睛。

海金沙俗名竹園葵。處處有之。收金法。以紙攤之。日中曬熱。以枝擊之。其枝葉自然有沙落紙上。旋收之。耑利小便。得蓬砂。梔子。馬牙硝最良。穀精草一名鼓槌草。又曰戴星草。生田中。味辛溫無毒。治咽喉痺。止齒痛。

草河車即蚤休。癰瘡至聖。商陸根名樟柳。退腫之宗。

草河車名金線重樓。味苦微寒無毒。主治癰癩驚熱。商陸味辛酸平有毒。分赤白二種。白者消水腫。根如人形者有神。赤者不入藥。

藜蘆為瘡疥之藥。貫衆殺寸白諸蟲。

藜蘆味辛苦寒有毒。俗名山稷。反細辛。芍藥。可吐風痰。不入湯藥。耑主疥瘡癰蟲。貫衆味苦微寒有毒。治金瘡。破癥結。止鼻紅。

草蒿一本作青蒿。滅骨蒸勞熱。旋覆花草名金沸。鈍痰嗽之鋒。

草蒿味苦寒無毒。處處有之。根苗子葉皆入藥。但各自使用。用子勿用葉。用根勿用苗。四者若齊用。則有損無益。得童便浸尤良。亦可煎湯洗瘡。除疥虱。旋覆花味鹹甘溫微冷有小毒。通膀胱水。去風濕。利痰止嘔。

蓖麻子善主催生。搗膏敷脚版。威靈仙能消骨鯁。熬汁灌喉嚨。

蓖麻子味甘辛有小毒。瘡癢研麻油搽敷。水瘡研服良。威靈仙味苦溫無毒。主宣氣。去冷消痰。療折傷。治諸風。

馬鞭草能通月水不行。破癥瘕之癖。葫蘆巴好補元陽腎冷。蠲疝氣之癰。

馬鞭草味甘苦寒有小毒。其草穗類鞭梢。因名之。俗謂之鐵掃帚。治溫瘧陰瘡。

葫蘆巴得茴香。桃仁同用。逐膀胱疝氣。得硫黃。附子同用。常補腎經。

萱草治淋。孕帶其花生男子。燈心去熱。燒灰善止夜啼童。

萱草一名鹿葱。其性涼而無毒。處處有之。孕婦佩帶其花。即生男子。故又名宜男草。燈心性涼。破傷處搗敷良。

山豆根療咽痛頭瘡五痔。金沸草治丹毒發背諸癰。



山豆根。味甘寒無毒。消腫毒。止熱嗽。金沸草。至冬時則皆有黃星。點點成行。味苦寒無毒。解硫黃毒。

狼毒。驅九種心痛。稀莨。掃濕痺諸風。

狼毒。味辛平有大毒。陸而沉水者良。主欬逆。治蟲疽癰癰結痰。草。味苦寒有小毒。形似鶴虱。昔有知州張詠嘗進此方。治諸風。稀莨。即火炊

夏枯草。最治頭瘡。癰癰癰瘰癧同可覓。天南星。能下氣。風痰腦痛止怔忡。

夏枯草。至夏即枯。故名。味苦辛寒無毒。天南星。處處有之。味苦辛有毒。散血墮胎。消癰腫。

退腫消風。牽牛子第一。諸瘡解毒。山茨菰最良。

牽牛子。炒過用。味苦寒有毒。處處有之。下氣通腸。利大小便。墮胎。能治腰疼脚痛。山茨菰。即鬼檠燈。又名金燈花。瘡腫癰疽癰癰消毒良。

仙茅。伸風者之脚攣。補虛堅骨。苧根。涼小兒之丹毒。安護胎宮。

仙茅。味辛溫無毒。治虛勞。逐冷氣。益陽堅骨。生長精神。苧根。補血安胎止渴。兼治小兒丹毒。

茵芋理寒熱似瘧。屋遊斷齒紐之縱。

茵芋味苦溫有毒。止心腹痛。通關節。主風寒濕痺。

屋遊。卽瓦上青苔。味苦寒

無毒。逐膀胱水。止皮膚寒熱。

本草編成斯賦。發醫家初學童蒙。

# 藥性賦

元 真定 李 杲東垣原編

吳門 王子接晉三重訂  
鄞縣 曹赤電炳章校點

## 卷四

### 木部

豈不以勞傷須桂肉。斂汗用桂枝。俱可行經破癖。炒過免墮胎兒。

桂味甘辛大熱有小毒。得人參熟地黃紫石英良。畏生葱。

五痔傷風稱槐角。瘡瘍殺疥羨松脂。

槐角實味酸鹹寒無毒。今處處有之。除熱氣。主火燒瘡。皮灌漱風疳齒。松脂、

味苦甘溫無毒。處處有之。道家服餌。輕身延年。松子味甘溫無毒。可供果品。

葉與根白皮。味苦溫無毒。主辟穀不飢。松節。漬酒治歷節風。

柏葉止血吐崩。要安臟鎮驚。去殼取仁於柏子。枸杞益陽明目。退虛勞寒熱。須用其根地骨皮。

柏葉味苦微溫無毒。四時各依方向採取陰乾用。柏白皮主火燒爛瘡。枸杞味苦寒。根大寒。子微寒。無毒。處處有之。惟陝西四川出者最佳。

茯苓有赤白二種。赤者通利小便。白者可補虛定悸。乾漆有生熟兩般。生則損人腸胃。熟者通月水愆期。

茯苓味甘平無毒。多年松根之氣薰灼而生。有赤白二種。並除寒熱。止渴消痰。而赤者專主利小便分水穀。白者專補虛定悸。乾漆味辛溫有毒。須炒熟用則無毒。去癥續骨殺蟲。除心氣止痛。

茯神則健志收驚。開心益智。琥珀則鎮心定魄。淋病偏宜。

茯神即茯苓抱根所生者。用須去心中木。味甘平無毒。多益心脾。主風虛。琥珀味苦平無毒。是松脂入地中多年則化成。

職掌虛煩。斂汗必須酸棗。性行通利。消浮當用榆皮。酸棗仁味酸平無毒。安五臟。除風痺。能堅骨補中。寧心定志。榆皮味甘平無

毒。性滑。通行大小便。消浮腫。治小兒白禿。下婦人胎衣。

攻赤目。清頭風。堅齒輕身。蔓荊子。斂金瘡。除腰痛。治風桑上寄生枝。

蔓荊子。味苦辛。微寒無毒。通關竅。去寸白蟲。除筋骨中寒熱。桑寄生。一名寓

木。味苦甘平無毒。并治崩中補內傷。胎前產後皆宜用。

瀉痢有功。訶黎勒同名訶子。頭眩鼻塞。木筆花乃是辛夷。

訶子。味苦溫無毒。開胃進食消痰。治崩漏及腸風下血。兼主賁豚冷氣。辛夷

味苦辛溫無毒。處處有之。南人謂之迎春木。久服輕身耐老。二月開花。色白帶

紫。花落無子。至夏復開花。初出如筆。故北人呼爲木筆花。主頭眩鼻塞最良。

烏藥主寬膨順氣。沒藥主跌撲金瘡。血氣相攻。諸疼共理。秦椒能明目通喉。蜀椒

能澀精療癰。溫中下氣。風痺同醫。

烏藥。味辛溫無毒。處處有之。惟天台產者爲勝。俗名旁箕。主心腹痛。補中益氣。

攻翻胃。利小便。沒藥。味苦平無毒。按徐表南州記。生波斯國。是彼處松脂也。

破血止痛。爲產後最宜。推陳致新。理內傷良。秦椒。味辛。生溫熟寒。有毒。攻腹

痛。祛風邪。溫中除痺。醋煎灌漱牙疼。蜀椒。去閉口者。味辛大熱有毒。出成都。



逐冷風。核名椒目。利水道。

牙痛乳癰。求莽草。腸風崩帶。索櫻櫚。

莽草。爲臣。性有毒。味辛溫。善開喉痺。理諸瘡癰。

櫻櫚。性平無毒。止痢養血。

治鼻衄。用燒存性入藥。

巴豆。破結宣腸。理心膨水脹。芫花。消浮逐水。繫瘤痔。當知。

巴豆。味辛溫。生溫熟寒。有毒。生巴郡。故名巴豆。性急通利。因名江子。用去皮心膜及油。然後可畏。大黃、黃連。芫花。味辛苦溫。有小毒。治欬逆喉鳴痰唾。腰腹心痛。

木鼈。治疥瘡腰痛有准。雷丸。殺三蟲。寸白無疑。

木鼈子。其形似鼈。故名。味甘溫無毒。治乳癰肛門腫及折傷。雷丸。味苦鹹寒。有小毒。白者良。赤者有毒。能殺人。

養腎除風。石楠葉。漱牙洗目。海桐皮。

石楠葉。味辛苦平。有毒。利皮毛筋骨病。海桐皮。味苦平無毒。主痢。除疥虱。治風痺痛。

牡荊子治雷頭乳腫。郁李仁蕩浮腫四肢。

牡荊子味苦辛無毒。即黃荊。今官司用作笞杖。處處有之。主頭風目眩。郁李仁味酸平無毒。俗名唐棣。通關格。去浮腫。根皮治齒痛風蛀。

密蒙花總爲眼科之要領。蘇方木專調產後之血迷。

密蒙花味甘平微寒無毒。蘇方木味甘鹹平無毒。專能破血消癰及撲損。楮實補虛明目。葉洗疹風。樹汁塗癬疥。竹皮刮下止嘔。葉解煩躁。燒瀝禦風痰。

楮實味甘寒無毒。主塗水腫及陰痿不起。竹皮多種取皮止嘔吐者。南人呼爲江南竹。味辛平甘寒無毒。肉薄。今人取作竹瀝者。又謂之淡竹。其葉解煩除欬逆。今方中用淡竹葉。又是一種叢小葉。柔微有毛。其根生子如麥門冬。

檮白皮止痢斷疳。葉汁洗瘡除疥虱。胡桐泪殺風牙蛀。腹膨脹滿吐堪施。

檮白皮與椿白皮性同良。但檮木臭。椿木香。味苦有毒。檮木根葉俱良。南北皆有之。兩木最爲無異。俗呼作虎目樹。胡桐泪味鹹寒無毒。形似黃礬。得水便消。如硝石也。

結胸散痞寬膨。逐水調風宜枳殼。煩悶通淋解熱。赤眸黃疸用山梔。

枳殼。味苦酸。微寒無毒。能攻痔瘻。消癥癖。山梔。味苦寒無毒。生於山間者爲

山梔。人家園圃種蒔者爲黃梔。形肥壯可染物。惟緊小者爲山梔。方可入藥。

檳榔。攻脚氣殺三蟲。宣通臟腑。厚朴。乃溫中除霍亂。膨脹堪調。

檳榔。味辛溫無毒。生海南。向日曰檳榔。形尖如雞心者良。向陰曰大腹子。平坐如饅頭。檳榔下氣除風。宣利臟腑。逐水消痰破結。厚朴。去粗皮薑汁炒過。味

苦溫無毒。須用中厚有紫油者佳。通經下氣。厚腸胃。消穀食。安腹中蟲。

猪苓。消渴利水。治傷寒中暑。龍腦。清頭明目。主驚搐小兒。

猪苓。味甘苦平無毒。生土底皮黑作塊似猪糞。故名。治欬瘧。消腫利水。止遺精。

龍腦。味辛苦微寒。一云溫平無毒。其香透頂。攻耳聾。消風氣。通九竅。卽梅花

片腦。若服餌過多至兩許。則身冷如醉。氣絕而非中毒。蓋性寒故也。

明目涼肝解熱。毋遺黃蘗。磨癥下浮行經。休缺紫葳。

黃蘗。俗名黃柏。味苦寒無毒。除血痢。去黃疸。治癰瘡。祛脾胃熱。治女人熱崩。

紫葳花。一名凌霄花。味鹹微寒無毒。處處有之。治風熱毒及癰症。

杜仲。堅筋補損傷。兼主腎虛腰痛。衛茅。殺鬼決經閉。陰人崩帶也能醫。

杜仲、味辛甘平無毒。折斷多白絲。用薑汁和炒去絲良。除風冷。強心志。衛茅、  
卽鬼箭羽。味苦無毒。攻腹痛破癥結。

癰腫癥瘕憑虎杖。殺蟲砥痔問蕪荑。

虎杖、俗名斑杖根。味甘平。微溫無毒。治傷損。消瘡毒。蕪荑、味辛平無毒。逐冷

除心痛。兼治皮膚骨節風。殺疥蟲治癬。攻腸風。

蕤仁搗膏點眼科。輒除熱赤。皂莢爲末搐鼻嚏。應釋妖迷。

蕤仁、味甘溫。微寒無毒。通結氣。鼻紅。皂莢、味辛鹹溫。有小毒。亦有數種。或長

至一二尺。惟如猪牙者良。消痰除嗽。散腫痛。去頭風。

沒石子主痢生肌。染烏黑髭髮。益智子瀋精益氣。止小便多遺。

沒石子、卽無食子。味苦溫無毒。出西番。用有竅者良。治陰瘡陰汗。益智子、味

辛溫無毒。安神定志。故謂之益智。

川練子號金鈴。冷氣膀胱能作主。五倍子名文蛤。腸氣五痔效端殊。

川練子、味苦寒。有小毒。處處有之。蜀中者良。根皮最殺蛇蟲。五倍子、味酸平  
無毒。除齒齲及瘡膿。亦可洗眼去風熱。

吳茱萸下氣消痰。提轉筋霍亂。山茱萸添精益腎。治風痺無疑。

吳茱萸味辛溫大熱有小毒。處處有之。除欬逆。逐邪風。主脚氣攻心。山茱萸一名石棗。味酸平微溫無毒。療耳聾。調女人月水。

桑白皮瀉肺補虛益氣。大腹皮通腸開胃健脾。

桑白皮味甘寒無毒。即桑樹根皮。利水道。消浮腫。殺寸白蟲。大腹皮即檳榔大腹子之皮。微溫無毒。專下氣分冷熱。攻心痛。

金櫻子冬青子。養精益腎輕身。調和五臟。蘇合香安息香。辟惡去鬼殺蟲。蠱毒消除。

金櫻子味酸澀平溫無毒。採實搗汁熬膏。久服輕身耐老。冬青子又名女貞實。味苦平無毒。治病與金櫻子同功。蘇合香味甘溫無毒。油能辟惡除溫瘧。久服令人不生夢。安息香味辛苦平無毒。辟邪煖腎止遺泄。

秦皮洗眼除昏。男子添精。婦人收帶下。黃蘗通喉豁痺。蛇傷取效。醫馬是神樞。

秦皮味苦寒無毒。治風寒濕痺。黃蘗味苦平無毒。治惡腫。

苦菜主頭疼。痢生腹痛。同薑煎服。鈎藤蠲癰瘕。兒生客忤。勝禱神祇。



苦菜。卽茶茗。味甘苦。微寒無毒。除痰下氣消宿食。鈎藤。味甘苦平。微寒無毒。其形如鈎。故得名。舒筋活血。

止痛生肌。麒麟竭。舒筋展痺。五加皮。

麒麟竭。一名血竭。味鹹平無毒。除血暈。五加皮。味辛苦溫。微寒無毒。治風寒

濕痺。止心痛。益精神。通疝氣。治陰瘡。小兒幼小不能行。服之良。

丁香。下氣溫中。能益脾止吐。沉香。調中順氣。療痛絞心腹。

丁香。味辛溫無毒。散腫除風毒。更治齒痛風牙。沉香。味辛溫無毒。療腫除風

去水。止霍亂轉筋。壯元陽。辟惡氣。

檀香。藿香。止霍亂吐嘔。痛連心腹。乳香。楓香。專消風止痛。瘡毒流離。

檀香。性熱無毒。消風腫。腎氣攻心。藿香。味辛微溫。去惡消腫。治吐逆。乳香。

味辛熱無毒。辟惡除邪。補精益腎。治諸瘡。攻血氣。楓香。是楓樹脂。卽白膠香

也。治癰疹風。擦齒痛。去虛浮水氣。味辛平微有毒。

竺黃。理天弔止驚風。更使清心明目。胡椒。能下氣逐風冷。兼除霍亂昏迷。

天竺黃。味甘寒無毒。生天竺國。故名。胡椒。味辛溫無毒。去痰止痢。治心腹卒

然作痛。

此木部之藥性。爲後學之繩規。

## 人部

看方猶看律。意在精詳。用藥如用兵。機毋輕發。草木之性既陳。人物猶宜立訣。律法度也。齊之以刑。用藥猶用兵。謂醫者乃人之司命。

天靈蓋最主傳屍。久病虛勞。熱蒸在骨。

天靈蓋乃死人頂骨十字解者。此骨是天生蓋壓一身之骨節。陽人用陰。陰人用陽。味鹹平無毒。主傳屍鬼疰人。

熱病乃陽毒發狂。當求人糞汁。打撲損傷并新產。快索童男溺。

人糞一名人中黃。性寒無毒。專治天行大熱。勞氣骨蒸。燒末調服。解諸毒。爲末湯調。治熱病發狂。絞糞汁飲之。童男溺。童子小便也。女子者不宜用。主寒熱虛勞。頭疼濕氣。

乳汁有點眼之功。視襠救陰陽之易。

婦人乳汁味甘平無毒。能安五臟悅皮膚。昔張倉常服。享壽百餘歲。衍義云。乳汁治眼之功何多。蓋人心主血。肝藏血。肝受血則能視。婦人之血上爲乳汁。下爲月水。用以治目。不亦宜乎。裊襠。即裊褲之當陰處。翦取方圓六七寸許。燒爲末服。男子病新瘥。而婦人與之交。則男病陰易。女人病新瘥。而男子與之交。則女病陽易。小腹絞痛。手足攣。目中生花。頭重不能舉。若不急治。則死。男子病用婦人裊襠。女人病用男子裊襠。以水調服。調諸淋。破瘀血。亂髮元來。卽血餘。止吐衄。理肺痿。漩垢便是人中白。血餘。乃常人亂髮燒灰。味苦微溫無毒。治癰疽及轉胞。人中白。卽尿桶中澄底垢積之結白者。火上燒灰。最治緊脣及勞熱傳屍。圖經衍義無虛。醫者可知端的。

## 禽獸部

蓋言走者屬獸。飛者屬禽。

禽屬陽。身輕。故能飛而上。獸屬陰。身重。故能走而不能上飛。

鹿角煎膠補瘦羸。又安胎止痛。麝香辟邪而通竅。安客忤癇驚。

鹿角味苦辛。依法煎煉成膠。及霜入藥用。止泄精遺尿。麝香味辛溫無毒。攻風疰墮胎救產難。

安魂定魄。牛黃治風癇驚熱。生肌止汗。龍骨止洩痢遺精。

牛黃味苦平有小毒。除狂躁。治天行時氣。龍骨味甘平微溫無毒。治女子崩止小便遺瀝。療陰瘡。龍齒鎮驚治癲癇。

牛乳補諸虛。益氣通腸。須求羊酪。獺肝開熱脹。傳屍勞嗽。有驗堪憑。

牛乳味微寒。性平無毒。止渴。獺肝爲君。味辛溫有毒。凡人素有冷氣虛膨者。此二味皆不宜服。

象牙出肉中之刺。熊膽醫痔痢之靈。

象牙味甘平無毒。生煮汁飲之。利小便。燒末止遺精。磨屑傅肉中刺。凡骨鯁者。磨水服即下。更祛勞熱止頭癇。熊膽味苦寒無毒。然難分真僞。取一粟許滴水中。一道如線不散者爲真。治天行熱症諸疳。惡防風。地黃。

羚羊角明目去風。可保驚狂心錯亂。膈膈臍溫中補腎。何憂夢與鬼交情。

羚羊角。味鹹性寒無毒。可活胎易產。益氣安心辟邪。脇肋臍。味鹹性熱無毒。主驚癇。消宿血。除痰癖氣。

阿膠止血安胎。兼除嗽痢。犀角涼心解毒。殺鬼聞名。

阿膠味甘平微溫無毒。出阿縣城北。井水煮取烏驢皮。以阿井水煎成膠爲真。須用一片鹿角同煮。不爾不能成膠也。養肝虛勞極。止四肢酸疼。犀角味苦酸鹹寒無毒。驅風明目。除心熱狂言。又治時行疫癘。

鹿茸益氣補虛。男治洩精。女止崩漏。虎骨驅邪辟惡。男去風毒。女保胎驚。

鹿茸用茄形連頂骨者。味甘酸溫無毒。一云味苦辛。虎骨性平味辛微熱無毒。治惡病及風痺拘攣。

兔頭骨主頭疼。和水燒灰催產難。牛角腮治崩帶。燒灰入藥效如神。

兔頭骨味甘平寒無毒。治頭昏痛。兔骨治熱中消渴。肉不可多食。損人陽氣。孕婦食兔肉。生子缺唇。不可與雞肉及生薑同食。牛角腮味苦甘無毒。消血閉便血。攻冷痢。

瓦雀肉則益氣。卵則強陰。白丁香療癰疔腫目。雄雞烏者補中。赤者止血。黃臍脰



止遺尿難禁。

瓦雀肉味甘溫無毒。雀糞直立者名白丁香。雄雞肉味溫無毒。烏者補中止

痛。赤者止血治崩。諸雄雞膽微寒。主目不明。心主五邪。血主損傷。肺主耳聾。腸

主小便數不禁。肝及左翅毛主陰痿不起。冠血能行乳汁。

蝙蝠經名伏翼。能開黑暗目瞑。

伏翼即蝙蝠別名。味鹹無毒。主淋目昏。久服則忘憂。糞名夜明砂。可治疳。

藥是伐病之斤。醫實司人之命。

言醫藥之治病。猶斧斤之伐木也。

### 蟲魚部

抑又聞蠹者為蟲。潛者為魚。堪行入藥。貴賤何拘。

蠹動也。潛登藏也。

全蠹有毒。須當去。能透耳聾。療諸風驚搐。盤螯即斑也熟炒不宜生。通淋墮孕。宣癰瘰之疵。

全蠍。宜緊小者佳。味甘辛。須去毒方可用。盤螯去足翅。以米同炒。至米黃色。

去米。若生用。即令人吐瀉。味辛寒。有大毒。

消水氣。去癭瘤。無如海蛤。安心志。磨翳障。大喜珍珠。

海蛤。味苦鹹。平無毒。治浮腫。除欬逆。定喘消煩。珍珠。味寒無毒。出廉州。主潤

澤皮膚。悅人顏色。綿包塞耳。可治聾。

水蛭。治癰疽。通經破血。田螺去目熱。反胃堪除。

水蛭。即螞蝗。生水中。名水蛭。生草中。名草蛭。生泥中。名泥蛭。並能著人及牛

馬股脛間。啞血入藥。當用水蛭之小者佳。此物極難得死。雖炙過經年。得水猶

可活。必炒令極黃熟。不爾入人腹。生子為害。田螺性大寒無毒。不可多食。其

肉傳熱瘡。殼主反胃。汁能醒酒止渴。田中取者為佳。

鼠婦。通月閉。利便瘕。仲景將來醫久瘕。蝨蟲破堅癥。磨血積。傷寒方內不曾無。

鼠婦。味酸溫無毒。生人家地上。處處有之。蝨蟲。名土鼈。味鹹寒有毒。處處有

之。

搜癰癧驚風。明目催生。稱蛇蛻。止喎斜口眼。墮胎點翳。捉衣魚。

蛇蛻、味鹹苦平無毒。主纏喉風。攻頭瘡癰癰。衣魚、味鹹溫無毒。處處有之。多見於書卷中。小兒淋閉。用以摩臍及小腹。溺即通。仍可摩瘡。出箭頭入肉。醫附骨鼠瘻。蛻蝦便是推車客。補打撲損傷。療兒疳昏眼。蝦蟆本草即蟾蜍。

蛻蝦、味鹹寒有毒。療兒驚癇瘵風癰。臨用當炙過。勿置水中。令人吐。入藥去足翅。蝦蟆肉、味辛寒無毒。主邪氣堅癢惡瘡鼠漏。

殺伏屍鬼疰三蟲。地龍俗名蚯蚓。正風賊斜喎。肚脫。蝸牛本是蛞蝓。

地龍、味苦無毒。須用白頸者良。傷寒狂熱須用。汁治痢消丹毒。螭、蝸牛、俗名螭螺。處處有之。生砂石垣牆下濕處。亦治背疽。用涎塗抹。

蟻蠶點眼翳雜科。割金瘡出肉中刺。蛤蚧傳屍堪止嗽。兼補肺邪鬼咸驅。

蟻蠶、味鹹甘有小毒。處處有之。以背行反馱於脚。即朽木中蠹蟲。但潔白者佳。

蛤蚧、一名守宮。功力全在尾梢。人捕之即自咬斷其尾。用以法取之。行常一雌一雄相隨。入藥亦當用成對者良。

牡蠣固漏血遺精。補虛止汗。蝨蟲破癥瘕血積。經閉通渠。

牡蠣、味鹹平微寒無毒。主瘧疾寒熱。除驚恐。蝨蟲、味苦微寒有毒。啗食牛馬背血者用。須炒熟。除去足翅。方可入藥。

鰻鱺魚、退勞熱。骨蒸殺蟲愈痔。石龍子除熱淋止血。蜥蜴殊途。

鰻鱺魚、味甘有毒。處處有之。雖有毒而能補五臟虛損。消項顙白駁風熱。煨骨熏蚊虱則滅。石龍子與蜥蜴蟪蛄守宮五種相近。

為賊骨是海螵蛸。退翳殺蟲。治崩攻痢。鯁鯉鱗為穿山甲。堪醫疥癬。鬼魅遭鋤。

海螵蛸、味鹹微溫無毒。療陰瘡。治耳聾。其血似墨。能吸波嘔墨以溷水。所以自衛。有八足聚生口旁。浮泛於水面。為見謂其必死。欲啄之。則聚足抱為。拖入水中食之。故名為賊魚。穿山甲、性涼有毒。主邪驚治痺。

勞熱骨蒸專鼈甲。脫肛狐臭尚蜘蛛。

鼈甲、味鹹平無毒。處處有之。治崩療瘕。主癥瘕疝癖。不可與雞子同食。合莧菜食則傷人。蜘蛛、性冷無毒。處處有之。然多種。身有毛刺及五色并薄小者。並不可用。療癰背瘡。蛀牙兼治口斜喎僻。喜忘者取網著衣領中。

蟬退消風。斷小兒夜哭之鬼。蝟皮生痔。提腸風下血之徒。

蟬退。味鹹甘寒無毒。亦治婦人產難。小兒驚癇。 蝟皮。味苦甘無毒。治疝氣陰蝕瘡。

鯉魚。寬胎脹。骨止赤白之崩。膽抹青盲赤目。蟹主熱結胸。黃能化漆爲水。殼燒集鼠招鮑。

鯉魚。味苦甘寒無毒。止渴消腫。腹有癥瘕之人不可食。 蟹。味鹹寒有毒。爪能破血墮胎。

鯽。治腸風下血。宜作鱠。又宜作羹。治痢無分赤白。蛙能補損祛勞。一種水雞爲美饌。專補產婦之虛。

鯽。味甘溫無毒。燒灰治諸瘡。補胃和中。 蛙。味甘寒無毒。殺疰邪。

蜈蚣。開小兒口噤。墮孕婦之胎。更制蛇毒。土狗催胎產難生。罨肉中之刺。退腫須臾。

蜈蚣。味辛溫有毒。用當炒熟。主殺三蟲。生則令人吐瀉。不堪入湯藥。 土狗。卽螻蛄。味鹹寒無毒。處處有之。下腫利大小便。解毒潰癰。

石決明瀉肝。黑障青盲終可決。桑螵蛸補腎。洩精遺溺竟無虞。



石決明、味鹹平涼無毒。除肝經風熱。桑螵蛸、味鹹甘平無毒。卽螳蜋子也。用炒黃色。不爾令人洩瀉。

原蠶蛾主洩精。好強陰道。白僵蠶治諸風。口噤難呼。

蠶蛾雄者有小毒。炒去翅足。補腎療血。風痺癰瘰用蠶沙。僵蠶炒去絲嘴。味

鹹平辛無毒。療驚癇崩漏病。又除口噤及喉風。

白花蛇主諸風濕痺拘攣兼疥癩。五靈脂行經閉。昏迷產婦早來沽。

白花蛇味甘溫鹹有毒。主諸風喎斜口眼。并大風瘡。與烏梢蛇同功。五靈脂、

卽寒號蟲糞也。治腸風并冷氣。炒之治崩。

著意要行斯道。潛心細下工夫。

## 果口叩部

且如果品數端。亦今優劣。

以果品言之。如柿有數種。紅者只可生噉。烏者可焙乾入藥用。其蒂功力且優。白者力薄而功亦劣。

入藥當知刑反忌宜。性情要辨苦甘冷熱。

大棗與生葱相刑。不宜合食。烏梅與黃精相反。豈可同餐。如桃杏雙仁者。有毒能殺人。安石榴味酸者。方可入藥。苦甘者不宜多食。主損齒傷肺。又如橘味辛溫。柚味苦冷。棗味甘熱。柿味甘寒之類。

橘皮則理氣寬中。消痰止欬。更可止嘔定吐。大棗則養脾扶胃。助藥成功。又能補氣調脈。

陳皮味辛溫無毒。主溫脾。青者破積聚。大棗味甘平溫無毒。

雞豆肉名爲芡實。輕身長志。好止腰疼。覆盆子卽是蓬蘽。益氣強陰。養精最利。

芡實味甘平無毒。補中治痺。煎和金櫻子。最益人。覆盆子味酸平鹹無毒。處處有之。補中益腎。調和臟腑。治虛損風。

柿乾止痢澀腸。生宜解酒渴。止噦。須教用蒂良。梨實除煩引飲。漿可吐風痰。乳婦金瘡如仇賊。

柿乾味甘寒無毒。最潤喉。通耳鼻。梨實味甘微酸寒無毒。可止嗽。不宜多食。致成冷痢。乳婦金瘡尤不可多食。

橄欖止渴生津。口脣乾燥。研傅核中仁。石榴舒筋止痢。去腹中蟲。根皮煎汁啜。橄欖味酸甘溫無毒。消酒毒。安石榴味甘酸無毒。殼入藥。治筋攣脚痛。攻痢夏。

藕實止痢補心垣。節除嘔衄。葉堪止渴安胎。桃仁通經破癥結。仍輟腰疼。花主下痢膿血。

藕實味甘平寒無毒。處處有之。桃仁去皮尖。味苦甘平無毒。其花通利小便更捷。

杏仁不用雙仁。通腸潤肺。治欬清音。烏梅卽是梅實。止渴化痰。痢中莫缺。

杏仁去皮尖及雙仁者。味酸甘無毒。治驚癇腹痺。及產乳金瘡。烏梅味酸平無毒。下氣調中止渴。治骨蒸勞熱。咳嗽痰涎。

宣木瓜治霍亂轉筋。調理脚氣。濕痺伸舒。枇杷葉能止嘔和胃。專降肺氣。功全口渴。

宣木瓜味酸溫無毒。消腫強筋骨。止渴并脚氣攻心。枇杷葉用布拭去毛。炙用。味苦平無毒。主肺風。

胡桃肉肥肌潤肉。撲傷和酒搗來嘗。草果仁益氣溫中。好伴常山攻瘧發。

胡桃肉味甘平無毒。去痔瘡消癰瘰。草果仁味辛溫無毒。溫脾胃消宿食。解酒毒攻冷氣。

若能熟此作筌蹄。可洗下工之陋拙。

## 米穀部

精明米穀。豆麥粟麻。雖民生之日用。充藥料於醫家。

穀入脾。豆入腎。麥入肝。粟入肺。麻入心。

粳米溫中和胃。秫米能解漆瘡。止渴除煩。須陳倉米。黃豆殺鬼辟邪。黑豆乃堪入藥。若問黃卷。便是豆芽。

米味甘溫無毒。粳即常時所食之米。秫即造酒之糯米。其種數甚多。不可盡述。主除煩斷痢。豆惟黑者入藥。宜炒熟用。味甘平無毒。其他俱不堪用。

祛胃熱。養腎虛。米粟可長生。填精髓。利小腸。巨勝即胡麻。

粟味鹹微寒無毒。治消中。巨勝子。久服之。可長生不老。利大小腸。堅筋快產。

主心驚。味甘平無毒。處處有之。卽黑麻子。

赤小豆。消水腫虛浮。研塗癰疽消熱毒。白扁豆治筋轉霍亂。葉傳蛇蟲咬最佳。

赤小豆炒過用。味甘酸平無毒。治消渴。攻脚氣。白扁豆味甘微寒無毒。消暑解毒。下氣和中。

小麥止汗養肝。堪除燥熱。大麥生肌消渴。長胃榮華。

大小麥味甘微寒無毒。

麥蘖入湯藥。真個溫中。可知消食。麥麩若調醋。傅撲損處。愈後無瑕。

麥蘖卽麥芽也。麩皮也。

去丹風解一切之毒。霍亂吐翻。取粉於菉豆。除浮疽吐一切痰涎。開胸膈病。摘蒂於甜瓜。

菉豆味甘寒無毒。除熱氣。主頭疼目暗。甜瓜味苦寒有毒。處處有之。蒂入藥。

瓜有赤白二種。入藥當用赤者。

言之有準。用之無差。

## 蔬菜部



既以言之五穀。又當取用蔬菜。

葱主頭疼。堪發散。通大小腸。白可安胎止痛。韭補腎虛。益元陽。溫中下氣。子收夢洩遺精。

葱味辛溫無毒。韭味辛溫微酸無毒。葱韭皆不可多食。昏人精神。又不可與

蜜同食。

搗汁止頭疼。喘嗽風痰。萊菔子。酒煎噴痘體。自然紅潤。說胡荽。

萊菔。即蘿蔔也。味甘辛無毒。根腦及嫩葉俱可食。煮熟消食。和中下氣。去痰癖。肥健人。胡荽味辛溫無毒。消穀通心竅。補五臟不足。利大小便。辟邪穢。

白冬瓜去躁煩止渴。白芥子寬胸膈痰拘。

冬瓜味甘微寒無毒。治淋利小便。除熱散癰。通小腸醒脾。用子中仁尤良。白芥子味辛溫無毒。青白紫數種。惟芥子粗大色白者入藥。除冷氣。攻反胃。治上氣。

婦人產難好催生。滑膩利泄。冬葵子。霍亂轉筋心腹痛。減煩卻暑。羨香薰。冬葵子味甘寒無毒。處處有之。其子是秋種覆養。經冬至春作子。故謂冬之葵。

子。除寒熱。治疳用根。香薷。味辛微寒無毒。下氣除煩熱。消腫止渴。

發病生蟲。又敗陽。便是芸薹菜。生瘡長痼。精神損。少吃茄子兒。

芸薹菜。味辛溫有毒。不宜多食。敗損陽氣。生腹中長蟲。主破癥瘕。通血除丹毒。消乳癰。茄子有紫白二種。味甘寒。性冷不宜多食。茄根煎湯。洗凍瘡。蒂燒灰。治腸風。

婦人惡血能令下。溼痺筋攣。取豆芽黃卷。瘡疥傷寒最得宜。血風血暈。用荊芥假蘇。

大豆黃卷。以黑豆大者為芽。蘖。生便曬乾。名黃卷。入藥用。味甘平無毒。假蘇。即荊芥。味辛溫無毒。下氣除勞。兼治頭痛。

馬齒莧散血敷瘡。傅火丹。殺蟲磨翳。草蘩薹發背瘡。瘍丹風起。爛搗堪塗。

馬齒莧處處有之。味酸寒無毒。止渴攻血痢。磨眼翳。利便難。草蘩薹。味酸平無毒。名雞腸菜。

消痰定喘。寬膨。當求蘇葉。風氣頭疼發散。切要薄荷。

紫蘇。味辛溫無毒。葉紫色而氣香者佳。消痰下氣。開胃用葉。風氣頭疼發散用

莖寬喘急治欬嗽用子。薄荷味辛苦溫無毒。發汗消食寬脹。除霍亂傷寒。可發散。

飴糖斂汗建中。補虛羸不小。神麴養脾進食。使胃氣有餘。

飴糖味甘微溫無毒。以糯米煮粥。候冷入麥蘖。澄清再熬成飴糖。以淨器盛貯。夏天澄沉井中。免令酸。諸米可作飴。惟糯米者入藥。止渴消痰治嗽。神麴味甘大煖。消食下氣。

調理產人。去瘀生新。猶用醋。通行血脈。助添藥勢。酒同塗。

醋一名苦酒。治癰除癥。消疽退腫。酒味苦甘辛。大熱有毒。辟惡除邪。破癥結。

香豉本食中之物。醫傷寒切不可無。

淡豆豉味苦寒無毒。治頭痛發汗。止痢解熱。以酒浸搗爛。患脚傳之良。

不揣愚衷而作賦。是為藥性之斤銖。揣量度也。

〔明〕 李中梓 編輯  
〔清〕 王晉三 重訂

# 雷公炮制藥性解

中國醫學大成





## 雷公炮製藥性解提要

舊本題明李中梓撰。凡金石部三十三種。果部十八種。穀部十一種。草部九十六種。木部五十七種。人部十種。禽獸部十八種。蟲魚部二十六種。每味之下。各有論案。其稱雷公云者。蓋採炮炙論之文。別附於末。考宋雷斅炮炙論三卷。自元以來。久無刊行之本。惟李時珍本草綱目所載較詳。是篇所採。似未全備。冠以雷公之名。僞也。然搜採藥性。多通用之品。初學誦讀。實不可少耳。

雷公炮製藥性解 提要

# 序

余讀仲景之敍醫。輒爲之掩卷。蓋其感生死之芒忽。篤君父之危殆。賤名利之浮榮。冀年壽以沒世。傷哉其言。焉得不原本藥性。加意候診者乎。三皇御宇。太昊首畫八卦。開萬世道術之祖。而神農徧嘗百味。黃帝著爲素問。述其鼎足。揚化醫之用居多。今攷本經所載草木鳥獸等類。則乾木果震萑葦坤子母牛兌羊艮狗之說。酸鹹有五味之別。青黃有五色之分。則坎水離火震木兌金坤土之說。定浮沈。明燥溼。則本天本地親上親下之說。立君臣分佐使。則君一民二之說。有畏有喜。有惡有反。則吉凶利害之說。有補有瀉。有正治。有從治。則變通趨時之說。無非大易之源流。八卦之分布。聖人所以順風氣而防夭札者。端不越此。自太史公著扁倉論。以爲美好者不祥之器。而儒者又好自張大。置醫於九流之中。欲如皇子之論當心。東里之辯六氣。文摯止疾於齊王。枚乘霍然於太子。豈可得哉。余以少孤。不及摻藥以進慈父。間爲母氏嘗之。退而攷諸方書。多所不合。斯用痛心。乃於讀書之暇。發本經仙經暨十四家本草四子等書。靡不悉究。然後辨陰陽之所屬。五

行之所宜。著藥性解二卷。敢謂拯危濟殆。於是焉賴。特以志余之悲。爲人子事親之一助爾。且夫甘旨以養之。溫清以奉之。而卒罹夫不可療之災。欲代則不能。欲徧訪而證諸人。則不及。此人子終天之恨。仲景氏傷之。余所不辭而爲之縷析者也。若夫素問一書。軒岐之精蘊在焉。亦欲訂其同異而折衷之。期於剖微而止。敬以異日。公之同好。雲間李中梓撰。

# 雷公炮製藥性解目錄

## 卷一

金石部三十三種

金銀箔

黃丹

胡粉

銅青

鐵漿鐵鑪附

水銀

輕粉

銀硃

密陀僧

一 一 二 二 二 二 三 三 三 四

丹砂

鍾乳

礬石

禹餘糧

硝石六種

滑石

石膏

青鹽

食鹽

雄黃

紫石英

赤石脂

四 五 六 七 八 八 九 一〇 一〇 一一 一一



寒水石	二
花蕊石	二
陽起石	二
蓬砂	三
膽礬	三
青礬石	三
無名異	三
玉屑	三
自然銅	四
石礬	五
磁石	五
硫磺	六
果部種十八	
陳皮 <small>核葉附</small>	七

青皮	七
枳殼	八
枳實	八
杏仁 <small>肉附</small>	九
桃仁 <small>花毛蟲葉實附</small>	〇
大棗	一
烏梅	一
藕 <small>皮節蓮子蓮鬚荷葉花蒂附</small>	一
枇杷葉 <small>實附</small>	二
石榴皮	二
山查	三
梨	三
柿 <small>柿乾蒂附</small>	三
芡實	四

雷公炮製藥性解 目錄	
胡桃	二四
龍眼	二四
橄欖 <small>核中 仁附</small>	二四
穀部 <small>十種</small>	
麥芽	二五
神麴	二五
酒	二六
醋	二六
飴糖	二六
胡麻子	二七
白扁豆 <small>豆花豆 葉附</small>	二七
赤小豆	二八
芝麻	二八
豆豉	二八

卷二	
萊豆	二八
草部 <small>上四種 下十種</small>	
人參	一
黃耆	二
甘草	二
當歸	三
川芎	四
山藥	四
白朮	四
蒼朮	五
芍藥 <small>赤白 二種</small>	五
生地黃	六

熟地黃	六
知母	七
貝母	七
黃芩	八
黃連	八
大黃	九
桔梗	〇
天花粉 <small>仁與附</small>	〇
半夏	一
紫蘇	一
白芷	二
防風	二
獨活	三
羌活	三

柴胡	一三
前胡	一四
香附	一五
麻黃	一五
葛根	一六
麥門冬	一六
天門冬	一七
五味子	一七
升麻	一八
藁本	一八
細辛	一九
連翹	一九
澤瀉	二〇
玄胡索	二〇

卷二

草部中五種

地榆	二
防己	二
常山	二
草龍膽	二
玄參	一
丹參	二
苦參	二
紅花	三
三稜	三
蓬莪朮	三
天麻 <small>附赤箭</small>	四

南星	五
秦艽	五
遠志 <small>附小草</small>	五
破故紙	六
葫蘆巴	六
何首烏 <small>二種</small>	六
骨碎補	七
威靈仙	八
牛膝 <small>二種</small>	八
黃精	九
蒲黃	九
續斷	九
益母草	一〇
肉蓯蓉	一〇

鎖陽	一
車前子	一
紫菀	一
百部	二
百合	二
款冬花	二
馬兜鈴	三
青黛	三
甘菊	三
薏苡仁	四
牡丹皮	四
兔絲子	五
茴香 <small>大種</small>	六
砂仁	六

白豆蔻	一六
肉豆蔻	一六
草豆蔻	一七
草果	一七
菖蒲	一七
黑附子	一八
天雄	一九
烏頭	一九
烏喙	一九
側子	一九
射干	二〇
旋覆花	二〇
大戟	二〇
商陸	二一

卷四

草部下四五十種

葶藶	二種	二
牽牛子	二種	二
葶藶	二種	二
木通	二種	二
通草	二種	二
燈心	一	一
石斛	一	一
石葦	二	二
白蒺藜子	二	二
青葙子	三	三
木賊	三	三

茅根	四
仙茅	四
鬱金	四
薑黃	五
牛蒡子	五
紫草	五
白頭翁	六
白前	六
白薇	六
白附子	六
蚤休	七
白蘚皮	七
蘆薈	七
胡黃連	八



澤蘭	八
狗脊	八
青蒿	九
葦撥	九
王不留行	九
淫羊藿	九
巴戟天	〇
蘭葉	〇
水萍	一
決明子	一
腕麻子	一
馬鞭草	二
蘆根	二
蛇牀子	二

金銀花	二
山豆根	三
艾葉	三
薄荷	三
豨薟	四
蒲公英	四
夏枯草	五
藿香	五
荊芥	五
香薷	六
佛耳草	六
蒼耳子	六
茵陳蒿	六
使君子	七

# 卷五

高良薑	一七
石蓮子	一七
合歡皮	一七
萱草根	一八
劉寄奴草	一八
覆盆子	一九

## 木部七十五種

茯苓 <small>赤白二種</small>	一
琥珀	二
松香 <small>子花葉附節</small>	三
柏子仁	四
桂 <small>分爲四種</small>	四

槐實 <small>枝皮膠附花</small>	六
木香	六
山梔	七
吳茱萸	八
山茱萸	九
蔓荊子	九
杜仲	九
烏藥	〇
厚朴	〇
黃柏	一
桑白皮 <small>枝堪寄生附</small>	一
枸杞子 <small>二種</small>	二
地骨皮	三
酸棗仁	三

益智	三
檳榔	四
大腹皮	四
丁香	五
冰片	五
猪苓	六
蘇木	六
沉香	六
乳香	七
沒藥	七
木瓜	八
竹葉 <small>苦竹竹瀝 附</small>	九
天竺黃	九
金櫻子	一〇

訶黎勒 <small>隨風 子附</small>	一〇
郁李仁	一一
蕪荑	一一
五加皮	一二
楮實 <small>樹汁 附</small>	一二
秦皮	一三
樗白皮 <small>椿皮</small>	一三
密蒙花	一三
辛夷	一四
蕤仁	一四
女貞實	一五
五倍子 <small>百藥 煎附</small>	一五
牙皂 <small>皂角 刺附</small>	一五
巴豆	一六

卷六

菜部十種

生薑

雷公炮製藥性解 目錄

金鈴子

紫葳

雷丸

鉤藤

血竭

茶茗

阿魏

乾漆

楓香

蜀椒

二十七

二十七

二十七

二十八

二十八

二十八

二十九

二十九

三〇

三〇

一

乾薑

萊菔子附

白芥子

韭附根子

蒜

胡荽子附

葱白

冬葵子

白冬瓜

人部十種

乳汁

金汁二種

屎蛆

人溺

二

二

三

三

三

四

四

四

五

五

六

六

六

秋石	七
月水	七
髮三種	七
紫河車	八
天靈蓋	八
死人枕	九
禽獸部種十九	
黑嘴白鴨 <small>綠頭鴨附</small>	九
烏骨雞	〇
雄雀	〇
雀卵	〇
伏翼	一
龍骨 <small>齒附</small>	一
虎骨	二

犀角	二
羚羊角	三
牛黃	三
麝香	四
鹿茸 <small>鹿角麋角附</small>	五
阿膠	六
熊膽	七
膈肭臍	七
狗肉 <small>陰莖血附</small>	八
羊肉	八
牛肉 <small>牛乳腦角腿膽附</small>	九
猪肉 <small>四蹄臟腸腎壯肺心舌油腦膏附</small>	九
蟲魚部 <small>二十種</small>	
蜂蜜 <small>蠟附</small>	九

牡蠣	二〇
珍珠	二〇
石決明	二一
龜甲	二二
夾蛇	二二
龜尿	二二
敗龜板	二二
龜附	二二
鼈甲肉附	二二
蕲州烏蛇	二三
白花蛇	二四
蝦蟆	二五
眉酥及	二五
附	二五
蠍子	二六
五靈脂	二六
蜈蚣	二七
蝸牛	二七
白殭蠶	二八
雄蠶	二八
附	二八
蟬蛻	二八

刺蝟皮	二八
土鼈蟲	二九
蜣螂	二九
斑貓	二九
穿山甲	三〇
鯽魚子附	三〇
鯉魚	三一
膽	三一
骨	三一
脂	三一
腸	三一
烏賊骨	三一
鰻鱺魚骨	三一
鱧魚	三一
血附	三一
蟹爪附	三一



雷公炮製藥性解 目錄

# 雷公炮製藥性解

明 雲間 李中梓士材編輯  
清 吳門 王子接晉三重訂  
鄞縣 曹赤電炳章校點

## 卷一

### 金石部

金銀箔。味辛。性平有毒。入心肺二經。主安心神。定驚悸。鎮顛狂。除邪熱。  
按金銀之入肺部。固其類也。其性沉重。能制火臟之輕揚。故亦入心經。過服必  
中其毒。以鴈鵠肉解之。  
黃丹。味辛。性微寒有毒。不載經絡。主吐逆顛狂。止痛生肌。  
按黃丹乃熬鉛所作。鉛本水中之金。最能制火。吐狂等證。何者非火。而有不瘳  
者乎。

胡粉、味辛。性寒無毒。不載經絡。主一切癰腫諸毒。及腐爛肉。殺三蟲。破癥結。

按胡粉一名粉錫。實亦化鉛所作。能破結殺蟲者。其亦鎮墜之功歟。

銅青、味苦澀。性平有微毒。不載經絡。主斂金瘡。治眼暗。止血殺蟲。能去腐肉。

按銅青卽銅綠。本醋沃銅上而得其精華。醋能收斂。故斂瘡止血。其去腐肉者。亦醋之功。眼乃肝竅。眼之不明。肝之病也。得金之精以制木。而目之暗者從此明矣。

鐵漿、味甘澀。性平無毒。入心肺二經。主顛癇狂亂。解諸毒入腹。蛇犬咬傷。鎮心神。明眼目。堪洗膝瘡。隨手而愈。

鐵繡、油調之。可敷惡瘡瘡疥。蒜磨。傅蜘蛛咬傷。按鐵漿卽浸鐵。色青。可染皂

者。質本金也。宜歸肺部。性本沉也。宜鎮心家。明目治漆。皆由伐木之功。鐵繡可敷瘡毒。亦以發在外者有散之義歟。

水銀、味辛。性寒有毒。不載經絡。主疹癰痂瘍。白禿皮膚。殺蟲虱。墮胎絕孕。解金銀銅錫毒。鎔化還復爲丹服之。神仙不死。畏磁石砒霜。

按水銀療蟲疹等證。良由其毒也。又殺五金毒者。蓋以其性陰柔。能消五金爲

泥耳。入耳能食腦至盡。入肉令百節攣縮。倒陰絕陽。性滑重。極易入肉。最宜謹之。能下死胎。可灌屍骸。內傳極言其煉服之功。然後世食之者。往往喪生。可爲妄信者戒。

雷公云。凡草中取者。并朱漆中者。俱不可用。經別藥制過者勿用。曾斂過死屍。及半生半死者勿用。若在硃砂中產出者。其水銀色欲紅。收得後用葫蘆盛之。免致遺失。若先以紫背天葵。并夜交藤自然汁二味同煮。一伏時其毒自退。若修十兩。止用煎二味汁各七鎰。和合煮足爲度。

輕粉。味辛。性寒有毒。不載經絡。主通大腸轉胞。諸瘡蟲癬。小兒疳積。輕明可愛。燒火上走者真。

按輕粉卽水銀所昇者。本草言其無毒。誤也。外科需爲要藥。但勿輕用服食。今見癰癰方中多用之。必能損人腸胃。不可不戒。其值頗貴。市中多燒凝水石及石膏爲粉以亂真。須細辨之。

銀硃。味苦辛。性溫有毒。止入敷藥殺蟲。餘無他用。

按銀硃亦水銀燒就。中其毒者。令人發脹至死。可弗慎耶。

密陀僧。味鹹辛。性平有毒。不載經絡。主皮膚斑點。五痔金瘡。嗽嘔吐痰。禁瘰癧。鎮心驚。體重如金色者佳。水飛用。

按密陀僧一名沒多僧。質極重。過服傷人臟。

雷公云。凡使搗令細。於磁鍋中安置了。用重紙袋盛柳木末於密陀僧鍋中。次下東流水。浸令滿。着火煮一伏時足。去柳木紙袋。取密陀僧用。

丹砂。味甘。生者微寒無毒。煉者大熱有毒。入心經。主鎮心安神。益氣明目。通血脈。除煩滿。止消渴。療百病。殺精祟鬼邪。祛疥瘡癬蟲。久服成仙。畏碱水。大如雞卵。形似芙蓉。破之若雲母。光明照徹者佳。

按丹砂之色。屬丙丁火。心臟之所由歸也。質性沉滯。勿宜多用。青霞子云。入石見火。悉成灰燼。丹砂伏火。化爲黃銀。能重能輕。能神能靈。能黑能白。能暗能明。太清云。外包人石。內含金精。先稟氣於甲。受氣於丙。出胎見壬。結魄成庚。增光歸戊。陰陽升降。各本其原。考茲二說。則服食成仙之說信矣。自唐世太平日久。膏粱之家。弗得其理。惑於方士。都致殞身。習俗成風。至今未已。斯民何辜。蒙此慘禍。其理淵奧。察之實難。吾願好事者慎之。

雷公云。凡使宜須細認。取諸般尙有百等。不可一一論之。有妙硫砂。如拳許大。或重一鎰一塊者。而面如鏡。若遇陰氣天雨。卽鏡面上有紅漿汁出。有梅柏砂。如梅子許大。夜有光生。照見一室。有白庭砂。如菩提子許大。上面有小星現。有神座砂。不經丹竈。服之則面白延年。其次有白金砂。澄水砂。陰成砂。辰錦砂。芙蓉砂。鏡面砂。箭鏃砂。曹未砂。土砂。金星砂。平面砂。神水砂。不可一一細述之也。凡修事硃砂。先於一淨室內焚香齋沐。然後取砂以香水浴。拭乾卽碎搗之。後向鉢中更研。三伏時卽取一磁鍋子放了砂子。用甘草。紫背天葵。五方草。各剉之。著砂上下。以東流水煮。亦三伏時。勿令水盡。闕失時候。約去三分。次入青芝草。山鬚草。半兩。蓋之下。十斤火煨。從已至子時方歇。候冷再研似粉。如要服則入熬蜜丸。如細麻子許大。空腹服一丸。如要入藥中用。則依此法。凡煨自然炭火。五兩硃砂。用甘草二兩。紫背天葵一鎰。五方草自然汁一鎰。同東流水煮過。

鍾乳味甘。性溫有毒。入肺腎二經。主泄精寒嗽。壯元氣。益陽事。安五臟。通百節。利九竅。下乳汁。亦能通聲。光潤輕鬆。色如煉硝石者佳。久研忌歇。須用水飛。以摻臂



上入肉不見爲度。蛇牀爲使。惡牡丹玄石牡蒙。畏紫石英藁草。忌羊血。

按鍾乳性溫。而狀有下行之義。宜入腎經。肺卽其母也。故并入之。諸家本草述其功者甚衆。惟丹溪以爲慄悍之劑。不宜輕用。不煉而服。使人病淋。

雷公云。凡使勿用頭粗厚并尾大者。爲孔公石。不是色黑。及經大火燒過。并久在地上收者。曾經藥物制者。並不得用。須要鮮明薄而有光潤者。似鷲翎管子爲上。有長五六寸者。凡修事法。以五香水煮過一伏時。然後漉出。又別用甘草紫背天葵汁漬。再煮一伏時。凡鍾乳八兩。用沉香零陵香白茅各一兩。以水先煮過一度了。第三度方用甘草等三味。各二兩再煮了。漉出拭乾。緩火焙之。然後入臼杵如粉。篩過却入鉢中。令有力少壯者兩三人不住研。三日夜勿歇。然後用水飛淨了。以絹籠之。於日中曬令乾。又入鉢中。研二萬遍。後以磁合收貯用之。

礬石。味酸。性寒無毒。入肺肝二經。主寒熱洩痢。白沃陰蝕。諸惡瘡癬。清喉痺。除目痛。祛固熱。禁泄瀉。收脫肛。同皂莢可吐風痰。和蜜蠟能消癰腫。光明如水晶者佳。甘草爲使。惡牡蠣。畏麻黃。

按礬石西方之色。宜入肺家。東方之味。宜入肝部。肺肝得令。而寒熱諸證可無虞矣。然亦收斂之劑。弗宜驟用。

雷公云。凡使須以磁瓶盛。放火中煅。令內外通赤。用鉗揭起蓋。旋安石蜂窠於赤瓶之中。燒蜂窠盡爲度。將鉗夾出。放冷敲碎入碓中。研如粉。後於屋下掘一坑。可深五寸。却以紙裹留坑中一宿。取出再研。每修事十兩。用石蜂窠六兩。燒盡爲度。又云。凡使要光明如水晶。酸鹹澀味全者。研如粉。於磁瓶中盛。要盛得兩三升者。然後以六一泥泥於火畔。炙之令乾。乃研了白礬於瓶內。用五方草。紫背天葵二味。自然汁各一鎰。旋旋添白礬於火中逼。令藥汁乾。用蓋了瓶口。復以泥泥上下。用火一百斤煅。從巳至未。去火取白礬。瓶出放冷。敲碎取礬。凡若經大火一煅。色如銀。自然伏火。銖兩不失。搗細研如輕粉。方用之。

禹餘糧。味甘。性寒。無毒。不載經絡。主咳逆寒熱煩滿。崩中血閉癥瘕。骨節疼痛。四肢不仁。大熱痔瘻。牡丹杜仲爲使。畏貝母菖蒲鐵器。

按禹餘糧。因禹行山中乏食。採此充糧。故以名之。則其無毒可知矣。太乙餘糧。本是一種。今諸家往往分別。惟陳藏器所言者近是。

硝石。味苦辛。性大寒有毒。入心脾二經。主六腑積聚燥急。留血閉藏。天行疫痢。傷寒發狂。停痰作痞。腸風痔漏。推陳致新。解諸石藥毒。種種實熱。悉可寫除。能墮胎孕。大黃爲使。惡苦參。苦菜。女苑。畏麥句薑。

按硝石爲太陰之精。宜入心家瀉火。而脾卽其子也。故并入之。丹溪云。本經言其無毒。誤也。能化七十二種。豈無毒而然乎。分爲六種。氣味相同。俱善消化。毆逐。但朴硝力緊。芒硝馬牙硝力緩。硝石風化。硝玄明粉。緩而又緩也。以之治病。病退卽已。本經稱其煉服補益。豈理也耶。經云。熱淫於內。治以鹹寒。佐以苦寒。古方因之。故都用大黃佐芒硝耳。

雷公云。凡使先研如粉。以磁瓶子於五斤火中。煨令通赤。用雞腸菜。柏子仁和作一處。分丸餅子許大。待餅子赤時。投硝石於磁瓶內。其硝石自然伏火。每四兩硝石。用雞腸菜。柏子仁共十五個。銖子盡爲度。

滑石。味甘淡。性寒無毒。入胃膀胱二經。主利水道。實大腸。化食毒。行積滯。逐凝血。解燥渴。導乳汁。補脾胃。降妄火。白膩而無黃砂者佳。甘草石葦爲使。惡曾青。

按滑石甘。宜於中州。淡宜於利水。胃與膀胱之所由入也。利益雖多。終是走泄。

之劑。無甘草以和之。弗宜獨用也。

雷公云。凡使有多般。勿誤用之。有白滑石。綠滑石。烏滑石。冷滑石。黃滑石。其白滑石如方解石。色白。於石上畫有白膩文。便是。綠滑石性寒有毒。不可入藥中用。烏滑石似黑色。畫石上有青白膩文。入用妙也。黃滑石似金顆圓。畫石上有青及黑色者。勿用。殺人。冷滑石青蒼色。畫石上作白膩文。亦勿用。若滑石色似水白青色。畫石有膩文者真。凡使先以刀刮。研如粉。以牡丹皮同煮一伏時。出去牡丹皮。取滑石。却用東流水淘過。於日中晒乾方用。

石膏味辛甘。性寒無毒。入肺胃二經。主出汗解肌。緩脾益氣。生津止渴。清胃消痰。最理頭疼。與方解石相似。須瑩淨如水晶者真。雞子爲使。惡莽草。馬目毒公。巴豆。畏鐵。

按石膏辛走肺。甘走胃。所以主發散。仲景名爲白虎。蓋有兩義。一則以入肺。一則以其性雄。苟胃弱不食。及血虛發熱者。誤用之。爲害不淺。

雷公云。凡使勿用方解石。此石雖白。不透明。其性燥。若石膏出剡州若山縣義清山。其色瑩潔如水晶。性良善也。凡使之。先於石臼中搗成粉。以密絹羅過。生



甘草水飛過。去水。令乾。重研細。用之良。

青鹽。味鹹。性寒。無毒。入腎經。主明目。止痛。益氣。堅筋骨。助水臟。除心腹痛。破積聚。癰疥瘡。一名戎鹽。一名胡鹽。

按青鹽味鹹。腎所宜也。故獨入之。水臟既補。則明目堅骨等功。何足異耶。食鹽味鹹。性溫。無毒。入腎肺肝三經。主鬼蠱邪疰毒氣。洗下部。齲瘡。吐中焦痰癖。熨疝氣。及內腎氣。止霍亂。及心腹卒痛。殺蟲去風。明目固齒。白如霜雪者佳。炒研用。

按食鹽之鹹。本歸腎臟。肺即其母。肝即其子也。故并入之。本草云。多食傷筋損肺。水腫及咳嗽血虛者忌之。何也。蓋以鹹走腎。過多則腎不能勝而受傷。於是盜食母氣。而肺氣亦損。肺損則金還尅木。夫肝主筋而藏血。肺主咳嗽而生水。數證之來。寧能免耶。

雄黃。味苦甘。性平。有毒。不載經絡。主殺精魅鬼邪。蛇虺蠱毒。山嵐瘴毒。惡瘡死肌。疥癬蟲蠹。百節中風。鼻中瘰肉。中惡腹痛。佩帶之。鬼神不敢近。諸毒不能傷。胎婦轉女成男。解藜蘆毒。大塊透明中無砂石者佳。研細。水飛用。

按雄黃或以爲黃金之苗。今有金窟處無雄黃。則斯言未足深信。夫孕婦佩之能轉女胎爲男。言若不經。然里中試之者。往往獲驗。則有奪造化之功。非稟太陽之精。惡能臻此。殺蠱辟邪。宜其效矣。中其毒者。以防已解之。

雷公云。凡使勿用黑雞黃。自死黃。夾膩黃。其臭似雄黃。只是臭不堪用。時人以醋洗之。三兩度。便無臭氣。勿誤用也。次有夾膩黃。亦似雄黃。其內一重黃。一重石。不堪用。次有黑雞黃。亦似雄黃。如烏雞頭上冠也。凡使要似鷓鴣鳥肝色爲上。凡修事。先以甘草。紫背天葵。地膽。碧稜花四件。並細剉。每件各五兩。雄黃三兩。東流水入瓦鍋中煮。三伏時。方漉出。搗如粉。水飛澄去黑者。曬乾再研。方入藥用。其內有刮鐵石。又號赴矢黃。能刮子鐵。並不入藥用。

紫石英。味甘辛。性溫無毒。入心經。主咳逆邪氣。寧心定驚。補不足。塗腫毒。又主婦人子戶風寒。十年無孕。長石爲使。畏扁青。附子。惡黃連。鮫甲。麥句薑。

按紫石英爲鎮重之劑。又有紫赤色。心經之所由入也。心主血。婦人得之。則血受溫補而胎可結矣。

赤石脂。味甘。性平無毒。入心經。主養心氣。明目益精。療腹痛下痢。癰疽瘡痔。女子



崩漏產難。下胞衣。惡大黃及松脂。畏荒花。

按石脂色赤。宜入心經。腹痛諸證。皆火爲之殃。崩漏諸證。皆血爲之禍。心主血屬火。得石脂以療之。而更何庸虞哉。

寒水石。味辛甘。性大寒。無毒。入五臟諸經。主內外大熱。時行熱渴。腹中積聚。解巴豆毒。凡使須薑汁煮之。汁盡爲度。細研用。畏地榆。

按寒水石卽凝水石。性極寒冷。故於五臟靡所不入。過服令人腸胃受寒。不能飲食。陶隱居云。夏月能爲冰者佳。如此則舉世不能得矣。似乎失言。

雷公云。凡使先用生薑自然汁煮。汁盡爲度。細研成粉。然後用之。每修十兩。用薑汁一鎰。

花蕊石。味性經絡。諸書不載。主金瘡止血。產婦血暈。火煨用。

按花蕊之功。專主血證。能化瘀血爲黃水。服之令人大虛。不宜輕用。若多用。服後當以補劑培之。

陽起石。味鹹。性溫無毒。入腎經。主腎絕陰痿。崩中漏下。癥瘕結氣。有雲頭雨脚及鷺鷥毛者。真桑螵蛸爲使。畏兔絲。惡澤瀉。官桂。蛇蛻。雷丸。忌羊血。

按陽起石鹹溫之品。宜歸水臟。崩漏癥結。皆腎虛所致。故咸療之。難得其真。勿宜誤用。

蓬砂味苦辛。性溫無毒。入肺經。主消痰止嗽。理喉痺。破癥結。光明瑩徹者佳。

按蓬砂色白味辛。帶入肺部。痰嗽等證。皆肺火也。故咸治之。

膽礬味酸苦辛。性寒有毒。不載經絡。主消熱殺蟲。止驚癇。吐風痰。鮮明者佳。

按膽礬之功。大抵與白礬相類。惟能止驚。爲少差耳。

青礪石味辛甘。性平有毒。入肺大腸胃三經。主蕩滌宿痰。消磨食積。研末細用。

按礪石辛宜於肺。甘宜於胃。大腸者。肺家傳送之官也。故都入之。大損元氣。不

可漫用。

無名異味甘。性平無毒。不載經絡。主金瘡折傷內損。止痛生肌及長肉。消癰疽腫毒。

按海內人云。石無名異絕難得。土無名異不甚貴重。豈本經說者爲石。今所有者爲土乎。用時以醋磨塗患處。

玉屑味甘。性平無毒。入肺經。主除煩止渴。養神明目。寧心定驚。滅癥痕。滋毛髮。助

聲喉。美顏色。搗如米。苦酒浸之。消如泥。惡鹿角。畏款冬花。

按玉屑色白性潤。宜入肺部。肺得其養。則煩渴諸證何自而生。又主滅癥云云者。亦以肺主皮毛。功效之所必及也。

自然銅。味辛平。無毒。不載經絡。主破積聚。療折傷。續筋骨。散血排膿。止痛定驚。亦主產後血邪。凡使須搥碎。以甘草水煮過。又用醋浸一宿。以泥包裹之。火煨研細用。

按自然銅。實銅坑中所產之石也。其色青黃如銅。不從礦煉。故名之。丹溪曰。自然銅。世以爲接骨要藥。不知接骨在補氣補血。補胃補腎。俗醫惟冀速效。以罔利而用之。亦未稔其燥散之禍耳。

雷公云。石髓鉛。卽自然銅也。方使勿用方金牙。其方金牙。真似石髓鉛。若誤餌。吐殺人。其石髓鉛色似乾銀泥。味微甘。如採得。先搥碎。同甘草湯煮一伏時。漉出令乾。入臼中搗了。重篩過。以醋浸一宿至明。用六一泥泥磁器中。約盛得三升以來。放文武火中。養三日夜。纔乾。便用蓋蓋了泥。用火煨兩伏時。去土。研如粉用。若修事五兩。以醋兩鎰爲度。

石驚。性涼無毒。味與經絡。諸書不載。主五淋小便不利。腸風痔瘻。婦人產難。兩手各握一枚。立驗。研細水飛用。

按圖經云。石驚出零陵郡。今祁陽縣沙灘亦有之。形似蚌而小。其實石也。觀其主治。都是行下之功。食療讚其補益。似未然耳。

磁石。味辛鹹。性寒無毒。入腎經。主周身溼痺。肢節中痛。目昏耳聾。補勞傷。除煩躁。消腫毒。令人有子。能吸重鐵者佳。入火煨紅。醋淬七次。研絕細用。柴胡爲使。惡牡丹。芥草。黃石脂。

按磁石入腎。何也。蓋以性能引鐵。取其引肺金之氣入腎。使子母相生爾。水得金而清。則相火不攻自去。故主治如右。然久服多服。必有大患。勿喜其功而忽其害也。

雷公云。凡使勿誤用玄中石並中麻石。此二石真相似磁石。只是吸鐵不得。中麻石心有赤皮粗。是鐵山石也。誤服之。令人生惡瘡。不可療。磁石一片。四面吸鐵一斤者。此名延年沙。四面吸得鐵八兩者。號曰續采石。四面吸得五兩上下者。爲磁石。凡修事一斤。用五花皮一鎰。地榆一鎰。故縣十五兩。二件並細剉。於

石上搥碎。作二三十塊。將磁石入磁瓶中。下草藥。以東流水煮三日夜。漉出拭乾。以布裹之。向大石上再搥令細。入乳鉢中。研極細如塵。以水飛過。又研如粉用之。

硫黃。味酸。性大熱有毒。入命門經。主下焦虛冷。陽絕不起。頭禿。疽痔癰疥。心腹疝癖。脚膝冷疼。虛損泄精。瑩淨無夾石者良。甘草湯煮過用。畏朴硝。細辛。飛廉。忌百般禽獸血。

按硫黃爲火之精。宜入命門補火。蓋人有真火。寄於右腎。苟非此火。則不能有生。此火一熄。則萬物無父。非硫黃孰與補者。太清云。硫稟純陽。號爲將軍。破邪歸正。返濁還清。挺立陽精。消陰化魄。戴元禮云。熱藥皆燥。惟硫黃不燥。則先賢常頌之矣。今人絕不用之。誠虞其熱毒耳。然有火衰之證。舍此莫療。亦畏而遺之可乎。中其毒者。以猪肉。鴨羹。餘甘子湯解之。

雷公云。凡使勿用青赤色。及半白半黃。半赤半黑者。自有黃色如雛雞初出殼者爲真。凡硫四兩。先以龍尾蒿自然汁一鎰。東流水三鎰。紫背天葵汁一鎰。粟逐子莖汁四鎰。合之攪勻。入瓦鍋。用六一泥固濟底下。將硫黃碎之。入於鍋中。



以前件藥汁。旋旋添入水煮之。汁盡爲度。再以百部末十兩。柳蟲末二斤。一簇草二斤。細剉之。以東流水並藥等同煮。硫黃二伏時。去諸藥。取出。用甘草湯洗了。入鉢中。研二萬遍。方妙。

## 果部

陳皮。味辛苦。性溫無毒。入肺肝脾胃四經。主下氣消食。化痰破結。止嘔咳。定霍亂。療吐瀉。利小便。通五淋。逐膀胱留熱。殺寸白諸蟲。核治腰痛。疝痛。葉治乳癰。脇癰。肉能止渴。多食令人氣逆生痰。去白者兼能除寒發表。留白者兼能補胃和中。微炒用。產廣中。陳久者良。

按陳皮辛苦之性。能泄肺部。金能制水。故入肝家。土不受侮。故入脾胃。採時性已極熱。如人至老成。則酷性漸減。收藏又復陳久。則多歷梅夏。而烈氣全消。溫中而無燥熱之患。行氣而無峻削之虞。中州之勝劑也。乃大全以爲多用獨用。有損脾胃。師心之過耳。

青皮。味苦酸。性溫無毒。入肝脾二經。主破滯氣。愈用而愈效。削堅積。愈下而愈良。



引諸藥至厥陰之分。下飲食入太陰之倉。消溫瘧熱甚結母。止左脇鬱怒作痛。去肉微炒用。

按青皮卽橘之小者。酸能瀉水。宜走肝經。溫能輔導。宜歸脾部。其性峻削。多服傷脾虛羸。

枳殼。味辛苦酸。性微寒無毒。入肺肝胃大腸四經。主下胸中至高之氣。消心中痞塞之痰。泄腹中滯塞之氣。去胃中隔宿之食。削腹內連年之積。疏皮毛胸膈之病。散風氣癢癰。通大腸閉結。止霍亂。療腸風。攻痔疾。消水腫。除風痛。去瓢核。麩炒用。陳久者良。

按枳殼辛歸於肺。酸歸於肝。大腸者肺之腑也。胃者上焦之腑也。故均入之。刮下枳茹。其效更速。

雷公云。凡使勿用枳實。緣性效不同。若使枳殼。取辛苦酸。并有油。能消一切癖塊。陳久年深者爲上。用時先去瓢。麩炒過。待麩焦黑取出。用布拭去焦黑。後再搗如粉用之。

枳實。味苦酸。性微寒無毒。入心脾二經。主消胸中之癖滿。逐心下之停水。化日久

之稠痰。削年深之堅積。除腹脹。消宿食。定喘咳。下氣逆。熬炒用。

按枳實。即枳殼之小者。苦宜於心。脾者心之子也。故並入之。其性猛烈。有沖牆倒壁之功。氣弱者忌之。考青皮陳皮同一種。枳殼枳實同一種。但採有遲早。分老嫩而名也。四者主治。咸以導滯爲功。然嫩者性酷治下。老者性緩治高之別爾。

杏仁。味甘苦。性溫有小毒。入肺大腸二經。主胸中氣逆而喘嗽。大腸氣秘而難便。及喉痺瘡。痰結煩悶。金瘡破傷。風熱諸瘡。中風諸證。蛇傷犬咬。陰戶痛癢。並堪搗傅。沸湯泡去皮尖炒用。得火良。惡黃芩黃耆。葛根。畏藜蘆。解錫毒及中狗肉毒。雙仁者能殺人。杏子不可多食。能損筋骨眼目。

按杏仁入肺者。經所謂肺苦氣上逆。急食苦以瀉之是也。大腸則共肺爲傳送者也。宜並入之。考左慈祕訣。稱杏仁爲草金丹。久服成仙。方書又云。服杏仁者。往往至二三年或瀉。或臍中出物。皆不可治。二說相背。然杏仁主散。痰從腠理中發散而去。且有小毒。則方書之說。最爲近理。祕訣所言。意者功在法製。亦未可知。然終屬虛渺。勿宜盡信。

雷公云。凡使須以沸湯浸。少時去皮膜及尖。擘作二片。用白火石並烏豆杏仁三件。於鍋中下東流水煮。從已至未。其杏仁色褐黃。勿用。修治一斤。用白火石一斤。烏豆三合。水旋添。勿令間斷。爲妙也。

桃仁。味苦甘。性平無毒。入肝大腸二經。主瘀血血閉。癥瘕鬼邪。血燥便結。殺三蟲。止心痛。沸湯泡去皮尖炒用。花主殺鬼疰。悅顏色。利二便。下諸蟲。勿用千葉者。令人鼻衄。毛主血瘕積聚。崩帶諸疾。桃蟲主殺精鬼邪惡不祥。葉主惡氣客忤。陰戶生蟲痛癢。及瘡中蟲。桃實多食令人發熱。

按桃仁行血。宜入肝經。性潤。宜入大腸。典術云。桃爲五木之精。故花仁子葉。俱能壓邪殺鬼。

雷公云。凡使須泡去皮尖。用白朮烏豆二味。和桃仁同於瓦鍋中煮一伏時。後漉出。用手擘作兩片。其心黃如金色。乃用之。花勿用千葉者。能使人鼻衄不止。目黃。凡用揀令淨。以絹袋盛。於檐下懸。令乾。用鬼髑髏。勿使乾桃子。其鬼髑髏。只是千葉桃花結子在樹上不落者。於十一月內採得。可爲神妙。凡修事以酒拌蒸。從已至未。焙乾。以銅刀切片。焙取肉用。

大棗味甘。性平無毒。入心脾二經。主和百藥。益五臟。潤心肺。養脾胃。補精氣。生津液。通九竅。強筋骨。祛邪氣。悅顏色。去核用。殺烏豆毒。忌生葱。

按棗之入脾者。經所謂五味入口。甘先歸脾是也。心則生脾者也。宜並入之。多服能壅脾作脹。而中滿及齒痛風疾者。咸非所宜。烏梅味酸。性溫無毒。入肺腎二經。主生津液。解煩熱。止吐逆。陰瘧瘴。止久痢。消酒毒。又主皮膚黑點。麻痺不仁。去核用。

按烏梅入肺者。經所謂肺欲收。急食酸以收之是也。腎則其所生者也。宜並入之。多食最能損齒。風寒初起。瘧疾未久者。不可驟以此收斂也。

藕味甘。性平無毒。入脾經。主散瘀血。止吐衄。解熱毒。消食止渴。除煩解酒。和蜜食之。能肥腹臟。不生諸蟲。煮熟食之。能實下焦。大開胃脘。其節尤佳。其皮散血不凝。蓮子主清心醒脾。補中養神。進飲食。止瀉痢。禁泄精。除腰痛。久服耳目聰明。宜去心蒸熟用。蓮鬚主益腎澀精。荷葉主雷頭風。破血止渴。荷蒂主安胎。逐瘀血。留好血。止血痢。

按藕味甘溫。宜歸脾臟。脾實裏血。故治血證。多服蓮子。令人氣滯。多服蓮鬚。令

人秘結。荷葉形如仰盂。其象爲震。震爲雷。屬木化風。故治雷頭風。枳朮丸用之。取其引升少陽經清氣耳。荷蒂在中。故能中守。又能行血者。性溫之功也。

枇杷葉。味苦。性平無毒。入肺經。主除嘔和胃。解渴止嗽。下氣清痰。刷去黃毛。蜜炙用。枇杷主潤五臟。止吐解渴。

按枇杷葉入肺。苦能泄氣故也。不去黃毛。射入肺中。發咳不已。枇杷多食。亦能發熱生痰。

雷公云。凡使採得後。秤。溼者葉重一兩。乾者三葉重一兩者。是氣足堪用。使粗布拭上毛。令盡。用甘草湯洗一遍。却用綿再拭令乾。每一兩以酥一分炙之。以酥盡爲度。

石榴皮。味酸澀。性溫無毒。入大腸腎二經。主精漏下痢。筋骨風痛。脚膝難行。目流冷淚。腸風下血。殺牙蟲。染鬚髮。其子止渴。其花百葉者。主心熱。療吐血。爲末吹鼻。中止衄血及金瘡血。

按腸滑則患血痢。腎滑則患遺泄。榴者留也。故入茲二經。然痢積未盡者。不可先以此澀之。多服能戀隔成痰。其子不宜過食。能損肺壞齒。其花色赤屬火。宜



入心家而主血。

雷公云。凡使皮葉根。勿令犯鐵。若使石榴殼。不計乾溼。先用漿浸一宿。至明漉出其水如墨汁。若使枝根葉並用。漿水浸一宿。方可用之。

山查味甘酸。性平無毒。入脾經。主健脾消食。散結氣。行滯血。理瘡瘍。

按山查之甘。宜歸脾臟。消食積而不傷於刻。行氣血而不傷於蕩。產科用之。療

兒枕疼。小兒尤爲要藥。

梨味甘。性寒無毒。入心肺二經。主心經客熱。肺臟煩熱。止嗽消痰。清喉降火。解渴除煩。消風潤燥。

按梨之入心經。所謂以甘瀉之是也。火清而金不受燥。故亦入肺經。性冷而利。多食損脾。丹溪曰。梨者利也。流利下行之謂也。乳婦及金瘡忌用。

柿味甘澀。性寒無毒。入心肺大腸三經。主潤心肺。通耳鼻。消痰嗽。清火熱。除渴解酒。祛腸內宿血。止口中吐血。忌同蟹食。柿乾潤喉降火。補虛殺蟲。厚腸止痢。柿蒂主呃逆。

按柿之色赤。宜歸心臟。性潤宜歸肺家。大腸則共肺爲傳送者也。故亦入之。性



冷傷脾。不宜多用。若同蟹食。令人腹痛大瀉。柿乾及蒂。總屬寒涼。都能清火。芡實味甘。性平無毒。入心腎脾胃四經。主安五臟。補脾胃。益精氣。止遺泄。煖腰膝。去溼痺。明耳目。治健忘。

按芡實之甘。宜歸脾胃。土得其宜。則水不受尅。火亦無盜食之虞。故又入心腎二經。多食壅氣。最難消化。嬰兒食之不長。老人食之延年。

胡桃味甘。性平無毒。入肺肝腎三經。主通血脈。潤肌膚。補下元。同松脂可敷癰瘰。同熱酒能理撲傷。去衣用。過食動風生痰。

按胡桃入肺。故主肌膚。入肝。故主血脈。其性屬火。能補相火。故亦入腎經。火能尅金。多食則傷肺。故能動風生痰。瀉痢及感冒風寒者忌用。

龍眼味甘。性溫無毒。入心脾二經。主補血氣。養肌肉。益虛氣。美顏色。除健忘。治怔忡。增智慧。明耳目。久服延年。

按龍眼甘溫之品。脾家所悅。心者脾之母也。母無顧子之憂。則心血可保。故入茲二經。然甘能作脹。凡中滿氣隔之證。均宜遠之。

橄欖味甘澀。性溫無毒。入脾胃二經。主開胃下氣。消食化酒。治渴止瀉。解諸魚毒。

核中仁。可塗口脣燥裂。

按橄欖甘溫之性。宜職脾胃。然性熱能致上壅。亦不可多食。

## 穀部

麥芽。味甘鹹。性溫無毒。入脾胃二經。主溫中下氣。開胃健脾。催生下胎。去宿食。除脹滿。止吐逆。破癥結。消痰痞。炒去芒。再炒焦黃。研用。蜜爲之使。

按麥芽甘而且溫。宜職中州。夫麥性泥滯。不過水浸生芽。氣雖少清。性猶未化。功效何若是殊哉。全在多炒。使其性枯爾。不然是積食矣。豈復能消耶。丹溪云。大麥有火。能生熱病。其芽能行上焦滯血。除腹內寒鳴。然多用久服。令人消腎。神麴味甘性溫無毒。入脾胃二經。主調中止瀉。開胃消食。破癥結。逐積痰。除脹滿。又主胎上搶心。血流不止。亦能下鬼胎。

按神麴甘溫。爲脾胃所喜。故兩入之。本小麥麵造成。須得六神氣者良。不爾。與麵餅何異。其法於六月六日用麵五斤。象白虎。蒼耳草自然汁一碗。象勾陳。野藪自然汁一碗。象騰蛇。青蒿自然汁一碗。象青龍。杏仁去皮尖五兩。及北方河

水。象玄武。赤小豆煮熟。去皮四兩。象朱雀。一如造麴法。懸風處經年用。

雷公云。凡使搗作末後。掘地坑深二尺。用物裹內坑中。經宿取出。焙乾用。

酒。味苦甘辛。性大熱有毒。入十二經。主毆邪氣。辟穢惡。禦霧露。解瘴癘。溫脾胃。破癥結。助藥力。厚腸胃。駐顏色。通行血脈。榮養肌膚。忌諸甜物及乳同食。

按酒之爲用。無微不達。故諸經皆入之。主療雖宏。能發溼中之熱。過飲則相火冒炎。肺經受燥。輒致痰嗽。脾因火而困倦。胃因火而嘔吐。心因火而昏狂。肝因火而善怒。膽因火而忘懼。膀胱因火而精枯。甚者。勞嗽吐衄。哮喘蟲脹。癰癤癰疽。流禍不小。尙或不節。死亡立至。可不謹乎。

醋。味酸。性溫無毒。入肝經。主胃脘氣痰。癥瘕積聚。產後血暈。去瘀生新。同胡粉止鼻中血。同雄黃治蜂蠍蛇傷。漬黃柏可治口瘡。磨南星可敷癰癰。調飛麵堪塗癰腫。和石灰除腋氣。反蛤肉。

按經曰。東方之木。其味酸。醋之所以耑入肝也。能傷筋損齒。不宜多食。

飴糖。味甘。微溫無毒。入肺脾二經。主和脾潤肺。補虛止渴。消痰理嗽。建中斂汗。按肺喜潤。脾喜甘。宜飴糖之入二經也。建中湯用之。取其甘緩。丹溪以爲能生

胃火。此損齒之因。非土制水。乃溼土生火也。中滿嘔吐及溼熱之證。皆不宜服。胡麻子味甘。性平無毒。入肺脾二經。主傷中虛羸。補五內。益氣力。潤肌膚。填腦髓。堅筋骨。療金瘡。止痛除瘡。及傷寒溫瘧。大吐後虛熱羸困。利大小腸。催生落胞。久服耳目聰明。辟穀延年。水淘去浮者。酒蒸曬乾。去麤皮。留薄皮。

按胡麻性潤而味甘。脾肺之所由歸也。仙經需爲要藥。取其補虛殊勝。脾家有火。大腸燥結者。始爲相宜。不然。恐有洩痢之患。

雷公云。凡使有四件。八稜者兩頭尖。紫黑色者。又呼胡麻。並是誤也。其巨勝有七稜。色赤味澀酸是真。又呼烏油麻。作巨勝。亦誤者。修事一斤。先以水淘。浮去之。沉者漚出。令乾。以酒拌蒸。從巳至亥。取出攤曬乾。於臼中舂去粗皮一重。拌小豆相對同炒。小豆熟。卽出去小豆。用之。上有薄皮。留用。力在殼也。

白菹豆味甘。性微溫無毒。入脾經。主補脾益氣。和中止瀉。醋製能療霍亂轉筋。解酒毒及河魴毒。一切草木毒。葉主蛇蟲咬傷。花主赤白帶下。

按菹豆性味。皆與脾家相得。宜獨入之。然此劑最爲泥膈。惟入健脾藥中。則能補脾。若單食多食。極能壅氣傷脾。本草稱其下氣。恐非。



赤小豆。味甘酸。性平無毒。入心經。主消熱毒。排癰腫。解煩熱。補血脈。止洩瀉。下水氣。利小便。除大便血。解小麥毒。

按赤小豆。南方心火之色也。故獨入之。經曰。諸瘡痛癢。皆屬心火。又曰。心主血。故主療如右。小腸者。即受盛而與心應者也。故亦能利之。衍義曰。久服令人黑瘦。結燥。亦以利小便之故耳。

芝麻。味甘。性溫無毒。入胃大小腸三經。主行風氣。通血脈。滑腸胃。潤肌膚。生嚙可敷。小兒頭瘡。麻油主治相同。能殺蟲治疥癬。解百毒。

按芝麻味甘。宜歸胃腑。性滑利。宜入大小腸。總是潤澤之劑。故能通血脈。血脈通則風氣自行。肌膚自潤矣。乳母食之。令兒無熱病。不宜久食。令人滑精消瘦。發渴困脾。有牙疼及脾胃疾者。尤所當戒。

豆豉。味苦。性寒無毒。入肺經。主傷寒頭痛寒熱。惡毒瘴氣。煩躁滿悶。虛勞喘吸。

按豉之入肺。所謂肺苦氣上逆。急食苦以洩之之意也。傷寒瘴氣。肺先受之。喘吸煩悶。亦肺氣有餘耳。何弗治耶。

菴豆。味甘。性寒無毒。入心胃二經。主除熱毒。厚腸胃。散風消腫。下氣。補臟養神。留

皮用。

按菴豆寒則入心而瀉火。甘則入胃而和中。禹錫具稱其補益。宜長食之。又堪作枕。能明目。治頭痛。



雷公炮製藥性解 卷一 穀部

# 雷公炮製藥性解

明 雲間 李中梓士材編輯  
清 吳門 王子接晉三重訂

鄞縣 曹赤電炳章校點

## 卷二

### 草部上

人參味甘。性微溫無毒。入肺經。補氣活血。止渴生津。肺寒可服。肺熱傷肺。去蘆用。茯苓爲使。惡鹵鹹及藜蘆。

按參之用。臟腑均補。何功之宏也。蓋人生以氣爲樞。而肺主氣。經所謂相傳之官。治節出焉。參能補氣。故宜入肺。肺得其補。則治節咸宜。氣行而血因以活矣。古方用以解散。亦血行風自滅之意也。至於津液。藏於膀胱。實上連於肺。故有生津液之功。肺寒者氣虛血滯。故曰可服。肺熱者火炎氣逆。血脈激行。參主上

升。且能濬血。故肺受傷也。性本疏通。人多泥其作飽。不知少服則壅。多則反宣通矣。

雷公云。凡使要肥大。塊如雞腿。并似人形者。採得陰乾。去四邊蘆頭。并黑者。剉入藥中。夏中少使。發心疰之患也。  
黃耆味甘。性微溫無毒。入肺脾二經。內託已潰瘡瘍。生肌收口。外主表虛盜汗。腠理充盈。惡龜甲、白蘚皮。

按黃耆之用。專能補表。肺主皮毛。脾主肌肉。故均入之。已潰瘡瘍及盜汗。皆表虛也。故咸用之。裏虛者忌服。恐升氣於表。愈致其虛。表邪者忌服。恐益其邪也。惟表虛邪湊不發汗者。可酌用之。生者亦能瀉火。

雷公云。凡使勿用水耆草真相似。只是生時葉短并根黃。先須去頭上破皮了。蒸半日出。後用手擘令細。於槐砧上剉用。熊氏曰。黃耆動三焦之火。

甘草味甘。性平無毒。入心脾二經。生則分身梢而瀉火。炙則健脾胃而和中。解百毒。和諸藥。甘能緩急。尊稱國老。白芷、乾漆、苦參爲使。惡遠志。反甘遂、海藻、大戟、芫花。忌豬肉、菘菜。

按味甘入脾。爲九土之精。安和七十二種金石。一千二百種草木。有調攝之功。故名國老。然性緩不可多用。一恐甘能作脹。一恐藥餌無功。惟虛人多熱及諸瘡毒者。宜倍用。中滿及初痢者忌之。所謂脾病人毋多食甘也。

雷公云。凡使須去頭尾尖處。其頭尾吐人。每斤切長三寸餘。劈破作六七。凡使用器中。盛酒浸蒸。從巳至午出。暴乾細割。使一斤用酥七兩塗上。炙三盡爲度。先炮令內外赤黃用良。

當歸味甘辛。性溫無毒。入心肝肺三經。頭止血而上行。身養血而中守。梢破血而下流。全活血而不走。氣血昏亂服之而定。各歸所當歸。故名。酒浸用。惡藺茹。畏菖蒲。海藻。牡蒙。

按當歸血藥也。心主血。肝藏血。脾裹血。故均入之。用分爲四。亦親上親下之道也。雷公云。一齊用。不如不使。服亦無效。未可盡信。性泥滯。風邪初旺及氣鬱者。宜少用之。

雷公云。凡使先去塵。並頭尖硬處一分已來。酒浸一宿。若要破血。即使尾。若要止痛止血。即用頭硬實處。若養血。即用中身。若全用。不如不使。服食無效。單使

妙也。

川芎味辛甘。性溫無毒。入肝經。上行頭角。引清陽之氣而止痛。下行血海。養新生之血以調經。久服令人暴亡。白芷爲使。畏黃連。小者名撫芎。主開鬱。

按川芎入肝經。能補血矣。何云暴亡。以其氣升陽。其味辛散。善提清氣。於上部有功。然宜中病卽已。若久用。則虛逆且耗。故有此患。凡氣升痰喘火劇中滿等證。不宜用之。

山藥味甘。性溫無毒。入脾肺腎三經。補陰虛。消腫硬。健脾氣。長肌肉。強筋骨。療乾咳。止遺泄。定驚悸。除瀉痢。乳製用。紫芝爲使。喜門冬。惡甘遂。

按丹溪曰。山藥屬土。而有金與水。宜入脾肺腎而補虛。經曰。虛之所在。邪必湊之。腫硬之謂也。得補則邪自去。脾自健。於是土盛生金。金盛生水。功效相仍矣。然單食多食。亦能滯氣。

白朮味苦甘。性溫無毒。入脾經。除溼利水道。進食強脾胃。佐黃芩以安胎。君枳實而消痞。止泄瀉。定嘔吐。有汗則止。無汗則發。土炒用。防風地榆爲使。忌桃李雀肉。青魚菰菜。

按白朮甘而除溼。所以爲脾家要藥。胎動痞滿吐瀉。皆脾弱也。用以助脾。諸疾自去。有汗因脾虛。故能止之。無汗因土不能生金。金受火尅。皮毛焦熱。既得其補脾。又藉其甘溫。而汗可發矣。傷寒門有動氣者。不宜用之。

蒼朮味甘辛。性溫無毒。入脾胃二經。主平胃健脾。寬中散結。發汗祛溼。壓山嵐氣。散溫瘧。泔浸一宿。換泔浸炒用。使忌同白朮。

按蒼朮辛甘祛溼。脾胃最喜。故宜入之。大約與白朮同功。乃藥性謂其寬中發汗。功過於白。固矣。又謂其補中除溼。力不及白。於理未然。夫除溼之道。莫過於發汗。安有汗大發而溼未除者也。溼去而脾受其益矣。若以爲發汗。故不能補中。則古何以稱之爲山精。煉服可長生也。亦以其結陰陽之精氣耳。俗醫泥其燥而不常用。不知脾爲藏主。所喜惟燥。未有脾氣健而諸藏猶受其損者。獨火炎土燥。脾虛作悶者。忌之。恐益其火也。

白芍藥味酸苦。性微寒。有小毒。入肝經。主怒氣傷肝。胸腹中積聚。腰臍間瘀血。腹痛下痢。目疾崩漏。調經安胎。赤者專主破血利小便。除熱明眼目。雷丸爲藥。沒藥爲使。惡石斛。芒硝。畏硝石。鼈甲。小蘗。反藜蘆。



按白芍酸走肝。故能瀉水中之火。因怒受傷之證。得之皆愈。積聚腹痛。雖脾之病。然往往亢而承制。土極似木之象也。經曰。治病必求於本。今治之以肝。正其本也。目疾與婦人諸證。皆血之病得之。以伐肝邪。則血自生而病自已。故四物湯用之。亦以婦人多氣也。今竟稱其補血之效而忘其用。可耶。新產後宜酌用之。恐酸寒伐生生之氣也。血虛者煨用。痛痢者炒用。

雷公云。凡採得後。於日中晒乾。以竹刀刮去粗皮。將蜜水拌蒸。從巳至未。晒乾用之。

生地黄。味甘苦。性寒無毒。入心肝脾肺四經。涼心火之煩熱。瀉脾土之溼熱。止肺經之衄熱。除肝木之血熱。忌見鐵器。當歸爲使。得麥門冬酒良。惡貝母。畏蕪荑。萊菔及子。

按生地黄總是涼血之劑。故入四經以清諸熱。老人津枯便結。婦人崩漏。及產後血攻心者。尤爲要藥。實脾藥中用二三分。使脾家永不受邪。血虛寒者忌之。熟地黄。味甘苦。性溫無毒。入心肝腎三經。活血氣。封填骨髓。滋腎水。補益真陰。傷寒後脛股疼痛。新產後臍腹難禁。利耳目。烏鬚髮。治五勞七傷。能安魂定魄。使忌

畏惡。俱同生地。性尤泥滯。薑酒浸用。

按熱地黃爲補血之劑。而心與肝藏血生血者也。故能入焉。其色黑。其性沉陰。重濁。經曰。濁中濁者。堅強骨髓。腎主骨。故入之。精血既足。則脛股臍腹之證自愈。耳目鬚髮。必受其益。而勞傷驚悸。並可痊矣。

雷公云。採得生地黃。去白皮。磁鍋上柳木甑蒸之。攤令氣歇。拌酒。再蒸。又出令乾。勿令犯銅鐵。令人腎消。并白髮。男損榮。女損衛也。

知母。味苦。性寒無毒。入腎經。瀉無根之腎火。療有汗之骨蒸。止虛勞之陽勝。滋化源之陰生。勿犯鐵器。犯之損腎。燒去毛。鹽酒炒用。

按知母入腎。爲生水之劑。水盛則火熄。所謂壯水之主。以制陽光也。口渴乾欬。眼花目眩。便赤腰痛。褥勞煩躁不眠。此皆陽盛陰衰之證。服之皆愈。若肺家寒嗽。及腎氣虛脫無火者。禁用。

雷公云。凡使先用槐砧上捶剉。燒乾。木臼中杵搗。勿令犯鐵器。行經上頸。酒炒用。

貝母。味辛苦。性微寒無毒。入心肺二經。清心潤肺。止嗽消痰。主胸腹氣逆。傷寒煩

熱。淋瀝瘕疝。喉痺。金瘡。人面瘡。癭瘤諸惡瘡。去心研用。厚朴白薇爲使。惡桃花。畏秦艽。礬石。莽草。反烏頭。

按貝母辛走肺。苦走心。善能散鬱瀉火。故治胸腹云云等疾。

雷公云。凡使先於柳木火中炮令黃。擘破去肉。口鼻上有米許大者。心一小顆。後拌糯米於鍋上同炒。待米黃熟。然後去米取出。其中有獨顆團。不作兩片無皺者。號曰丹龍精。不入藥中。若誤服。令人筋血脈永不收。用黃精小鹽汁合服立愈。

黃芩。味苦平。性寒無毒。入肺大腸膀胱膽四經。主崩淋熱疽。痛痢惡瘡。解毒收口。去翳明目。調經安胎。中枯而飄者。瀉肺火。消痰利氣。除風溼留熱於肌表。細實而堅者。瀉大腸火。養陰退陽。滋化源。除熱於膀胱。山茱萸。龍骨爲使。惡葱實。畏丹砂。牡丹。藜蘆。沙參。丹參。

按芩枯飄者有上升之象。故入肺。堅實者有下行之理。故入大腸諸經。性甚寒。苟無實火。不宜用之。

黃連。味苦。性寒無毒。入心經。主心火炎。目疾暴發。瘡瘍紅腫。腸紅下痢。痞滿泄瀉。

小兒疳熱。消口中瘡。驚悸煩躁。天行熱疾。黃芩、龍骨、連翹、滑石爲使。惡菊花、芫花、玄參、白蘚、白殭蠶。畏款冬花、解巴豆、烏頭毒。忌豬肉、冷水。

按黃連味苦瀉心。治心火諸病不可缺。瀉痢雖屬脾經。正由火不能生土。況心與小腸相爲表裏。心火瀉則小便亦利。而腸胃自厚矣。因寒得瀉者忌之。又久病氣虛。心火不盛者。用之則愈虛。虛火反熾。

雷公云。凡使以布拭去髭毛。然後用漿水浸二伏時。漉出。於柳木火中焙乾用。若服此藥。得十兩。不得食豬肉。若服至三年。一生不得食豬肉也。

大黃味苦。性大寒無毒。入脾胃大腸。心肝五經。性沉而不浮。用走而不守。奪土鬱而無壅滯。定禍亂而致太平。名曰將軍。又主癰腫及目疾痢疾暴發。血閼火閉。推陳致新。黃芩爲使。無所畏。錦紋者佳。

按大黃之入脾胃大腸。人所解也。其入心與肝也。人多不究。昔仲景百勞丸。蠱蟲丸。都用大黃以理勞傷吐衄。意最深微。蓋以濁陰不降。則清陽不升者。天地之道也。瘀血不去。則新血不生者。人身之道也。蒸熱日久。瘀血停於經絡。必得大黃以豁之。則肝脾通暢。陳推而新致矣。今之治勞。多用滋陰。頻服不效。坐而



待斃。嗟乎。術豈止此耶。至癰腫目疾及痢疾。咸熱瘀所致。故並治之。傷寒脈弱及風寒未解者。禁用。

雷公云。凡使細切。內紋如水。旋斑緊重。剉蒸。從巳至未。晒乾。又漉。臘水蒸。從未至亥。如此蒸七度。晒乾。却漉。薄蜜水再蒸一伏時。其大黃醬如烏膏樣子。日晒乾用之。爲妙。

桔梗。味辛。性微溫。有小毒。入肺經。主肺熱氣奔。痰嗽鼻塞。清喉利膈。能載諸藥入肺。節皮爲使。畏白芨。龍眼。龍膽草。

按桔梗味辛。故專療肺疾。下部藥中勿用。恐其上載而不能下達也。

雷公云。凡使勿用本梗。真似桔梗。咬之只是腥澁。不堪用。凡使去頭尖硬二三分已來。并兩畔。附枝子於槐砧上細剉。用百合水浸一伏時。漉出。緩火熬令乾用。每修事四兩。用生百合五分。搗作膏。投水中浸。

天花粉。味苦。性寒無毒。入肺心脾胃小腸五經。主肺火盛而喉痺。脾胃火勝而口齒腫痛。清心利小便。消痰除咳嗽。排膿消腫。生肌長肉。止渴退煩熱。補虛通月經。枸杞爲使。惡乾薑。畏牛膝。乾漆。反烏頭。

按天花粉。色白入肺。味苦入心。脾胃者。心之子。肺之母也。小腸與心相爲表裏。故均入焉。本功清熱。故主療頗多。其理易達。惟曰補虛通經。此甚不可泥也。夫苦寒之劑。豈能大補。以其能清火。則陰得其養。非真補也。月水不通。亦以熱閉。熱退則血盛。經通。非真能通也。此治本窮源之說耳。倘因寒致疾者。可誤使哉。子名瓜蒌。主胸痺。仁主潤肺下氣。止痰嗽。療乳癰乳閉。並宜炒用。半夏。味辛平。性生寒。熟溫。有毒。入肺脾胃三經。下氣止嘔吐。開鬱散表邪。除溼化痰涎。大和脾胃。須湯淋十遍。薑礬甘草製用。射干。柴胡爲使。惡皂莢。畏雄黃。生薑。乾薑。秦皮。龜甲。反烏頭。忌羊肉。羊血。飴糖。海藻。

按半夏。味辛入肺。性燥入脾胃。中其毒者。口噤發吐。煩渴及血證勿用。惟氣證發渴者不禁。

雷公云。凡使勿用白傍幾子。真似半夏。只是咬著誤微酸。不入藥用。若修事半夏。四兩。用搗了白芥子末二兩。頭醋六兩。二味攪令濁。將半夏投中。洗三遍。用之。半夏上有陳涎。若洗不淨。令人氣逆肝氣怒滿。紫蘇。味甘辛。性溫無毒。入肺脾二經。葉能發汗散表。溫胃和中。除頭痛肢節痛。雙



面紫者佳。不敢用麻黃者。以此代之。梗能順氣安胎。子能開鬱下氣。定喘消痰。

按辛走肺。甘走脾。辛散之劑。下氣最捷。氣虛者少用之。

白芷味辛。性溫無毒。入肺脾胃三經。去頭面皮膚之風。除肌肉燥癢之痺。止陽明頭痛之邪。為肺部引經之劑。主排膿托瘡。生肌長肉。通經利竅。止漏除崩。明目散風。驅寒燥溼。當歸為使。惡旋覆花。

按白芷味辛。為肺所喜。而溫燥為脾胃所喜。宜其入矣。然香燥而發散。主治雖多。能傷氣血。不宜多用。

雷公云。凡採得後。勿用四條。低處生者。此名張公藤。兼勿用馬蘭。並不入藥中。採得後刮削去皮。細剉。用黃精亦細剉。以竹刀切二味等分。同蒸一伏時。候出。於日晒乾。去黃精用之。

防風味辛甘。性溫無毒。入肺經。瀉肺金。療諸風。開結氣。理目痛。惡乾薑、藜蘆、白藪、羌花。解附子毒。

按防風辛走肺。為升陽之劑。故通療諸風。氣之結者。肺之疾也。目之痛者。風之患也。宜並主之。東垣云。卑賤之卒。聽令而行。隨所引而至。乃風藥中潤劑也。能

瀉上焦。元氣虛者不概用。今人類犯此弊。

獨活。味苦甘辛。性微溫無毒。入肺腎二經。主新舊諸風溼痺。頸項難伸。腰背痠疼。四肢攣痿。黃色而作塊者爲獨活。

按獨活。氣濁屬陰。善行血分。斂而能舒。沉而能升。緩而善搜。可助表虛。故入太陰肺。少陰腎。以理伏風。

羌活。味苦甘平。性微溫無毒。入小腸膀胱二經。散入表風邪。利周身節痛。排巨陽腐肉之疽。除新舊風溼之證。紫色而節密者爲羌活。

按羌活。氣清屬陽。善行氣分。舒而不斂。升而能沉。雄而善散。可發表邪。故入手太陽小腸足太陽膀胱。以理遊風。其功用與獨活雖若不同。實互相表裏。用者審之。

雷公云。採得後。細剉。拌淫羊藿。蒸二日後。曝乾。去淫羊藿用。免煩人心。

柴胡。味苦。性微寒無毒。入肝膽心胞絡三焦胃大腸六經。主傷寒心中煩熱。痰實腸胃中結氣積聚。寒熱邪氣。兩脇下痛。疏通肝木。推陳致新。半夏爲使。惡皂莢。畏女菀。藜蘆。犯火無效。

按柴胡氣味升陽。能提下元清氣上行。以瀉三焦火。補中益氣湯用之。亦以其能提肝氣之陷者。由左而升也。凡胸腹腸胃之病。因熱所致者。得柴胡引清去濁而病謝矣。故入肝膽等經。衍義曰。本經並無一字言及治勞。今治勞多用之。誤人不小。勞有一種真臟虛損。復受邪熱。邪因虛而致勞者。宜用。後世得此數言。凡遇勞證。概不敢用。此所謂侏儒觀場。隨衆喧喝矣。惟勞證不犯實熱者。用之亦能殺人。誠所當慎。咳嗽氣急痰喘嘔逆者。禁用。以其上升也。傷寒初起忌之。恐引邪入少陽經也。

雷公云。凡使莖長軟皮赤。黃髭鬚。出在平川平縣。卽今銀州銀縣也。西畔生處。多有白鶴綠鶴。於此翔處。是柴胡香直上雲間。若有過往。聞者皆氣爽。凡採得後。去髭并頭。用銀刀削去赤薄皮少許。却以粗布拭淨。細剉用之。勿令犯火。立便無效也。註云。柴胡乃少陽經藥也。久服令人肝膽平。

前胡味苦甘辛。性微溫無毒。入肺肝脾膀胱四經。主傷寒痰嗽痞滿。心腹結氣。解熱開胃。推陳致新。亦止夜啼兒。佐使畏惡同柴胡。按前胡辛可暢肺。以解風寒。甘可悅脾。以理胸腹。苦能洩厥陰之火。溫能散太

陽之邪。

雷公云。凡使勿用莖蒿根。緣真似前胡。只是味粗酸。若誤用。令人反胃不受食。若是前胡。味甘氣香。凡修事。先用刀刮去蒼黑皮並髭。細剉。用甜水浸令潤。於日中曬乾用之。

香附。味辛甘。性溫無毒。入肺肝脾胃四經。疏氣開鬱。消風除癢。便醋製用。

按香附味甘辛。故主發散疏通。以入肺肝脾胃。類稱女科聖藥者。蓋以婦人心性偏熱。多氣多鬱。血因氣鬱。則不能生耳。不知惟氣實而血不大虛者宜之。不然。損其氣。燥其血。愈致其疾。惜乎未有發明。而俗多受女科聖藥一句之累矣。性燥。故便製以潤之。性散。故醋製以斂之。

麻黃。味甘苦。性溫無毒。入肺心大腸膀胱四經。主散在表寒邪。通九竅。開毛孔。破癥結。除積聚。去根節者。大能發汗。根節能斂汗。厚朴爲使。惡辛夷。石葦。陳久者良。按麻黃耑主發散。宜入肺部。出汗開氣。宜入心與大腸膀胱。此驍悍之劑也。可治冬月春間傷寒瘟疫。夏季不可輕用。惟在表真有寒邪者可用。或無寒邪。或寒邪在裏。或裏虛之人。或陰虛發熱。或傷風有汗。或傷食等證。雖發熱惡寒。其



不頭疼身疼而拘急。六脈不浮緊者。皆不可用。雖可汗之證。不宜多服。蓋汗乃心之液。若不可汗而汗。與可汗而過汗。則心血爲之動矣。或至亡陽。或至衄血不止。而成大患。丹溪以麻黃人參同用。亦攻補之法也。醫者宜知之。

雷公云。凡使去節并沫。若不盡。服之令人悶。用銅刀剪去節并頭。槐砧上用銅刀細剉。煎三四十沸。竹片掠去上沫盡。漉出熬乾用。

葛根味甘。性平無毒。入胃大腸二經。發傷寒之表邪。止胃虛之消渴。解中酒之奇毒。治往來之溫瘧。解野葛巴豆丹石百藥毒。

按葛根療熱解表。故入手足陽明。太陽初病未入陽明而頭痛者。不可便服以發之。恐引賊入家也。又表虛多汗者禁用。

麥門冬味甘。性平。微寒無毒。入肺心二經。退肺中隱伏之火。生肺中不足之金。止消渴。陰得其養。補虛勞。熱不能侵。去心用地黃車前爲使。惡款冬。苦瓠。畏苦參。青蘘。忌鯽魚。肥大者佳。

按麥門冬陽中微陰。夫陽乃肺藥。微陰則去肺中伏火。伏火去。則肺金安而能生水。水盛則能清心而安神矣。故能治血妄行。調經和脈。

天門冬。味苦甘。性寒無毒。入肺腎二經。保肺氣。不被熱擾。定喘促。故得康寧。止消渴。利小便。強骨髓。悅顏色。殺三蟲。去伏尸。去心用。地黃、貝母、垣衣爲使。畏曾青、忌鯉魚。

按天門冬氣薄主升。故入肺。味厚爲陰。故入腎。虛熱者宜之。虛寒者禁用。雷公云。採得了。去上皮一重。便劈破。去心。用柳木甑。燒柳木柴。蒸一伏時。酒洒令遍。更添火蒸。出曝。去地二尺已來。作小架上。鋪天門葉。將蒸了天門冬攤令乾用。

五味子。味皮肉甘酸。核中苦辛。且都有鹹味。五味俱備。故名。性溫無毒。入肺腎二經。滋腎經不足之水。收肺氣耗散之金。除煩熱。生津止渴。補虛勞。益氣強陰。莢蓉爲使。惡萎蕤。勝烏頭。北產者良。

按五味屬水。而有木火土金。故雖入肺腎。而五臟咸補。乃生津之要藥。收斂之妙劑。然多食反致虛熱。蓋以收補之驟也。如火嗽。輒用寒涼。恐致相激。須用此酸斂以降之。亦宜少用。肺火鬱及寒邪初起者。禁用。小兒尤甚。以酸能釣痰引嗽也。



雷公云。凡小顆皮皺泡者。有白撲鹽霜一重。其味酸鹹苦辛甘味全者真也。凡用以銅刀劈作兩片。用蜜浸蒸。從巳至申。却以漿水浸一宿。焙乾用之。

升麻味甘苦。性微寒無毒。入大腸脾胃肺四經。引葱白散手陽明之風邪。引石膏止足陽明之齒痛。引諸藥遊行四經。升陽氣於至陰之下。故名升麻。又主解百毒。殺精物。辟瘟疫。除蟲毒。止瀉痢。白芷爲使。形輕而堅實青綠色者佳。

按升麻提氣解肌。故入此四經。然奉令之使。不能益人。若下元不足者。用此升之。則下虛而元氣益虧矣。藥性乃曰。元氣不足者。用此於陰中升陽。恐非。惟陽氣有餘而下陷者宜之。若初病太陽證。便服升麻。以發陽明汗。是引賊入門。亦非所宜也。

雷公云。採得後。用刀刮去粗皮一重。用黃精自然汁浸一宿。漉出。曝乾細剉。蒸了。曝乾後用之佳。

藁本味苦辛。性微溫無毒。入小腸膀胱二經。主寒氣客於巨陽之經。若頭痛流於顛頂之上。又主婦人疝瘕。陰中寒腫痛。腹中急疼。惡蘭茹。畏青箱子。

按藁本上行治風。故理太陽頭痛。下行治溼。故婦人諸證。風溼俱治。功用雖匹。

尤長於風耳。

細辛。味辛。性溫。無毒。入心肝膽脾四經。止少陰合病之頭痛。散三陽數變之風邪。主肢節拘攣。風寒溼痺。溫中氣。散死肌。破結氣。消痰嗽。止目淚。療牙疼。治口臭。利水道。除喉痺。通血閉。獨活。曾青。棗根。爲使。惡狼毒。山茱萸。黃耆。畏硝石。滑石。反藜蘆。忌生菜。狸肉。華陰者良。

按細辛辛溫。宜入心肝等經。以療在裏之風邪。其氣升陽。故上部多功。然諸證犯寒者可用。若因火熱屬陽證者忌之。單服末不可過半錢。多則氣塞不通者死。

雷公云。凡使一葉。揀雙葉。服之害人。須去頭上。田瓜水浸一宿。至明漉出。曬乾用。

連翹。味苦。性微寒。無毒。入心肝膽胃三焦大腸六經。瀉六經之血熱。散諸腫之瘡瘍。利小腸。殺白蟲。通月經。療五淋。破癭瘤。解痘毒。鼠黏子爲使。

按連翹苦寒。雖瀉六經。而心經爲最。諸瘡淋閉等證。俱屬心火。故能療之。藥性曰。除六經熱。與柴胡同功。然此治血熱。柴胡治氣熱之別耳。

澤瀉味甘鹹。性寒無毒。入膀胱腎三焦小腸四經。主去胞垢。退陰汗。治小便淋瀝。仙藥療水病。溼腫靈丹。畏海蛤。文蛤。色白者佳。

按澤瀉下降爲陰。專主滲洩。宜入膀胱諸經。其行水之功。過於猪苓。衍義曰。小便既多。腎氣焉得復實。扁鵲曰。多服病人眼。藥性曰。令人面光無子。乃本草稱其補虛明目。治洩精消渴。珍珠囊註其生新水止虛煩。恐無是理。卽六味丸中用之。以其滲去脾溼。退命門火爲向導爾。又藥性賦云。補陰不足。蓋以補陰之功不足也。後世不察。謂其可以補陰分之不足。大失本旨。

扁鵲云。多服病人眼。一名水瀉。一名及瀉。一名芒芋。一名鵠瀉。生汝南汝澤。五月八月採根陰乾。

實味甘無毒。主風痺消渴。益腎氣。強陰補不足。除邪溼。久服面生光。令人無子。九月採。

雷公云。不拘多少。細剉。酒浸一宿。漉出曝乾任用也。葉味鹹無毒。主大風。乳汁不出。產難。強陰氣。五月採。玄胡索味苦辛。性溫無毒。入心肺脾胃四經。活精血。療產後之疾。調月水。主胎前

之證。一切因血作痛之證並治。酒炒行血。醋炒止血。生用破血。炒用調血。

按玄胡索可升可降。爲陰中之陽。故能行上下四經。此理血之劑也。苟非血證。用之無益。

地榆。味苦甘酸。性微寒無毒。入大腸肝二經。主下部積熱之血痢。止下焦不禁之月經。又主金瘡。除惡肉。崩中帶下。得髮良。惡麥門冬。

按地榆沉寒屬陰。專入肝腸以理下焦。血證有熱者宜之。若虛寒下陷。血衰泄瀉者勿用。

防己。味辛苦。性平溫無毒。入十二經。尤善腰以下至足溼熱腫盛。療中風手脚攣急。口眼喎斜。疥癬蟲瘡。止嗽消痰。利大小便。去留熱。垣衣爲使。惡細辛。葶藶。殺雄黃毒。

按防己爲陽中之陰。於經絡無所不入。又主降。故下部多功。象之於人。則險而健者也。用之當則可展其能。一不當而反階之禍。惟十二經真有溼熱壅塞。及膀胱積熱。下注脚氣。此誠要藥。無可代者。然臭味拂人。妄服之令人減食。其不可用有四。若飲食勞倦。元氣既虧。而以防己泄大便。則重亡其血。一也。發渴引

飲。熱在肺經氣分。而防己乃下焦血藥。二也。外傷風寒。邪傳肺部。以至小便黃赤不通。此上焦氣分禁忌血藥。三也。久病之後。津液不行。此上焦虛渴。宜補宜甘溫。若用苦寒之劑。則速其危。四也。分木漢二種。卽根苗爲名。漢主水氣。木主風氣。爲少異耳。

雷公云。凡使勿使水條。以其水防己黃腥。皮皺。上有了足。子不堪用。夫使防己。要心花大黃色者佳。車前草根相對同蒸。半日後。出晒。車前草去之。細剉用。常山味苦辛。性微寒有毒。入肝經。最開結痰。專理瘧疾。毒令人吐。惡生葱。菰菜及醋。苗名蜀漆。鷄骨者良。

按丹溪云。常山屬金。宜伐肝邪。然其性酷。下咽令人大吐。傷脾損胃。惟精壯與痰實者宜之。老人小兒及虛弱久病勿用。

雷公云。凡使春使莖葉。夏秋冬用根。用酒浸一宿。至明漉出。日乾。熬搗炒用。勿令老人久病服之。大忌。

草龍膽。味苦澀。性寒無毒。入肝膽腎膀胱四經。退肝經之邪熱。除下焦之溼腫。明目定驚。治疸止痢。能殺疳蟲。小豆。貫衆爲使。惡防葵。地黃。



按圖經龍膽秋令開花冬間結實。屬金與水。金能制木水入腎家膽與膀胱。乃肝腎同部之腑也。故均入焉。夫目得肝血而能視。肝得腎水而後生。今益腎清肝。目之受明所自來矣。驚疳痘痢。皆肝膽證也。何弗治耶。  
雷公云。採得後陰乾。欲出時。用銅刀切去髭上頭丁。於甘草湯中浸一宿。至明漉出。曝乾用。勿空腹食之。令人溺不禁。



雷公炮製藥性解 卷二 草部上

# 雷公炮製藥性解

明 雲間 李中梓士材編輯  
清 吳門 王子接晉三重訂  
鄞縣 曹赤電炳章校點

## 卷二

### 草部中

玄參。味苦鹹。性微寒無毒。入心肺腎三經。主腹中寒熱積聚。女子乳癰諸疾。補腎氣。除心煩。明眼目。理頭風。療咽喉。消癭瘤。散癰腫。解熱毒。惡黃耆、乾薑、大棗、山茱萸。反藜蘆。勿犯銅器。餌之噎喉損目。

按玄參氣輕清而苦。故能入心肺。以清上焦之火。體重濁而鹹。故能入腎部。以滋少陰之火。所以積聚等證。靡不療之。

雷公云。凡採得須用蒲草重重相隔。入甑蒸兩伏時。後出晒乾。使用時勿令犯

銅器。餌之墮人喉。損人目。揀去蒲草用之。

丹參。味苦。性微寒。無毒。入心經。養神定志。破結除癥。消癰散腫。排膿止痛。生肌長肉。治風邪留熱。眼赤狂悶。骨節疼痛。四肢不遂。破宿血。補新血。安生胎。落死胎。理婦人經脈不調。血崩帶下。

按丹參色赤屬火。味苦而寒。故入手少陽經。以療諸般血證。

苦參。味辛。性寒。無毒。入胃大腸肝腎四經。主結氣積聚。伏熱黃疸。腸風燥渴。溺有餘瀝。逐水消癰。明目止淚。去溼殺蟲。療大風及一切風熱細疹。以糯米泔浸一宿。去浮面腥氣。曬用。玄參爲使。惡貝母。漏蘆。兔絲子。反藜蘆。

按苦參屬水。有火性下降。本入少陰心。又入手足陽明及足厥陰經者。以其善主溼也。蓋溼勝則生熱。熱勝則生風。而結氣等證。從茲有矣。今以苦參燥溼。治其本也。東南卑溼。尤爲要藥。丹溪曰。能峻補陰氣。或得之而腰重者。以其氣降而不升。非傷腎也。

雷公云。凡使不計多少。先須用糯米濃泔浸一宿。上有腥穢氣。並在水面上浮去。須重重淘過。卽蒸。從巳至申。出曝乾。細剉用之。

紅花。味辛。性溫無毒。入心肝二經。逐腹中惡血。而補血虛。除產後敗血。而止血暈。療跌撲損傷。瘡毒腫脹。老人血少便結。女子經閉不行。催生下胎衣及死胎。酒漬用。其苗生搗敷腫毒。其子吞數粒。主天行痘瘡不出。

按紅花下行血海。宜入足厥陰而逐血。潔古云。苦溫爲陰中之陽。故又入手少陰而補血。然長於行血。欲其補血須少用。或佐補劑。三稜。味苦。性平無毒。入肺脾二經。主行氣行血。多年癥癖如石。能消爲水。麵裹煨。醋炒用。

按三稜爲血中氣藥。脾裏血。肺主氣。宜並入焉。蓋血隨氣上。氣聚則血下流。故生癥癖之患。非三稜不治。然有斬關之勢。虛人忌之。蓬莪。味苦辛。性溫無毒。入肺脾二經。開胃消食。破積聚。行瘀血。療心疼。除腹痛。利月經。主奔豚。定霍亂。下小兒食積。

按蓬莪與三稜相似。故經絡亦同。但氣中血藥爲少異爾。性亦猛厲。但能開氣。不能益氣。虛人禁之。乃大全謂氣短不能續者亦宜用之。過矣。卽大小七香丸。集香丸。都用以理氣。豈用以補氣乎。欲其先入血則醋炒。欲其先入氣則火

炮。三稜亦然。

雷公云。凡使於沙盆中用醋磨令盡。然後於火畔吸令乾。重篩過用之。

天麻。味辛。性平。無毒。入肝膀胱二經。療大人風熱眩暈。治小兒驚悸風癇。祛諸風。麻痺不仁。主癰瘰。語言不遂。利腰膝。強筋力。活血脈。通九竅。利周身。療癰腫。溼紙裹煨用。無畏忌。苗名赤箭。主用略同。

按天麻去風。故入厥陰。去溼。故入膀胱。真有風溼。功效若神。癰腫之證。溼生熱也。宜亦治之。赤箭用苗。有自表入裏之功。天麻用根。有自內達外之理。不宜同劑。反致無功。

雷公云。凡使勿用銜風草。緣與天麻相似。只是葉莖不同。其銜風草根莖。葉皆自有青點。使銜風草根。切勿使天麻二件誤用。即令人有腸結之患。修事天麻十兩。用蒺藜子一鎰。緩火熬煎。熟後便先安置天麻十兩於甑中。只用火熬過。蒺藜子蓋。內外再用三重紙蓋。並繫從巳至未時。又出蒺藜子。再入熬炒。存前天麻瓶內。用炒蒺藜子於中。依前蓋。又隔一伏時。取出。如此七遍。瓶盛出後。用布拭上氣汗。用刀劈焙之。細剉。單搗。若用銜風草。修事法亦同。天麻一般。



南星。味苦辛。性平有毒。入脾肺二經。主中風牙關緊閉。痰盛麻痺。下氣破堅積。消癰腫。利胸膈。散氣墮胎。搗敷疥癬瘡毒。并蛇蟲咬傷。沸水泡七次。以牛膽汁收其沫入膽。久懸風處更佳。畏附子。乾薑。生薑。

按肺受風邪。脾多痰飲。南星專主風痰。故並入二經。味辛主散。所以消癰墮胎。及療疥癬等疾。大抵與半夏同功。但半夏辛而能守。南星辛而不守。其燥急之性。甚於半夏。故古方以牛膽苦寒之性制其燥烈。且膽又有益肝鎮驚之功。小兒尤爲要藥。丹溪曰。南星欲其下行。以黃柏引之。秦艽。味苦辛。性微溫無毒。入胃大小腸三經。主骨蒸。腸風瀉血。活筋血。利大小便。除風溼。療黃疸。解酒毒。去頭風。菖蒲爲使。羅紋者佳。

按秦艽苦則湧洩。爲陰。故入大小腸以療諸溼。辛則發散。爲陽。故入陽明經以療諸風。骨蒸之證。亦溼勝風溼所致。宜並理之。

雷公云。凡使秦艽。須於脚文處認取左文。列爲秦。治疾。右文列爲艽。卽發脚氣。凡用秦艽。以布拭去黃白毛盡。然後用還元湯浸一宿。日曝乾用之。遠志。味苦。性溫無毒。入心腎二經。補不足。除邪氣。益智慧。明耳目。寧怔忡。定驚悸。

利九竅。治健忘。壯陽道。益精氣。長肌肉。助筋骨。及婦人血禁失音。小兒驚風客忤。皮膚熱。面目黃。久服悅顏色。延年。甘草湯泡。去心用。得茯苓、冬葵子、龍骨良。畏珍珠、藜蘆、蜚蠊、齊蛤。忌諸肉、生葱、冷水。殺天雄。附子毒。葉名小草。主夢洩。

按遠志苦入心經。溫能滋腎。而不足等證。咸本二經。故都治之。

雷公云。遠志凡使先須搥去心。若不去心。服之令人悶。去心了。用熟甘草湯浸一宿。漉出。曝乾用之。

破故紙。味苦辛。性大溫。無毒。入腎經。主五勞七傷。陽虛精滑。腰痛膝冷。囊溼腎寒。酒浸一宿。水浸三日。蒸用。惡甘草。忌羊肉、羊血、藝薑。

按破故紙苦能堅腎。且性大溫。故專走少陰。然氣燥不宜多用。命門有火及津枯者忌之。

葫蘆巴。味苦。性溫。無毒。入腎膀胱二經。得桃仁、大茴。療膀胱疝氣。得硫黃、黑附。理腎臟虛寒。

按葫蘆巴雖入腎與膀胱。攷諸本經。無佐使不能獨成功也。何首烏。味苦甘澀。微溫。無毒。十二經絡所不收。觀其藤夜交。乃補陰之劑也。消瘰

癰。散癰腫。療五痔。止腸風。烏鬚髮。美容顏。補勞瘦。助精神。長肌肉。堅筋骨。添精髓。固腰膝。除風溼。明眼目。及治婦人產後帶下諸血。老年尤爲要藥。久服令人多子。延年去癰皮。酒浸拌黑豆末蒸之。水中復加黑豆及酒曬乾。九次爲度。春夏採鮮者。赤白合用。兼補氣血。茯苓爲使。畏猪羊血。無鱗魚。蘿蔔。忌鐵器。

按何首烏大能補益。全在蒸曬如法。大者剖開。其中有鳥獸山嶽之形。亦神物也。傳云。五十年如拳大。號山奴。服之一年。髭鬚青黑。百年如碗大。號山哥。服之一年。顏色紅悅。一百五十年如盆大。號山伯。服之一年。齒落重生。二百年如斗大。號山翁。服之一年。顏如童子。行及奔馬。三百年如栲栳大。號山精。服之一年。延齡益算。純陽之體。久服成仙。邇來漸能用之。惜未能如法制之耳。骨碎補。味苦。性溫無毒。入腎經。主折傷。補骨碎。去毒風疼痛。固齒牙。療蝕瘡。殺諸蟲。去毛細剉。蜜拌蒸曬乾用。

按骨碎補溫而下行。專入腎家。以理骨病。齒者骨之餘也。故能固之。又能殺蟲者。蓋以蟲生於溼。今能去毒風而蟲之巢穴搗矣。豈能生耶。

雷公云。凡使採得後。先用銅刀刮去上黃赤毛盡。便細切。用蜜拌令潤。架柳甑

蒸一日後。出曝乾用。又乾寧記云。去毛細切後。用生蜜拌蒸。從巳至亥。照前曝乾。搗。一用炮豬腎空心吃。治耳鳴。亦能止諸雜痛。

威靈仙。味苦。性溫無毒。入十二經。主諸風。宣通五臟。去腹內冷滯。心胸痰水。久積癥癖。膀胱惡水。腰膝冷疼。兩足腫滿。又療折傷。忌麵及茶茗。牛肉。牛乳。採時不聞流水聲。鐵脚者佳。

按威靈仙可升可降。爲陰中之陽。故於經絡無所不入。丹溪云。屬水。故於肝臟多功。治痛風之要藥也。其性好走。多服疏人五臟真氣。然風注痛疼。非此不除。中病卽已。不宜多用。

牛膝。味苦酸。性平無毒。入腎經。補精氣。利腰膝。填骨髓。除腦漏。祛寒溼。破血結。通月經。墮胎孕。理膀胱氣化。遲難。陰中作痛。欲死。去蘆。酒浸一宿用。惡龜甲。螢火。陸英。畏白前白。蘇皮。忌牛肉。

按丹溪云。牛膝引諸藥下行。宜入足少陰經。以理諸疾。婦人得之。應歸血海。故行血有功。脾虛氣陷。及腿膝腫者。不宜用之。有二種。土牛膝。所稟薄。故短而細。主破血氣。川牛膝。所稟厚。故肥而長。主補精髓。竹木刺入肉。塗之可出。



雷公云。凡使去頭並塵土了。用黃精自然汁浸一宿。漉出。細剉。焙乾用。黃精味甘。性平無毒。入脾肺二經。補中益氣。除風溼。安五臟。駐顏色。久服延年。

按黃精甘宜入脾。潤宜入肺。久服方得其益。實勝於根。花勝於實。但難辨爾。與鉤吻相似。然鉤吻有毛。鉤二箇。誤服殺人。

雷公云。凡使勿用鉤吻。真似黃精。只是葉有毛子二箇。是則認處。誤服害人。黃精葉似竹葉。凡採得以溪水洗淨。後蒸。從巳至午。刀薄切。曬乾用。

蒲黃味苦。性平無毒。入肝經。生用則性滑。主行血。通經墮胎。消瘀排膿。利小便。祛心腹膀胱熱。炒用則性澀。主止血。除崩漏帶下。一切吐衄血。痢血尿血。腸風下血。止精洩。定兒枕痛。忌見鐵器。宜隔紙焙。黃蒸之。再焙用。

按蒲黃主血。而肝藏血。故獨入焉。仙經用之。亦以多功於血耳。

雷公云。凡使勿用松黃並黃蒿。其二件全似。只是味異。凡飲使蒲黃。須隔三重紙焙。令色黃。蒸半日。却焙。令乾用之妙。

續斷味苦辛。性溫無毒。入肝腎二經。主傷寒不足。折傷金瘡。諸癰腫。治漏尿血。益氣力。續筋骨。散諸血。煖子宮。療腰痛。縮小便。止夢泄。利關節。調血和血。生肌止痛。

酒浸一宿。焙乾用。地黃爲使。惡雷丸。

按腎主骨而藏精。肝主筋而藏血。續斷補精血而理筋骨。宜入此二經矣。胎產之證。尤爲要藥。

雷公云。凡使勿用草茆利。真似續斷。若誤用。服之令人筋軟。採得後。橫切剉之。又去向裏硬筋了。用酒浸一伏時。焙乾用。

益母草。味辛甘。性微寒無毒。入諸陰經。主行血養血。安胎利產。消浮腫惡毒疥瘡。治頭風血虛目疾。癰疹發癢。堪作浴湯。子名茺蔚。益精明目。除水氣。療血逆大熱。頭痛心煩。下腹中死胎。理產後血脹。

按益母本功治血。故入諸陰之經。行血而不傷新血。養血而不滯瘀血。所以爲胎產聖藥。又能消瘡腫者。取其行血。而且辛甘發散也。

肉蓯蓉。味甘酸鹹。性微溫無毒。入命門經。興陽道。益精髓。補勞傷。強筋骨。主男子精泄尿血。溺有遺瀝。女子癥痛崩帶。宮寒不孕。酒浸一宿。去浮甲。劈破中心。去白膜。蒸半日。酥炙用。潤而肥大者佳。

按蓯蓉性溫。爲濁中之濁。故入命門而補火。惟尺脈弱者宜之。相火旺者忌用。



多服令人大便滑。

雷公云。凡使先須清酒浸一宿。至明。以板刷去上沙土浮甲盡。劈破中心。去白膜一重。如竹絲草樣。是此偏隔人心。前氣不散。令人上氣不出。凡使先用酒浸。並刷淨。却蒸。從午至酉出。又用酥炙佳。

鎖陽味甘鹹。性溫無毒。入腎經。補陰虛。固髓。潤大便燥結。宜酥炙用。

按鎖陽鹹溫。宜入少陰。本經不載。丹溪續補。以其固精。故有鎖陽之名。主用與菟蓉相似。老人枯閉。最爲要藥。大便不實者忌之。

車前子味甘。性寒無毒。入肝膀胱小腸三經。主淋瀝癰閉。陰莖腫痛。溼瘡泄瀉。赤白帶濁。血閉產難。炒細研用。常山爲使。根葉主金瘡。功用同子。

按車前子利水。宜入足太陽。行血。宜入足厥陰。然逐水之劑。多損於目。本草云。明目者。以其清肝熱。如釜底抽薪。非因洩水之功也。

紫菀味苦辛。性溫無毒。入心肺二經。主咳逆上氣。痰喘吐衄。補虛勞。安五臟。水洗淨。蜜炙用。款冬爲使。惡天雄。瞿麥。雷丸。遠志。畏茵陳蒿。紫色潤軟者佳。

按紫菀苦能入心。而泄上炎之火。辛能入肺。而散結滯之氣。行氣養血。專治血

痰。爲血癆要藥。

雷公云。凡使先去髭有白練色者。號曰羊鬚草。自然不同。採得後去頭上了。用東流水淘洗令淨。用蜜浸一宿。至明於火上焙乾用。凡修治一兩用蜜二分。百部味甘苦。性微寒。有小毒。入肺經。主肺熱咳逆。傳屍骨蒸。殺疳疔。寸白諸蟲及虱。竹刀劈開。去心。酒浸用。

按百部專療咳嗽。宜入肺經。而小毒。故能殺蟲也。

雷公云。凡採得後。用竹刀劈破。去心皮。花作數十。於簷下懸。令風吹。待乾後。却用酒浸一宿。漉出焙乾。細剉。用葱一顆。自有八十三條者焙乾。號曰地仙苗。若修事餌之壽長。

百合味甘。性平無毒。入心肺大小腸四經。主鬼魅邪氣。熱咳吐血。潤肺寧心。定驚益志。攻發背。消癰腫。除脹滿。利二便。

按百合性潤。故入心肺諸經。雖能補益。亦傷肺氣。不宜多服。

款冬花味苦辛。性溫無毒。入心肺二經。主中風喉痺。肺痿肺癰。潤心肺。止咳嗽。除痰喘。定驚悸。洗肝明目。杏仁爲使得紫苑。良惡皂莢。硝石。玄參。畏貝母。辛夷。麻黃。

黃耆、黃芩、黃連、青箱。

按款冬辛甘發散爲陽。故入心肺。以理痰嗽等證。畏惡甚多。用者審之。

雷公云。凡採得須去向外裏花蕊殼。並向裏實如粟零殼者。並枝葉。甘草水浸一宿。待搗碎。纔煎兩件。拌了用。

馬兜鈴。味苦。性寒無毒。入肺經。主清肺。除咳嗽痰喘。治血痔漏瘡。根名青木香。下毒甚速。

按馬兜鈴專主手太陰經。何以治痔漏之證也。良以肺與大腸相爲表裏。肺遺熱於大腸。故有此證。今清其表而裏病自愈矣。

雷公云。凡使採得後去葉並蔓。用生絹袋盛。於東屋角畔懸。令乾。劈開去隔膜。取淨子焙用。

青黛。味苦甘。性寒無毒。入肝脾二經。除鬱火。解熱毒。止下痢。殺諸蟲。治小兒疳蟲消瘦。驚癇邪氣。脣焦口渴。上膈稠痰。療傷寒赤斑。面黃鼻赤。

按青黛色青屬木。味甘屬土。宜入厥陰太陰。以理諸熱之證。

甘菊。味甘微苦。性平無毒。入肺脾肝腎四經。能補陰氣。明目聰耳。清頭風及胸中。

煩熱。肌膚溼痺。枸杞根、桑白皮、蒼白朮爲使。

按丹溪曰。菊花屬金。而有土於水。大能補陰。宜入肺肝等經。蓋煩熱諸證。皆由水不足而火炎。得此補陰。則水盛而火自息矣。須用味甘者佳。若苦者爲苦菊。大傷胃氣。慎之。

薏苡仁。味甘。微寒無毒。入肺脾肝胃大腸五經。利腸胃。消水腫。祛風溼。療脚氣。治肺痿。健脾胃。

按薏苡仁總理溼熱。故入上下五經。蓋受熱使人筋攣。受溼使人筋緩者。可用。若受寒使人筋急者。忌之。勢力和緩。須多用見效。

雷公云。凡使勿用秔米。顆大無味。其秔米。時人呼爲粳秔是也。若薏苡仁顆小。色青味甘。咬著黏人齒。用一兩。以糯米一兩同熬。令糯米熟。去米取使。若更以鹽湯煎之。則是一般修事。

牡丹皮。味辛苦。性微溫無毒。入肝經。治一切冷熱。氣血凝滯。吐衄血瘀。積血。跌撲傷血。產後惡血。通月經。除風痺。催產難。畏兔絲子。忌蒜。

按丹皮主用。無非辛溫之功。禹錫等言其治冷。當矣。本草曰性寒。不亦誤耶。夫

肝爲血舍。丹皮乃血劑。固宜入之。本功專行血。不能補血。而東垣以此治無汗骨蒸。六味丸及補心丹皆用之。蓋以血患火燥則枯。患氣鬱則新者不生。此劑苦能瀉陰火。辛能疏結氣。故爲血分要藥。

雷公云。凡採後日乾。用銅刀劈破。去骨細剉。如大豆許。用清酒浸蒸。從巳至未。出日曬乾用。

兔絲子。味甘辛。性平無毒。入腎經。主男子腎虛精寒。腰膝冷痛。莖中寒。精自出。溺有餘瀝。鬼交泄精。久服強陰堅骨。駐顏明目。輕身。令人多子。浸五宿。蒸熟。杵作餅。曬乾研用。山藥。松脂爲使。惡蘆菌。

按雷公云。兔絲子稟受中和。凝正陽氣。故宜入補少陰。溫而不燥。不助相火。至和至美之劑。宜常用之。

雷公云。凡使勿用天碧草子。其樣真相似。只是天碧草子。味酸澀。並黏。不入藥用。其兔絲子稟中和正陽之氣所結。補衛氣。助人筋脈。採得去粗薄殼。用苦酒浸二日。漉出。用黃精自然汁浸一宿。至明。微用火煎至乾。入臼中熱燒。鐵杵三千餘成粉。并黃精自然汁與兔絲子相對用之。



茴香。味辛甘。性溫無毒。入心脾膀胱三經。主一切臭氣。腎臟虛寒。癰疽腫痛及蛇傷。調中止嘔。下氣寬胸。又有一種小茴。氣味稍薄。然治膀胱冷痛。疝氣尤奇。

按茴香氣厚。爲陽中之陽。故入少陰太陰太陽。以理虛寒諸證。雖辛溫快脾。亦能耗氣。今內相都入煎燂油膩之物。與火無異。久則致疾。深宜戒之。

砂仁。味辛。性溫無毒。入脾胃肺大小腸膀胱腎七經。主虛寒瀉痢。宿食不消。腹痛。心忪。咳嗽。腹滿奔弛。霍亂轉筋。祛冷逐痰。安胎止吐。下氣化酒食。炒去衣研用。

按砂仁爲行散之劑。故入脾胃諸經。性溫而不傷於熱。行氣而不傷於尅。太陰經要劑也。宜常用之。

白豆蔻。味辛。性溫無毒。入肺脾胃三經。主消寒痰。下滯氣。退目中翳。止嘔吐。開胃進食。除冷瀉痢及腹痛。心忪。炒去衣研用。白而圓滿者佳。

按白豆蔻辛宜入肺。溫爲脾胃所喜。故并入之。大抵辛散之劑。不能補益。藥性稱其補上焦元氣。恐無是理。但不甚尅削耳。世俗不察而信之。誤人不小。治寒氣神效。肺胃中有火及虛者忌之。

肉豆蔻。味苦辛。性溫無毒。入肺胃二經。療心腹脹痛。卒成霍亂。脾胃寒弱。宿食不

消。虛冷瀉痢。小兒傷乳吐瀉。尤爲要藥。糯米粉裹煨。忌見鐵器。

按肉豆蔻卽肉果。辛溫之性。宜入脾胃。有未去之積者。不可先用。

雷公云。凡使須以糯米作粉。使熱湯搜裹豆蔻於糖灰中炮。待米團子焦黃熟。然後出去米。其中有子取用。勿令犯鐵。

草豆蔻。味辛。性熱無毒。入脾胃二經。主風寒客邪在胃。其餘與白者同功。而性尤燥急。不及白蔻有清高之氣。

按草豆蔻辛溫發散。故入脾胃而主風寒。多食大損脾胃。衍義謂其虛弱不食者宜此。恐非。胃火者大忌。

雷公云。凡使須去蒂并向裏子後。取皮。用茱萸同於鍋上緩炒。待茱萸微黃黑。卽去茱萸。取草豆蔻皮及子。杵用之。

草果。味辛。性溫無毒。入脾胃二經。主瘧疾胸腹結滯。嘔吐胃經風邪。

按草果辛溫發散。與草蔻同功。故經絡亦同。多食亦損脾胃。虛弱及胃火者亦忌之。

菖蒲。味辛。性溫無毒。入心脾膀胱三經。主風寒溼痺。欬逆上氣。鬼疰邪氣。通九竅。

明耳目。堅牙齒。清聲音。益心志。除健忘。止霍亂。開煩悶。溫心腹。殺諸蟲。療惡瘡疥癬。勿犯鐵器。去根毛用。秦皮、秦艽爲使。惡地膽、麻黃。忌羊肉、羊血、飴糖。生石上一寸九節者佳。

按菖蒲通神明。宜入心經。祛風溼。宜入肺與膀胱。功驗雖宏。然主散而不主收。勿宜久用。

雷公云。凡使勿用泥菖夏菖。其二件相似。如竹根鞭形。黑氣穢味。腥不堪用。凡使採石上生者。根條嫩黃。緊硬節稠。長一寸有九節者是真也。採得後用銅刀刮去黃黑硬節皮一重。用嫩桑枝條相拌。蒸出曝乾。去桑條剉用。

黑附子。味辛甘。性大熱。有大毒。通行諸經。主六腑沉寒。三陽厥逆。癥堅積聚。寒溼拘攣。霍亂轉筋。足膝無力。墮胎甚速。擇每隻重一兩者。去皮臍。以薑汁鹽水煮數沸。又用黃連甘草童便合煮一時。於平地上掘坑埋一宿。取出。切圖曬乾用。地膽爲使。惡蜈蚣。畏人參、甘草、黃耆、防風、黑豆。

按附子爲陽中之陽。其性浮而不沉。其用走而不息。故於經絡靡所不入。宜致墮胎祛癥積等證者。辛甘大熱。能補命門衰敗之火。以生脾土。故仲景四逆湯

用以回腎氣。理中湯用以補脾。八味丸用以補腎脾。譬如躁悍之將。善用之。奏功甚捷。不善用之。爲害非輕。丹溪以爲仲景取其行地黃之滯。而不能有補。則古方用黑附一味。可以回陽。不補而能之乎。丹溪之言。於理未當。雖然。彼或鑑誤用之弊。有激而發爾。如法製之。毒性盡去。且令下行。若痼冷陽脫。但微炮之。天雄性味經絡功用。與附子同。主療頭面風去來疼痛。遠志爲使。惡腐痺。按天雄卽附子之長而尖。巔頂不正者。其氣親上。故潔古云。主上焦陽虛。烏頭性味經絡功用。亦同附子。主中風惡風。洗洗出汗。莽草爲使。惡藜蘆。反半夏、瓜蒌、貝母、白蘘、白芨。

按烏頭卽春間採附子之嫩小者。一云。原生苗腦。烏喙主男子腎溼。陰癢癰腫。使反性味功用同前。

按烏喙卽烏頭之有兩歧者。如烏之口。故名。

側子主發散四肢。爲風疹藥。

按側子卽附子傍出小顆。其氣輕揚。故主發散。

雷公云。側子只是附子傍有小顆如棗核者是。主用治風疹神妙也。木鼈子。只

是諸喙附雄側烏中有穗者。號曰木鼈子。不入藥用。若服之。令人喪目。射干。味苦。性微溫。有毒。入肺肝脾三經。主欬逆上氣。咽喉諸證。開胃進食。鎮肝明目。消癰毒。逐瘀血。通月經。行積痰。使結核自消。又肝經溼氣。因疲勞而發便毒者。取三寸與生薑同煎服。利兩三行效。

按射干溫能下氣行血。宜入肺肝。苦能消痰。宜入脾經。久服令人虛。雷公云。凡使先以米泔浸一宿。漉出。然後用薑竹葉煮。從未至亥。漉出。日乾用之。

旋覆花。味鹹甘。性溫。有小毒。入肺肝大腸膀胱四經。主結氣風氣。脇下滿。膈上痰。如膠漆。利大腸。逐水溼。

按旋覆花專理風氣水溼。而肝主風。脾主氣。膀胱大腸主水溼。故均入之。丹溪曰。走散之藥。病人涉虛者。不宜多服。

雷公云。凡採得後。去裏殼。蕊皮并蒂子。花蕊蒸。從巳至午。曬乾用。大戟。味苦甘。性大寒。有毒。入十二經。主水脹。蠱毒。癥結。腹滿。急痛。發汗。利大小腸。通月經。墮胎孕。小豆爲使。惡山藥。畏菖蒲。反甘草。芫花。海藻。



按大戟陰中微陽。逐十二經水。能損真氣。量虛實用之。

雷公云。凡使勿用附生者。若服令洩氣不禁。即用薺芫子灌解去。採得於槐砧上細剉。與海羊葉拌蒸。從巳至申。去羊葉曬乾用之。

商陸。味酸辛。性寒有毒。入脾膀胱小腸三經。主水脹蠱毒。疝瘕癰腫惡瘡。墮胎孕。按商陸專主逐水。與大戟相似。夫水之爲病。由於膀胱小腸不利。而脾家之所深惡者也。故咸入之。有赤白二種。白者可服。赤者有毒。堪用貼腫。誤服殺人。雷公云。凡使勿用赤葛。緣相似。其赤葛抱莖有消筋骨之毒。故勿餌。商陸花白。年多者。仙人採之作脯。可下酒也。每修事先以銅刀刮去粗皮。小薄切。以東流水浸二宿。然後漉出。架甑蒸。以豆葉一重了。與商陸一重。如斯蒸。從午至亥。出去豆葉。曬乾了。細剉用。若無豆葉。只用豆代之。

葶藶。味辛苦。性寒有小毒。入肺心脾膀胱四經。主水腫結氣。膀胱留熱。定肺氣之喘促。療積飲之痰厥。同糯米焙黃。去米用。榆皮爲使。惡殭蠶。燈草。石龍芮。

按葶藶辛走肺。苦走心。膀胱者。肺所竅也。脾土者。心所生也。故皆入之。大傷肺氣。滲泄下元。用之不當。殺人甚捷。稍涉虛者。忌之。有甜苦二種。苦者太猛劣。甜

者性少緩。

雷公云。凡使勿用赤鬚子。真相似葶藶。只是味微甘苦。葶藶子入頂。凡使以糯米相合。於火上微微焙。待米熟去米。單搗用。

牽牛子。味苦辛。性寒有毒。入大小腸二經。主下氣。通二便。祛壅滯氣急。退水腫。消風毒。治腰膝痛。墮胎孕。酒蒸。去皮用。

按牽牛子專主水氣。故入大小腸經。丹溪曰。屬火善走。有兩種。黑者兼水。白者兼金。病形與證俱實者用之。然驅逐致虛。不脹滿不大便秘者。勿用。仲景治七種溼證及小便不利。俱不用之。何也。蓋受溼之根在下焦。是血分中氣病。皆因上焦虛弱。不能氣化所致。若復用辛辣之劑。以瀉太陰之金。危亡立至矣。可不謹乎。

雷公云。草金零牽牛子是也。凡使其藥。秋末卽有實。冬收之。凡用曬乾。却入水中淘。浮者去之。取沉者曬乾。用酒蒸。從巳至未。曬乾。臨用春去黑皮用。葶藶。味苦甘。性平無毒。入脾腎膀胱三經。主風寒溼痺。腰背痛。中風不遂。遍身頑麻。膀胱宿水。陰痿失溺。利水道。益精明目。薏苡爲使。畏葵根。大黃。柴胡。牡蠣。忌牛

肉。

按萆薢之入三經。何也。蓋腎受土尅。則水臟既衰。肝挾相火而凌土溼。脾主肌肉。溼鬱肌腠。則生熱生風。以致榮衛不利。關節不利。而萆薢長於去水。用之以滲脾溼。則土安其位。水不受侮矣。然失用令人小便多。小便既多。則腎氣安得復實。今多泥其入腎。用爲補劑。亦未深原其理耳。

木通。味辛甘。性平無毒。入小腸經。主五淋小便閉。經凝乳閉。難產。積聚。驚悸心煩。健忘耳聾。聲啞鼻塞。癰瘡脾疸喜睡。天行瘟疫。

按木通利便。專瀉小腸。宜療五淋等證。其驚悸等證。雖屬心經。而心與小腸相爲表裏。故並治之。脾疸喜睡。此脾之病。皆溼所釀也。利小腸而溼不去乎。瘟疫之來。感天地不正之氣。今受盛之官行。而邪不能容。亦宜療矣。通草。味淡。性寒無毒。入肺大小腸三經。與木通同功。特瀉肺明目。退熱行經。下乳通結。力尤勝之。

按通草色白。宜其瀉肺。味淡。故入小腸。性主通行。故又入大腸。卽本草續註所謂通脫木。今女工用以作花。

雷公炮製藥性解 卷三 草部中

# 雷公炮製藥性解

明 雲間 李中梓士材編輯  
清 吳門 王子接晉三重訂

鄞縣 曹赤電炳章校點

## 卷四

### 草部下

燈心。味淡。性寒無毒。入心小腸二經。主胸腹邪氣。清心定驚。除熱利水。燒灰敷金瘡止血。療小兒夜啼。吹喉中治急喉痺甚捷。

按燈心味淡。五臟無歸。專入小腸利水。訣曰。小腸受盛與心應。故又入心經。燒灰性涼。宜治療如右。

石斛。味甘。性平無毒。入胃腎二經。補虛羸。煖水藏。填精髓。強筋骨。平胃氣。逐皮膚邪熱。療脚膝冷痺。久服厚腸胃。定志除驚。去根。酒浸一宿。曝乾酥炙用。陸英爲使。



惡寒水石。巴豆。畏殭蠶。雷丸。

按石斛入腎。則專主下部矣。而又入胃者。蓋以其味甘能助腎。而不傷於熱。平胃而不傷於燥之故也。

雷公云。凡使先去頭上子。用酒浸一宿。漉出曬乾。再用酥蒸。從巳至酉。却徐徐焙乾。然後用。

石葦。味苦甘。性平無毒。入肺膀胱二經。主勞熱邪氣。五淋癰閉。膀胱熱滿。癰疽發背。除煩下氣。補虛益精。拭去毛。羊脂炒焦用。絡石。杏仁爲使。得菖蒲良。

按石葦清熱利水。本入膀胱。而肺則下連者也。宜兼入之。既能清熱利水。則無陽亢陰傷之患。

白蒺藜子。味苦辛。性溫無毒。入肺肝腎三經。主惡血塊。癥結喉痺。產難乳閉。小兒頭瘡。皮膚風癢。頭痛。欬逆肺痿。除煩下氣。明眼目。去燥熱。療腫毒。止遺泄。其葉可作浴湯治風。杵去刺。酒蒸炒用。烏頭爲使。沙苑蒺藜。主補腎添精。強陰種子。

按蒺藜行血。宜入肝經。下氣宜入肺經。惡血等證。皆二經病也。故俱主之。其所以入腎者。因肺爲之母。肝爲之子。未有子母俱利。而腎不受其益者。故能止遺。

洩。產沙苑者。誠續嗣神丹。而本草不言。惜哉。

雷公云。凡使採得後。揀了淨蒸。從午至酉。出日曬乾。春。令皮上刺盡。用酒拌再蒸一二時用。

青葙子。味苦。性微寒。無毒。入心肝二經。主邪氣。皮膚風熱。溼癢。殺三蟲。疥蟲。惡瘡。痔蝕。下部。蠱瘡。鎮肝藏。堅骨筋。益腦髓。明耳目。一名草葶藶。

按青葙子苦者。丙丁之味也。青者甲乙之色也。故入心肝二經。本經並不言治眼。而藥性論及日華子皆言之。亦以苦寒之性。能清肝藏熱毒。上衝耳。

雷公云。凡使勿誤用思葇子。并鼠粘子兩種。頗相似。只是味不同。其思葇子味粗。煎之有涎。

木賊。味甘微苦。性平。無毒。入肺經。主目疾。退翳膜。消積塊。益肝臟。得麝香。牛角腮。治休息痢。久不瘥。得禹餘糧。當歸。芎藭。療崩中赤白。得槐鵝。桑耳。治腸虛下血。得槐子。枳實。地榆。治腸澼及痔血。去節。水潤焙用。

按木賊之名。以其能伐木也。肝爲木。故宜入焉。夫目得血而能視。藉之以伐肝邪。則血生而目疾愈矣。

茅根味甘。性寒無毒。入胃小腸二經。逐瘀血。通血閉。止吐衄。下五淋。利小便。理勞傷。補虛羸。除腸胃客熱。治婦人崩漏。

按茅根利水。本入小腸。而胃則其實受。故亦入之。

仙茅味辛。性溫有毒。入肝腎二經。主心腹冷氣。不能食。腰足攣痺。不能行。丈夫血損勞傷。老人失溺無子。強陽道。補精血。明眼目。堅骨髓。洗淨去皮。銅刀切如豆大。生稀布袋盛。於烏豆水中浸一宿。酒拌蒸半日。曬乾用。勿犯鐵器。忌牛肉、牛乳。

按仙茅性溫。本入腎經。而肝者腎所生也。故兼入之。傳云。十斤乳石。不及一斤仙茅。蓋表其功爾。中其毒者。令人舌脹。急煎大黃朴硝湯飲之。復以末摻舌間。即解。素有火證者勿用。

雷公云。凡採得後。用清水洗令淨。刮去皮。於槐砧上切豆許大。却用生稀布袋盛。蒸一宿用。

鬱金味辛苦。性溫無毒。入心肺二經。主下氣破血開鬱。療尿血淋血金瘡。楚產蟬肚者佳。

按鬱金本草言其性寒。自藥性論始言其治冷氣。今觀其主療。都是辛散之用。

性寒而能之乎。夫肺主氣。心主血。鬱金能行氣血。故兩入之。丹溪云。屬火而有土與水。古人用以治鬱遏不散者。故名。

薑黃。味辛苦。性溫無毒。經絡主治與鬱金同功。更烈。

按薑黃本草亦曰性寒。而陳藏器及日華子咸謂其熱。辨之悉矣。能傷元氣。用者審之。

牛蒡子。味辛。性溫無毒。入十二經。主風溼癰疹盈肌。咽喉風熱不利。諸腫瘡瘍之證。腰膝凝滯之氣。潤肺止嗽。散氣消痰。酒拌蒸。待有白霜出。拭去。乾焙搗用。一名惡實。一名鼠黏子。

按主治祕訣及東垣皆云。牛蒡子辛溫。故能入十二經而通散也。潔古云。吞一枚。可出癰疽頭。亦表其辛散之功爾。本草言其性平。誤矣。

紫草。味苦。性寒無毒。入心小腸二經。主心腹邪氣。脹滿作痛。癰腫諸毒。除五疽。利九竅。通水道。小兒血熱痘瘡。尤爲要劑。取嫩茸。去髭用。

按紫草主血熱。本入心經。而小腸者。受盛而與心應者也。故并入之。邪氣諸證。咸本於熱。今清其心而自愈矣。

雷公云。凡使須用蠟水蒸之。待水乾。取去頭并髭。剉用。每治紫草一斤。用蠟二兩。鎔化用。

白頭翁。味苦。性溫。有小毒。入心腎二經。主溫瘧發狂。癰疽積聚。癭瘤瘰癧。金瘡鼻衄。齒痛。腹痛。骨痛。赤毒痢下。男子陰疝。偏腫。小兒頭禿。羶腥。豚實爲使。得酒良。

按白頭翁。味苦。本入心經。經曰。腎欲堅。急入苦以堅之。故又入腎。溫瘧等證。無非水衰火旺。故治之。

白前。味甘辛。性微溫。無毒。入肺經。主下氣。除嗽氣。寒呃上衝。不得睡臥。氣逆沖喉。呼吸欲絕。腹中時時作水雞聲。甘草水浸一宿。去頭鬚子。焙乾用。忌羊肉。

按白前。色白。味辛。故入肺經。專主一切氣證。

白薇。味苦。鹹。性大寒。無毒。入心腎二經。主暴中風。身熱腹滿。忽忽不知人。狂惑鬼邪。寒熱酸疼。溫瘧洗洗發作。下水氣。利陰氣。定驚益精。以糯米泔浸一宿。去髭細剉。蒸用。惡黃耆。大黃。大戟。乾薑。大棗。乾漆。山萸。

按白薇。味苦。入心。鹹入腎。故主治如右。

白附子。味甘辛。性溫。無毒。入肺脾二經。主中風失音。一切冷風氣。頭面百病。斑點。



風瘡疥癬。心痛血痺。陰囊溼癢。入藥炮用。新羅出者佳。

按白附色白味辛。故宜入肺。以治風痰。甘而且溫。故宜入脾。以治皮膚。陽中之陽。能上升。故治面病。

蚤休味苦微寒有毒。入心經。主驚癇癲疾。瘰癧陰蝕。癰腫毒瘡。小兒胎風。手足抽掣。下三蟲。去蛇毒。一名紫河車。一名重樓。金線。

按蚤休味苦。故入心經。以治驚癇等疾。而能解毒。

白蘚皮味苦鹹。性寒無毒。入肺小腸二經。主頭風黃疸。欬逆淋瀝。溼痺死肌。一切疥癩惡風疥癬。楊梅諸瘡。熱毒天行時疾。頭痛眼疼。女子陰痛。小兒驚癇。和血脈。通九竅。利小腸。惡蠅蛸。桔梗。茯苓。草薢。

按白蘚皮入肺經。故能去風。入小腸。故能去溼。夫風溼既除。則血氣自活。而熱亦從此逝矣。

蘆薈味苦。性寒無毒。入心肝二經。消風熱。除煩悶。明眼目。治驚癇。殺三蟲。療五疳。及疥癬痔漏諸瘡。解巴豆毒。

按蘆薈之苦。本入心經。而肝則其母也。故亦入之。在小兒驚疳諸熱。尤爲要藥。

雷公云。凡使勿用雜象膽。其象膽乾了。上有竹斑光膩。和象葉搗。此藥先搗成粉。

胡黃連。味苦。性寒無毒。入肝膽胃三經。主傷寒咳嗽。溫瘧發熱。骨蒸勞熱。三消五痔。補肝膽。明眼目。止瀉痢。益顏色。治小兒驚疳霍亂。大人五心煩熱。婦人胎蒸虛驚。惡菊花。玄參。白蘚皮。忌猪肉。解巴豆毒。折之出塵如煙者真。

按胡黃連苦寒。能瀉三經之火。小兒多熱證最宜。

澤蘭。味苦。性微溫無毒。入小腸經。通肝脾之血。產前後百病皆治。通九竅。利關脈。又主頭風目痛。鼻紅吐血。治癰排膿。防己爲之使。

按澤蘭能通利小腸。則肝脾無壅閼之患。故能通關竅以理血脈也。行血而無推蕩之患。養血而無膩滯之虞。所以爲產科聖藥。凡癰瘡皆因血熱。故亦治之。雷公云。要別識雌雄。其形不同。大澤蘭形葉皆圓。能生血益氣與榮。合小澤蘭通別同用。

狗脊。味苦甘。性微溫無毒。入腎膀胱二經。主腎氣虛弱。風寒溼痺。腰膝軟弱。骨節作疼。老人失溺不節。女子傷中淋露。酒蒸用。草薢爲使。惡敗醬。

按狗脊入腎。故主骨病。入膀胱。故主溼病。

青蒿。味苦。性寒無毒。入心經。主骨蒸勞熱。虛煩盜汗。明目殺蟲。童便浸七宿。曬乾用。

按青蒿苦入心。故瀉丙丁以理諸疾。

葦撥。味辛。性大溫無毒。入肺脾胃膀胱四經。主溫中下氣。消食開痰。治陰疝。止霍亂。除瀉痢日久。療心腹冷痛。醋浸一宿。刮去皮。粟子令淨。方用。

按葦撥辛走肺家。溫宜脾胃膀胱肺經。故咸入之。

王不留行。味苦甘。性平無毒。入心肝二經。主金瘡止血。癰疽毒瘡。心煩鼻衄。難產。出竹木刺入肉。治風毒通血脈。酒蒸焙用。

按王不留行專療血證。而心主血。肝藏血者也。故均入之。癰疽等證。血不和也。經曰。營氣不從。逆於肉理。乃生癰腫。此主和血固宜治之。又治風毒者。所謂治風先治血。血行風自滅也。

淫羊藿。味辛。性溫無毒。入腎經。主絕陽不起。絕陰不育。莖中作痛。小便不利。益氣力。堅筋骨。丈夫久服。令人無子。每斤去花細剉。拌羊脂四兩。炒盡脂爲度。山藥。紫

芝爲使。得酒良。一名仙靈脾。

按仙靈脾入腎。而主絕陽等證。其爲補也明甚。乃繼之曰久服無子。毋乃惑乎。不知此劑專助相火。令人淫慾不休。慾太甚則精氣耗。經曰。因而強力。腎氣乃傷。高骨乃壞。且命門之火。乘水之衰。挾土來尅。生之不保。其能嗣耶。雷公云。凡使仙靈脾須用夾刀夾去葉枝盡後。細剉。用羊脂相對拌。炒過然後用。

巴戟天。味辛甘。性微溫。無毒。入脾腎二經。主助腎添精。除一切風及邪氣。酒浸用。覆盆爲使。惡雷丸。丹參。

按巴戟之溫。本專補腎。而肺乃腎之母也。且其味辛。故兼入之以療風。凡命門火旺以致泄精者。忌之。

雷公云。凡使先用枸杞子湯浸一宿。待稍軟。漉出。酒浸一時。又漉出。用菊花同熬。令焦黃用。

蘭葉。味甘。性寒。無毒。入肺經。止渴生津。益氣散鬱。

按丹溪云。蘭葉稟金水之精。故入肺臟。昔東垣方中嘗用之。經謂消渴治之以

蘭是也。今屢驗之。

水萍。味辛酸。性寒無毒。入肺小腸二經。消水腫。利小便。逐風寒。堪浴遍身瘡癢。發汗甚於麻黃。

按水萍入肺。故主祛風。入小腸。故主祛溼。此是水中大萍。非溝渠所生者。高供奉採萍歌云。不在山。不在岸。採我之時七月半。選甚癰風與緩風。些小微風都不算。豆淋酒下二三丸。鐵櫟頭兒都出汗。以此觀之。其功甚於麻黃可知矣。決明子。味鹹苦甘。性平無毒。入肝經。主青盲赤白翳膜。時有淚出。除肝熱。療頭風。研末塗腫毒。貼腦止鼻紅。耆實爲使。惡大麻子。

按決明專入厥陰。以除風熱。故爲眼科要藥。鼻紅腫毒。咸血熱也。宜其療矣。薤麻子。味甘辛。有小毒。入脾大腸二經。主水腹腹滿。臟腑燥熱。無名腫毒。敷之可消。口眼喎斜。敷之可正。塗足心。下胞胎如神。塗顛頂。收生腸甚捷。忌見鐵器。服過者一生忌食豆。誤犯之。腹脹猛甚。葉主脚氣風腫不仁。搗蒸傅之。按丹溪云。薤麻子屬陰。故入太陰陽明。以驅水滿。以催產難。固矣。而無名腫毒。熱也。口眼喎斜。風也。何併治之。豈其辛甘發散之功耶。



雷公云。凡使勿用黑天赤利子。緣在地蔓上生。是以有毒。其蒴麻子形似巴豆而光滑。有黃黑斑點。凡使先須和皮用鹽湯浸半日。去皮取肉。研過用。馬鞭草味苦甘。性寒有小毒。入肝脾二經。主活血通經。治金瘡諸瘡癰。取汁和酒服。

按肝藏血者也。脾裹血者也。馬鞭專主血分。故入是二經。

蘆根味甘。性寒無毒。入肺胃二經。主消渴客熱。止小便利。治五噎膈氣煩悶吐逆。以蘆根五兩。水三盞。煮一盞服。甚效。

按蘆根主氣逆嘔噦。故入太陰陽明。消渴之證。亦以氣化不及故也。今得蘆根以理太陰。而津液之生必矣。

蛇牀子味苦辛甘。性平有小毒。入肺腎二經。主風寒溼痺。諸惡瘡癬。婦人陰中腫痛。男子陰痿溼癢。久服駐顏輕身。令人有子。酒浸一宿。地黃汁拌蒸。焙乾用。惡牡丹皮。巴豆。貝母。

按蛇牀理風溼。宜入太陰。補虛痿。宜入少陰。

金銀花味苦甘。性平微寒無毒。入肺經。主熱毒血痢。消癰散毒。補虛療風。久服延

年。

按金銀花解肌膚之毒。故入肺經。爲瘡科要藥。陶隱居云。常服益壽。人多忽之。更求難得者。是貴遠賤近庸人之情乎。

山豆根味甘。性寒無毒。入心肺二經。主解諸藥毒。止咽喉痛。退熱消癰。

按山豆根性寒。專瀉心火。心火去則金無所損。金得其保。而熱傷之虞。吾知免矣。

艾葉味苦。性微溫無毒。入肝脾二經。主灸百病。溫中理氣。開鬱調經。安胎種子。止崩漏。除久痢。辟鬼邪。定霍亂。生搗汁。理吐衄血。

按艾葉溫能令肝脾疏暢。而無壅滯之患。夫人之一身。惟茲氣血兩端。今土木既調。則榮衛和而百病自却矣。至於溼中等效。又舉其偏長耳。煎服者宜新鮮。灸火者宜陳久。生用則寒。熟用則熱。

薄荷味辛。性微寒無毒。入肺經。主中風失音。下脹氣。去頭風。通利關節。破血止痢。清風消腫。引諸藥入榮衛。能發毒汗。清利六陽之會首。祛除諸熱之風邪。

按薄荷有走表之功。宜職太陰之部。中風諸患。固其專也。而血痢之證。病在凝

滯。今得辛以暢氣。而結凝爲之自釋矣。

豨薟。味苦。性溫。有小毒。入肝腎二經。補元氣。祛風溼。強筋骨。長眉髮。烏鬚髮。明耳目。得酒良。九月九日採者。

按豨薟功驗如右。宜職厥陰少陰二經。高郵軍謂其性溫。當矣。本草言其性寒。與主用相違。不亦誤乎。久服大能補益。故張詠進御表云。金稜銀線。素根紫葍。誰知至賤之中。乃伏殊常之品。臣服百劑。耳目聰明。漸服滿歲。鬚髭再黑。羅守一墜馬中風。不意十服卽痊。僧知嚴七十口。眼喎斜。數服頓愈。若張益州者。可謂識其用矣。宜去根。連莖葉細剉。搗爛取汁。熬煉成膏。以甘草熟地煎膏。煉蜜三味收之。出火毒。酒調服。功妙不可具述。所謂有小毒者。以生用令人吐也。今旣經製度。則毒去而功全矣。

蒲公英。味苦甘。性寒。無毒。入脾胃二經。化熱毒。消惡瘡。結核。解食毒。散滯氣。細剉。同忍冬藤取汁入酒。以治乳癰。服罷欲睡。是其功也。睡覺病已安矣。

按丹溪云。蒲公英花黃屬土。宜入太陰陽明經。有一種花葉莖相類而高大者。非也。其真者短小塌地。質輕脆。斷之有白汁。其花幹如葱管空者是也。四時常

花。花罷結實。絮中有子。落處則生。則其稟天地中和之性可見矣。故治諸毒。又爲黃花地丁者。以治疔毒者名也。

夏枯草。味苦辛。性寒無毒。入肝經。主瘰癧癭瘤。溼脾脚腫。肝虛目痛。冷淚羞明。散血破癥。生肌解毒。土瓜爲使。

按夏枯草三四月開花。是時正厥陰風木主令。其爲肝經之藥明矣。丹溪曰。夏至卽枯者。蓋稟純陽之氣。得陰氣則枯也。

藷香。味甘辛。性微溫無毒。入肺脾胃三經。開胃口。進飲食。止霍亂。除吐逆。

按藷香辛溫。入肺經以調氣。甘溫入脾胃以和中。治節適宜。中州得令。則臟腑咸安。病將奚來。

荊芥。味辛苦。性微溫無毒。入肺肝二經。主結氣瘀血。酒傷食滯。能發汗。去皮毛諸風。涼血熱。療痛癢諸瘡。其治產暈如神。陳久者良。

按荊芥行血療風。則太陰厥陰之入。固其宜也。今人但遇風證。輒用荊防。此流氣散之相沿爾。不知風在皮裏膜外者。荊芥主之。非若防風之入骨肉也。有汗者勿用。

香薷。味辛。性微溫。無毒。入肺胃二經。主下氣。除煩熱。定霍亂。止嘔吐。療腹痛。散水腫。調中溫胃。最解暑氣。

按香薷性溫。其除熱解暑之功。何若是其著也。不知炎威酷暑。則臟腑伏陰。胸腹有凝結之憂。而皮膚多蒸熱之氣。得香薷之辛以散之。溫以解之。而傷暑之證。從茲遠矣。熱服令人泄瀉。久服耗人真氣。江右硬梗石生者良。土香薷苗軟。但能解暑。其他無效。

佛耳草。味酸。性熱。有小毒。入肺經。主肺中有寒。及痰嗽勞嗽。款冬花爲使。

按佛耳草入太陰。大升肺氣。宜少用之。過食損目。以性熱有小毒也。

蒼耳子。味甘。性溫。有小毒。入肺經。主風寒溼痺。頭風腦漏。疔腫困重。疥癬搔癢。血崩。大風癩癧。善能發汗。炒令香。杵去刺用。反猪肉。解狗毒。

按蒼耳甘溫。故能走表。肺主皮毛。所以入之。肺主風邪。故治療如右。

茵陳蒿。味苦。性微寒。無毒。入膀胱經。主傷寒大熱。黃疸便赤。治眼目。行滯氣。能發汗。去風溼。去根用。犯火無功。

按茵陳專理洩便。本爲膀胱之劑。又何以治疸。蓋疸之爲病。脾受傷也。而脾之



所惡。溼乘土也。得茵陳以利水。則溼去土安。而疸自愈矣。疸分陰寒陽熱二種。陽疸熱多有溼有燥。同梔子用。一治溼疸。同梔子橘皮治燥疸。陰疸寒多。只有一證。同附子治之。

使君子味甘。性溫無毒。入脾胃二經。治小兒五疳。利小便。止白濁。除瀉痢。殺諸蟲。連殼用。

按使君子甘溫。宜主脾胃。然多食令人發呃。傷胃故也。

高良薑味辛。性大溫無毒。入脾胃二經。主胃中冷逆。霍亂腹痛。除寒氣。去冷痺。止吐瀉。療翻胃。消宿食。解酒毒。

按良薑辛溫。脾胃所快。真有寒證者。服之甚驗。若有熱病者。誤投愈劇。

石蓮子味苦。性寒無毒。入心胃膀胱三經。主噤口痢。及濕熱滲入膀胱。爲白濁淋瀝等證。清心解煩。開胃進食。去殼用。

按石蓮苦寒。宜瀉少陰之火。心火既清。則胃與膀胱不能獨熱矣。故皆入之。此別是一種。非蓮子比也。

合歡皮味甘。性平無毒。入心經。主安五臟。利心志。殺諸蟲。消癰腫。續筋骨。令人歡

樂無怒。輕身明目。花主小兒撮口。煎湯洗拭。跌打傷疼。熱酒調下。

按合歡味甘。何以獨入心家。經所謂以甘瀉之之說也。心得所勝。而癰瘡諸患爲之自釋矣。其葉細細相並。至夜則合。又名夜合花。似絨拂可愛。俗又謂之爲絨。

萱草根。味甘。性寒無毒。入脾肺二經。主沙淋水氣。酒疸身黃。小便赤澀。身體煩熱。大熱衄血。安五臟。利心志。令人喜悅忘憂。輕身明目。採其嫩苗。功亦相倣。花名宜男。最利胸膈。妊婦佩之。轉女爲男。

按萱草之甘。宜歸脾部。而肺則其所生者。故亦入之。嵇康養生論云。合歡蠲忿。萱草忘憂。圖經亦共言之。當非虛語。

劉寄奴草。味苦。性溫無毒。入心肺二經。主下氣。除癥破血通經。療霍亂水瀉。止金瘡出血。湯火所傷。亦堪搗傅。酒蒸曝用。

按寄奴之苦。宜歸心藏。而溫煖之性。又與脾部相宜。故兩入之。蓋心實主血。脾實裏血。所以專療血證。唐本云。多服令人利。亦以其宣泄耳。

雷公云。採得後去莖葉。只用實。凡使先以布拭去薄殼皮令淨。拌酒蒸。從已至

申出。曬乾用。

覆盆子味甘酸。性溫無毒。入肝腎二經。主腎傷精滑。陰痿不起。小便頻數。補虛續絕。益氣溫中。安和五臟。補肝明目。黑髮潤肌。亦療中風發熱成驚。女子食之多孕。久服延年。去黃葉及蒂。水淘淨。酒蒸。曝乾用。

按覆盆之酸。宜歸肝部。而腎則其母也。且溫補之性。適與相宜。故咸入之。衍義云。小便多者服之。當覆其溺器。故名。

雷公云。凡使用東流水淘淨。子葉并皮蒂盡了。用酒蒸一宿。以東流水淘兩遍。又曬乾方用。

雷公炮製藥性解 卷四 草部下

# 雷公炮製藥性解

明 雲間 李中梓士材編輯  
清 吳門 王子接晉三重訂  
鄞縣 曹赤電炳章校點

## 卷五

### 木部

白茯苓。味淡微甘。性平無毒。入肺脾小腸三經。主補脾氣。利小便。止煩渴。定驚悸。久服延年。去皮心研細。入水中攪之。浮者是其筋也。宜去之。誤服損目。赤者專主利水。抱根而生者名茯神。主補心安神。除驚悸。治健忘。馬蘭爲使。惡白蘘。畏牡蒙、地榆、雄黃、秦艽、龜甲。忌醋及酸物。

按茯苓色白。是西方肺金之象也。味淡。是太陽滲利之品也。微甘。是中央脾土之味也。故均入之。夫脾最惡溼。而小便利則溼自除。所以補脾既能滲洩。燥脾



似不能生津已。潔古何爲稱其止渴。良由色白屬金。能培肺部。肺金得補。則自能生水。且經曰。膀胱者州都之官。津液藏焉。氣化則能出矣。誠以其上連於肺。得肺氣以化之。津液從之出爾。藥性所謂白者入壬癸。亦此意也。而渴有不止者乎。至於驚悸者。心經之虛也。而心與小腸相爲表裏。既瀉小腸。而心火亦爲之清矣。故能定之。丹溪曰。陰虛未爲相宜。蓋虞其滲洩爾。然味尙甘。甘主緩。亦無大害。非若豬苓一於淡滲。而大傷陰分也。藥性云。小便多而能止。大便結而能通。與本功相反。未可輕信。赤者屬丙丁。專入膀胱瀉火。故利水之外。無他長。茯苓抱根。有依而附之之義。驚悸者。魂不能附。健忘者。神不能守。宜其治矣。廣誌云。茯苓松脂所作。勝茯苓。衍義曰。氣盛者洩於身。不抱本根。結爲茯苓。有津氣而不甚盛。不離其本。結爲茯苓。考茲兩書。各相違悖。然仙經服食。多需茯苓。而茯苓不與焉。兩說之是非。於是乎辨。

琥珀味甘。性平無毒。入心脾小腸三經。主辟百邪。安五臟。定魂魄。止心痛。消瘀血。利水道。通五淋。破癥結。去目翳。傅金瘡。

按琥珀乃松脂入地千載化成。得土既久。宜入脾家。松之有脂。猶人之有血與

水也。且成珀者。有下注之義。又宜入心與小腸。內經曰。主不明則十二官危。便道閉塞而不通。服琥珀則神室得令。五臟安。魂魄定。邪何所附。病何自生邪。於是便道通。而瘀血諸證靡弗去矣。夫目得血而能視。心寧則榮和。而翳何足虞。金瘡者。惟患其血逆於腠爾。能止之和之。未有不瘳者也。丹溪曰。古方用以燥脾土有功。脾能運化。則肺氣下降。故小便可通。若血少不利者。反致其燥急之苦。別說云。茯苓生成於陰者也。琥珀生於陽而成於陰者也。故皆主安心利水而治榮。

雷公云。凡使紅松脂。石珀。水珀。花珀。物象珀。翳珀。琥珀。紅松脂如琥珀。只是大脆文橫。水珀多無紅色。如淺黃多粗皮。彼石珀如石重。色黃不堪用。花珀文似新馬尾。松心文一路赤。一路黃。物象珀其內似有物。極爲神妙。翳珀爲衆珀之長。故號曰翳珀。琥珀如血色。安於布上拭。吸得芥子者真也。凡入藥中。用水調側柏子末。安於瓷鍋中。安琥珀於末中了。下火煮。從巳至申。別有異光。便搗如粉。重篩用。

松香。味苦甘。性溫無毒。入脾肺二經。主安五臟。除伏熱。解消渴。逐諸風。療癰疽惡

瘡。及白禿疥癢。風氣金傷。止血殺蟲定痛。松子。益氣補虛。松花。清心解煩。松葉。生毛髮。去風溼。灸罽凍。松節。主骨節久風。脚痺疼痛。久服俱能辟穀延年。

按松香甘溫之品。與脾部相宜。而肺者脾之子也。故兩入之。伏熱等證。悉屬二經。為得不治。子花節葉。主療小異。亦親上親下之道也。

柏子仁。味甘辛。性平無毒。入肺脾腎三經。主安五臟。定驚悸。補中氣。除風溼。興陽道。煖腰膝。去頭風。辟百邪。潤皮膚。明耳目。側柏葉。味苦澀。性微寒。止吐衄崩痢。除風冷溼痺。烏鬚黑髮。灸罽凍瘡。久服延年。牡蠣。桂。瓜子。為使。畏菊花。羊蹄草。諸石及麵麴。

按柏子仁辛歸肺。甘歸脾。濁陰歸腎。故均入之。柏葉之苦澀。屬金而善守。最清血分。為補陰要藥。須用嫩葉。春採東。夏採南。秋採西。冬採北。纔得節候生氣。雷公云。凡使先以酒浸一宿。至明。漉曬乾。用黃精自然汁。日中煎。手不住攪。若夫天陰。即於當中著火。用瓶器盛柏子仁。著火。緩緩煮。成膏為度。每煎三兩。柏子仁。用酒五兩浸。乾為度。

桂。味辛甘。性大熱有毒。其在下最厚者。曰肉桂。去其麤皮。為桂心。入心脾肺腎四

經。主九種心疼。補勞傷。通九竅。煖水臟。續筋骨。殺三蟲。散積氣。破瘀血。下胎衣。除欬逆。療腹痛。止瀉痢。善發汗。其在中次厚者。曰官桂。入肝脾二經。主上焦有寒。走肩臂而行枝節。其在嫩枝四發者。曰桂枝。專入肺經。主解肌發表。理有汗之傷寒。四者皆殺草木毒。百藥無畏。性忌生葱。

按桂在下。有入腎之理。屬火。有入心之義。而辛散之性。與肺部相投。甘溫之性。與脾家相悅。故均入焉。官桂在中。而肝脾皆在中之臟也。且經曰。肝欲散。急食辛以散之。以辛補之。又曰。脾欲緩。急食甘以緩之。以甘補之。桂味辛甘。二經之所由入也。薄桂在上。而肺胃亦居上。故宜入之。桂枝四發。有發散之義。且氣味俱輕。宜入太陰而主表。丹溪曰。仲景救表用桂枝。非表有虛而用以補也。衛有風寒。故病自汗。以此發其邪。則衛和而表密。汗自止爾。衍義乃謂仲景治表虛誤也。本草言桂發汗。正合素問辛甘發散之義。後人用桂止汗。失經旨矣。大抵桂爲陽中之陽。壯年火旺者忌食。惟命門火衰不能生土。納穀不化。及產後虛弱者。宜之。細考桂有數種。論之者無慮數十家。或言種異。或言地殊。各不相侔。咸無所據。詢之交廣商人所販。惟陳藏器所謂雖分數等。同是一物。此說最當。



別說亦稱之矣。今採其意以詳別如右。

雷公云。凡使去薄者。要紫色厚者。去上粗皮。取心中味。辛者用。每斤大厚紫桂。只取得五兩。取有味厚處生用。如未用。即用重裹熟絹。并紙裹。勿令犯風。其州上只有桂草。無桂心。用桂草煮丹陽木皮。遂成桂心。凡使即單搗用。

槐實。味苦。酸鹹。性寒。無毒。入心肝大腸三經。主五內邪熱。腸風五痔。湯火瘍瘡。男子囊墜腫痛。陰瘡溼證。婦人陰中痛癢。崩中漏下。明目補腦。殺蟲去風。黑髮延年。酒服能催生墮胎。枝專主洗溼熱諸瘡。治九種心疼。皮主中風拘攣。齒痛疳蠱。消癰解毒。止痛長肉。膠主肝臟風。筋脈抽掣。及急風口噤。四肢不收。或毒風周身如蟲行。破傷危急。花與實同功。又主心痛及疔腫熱毒。赤白下痢。小兒驚癇。景天爲使。

按槐實之苦。能泄心火。酸寒之性。能伐肝經。經曰。酸苦湧洩爲陰。其功主降。故又入大腸。以理下焦諸證。且催產難。夫蟲之生也。因於溼。風之生也。因於熱。溼熱既去。又奚庸虞。花枝皮葉。主治大同小異。久爲痔瘡要藥。木香。味苦辛。性微溫。無毒。入心肺肝脾胃膀胱六經。主心腹一切氣疾。癖癥塊。九



種心疼。止瀉痢。除霍亂。健脾胃。消食積。定嘔逆。下痰壅。辟邪氣。瘟疫。殺瘧蟲。精物。宜生磨用。火炒令人脹。形如枯骨。苦口沾牙者良。

按木香辛入肺。苦入心。溫宜脾胃。肝者心之母也。膀胱者肺所連也。故均入焉。蓋心乃一身之主。氣血之所聽命者也。有主則能塞氣。肺氣調則金能制木。而肝火自伏矣。凡人有怒。則肝氣拂逆。而反忤其元氣。心有縱肝之情而不能制。則肝氣於是乎盛。或爲拂逆。或爲氣衝。得木香則心氣暢而正氣亦暢。肝氣何拂逆之有哉。實心之行。夫肝也。非肝之自行也。東垣以黃連制之。惡其氣行過於通暢。不無走泄之患爾。

雷公云。凡使其木香是蘆葦根條。五盤旋。採得二十九日。方硬如朽骨。硬碎。其有蘆頭丁。蓋子色青者。是木香神也。

山梔。味苦。性寒無毒。入心肺大小腸胃膀胱六經。主五內邪熱。亡血津枯。面紅目赤。癰腫瘡瘍。五種黃病。開鬱瀉火。療心中懊懣顛倒而不眠。治臍下血滯小便而不利。皮走肌膚之熱。仁去心胸之熱。解羊躑躅及蠱蟲毒。

按山梔味苦歸心。輕飄象肺。入腸則供肺爲傳道者也。小腸則受盛與心應者。

也。胃亦上焦之腑也。膀胱亦肺部之約也。故咸入之。以理邪熱諸證。潔古曰。輕清上行。丹溪又曰。屈曲下行。兩家之說。似相左矣。不知惟其上行。最能清肺。肺氣清而化。則小便從此氣化而出。經曰。膀胱藏津液。氣化則能出者。是也。虛火炎者。炒黑用。煩鬱嘔逆者。薑汁炒用。此外並宜生服。

雷公云。凡使勿用顆大者。號曰伏。凡梔子無力。須要如雀腦并鬚長有九路。赤色者上。凡使先去皮鬚取仁。以甘草水浸一宿。漉出焙乾。搗篩如金末用。吳茱萸。味苦辛。性熱有小毒。入肝脾胃大腸腎五經。主下氣消痰。寒氣噎塞。心腹刺痛。霍亂轉筋。脚氣攻心。止咳逆。逐風邪。消宿食。除血痺。鹽湯炮去毒用。寥實爲使。惡丹參。硝石。白堊。畏紫石英。

按吳茱萸辛熱之劑。宜入五經。以理寒證。多食大損元氣。腸虛者忌之。

雷公云。凡使先去葉梗。并雜收子。用大盆二口。使鹽水洗一百轉。自然無涎。日乾。任入丸散中用。修事十兩。用鹽二兩。研作末。投東流水。四投中分作一百度洗。則有大效。若用醋煮。卽先沸醋三十餘沸後。共茱萸沸。醋盡曬乾。每用十兩。使醋鎔爲度。

山茱萸。味甘酸。微溫無毒。入肝腎二經。主通邪氣。逐風痺。破癥結。通九竅。除鼻塞。療耳聾。殺三蟲。安五臟。壯元陽。固精髓。利小便。去梗用。寥實爲使。惡桔梗。防風。防己。

按山茱萸大補精血。故入少陰厥陰。六味丸用之。取其補腎而不傷於熱耳。若舍是而別求熱劑。以爲淫慾助。猶棄賢良而搜佞倖也。愚乎哉。

雷公云。凡使勿用雀兒蘇。臭似山茱萸。只是核入稜。不入藥。使山茱萸須去內核。每修事去核子一斤。取內皮用。只存成四兩已來。緩火熬之。方用。能壯元氣。精秘。其核最滑精。

蔓荊子。味苦甘辛。性微寒無毒。入肝經。主散風寒。療頭風。除目痛。去翳膜。堅齒牙。利九竅。殺百蟲。酒浸一宿。蒸用。惡石膏。烏頭。

按經曰。東方青色。入通於肝。開竅於目。又曰。風生木。木生酸。酸生肝。荊實入肝。故專主散風。以療目疾。主治祕訣云。其味苦甘。爲陽中之陰。能涼諸經之血熱。杜仲。味辛甘。性溫無毒。入腎經。主陰下溼癢。小便餘瀝。強志。壯筋骨。滋腎止腰痛。去粗皮。酥蜜炙去絲用。惡蛇蛻。玄參。

按杜仲降而屬陽。宜職腎家之證。然精血燥者。不宜多用。

雷公云。凡使先須削去粗皮。用酥蜜和作一兩炙之。以盡爲度。炙乾了。細剉用。凡修事一斤。酥一兩。蜜三兩。二味相和合處用也。

烏藥。味苦辛。性溫無毒。入肺脾二經。主一切氣證。及中惡心腹痛。蠱毒鬼疰。天行疫瘴。嘔逆脹滿。霍亂吐瀉。癰癤疥癩。

按烏藥辛。宜於肺。溫宜於脾。故主中惡等證。癰癤疥癩。成於血逆。始於氣逆。烏藥長於理氣。故并療之。然辛溫發散。不宜久用。恐損真元。

厚朴。味苦辛。性溫無毒。入脾胃二經。去實滿而治腹脹。除溼結而和胃氣。止嘔清痰。溫中消食。乾薑爲使。惡澤瀉。寒水石。硝石。忌食豆。

按厚朴辛則能發。溫則能行。脾胃之所喜也。故入之以理諸證。丹溪曰。厚朴屬土而有火。平胃散用之以佐蒼朮。正謂瀉上焦之溼。平胃土不使太過。以致於和而已。若以爲溫補而泛用之。非也。體重濁而微降。最能耗氣。春夏秋宜用。冬間忌之。氣虛之人及孕婦。亦不可服。

雷公云。凡使要用紫色。味辛爲好。或丸散。便去粗皮。用醋炙過。每條一斤。用酥



四兩。炙了細剉。若用湯飲下。使用自然薑汁八兩。炙一日爲度。

黃柏。味苦。性寒無毒。入腎膀胱二經。主瀉下焦隱伏之火。安上焦虛熾之蟲。除臍下痛。補腎水衰。止血痢。治癰瘡。明眼目。利小便。除溼熱。療女子熱崩。鹽酒多炒。免致寒入於腎。惡乾漆。肉厚鮮黃者佳。

按黃柏沈而屬陰。故主腎與膀胱諸證。其性苦寒。能泄亢甚之陽。以堅腎部。則水主既盛。陽光自遏。而陰血無火爍之患矣。豈實有滋補之功哉。若腎家無火。兩尺微弱。或左尺獨旺者。均不宜用。

桑白皮。味辛甘。性寒無毒。入脾肺二經。主傷寒羸瘦。崩中脈絕。肺氣有餘。虛勞客熱。瘀血停留。吐血熱渴。止嗽消痰。開胃進食。利二便。消水腫。能殺寸白。可縫金瘡。皮中白汁。塗脣燥及小兒口瘡。銅刀切片。文火蜜炙。勿令涎落。桂心麻子爲使。忌見鉛鐵。桑枝。療手足拘攣。陰管作痛。眼眶作暈。氣逆咳嗽。腫毒風癢。桑椹。開關竅。利血脈。安神魂。黑鬚髮。明耳目。桑寄生。主除腰痛。去風溼。健筋骨。充肌膚。愈金瘡。益血脈。長鬚髮。堅齒牙。安胎氣。下乳汁。止崩漏。折其莖深黃色者真。

按桑皮辛則走西方而瀉肺金。甘則歸中央而利脾土。然肺氣虛脾氣弱者。不



宜用之。恐潤利之品。能走真元爾。枝本四發。有發散之義。堪爲桑英。有裨益之功。而寄生獨產於海外。蓋以地煖不蠶。桑木無採捫之苦。得氣最厚。生意濃密。葉上自然生出。何曾有所謂節間可容他子也。此說本之丹溪。最爲近理。圖經諸書。胥失之也。難得其真。誤服殺人。用者謹之。

雷公云。凡使在樹上自然生獨枝樹是也。採得後。用銅刀和枝根莖細剉。陰乾任用。勿令見火。切忌切忌。

枸杞子。味苦甘。性微寒無毒。入肝腎二經。主五內邪熱。煩躁消渴。周痺風溼。下胸脇氣。除頭痛。明眼目。補勞傷。堅筋骨。益精髓。壯心氣。強陰益智。去皮膚骨節間風。散瘡腫熱毒。久服延年。惡乳酪。解麵毒。

按枸杞子味苦可以堅腎。性寒可以清肝。五內等證。孰不本於二經。宜其治矣。陶隱居云。去家千里。勿食枸杞。此言其補精強腎也。然惟甘州者有其功。至於土產者味苦。但能利大小腸。清心除熱而已。

雷公云。凡使用採得後。使東流水浸。以物刷去土。用熟甘草湯浸一宿。然後焙乾用。其根若似物形狀者佳。春食葉。夏食子。秋冬食根并子也。

地骨皮。味苦。性寒無毒。入肺腎二經。療在表無定之風邪。退傳屍有汗之骨蒸。除熱清肺。止嗽解渴。涼血涼骨。利二便。去骨用。

按地骨皮卽枸杞根也。故均入腎。又入肺者。蓋以其爲表則其用在表。肺主皮毛。所以入二經。功用與枸杞相同。

酸棗仁。味酸。性平無毒。入心脾肝膽四經。主筋骨酸寒。夜臥不寧。虛汗煩渴。安和五臟。大補心脾。炒熟去皮尖研用。生者治嗜臥不休。惡防己。

按棗仁味酸。本入肝經。而心則其所生者也。脾則其所制者也。膽又其相依之腑也。宜並入之。聖惠方云。膽虛不眠。寒也。炒熟爲末。竹葉湯調服。蓋以肝膽相爲表裏。血虛則肝虛。肝虛則膽亦虛。得熟棗仁之酸溫。以旺肝氣。則木來尅土。脾主四肢。又主困倦。所以令人多睡。又濟衆方云。膽實多睡。熱也。生研爲末。薑茶湯調服。亦以棗仁秋成者也。生則得全金氣。而能制肝木。肝木有制。則脾不受侮。而運行不睡矣。

雷公云。凡使採得後。曬乾取葉。重拌酸棗仁。蒸半日了。去尖皮了。任研用。益智。味辛。性溫無毒。入脾胃腎三經。主遺精虛漏。小便餘瀝。益氣安神。和中止嘔。

去皮鹽炒用。

按益智辛溫。善逐脾胃之寒邪。而土得所勝。則腎水無相尅之虞矣。遺精諸證。吾知免矣。

檳榔。味辛甘澀。性溫無毒。入胃大腸二經。主消穀逐水。宣臟利腑。攻堅行滯。除痰癖。殺三蟲。却伏尸。療寸白。攻脚氣。解諸蟲。墜藥性如鐵石。治厚重如奔馬。見火無功。

按檳榔甘溫之品。宜於胃家。沉陰之性。宜於大腸。考諸功驗。取其下墜。非取其破氣。廣閩多服之者。蓋以地煖淫蒸。居民感之。氣亦上盛。故服此以降之。爾尖長者。快銳速效。

雷公云。凡使存坐穩正。堅實不虛者。心堅有錦紋者妙。半白半黑。并心虛者。不入藥用。凡修事。即頭圓矮毗者爲榔。身形尖紫文者爲檳。榔力小。檳力大。欲使先以刀刮去底。細切。勿經火。

大腹皮。味苦辛。性微溫無毒。入肺脾二經。主冷熱氣攻心腹。疏通關格。除脹滿。祛壅滯。消浮腫。酒洗去沙。復以大豆汁洗用。

按大腹辛宜瀉肺。溫宜健脾。然宣泄太過。氣虛者勿用。樹上多棲鳩鳥。污染糞毒。最能爲害。故必多洗。方堪用爾。

丁香味甘辛。性溫無毒。入肺脾胃腎四經。主口氣腹痛。霍亂反胃。鬼疰蠱毒。及腎氣奔豚氣。壯陽煖腰膝。療冷氣。殺酒毒。消痰癖。除冷勞。有大如山茱萸者。名母丁香。氣味尤佳。

按丁香辛溫走肺部。甘溫走脾胃。腎者。土所制而金所生也。宜咸入之。果犯寒疴。投之輒應。倘因火症。爲禍勿輕。陳藏器云。拔去白鬚。薑汁調塗孔中。重生卽黑。

雷公云。凡使有雌雄。雄顆小。雌顆大。似棗核。方中多使。雌力大。膏煎中用雄。若用須去了。蓋乳子發人背癰也。

冰片味辛苦。性溫無毒。入肺肝二經。主心腹邪氣積聚。喉閉乳蛾。舌腫。痔瘡。通九竅。消風氣。明耳目。殺諸蟲。解蠱毒。又主小兒驚癇。大人痰迷。

按冰片之辛。本入肺家。而肝則受尅者也。故兼入焉。主治諸症。俱是氣閉生熱。而冰片則辛散之極。開氣如反掌。故多用之。然亦從治之法也。世俗因其主用。

遂疑其性寒。輒與麝香同用。以爲桂附之助。獨不計人身陽易於動。陰易於虧。丹溪之訓。詎可忽諸。

猪苓。味淡。性平。無毒。入膀胱經。主利便除溼。消腫通淋。去黑皮用。

按猪苓味淡。五臟無歸。專入膀胱利水。今之療瀉者。概用之。謂其去脾家之溼也。不知一於滲泄。逐水太過。水盡則傷腎。昏目。不可不知。

雷公云。凡採得用銅刀刮上粗皮一重。薄切。下東流水浸一宿。至明漉出細切。以升麻葉對蒸一日。去升麻葉令淨。曬乾用。

蘇木。味甘鹹。性平。無毒。入肝經。主破產後惡血。瘡瘍死症。一切跌撲損傷。調月水。去瘀血。和新血。排膿止痛。消癰散腫。及主霍亂嘔逆。赤白痢下。酒蒸乾用。

按蘇木專主血分。宜入肝經。然破血之功多。而和血之功少。勿得多用。以傷陰分。

雷公云。凡使去上粗皮并節子。若有中心文橫如紫角者。號曰水中尊色。具是倍常百等。須剉細了。重搗拌細條。梅枝蒸。從巳至申。陰乾用。

沉香。味辛苦。性溫。無毒。入腎命門二經。主祛惡氣。定霍亂。補五臟。益精氣。壯元陽。



除冷氣。破癥癖。皮膚瘙癢。骨節不仁。忌見火。生磨用。

按沉香屬陽而性沉。多功於下部。命腎之所由入也。然香劑多燥。未免傷血。必下焦虛寒者宜之。若水臟衰微。相火盛炎者誤用。則水益枯而火益烈。禍無極矣。今多以爲平和之劑。無損於人。輒用以化氣。其不禍人者幾希。

雷公云。沉香。凡使須要不枯者。如嘴角硬。重沉於水下爲上也。半沉者次也。大凡入丸散中用。俟衆藥出。卽入拌和用也。

乳香。味辛苦。性溫無毒。入十二經。主祛邪下氣。補腎益精。治霍亂。催產難。定心腹急疼。療癰癭風癢。諸般惡瘡。風水腫毒。中風聾瘵。亦入敷膏。止痛生肌。瓦上微炒出油。燈草同研用。

按乳香辛香發散。於十二經絡無所不入。生南海波斯國赤松脂也。垂滴成珠。綴木未落者。名珠香。圓小光明。效速。滴下如乳。鎔塌地面者。名塌香。大塊枯黯。效遲。用者不可不審。

沒藥。味苦辛。性平無毒。入十二經。主破癥結宿血。止痛。療金瘡杖瘡痔瘡。諸惡腫毒。跌打損傷。目中翳暈。歷節諸風。骨節疼痛。製同乳香。

按沒藥與乳香同功。大抵血滯則氣壅。氣壅於經絡滿急。故痛且腫。得沒藥以宣通氣血。宜其治矣。

木瓜。味酸性寒無毒。入肺脾肝三經。主脚氣水腫。心腹冷熱痛及奔豚。去溼氣。調榮衛。助穀氣。和脾胃。止吐瀉。忌犯鐵器。石搗用。

按木瓜之入三經。何也。經所謂以酸補肺。以酸瀉肝。脾則受制於木。而孕育夫金者也。何弗入焉。東垣云。氣脫則能收。氣滯則能和。腰腎脚膝之要藥也。香薷飲用之。取其專和脾胃。培植肺氣。除夏間之溼。以生至微之金耳。

雷公云。凡使勿誤用和圓子。蔓子。土茯苓。其色樣外形。真似木瓜。只氣味別。并向裏子。各不同。若木瓜皮薄。微赤黃香。甘酸不澁。調榮衛。助穀氣。向裏子頭尖一面。方是真木瓜。若和圓子。色微黃。蒂核粗。子小圓。味澀微酸。傷人氣。蔓子顆小似木瓜。味絕澀。不堪用。土茯苓似木瓜。味絕澀。子如大樣油麻。又苦澁。不堪用。若餌之。令人目澁。目赤。多筋骨痛。凡使木瓜。勿犯鐵。用銅刀刮去硬皮。并子薄切。於日中曬。却用黃牛乳汁拌蒸。從巳至未。其木瓜如膏煎。却於日中薄攤。曬乾用也。

竹葉味甘淡。性平無毒。入心肺胃三經。主新舊風邪之煩熱。喘促氣勝之上冲。療傷寒。解虛煩。治消渴。療喉痺。止嘔吐。除咳逆。有一種苦竹葉。主舌瘡目痛。去青刮取爲竹茹。主胃熱嘔呃。除煩解渴。療吐衄崩中。噎膈氣溢。筋極五痔。火燒竹瀝。主陰虛發熱。中風口噤。除自汗。解消渴。止驚悸。清煩躁。痰在手足四肢。非此不達。痰在脾裏膜外。有此可毆。又主小兒天弔驚癇。婦人懷妊悶暈。胎前不損子。產後不得虛。筍補氣止渴。久食益人。

按竹葉生於中半以上。故主治多在上焦。心肺胃。皆臟腑之居上者也。宜並入之。味苦者專瀉南方。竹茹者其除土鬱。故主用小殊。竹瀝者竹之液也。猶人身之血也。極能補陰。況陰之不足。由於火燥。竹瀝長於清火。則血得其養。本經已載其功。丹溪又詳其效。而世俗不能常用者。蓋泥證類之大寒爾。不知竹卽筍之老者也。今人自幼食筍。至老不撤。曾無中其寒涼之害者。瀝則假火而成。何寒之有。證類之所大寒者。蓋表其功。非論其氣也。幸高明者準之以理。斯藥無遺用矣。

天竺黃味甘。性寒無毒。入心經。主清心明目。除驚解煩。毆邪逐痰。及小兒驚癇。天

弔風熱諸證。

按竺黃之寒。專瀉少陰之火。火去而驚邪諸證靡不療矣。產三竺國。卽竹節內黃粉。然多有僞者。須辨其片片如竹節者真。

金櫻子。味酸澀。性溫無毒。入脾肺腎三經。主脾洩下痢。血崩帶下。瀦精氣。止遺泄。除咳嗽。止小便。助真氣。潤顏色。久服延年。先去刺。剖開去子。復拭去毛用。

按丹溪曰。金櫻子屬土而有金與水。脾肺腎之入。固其宜也。又曰。經絡隧道。以通暢爲和平。味者取其澀性。煎膏食之。自作不靖。咎將誰執。此恐過服者傷脾百發也。須九十月間半熟時採之。太生令人利。太熟功力薄。

訶梨勒。味苦酸澀。性溫無毒。入肺肝脾腎大腸五經。主冷氣心腹脹滿。久瀉痢。霍亂喘急。腸風瀉血。崩中帶下。奔豚腎氣。開胃消食。生津止渴。治嗽開音。酒浸蒸熟用。未熟時風飄墜者。謂之隨風子。肺因火傷。鬱退脹滿。痰嗽咽喉不利者。含三四枚殊勝。

按訶梨勒。酸以瀉肝收肺。苦以堅腎瀉脾。澀以厚大腸。五經之入所由來也。終是酸澀之劑。久瀉痢者宜之。若積初起而用之。與丹溪痢無止法意相左矣。衍



義曰。氣虛人亦宜緩緩煨熟少服。雖能澀腸。又能洩氣故也。丹溪云。訶梨勒文。只有六路。或多或少。此是昆梨勒。罌梨勒。榔精勒。雜路勒。並不宜用。

雷公云。凡使勿用毗梨勒。罌梨勒。榔精勒。雜路勒。若訶梨勒。文只是六路。或多或少。並是雜路勒。毗路勒。個個毗雜。路皆圓露。又或入路至十三路。號曰榔精勒。多澀。不入用。凡修事先於酒內浸。後蒸一伏時。以刀削路。細剉。路乾用之。郁李仁。味酸。性平無毒。入大腸經。主四肢浮腫。腸中結氣。關格不通。膀胱急痛。潤腸破血。利水下氣。消食寬中。忌麵及牛馬肉。

按郁李仁屬陰。性主降。故獨入大腸。然宣洩太過。能疏五臟真氣。虛人不宜多用。

蕪荑。味辛。性溫無毒。入肺脾二經。主五內邪氣。腸風痔漏。疥癬風熱。皮膚骨節間風溼。除冷氣。化宿食。消疳積。殺諸蟲。去衣。麵炒黃用。

按蕪荑辛宜於肺。溫宜於脾。故兩入之。風寒溼脾。大腸冷滑者。此爲要劑。夫氣食皆因寒而滯。諸蟲皆因溼而生。得蕪荑以溫之。燥之。而證猶不痊者。未之有也。



五加皮。味辛苦。性溫無毒。入肺腎二經。主心腹腰膝痛。疝氣。骨節拘攣多年。瘀血在皮膚。陰痿囊溼。小兒脚軟。女子陰癢。陰蝕。補勞傷。堅節骨。益志氣。添精髓。久服延年。遠志爲使。畏蛇皮。玄參。

按五加皮辛能瀉肺。苦能堅腎。宜並入之。心腹等件。何非兩經之證。而有不治者耶。昔張子聲、楊廷如、王叔牙、於世彥等。皆服五加皮酒。不絕房室。得壽三百歲。有子二十人。延年之說。此其徵矣。

雷公云。今五加皮其樹本是白。秋樹其上有葉如蒲葉者。其三葉花是雄。五葉花是雌。剝皮陰乾。陽人使陰。陰人使陽。

楮實。味甘。性平無毒。入腎經。主補虛勞。壯陰痿。助腰膝。退水腫。堅筋骨。益氣力。充肌膚。悅顏色。明耳目。久服長生。酒浸一宿。蒸用。樹汁塗癬及蠍螫。樹皮主逐水利小便。葉主小兒身熱。煎湯洗惡瘡。長肌肉。莖主癰疹作癢。單煮洗浴。

按楮實濁陰下降。宜入少陰。補益之功。諸書具載。獨修真秘旨曰。服楮實者。輒爲骨軟疾。必非無根之說。然甚難解釋。姑錄之以待明敏。

雷公云。凡使採得後。用水浸三日。將物攪旋。浮於水面者去之。然後曬乾。却用

酒浸一伏時了。使蒸從已至亥出。焙令乾用。

秦皮。味苦。性寒無毒。入肝腎二經。主散風寒溼痺。去肝中久熱。兩目赤腫。青白翳。暈流淚不止。及丈夫精衰。女子崩帶。小兒風熱驚癇。大戟爲使。惡吳茱萸。防葵。

按秦皮青碧之色。宜入厥陰。沉陰之品。宜入少陰。脾胃虛寒者。不宜多用。

樗白皮。味苦。性寒無毒。入心肝脾三經。主月經過度。帶漏崩中。夢洩遺精。腸風痔漏。久痢脫肛。縮小便。除瘡疥。祛鬼疰。殺傳屍。解蠱毒。逐蛔蟲。蜜炙用。有一種椿皮。功用相同。性斂微溫。

按樗白皮血中之藥也。心主血。肝藏血。脾裹血。宜均入之。孟詵云。多食令人神昏血氣微。

密蒙花。味甘。性微寒無毒。入肝經。主青盲膚醫。赤澼眇淚。赤脈貫睛。又主小兒疳痘及疳眼。酒浸一宿。蜜拌蒸。曬乾用。

按密蒙專入肝經。故治目之外無他長。眼科之要劑也。

雷公云。凡使先揀令淨。用酒浸一宿。漉出候乾。用將蜜令潤蒸。從卯至酉出。日乾。如此拌蒸三遍。又却日乾用。每修事一兩。用酒八兩。浸待色變。用蜜半兩蒸。

爲度。此元名木錦花。

辛夷。味辛。性溫無毒。入肺胃二經。主身體寒熱。頭風腦痛。面腫齒痛。眩冒如在車船。溫中氣。利九竅。解肌表。通鼻塞。除濁涕。生鬚髮。殺白蟲。去面點。去毛及心用。芎藭爲使。惡五靈脂。畏菖蒲。蒲黃。黃連。石膏。黃環。

按辛夷辛溫發散。太陰陽明之入。固其宜也。若肺胃虛熱不受風邪者。勿得漫用。

雷公云。凡使之去粗皮。拭上赤肉毛了。卽以芭蕉水浸一宿。漉出。用漿水煮。從已至未出。焙乾用。若治眼目中患。卽一時去皮。用向裏實者。

蕤仁。味甘。性溫無毒。入心肝脾三經。主心腹結氣結痰。鼻中衄血。眼胞上下風腫爛弦。左右背熱障努肉。清火止淚。益水生光。破核取仁。去皮尖研用。

按心肝與脾皆血之臟。而蕤仁入之。夫目之有疾。血之故也。今得其甘以養血。溫以和血。而腫脹諸患。從茲息矣。

雷公云。凡使先用熱水浸去皮尖。作兩片。用芒硝、木通、甘草、三味。和蕤仁同水煮一伏時。後漉出。去諸藥。取蕤仁研成膏。加減入藥中使。凡修事四兩。用芒硝

一兩。木通甘草七兩。

女貞實味甘苦。性平無毒。入心脾二經。主安五臟。養精神。補陰分。益中氣。黑鬚髮。強筋力。去風溼。除百病。久服可延年。冬採取布袋洗淨衣皮。酒浸一宿。曬乾用。

按女貞實苦走心。甘走脾。性用平和。經冬不凋。誠補陰之上劑也。仙家亦需服。食今罕有能用之者。亦未究其藥爾。

五倍子。味苦酸。性平無毒。入大腸經。主齒宣疳。風癬疥癢。腸風五痔。及小兒面鼻口耳疳瘡。明目生津。止瀉瀦精。噉口中。治口瘡。善收頑痰。解諸熱毒。百藥煎即五倍造成。主肺脹喘咳。噉化能斂而降之。

按五倍酸苦之性。專瀦大腸。其收斂甚捷。瀉痢初起者。未宜入劑。

牙皂。味辛鹹。性溫有小毒。入肝胃二經。主風痺死肌。頭風目淚。中風邪氣。勞蟲等物。通關竅。理癰疽。消脹滿。化穀食。除咳嗽。療骨蒸。去疥癬。搐鼻噴嚏。立至。敷腫疼。痛即除。和生礬可吐風痰。拌蜂蜜名爲導箭。水浸一宿。去皮弦酥炙。復去核及黃用。柏實爲使。惡麥門冬。畏空青。人參。苦參。皂角刺。主厲風鼻梁崩倒。眉髮自落。又主癰疽。其未潰者。能發散。其已潰者。能引排膿。藥直達膿處成功。諸惡瘡癰。咸不



可缺。

按肝爲風木之臟。胃爲水穀之腑。牙皂辛溫。有行散之功。宜並入之。多用能耗氣損血。其刺乃質幹之銳者。故於瘡癰無所不達。若療癘風。九蒸曝爲妙。巴豆味辛。性生溫。熟寒。有大毒。入脾胃大腸三經。主削堅積。蕩臟腑之沉寒。通閉塞。利水穀之道路。排膿消腫。破血通經。殺鬼毒蟲。疰及腹臟諸蟲。去皮心膜。油水煮五度用。芫花爲使。惡藁草。畏大黃、黃連、藜蘆、牽牛、蘆筍、瞿豉、冷水。殺斑蝥、蛇蝎毒。

按巴豆專主宣通。則脾胃大腸宜其入已。炒令紫黑。可以通腸。亦可止瀉。蓋通固通用之意也。仲景東垣及諸名家。每每用之。今世俗畏其辛熱之毒。蕩滌之患。輒云剗劑。廢皆不用。不知巴豆爲斬關奪門之將。其性猛烈。投之不當。爲害非輕。用之得宜。奏功甚捷。譬如張飛。亦一虎將也。顧人用之何如耳。可概棄哉。倘氣虛羸弱。脾氣久傷者。誠所大忌。

雷公云。凡使巴之與豆及剛子。須在仔細認。勿誤用殺人。巴顆小緊實。色黃。豆卽顆有三稜。色黑。若剛子。小似棗核。兩頭尖。巴與豆卽用。剛子勿使。凡修事巴



豆敲碎。以麻油并酒等煮。研膏後用。每修事一兩。以酒與麻油各七合。盡爲度。金鈴子。味苦。性寒。有小毒。入心小腸二經。主溫疾傷寒。理大熱顛狂。利小便。通水道。殺三蟲。愈瘡瘍。善除心痛。宜作浴湯。曬乾酒蒸。去皮核用。川蜀者佳。

按金鈴子苦寒。宜入心家。而小腸卽其腑也。故並入之。瘡瘍諸證。何非心火所致。得金鈴以瀉之。洵可愈矣。

紫葳。味甘酸。性微寒。無毒。入脾肝二經。主婦人產後血崩不定。血隔遊風。崩中帶下。癥瘕血閉。安胎通淋。又主熱風及身癢風疹。二便不通。酒釐熱毒。畏鹵鹹。一名凌霄花。

按紫葳甘歸脾臟。酸走肝家。二經乃藏血裏血者也。故專調血證。風癢之生。亦榮衛不和爾。宜並理之。丹溪曰。治崩中。此之要藥也。且補陰甚捷。蓋有守而獨行者。

雷丸。味苦鹹。性寒。有小毒。入肺脾胃三經。主胃中熱。癩發狂走。惡風汗出。解蟲毒。殺諸蟲。逐皮裏膜外之水。又作麻膏。除小兒百病。利丈夫。不利女子。久服陰痿。火炮用。荔實。厚朴。芫花爲使。惡葛根。扁蓄。赤者殺人。

按雷丸苦能燥脾。而胃則其腑也。肺則其子也。故均入之。蟲以溼熱爲巢穴。溼熱去而蟲可殺矣。本經旣云利丈夫。別錄又云久服陰痿。於事相反。陶隱居以此致疑。不知利者疎利之謂爾。非利益也。

雷公云。凡使用甘草。水浸一宿了。將刀刮去黑皮。破作四五片。又用甘草湯浸一宿後蒸。從巳至未。日乾。却以酒拌如前。日乾用之。

鉤藤味甘苦。性微寒無毒。入十二經。主小兒寒熱。諸種驚癇。胎風客忤。熱壅夜啼。舒筋活血。色黃而嫩。鉤多者佳。

按鉤藤兼生氣血。故於經絡靡所不入。惟療小兒。不入餘方。

血竭味甘微鹹。性平有小毒。入諸陰經。主五臟邪氣。心腹卒痛。除帶下。破積血。療疥癬惡瘡及金瘡。生肌止痛。得密陀僧良。有假者是海母血。頗相似。然味大鹹。有腥氣爲辨爾。敲斷有光彩。磨指甲紅透者佳。另研用。若與別藥同搗。化作飛塵。

按血竭專主血分。故入諸陰之經。日華子云。諸瘡久不合者。以敷此藥。然不可多使。却能引膿。

茶茗味甘苦。性微寒無毒。入心肝脾肺腎五經。主下氣醒睡。除痰消食。利便生津。

破熱氣。清頭目。善祛油膩。解煎炙毒。

按茶茗清利之品。故五臟咸入。然過食傷脾。令人面黃消瘦。其醒睡者。亦以伐

脾故耳。

阿魏。味辛。性微熱無毒。入胃經。主破癥積。下惡氣。治霍亂。止腹疼。辟瘟禁瘧。辟鬼祛邪。能消蠱毒。可滅傳屍。

按阿魏。辛熱之性。與胃腑相宜。故獨入之。產波斯國阿盧木內之脂也。唐本註云。體性極臭。而能止臭。亦奇物也。今市家多煎蒜白假充。不可不辨。真者置熱銅器中。一日夜。其沾阿魏處。白如銀。

雷公云。凡使多有訛偽。共有三驗。第一驗。將半銖安於熱銅器中。一宿至明。沾阿魏處。白如銀汞。無赤色。第二驗。將一銖置於五方草自然汁中。浸一夜至明。如鮮血色。第三驗。將一銖安在樹上。樹立乾。便是真。凡使先於淨鉢中研如粉了。於熱酒器上蒸過。存入藥中用之。

乾漆。味辛。性溫有毒。入胃大小腸三經。主年深堅結之沉積。日久秘結之瘀血。殺三蟲。絕傳屍。損咳嗽。止崩漏。除九種心疼。療風寒溼痺。炒令煙盡用。半夏爲使。畏

雞子、油脂、鐵漿、黃櫨汁、蟹。

按乾漆專主行化。胃與二腸宜其入已。然攻堅消積之劑。終損元神。不宜過用。中其毒者。以所畏之物解之。

楓香、味辛苦。性平無毒。入脾肝二經。主辟惡氣。治瘍毒。止齒痛。消風氣。除下痢。止霍亂。退癰疹最捷。一名白膠。一名芸香。

按楓香辛宜走肺。苦宜燥脾。治節得宜。倉廩得令。則惡氣等證。何患其不瘳。蜀椒、味辛。性熱有毒。入肺脾二經。主冷氣欬逆。心腹邪氣。風寒溼痺。癰疽積聚。霍亂轉筋。留飲宿食。開腠理。通血脈。堅齒髮。調關節。堪辟瘟疫。可洗漆瘡。微炒能出汗。去黃殼用。

按蜀椒辛宜肺。熱宜脾家。故並入之。證屬寒凝。誠爲要劑。然過於行散。多服令人乏氣。且發熱疾。閉口者能殺人。不可不慎。

雷公云。一名南椒。凡使須去目及閉口者不用。其椒子先須酒拌。令溼蒸。從巳至午放冷。又製法微炒出汗。投器中舂之。取紅皮。去黃殼。密收器中任用也。

# 雷公炮製藥性解

明 雲間 李中梓士材編輯  
清 吳門 王子接晉三重訂

鄞縣 曹赤電炳章校點

## 卷六

### 菜部

生薑。味辛。性溫無毒。入肺心脾胃四經。主通神明。去穢惡。散風寒。止嘔吐。除泄瀉。散鬱結。暢脾胃。療痰嗽。製半夏和藥。要熱去皮。要冷留皮。惡黃芩。

按生薑辛入肺。肺得所勝。則氣通宣暢。主宰精靈。故能通神明。神明通則一身之氣皆爲我使。而亦勝矣。一身之氣勝。則中焦之元氣定。而脾胃出納之令行。邪氣不能容矣。故能去穢惡。經云。秋不食薑者。蓋以燥金主令。天道斂收。薑則味辛。善散肺氣。人肖天地以生。未有干天地之和而猶受其益者。諺所謂夜不



食薑亦以夜氣斂而薑性散耳。如療病則不可泥也。宜常用而不宜多用。

乾薑味辛。性大熱有毒。入肺大腸脾胃腎五經。生者味辛。能行血。逐寒邪而發表。熟者味苦。能止血。除胃冷而守中。沉寒痼冷。腎中無陽。脈氣欲絕者。用黑附爲引。按乾薑之辛。本職肺家。其以性熱。故又入脾胃大腸。至於少陰之入。黑附爲之引耳。夫血遇熱則走。生者行之。固其宜也。而吐衄下血崩漏淋產證。熟者反能止之。何也。蓋物極則反。血去多而陰不復。則陽無所附。得此以助陽之生。而陰復矣。曰。見火則味苦。色黑。守而不走。血安得不止耶。然必病久氣虛。亡陽而多盜汗。及手足冷者。宜用。若初病火熾。遽爾投之。是抱薪救火。危亡立至矣。可不謹乎。丹溪曰。乾薑散肺氣。同五味能止嗽。治血虛發熱。該與補陰藥同用。入肺中利肺氣。入腎中燥下溼。入氣分引血藥入血也。東垣云。多用能耗元氣。壯火食氣故也。乾薑辛熱。皆言補脾。海藏獨言泄脾。何也。泄之一字。非泄脾之正氣。是泄脾中寒溼之邪。蓋以辛熱之劑燥之。故曰泄脾也。生者能墮胎。萊菔味辛甘。性溫無毒。入肺脾二經。主下氣消食。除痰止嗽。解渴化癖。搗汁磨墨。堪止吐血。熟者補脾。其子下氣猶捷。有推墻倒壁之功。水研可吐風痰。醋研可敷。

惡毒。俗名蘿蔔。解麵毒。

按萊菔辛宜肺部。甘走脾家。故兩入之。生者下氣。多食耗血。以辛多於甘也。熟者補脾。多食滯氣。以甘多於辛也。其子力倍。虛者戒之。

白芥子。味辛。性溫無毒。入肺胃二經。主下氣。止翻胃。消瘰癧。辟鬼邪。敗疰氣。除皮裏膜外痰涎。醋研可敷射工毒。其莖葉堪卻冷氣。能安五臟。

按白芥子辛宜於肺。溫宜於胃。故俱入之。氣虛及肺胃中有火者。咸禁食之。韭。味辛。性溫無毒。入肺脾腎三經。主下氣和中。補腎益陽。利腰膝。和臟腑。除胸腹疝癖。痼冷。止白濁遺精。其根搗汁。下膈中瘀血。殊效。其子較根葉猶勝。忌糖蜜及牛肉。

按丹溪云。韭屬金而有土與水。宜入肺脾腎以主三經之證。然不宜多食。令人神昏目暗。

蒜。味辛。性大溫。有小毒。入脾胃二經。主溫中消食。止霍亂轉筋。除吐瀉及中脘冷痛。瘟疫瘡瘍。蠱毒疔腫。邪痺毒氣。

按蒜味辛溫。故入脾胃以理諸證。丹溪云。性熱快膈。人皆喜食。多用則傷脾損

肺。壞肝昏目。生痰發嗽。而無顏色。化肉之功。不足多也。有志願生者。宜知自警。胡荽。味辛。性溫微毒。入肺脾二經。主通小腹氣。除四肢熱。止頭痛。消穀食。散痧疹。齊痘瘡。其子煎油。可敷禿瘡。忌斜蒿同食。令人汗死。

按胡荽。味辛。肺所樂也。性溫。脾所快也。故皆入之。肺主皮毛。脾主肌肉。所以理痧痘等證。多食損精神。發痼疾。令人健忘。脚氣狐臭者。食之愈甚。

葱白。味辛。性溫無毒。入肺胃肝三經。善發汗。通骨節。逐肝邪。明眼目。去喉痺。愈金瘡。安胎氣。止鼻衄。治霍亂轉筋。理傷寒頭痛。殺魚肉毒。通大小腸。散面目浮腫。止心腹急疼。脚氣奔豚氣。連鬚搗。可除蛇傷。蚯蚓傷。畏蜜。菰菜。常山同食殺人。

按皮毛腠理。肺所司也。風淫水旺。肝所患也。邪傳入裏。胃所疾也。葱白功專發散。又主通中。三經之入。有由來矣。多食則伐氣昏神。虛者戒之。

冬葵子。味甘。性寒無毒。入小腸膀胱二經。主滑胎產。利小便。療熱淋。逆生者得之。即順。胎死者得之。即下。能通乳汁。堪潰癰疽。

按冬葵子。性最滑利。能宣積壅。宜入手足太陽。以爲催生之劑。然不可預服。恐胞未轉而先催。空涸其水。反艱其產耳。癰疽者。榮氣不從。逆於肉理。乳閉者。亦

凝滯之所致也。得冬葵以導之。而不瘳者鮮矣。

白冬瓜味甘。性微寒無毒。入脾胃大小腸四經。主胸前煩悶作渴。臍下水脹。成淋。通大小便。大解熱毒。可貼癰疽。又解丹石毒及魚毒。

按冬瓜味甘。宜入脾胃。性走而急。宜入大小腸。煩渴癰疽。皆熱也。其性寒。故能解之。丹溪曰。久病與陰虛者忌服。未被霜而食之。令人成反胃病。

## 人部

乳汁味甘。性平無毒。入心肝脾三經。主健四肢。榮五臟。實腠理。悅皮膚。安神魂。利關格。明眼目。久服延年。

按乳汁本血也。心主血。肝藏血。脾裹血。宜並入之。夫婦人之血。降為月水。升為乳汁。房術云。女子一身屬陰。惟月水屬陽。故名水中金。惜神農本經不載。而諸家本草。遂以為血屬於陰。其性大冷。不知月水乳汁。本同一物。月水之熱。人咸知也。今升而為乳。質較輕清。中和補益。實為過之。何反以為大冷耶。若果大冷。則必能傷脾。小兒食之。當泄利不止矣。有是理哉。特不宜與食混進。誠能令人



瀉耳。

金汁味甘苦。性大寒無毒。入心經。主天行狂熱。陰虛燥熱。解一切毒。療一切瘡。埋土年久者佳。

按素問曰。濁陰出下竅。宜其足以制陽亢。而心則火之主也。故獨入之。造法於冬月取竹籬置缸上。櫻皮鋪滿。加草紙數層。尿澆於上。汁淋在缸。新甕盛貯。磁鉢蓋之。鹽泥封固。埋地年深。自如清泉。聞無穢氣。又法臘月取淡竹刮去青皮。浸廁中取汁亦佳。

屎蛆味甘鹹。性平無毒。入脾經。主小兒疳積脹滿。須水中漂淨。貯於桶中。剖蝦蟆飼肥。烈日曝蒸。蓋密即死。文火烘燥用。

按蛆本濁陰下降流動不拘之物。有行下之理。故專入脾經。以療兒疳最效。人溺味鹹。性寒無毒。入心肺二經。主勞熱吐衄。痰喘咳嗽。撲傷瘀血。產後敗血。生津解渴。能通二便。童男者猶勝。積垢在器。即名人中白。瓦上文火煨之。存性。酒醋兼制。與溺同功。療口瘡痰結。須露天經年者佳。

按人溺降火最速。丹溪曰。氣有餘便是火。肺主氣。心屬火。宜均入之。降火而不



傷於寒涼。且補益之功甚大。而本草不言。惜哉。褚澄云。以童便治血證。百不一死。庶得其用矣。

秋石。味鹹。性微寒無毒。入肺腎二經。主滋腎水。返本還元。養丹田。歸根復命。安和五臟。潤澤三焦。消欬逆稠痰。退骨蒸勞熱。能除鼓脹。亦軟堅積。明目清心。延年益壽。

按秋石之鹹。本專入腎。而肺即其母也。故并入之。須用陰陽煉者。兼而服之。得坎離既濟之義。東坡有煉法可用。

月水。性味經絡。諸書不載。主男子虛羸。中傷幾死。解藥箭毒。首經者猶屬純陽。能回生再造。

按月水之補。實令人有起死之功。今時罕有能用之者。惜哉。

髮。味苦。性微溫無毒。入心經。主咳嗽五淋。二便不通。燒灰吹鼻。立止衄血。亦主小兒驚癇。胎髮及童男女剃下者尤佳。多產婦人髮。燒灰酒服。極善催生。

按髮爲血之餘。而心則主血者也。故獨入之。丹溪稱其補陰甚捷。良有故耳。

雷公云。凡使須用男子二十已來。無疾患。顏貌紅白。於頂心剪下者佳。凡於丸

散膏中。先用苦參水浸一宿。漉出入瓶。以火燒之。令通赤。放冷。研用之。

紫河車味甘。性大溫。無毒。入心脾腎三經。主諸虛百損。五勞七傷。骨蒸潮熱。體弱氣短。吐衄。男子精衰。婦人無孕。的是仙丹。取肥壯者洗淨。抽去紫筋切碎。入童便二碗。入鉛鉗重湯煮爛。一晝夜方開。杵成膏用。世俗有埋地日久化作清泉者。此名河車水。主天行時疫熱狂。小兒丹疹熱毒。

按紫河車味甘。宜其歸脾。父之精也。宜歸腎臟。母之血也。宜入心家。夫其精血所結。未有男女。先立胚胎。渾然太虛。實乾坤之橐籥。鉛汞之根基。九九數足。兒則載而乘之。故名河車。又曰紫者。以紅黑色相雜也。合坎離之色。得妙合之精。雖成後天之形。實稟先天之氣。補益之功。更無足與儔者。第其性溫。若有火證者。必得便制。斯無他患耳。

天靈蓋味鹹。性平。無毒。所入經絡。諸書不載。主傳屍鬼疰。并療大傷。取得後。用糖灰火罨一夜。待腥穢氣出盡後。用童便於磁鍋內煮一伏時。埋於地下可深一尺。亦一伏時。取出聽用。陽人使陰。陰人使陽。

按天靈蓋即頂蓋骨也。神農本經不載。後世醫家始用之。此本同類之物。見則

當憐而悲之。乃取而食之。殊非仁人之用心。世稱孫思邈有大功於世。以殺命治命。尚有陰責。況於是乎。若必不得已而用之。當取年深漬汚者。良以其絕屍氣也。

死人枕。味鹹。性平無毒。所入經絡。諸書不載。主傳屍鬼疰邪氣石蛔。取之煎湯用。用畢送還原處。

按死人枕卽腦後骨也。夫鬼邪乘人。非藥石可攻。用死人枕者。所謂引之以類也。石蛔者。久蛭也。醫療旣癖。蛭蟲轉堅。藥劑不能療。所以需鬼物驅之。用畢卽送還原處者。一則使邪疰之氣有所依歸。一則勿以療人而傷鬼也。古有神醫徐嗣伯劉大用者。用之輒驗。

## 禽獸部

黑嘴白鴨。味甘。性微寒無毒。入肺腎二經。主大補虛勞。最消毒熱。利小便。除水腫。消脹滿。利臟腑。退瘡腫。定驚癇。綠頭者亦堪用。白目者能殺人。忌龜鼈肉。按肺之色屬白。腎之色屬黑。黑嘴白鴨宜其入此二經。肺腎受補。誠爲勞證仙。

方得童便煮服。功效不可盡述。

烏骨毛鷄味甘。性微溫。有小毒。入五臟諸經。主虛羸折傷癰疽。及心腹惡氣。亦能安胎。過食生火動風。

按丹溪曰。鷄屬土而有金與木火。則所稟者惟少水爾。今得其毛骨之黑。是五行具備。故於五臟靡弗入也。於卦爲巽。巽爲木。故能生火。又爲風。故能動風。曰華子以爲除風溼麻痺。於理未合。

雄雀味甘鹹。性熱無毒。入命門經。主益氣壯陽。其腦主耳聾及凍瘡。頭血主點雀盲。糞名白丁香。主癰癰癰。點目內努肉血膜。除癰瘰伏梁。爛疔癖積塊。

按雀之鹹熱。宜入命門而補火。然相火久炙。其水必衰。勿宜過服。致傷腎臟。妊娠猶忌食之。腦血及白丁香之功。咸性熱所致爾。

雀卵味酸溫無毒。主下氣。男子陰痿不起。強之令熱。多精有子。腦主耳聾。頭血主雀盲。雄雀屎齒痛用藥。療目痛。治癰癰。女子帶下。溺不利。除疝瘕。五月取之良。注云。兩頭尖者是雄雀屎。

雷公云。雀蘇。凡使勿用雀兒糞。其雀兒口黃未經淫者。糞連蘇。若底坐尖在上。

卽曰雌。兩頭圓者是。陰人使雄。陽人使雌。凡採之先去兩畔有附子生者通用。然後於鉢中研如粉。煎甘草湯浸一宿。去上清。甘草水盡。焙乾任用。伏翼味鹹。性微熱有毒。不載經絡。主逐五淋。利水道。去翳明目。令人喜樂。媚好忘憂。久服延年。尿名夜明砂。破腹中血氣。及寒熱積聚。除驚悸。血堪點眼。形重一觔。色白如雪者佳。

按伏翼原名蝙蝠。以其晝伏夜飛。因稱伏翼。能伏氣。冬月不食。故多壽。人服之。宜其有延年之功矣。

雷公云。凡使要重一斤者。方採之。每修事先拭去肉上皮毛爪腸。留翅并肉脚及嘴。然後酒浸一宿。漚出。取黃精自然汁塗之。炙令乾。方用。每修事重一斤一個。用黃精自然汁五兩爲度。

龍骨味甘。性平無毒。入腎經。主丈夫精滑遺洩。婦人崩中帶下。止腸風下血。療瀉痢不止。得五色具者佳。其齒主驚癇狂疾。俱畏乾漆。蜀椒。理石。石膏。

按經曰。腎主骨。宜龍骨獨入之。觀其沾舌。大抵齋之用居多。故主精滑等症。經曰。瀉可去脫。是之謂耶。



虎骨。味辛。性微熱無毒。入腎經。主邪氣鬼疰。筋骨毒風攣急。酥炙用。畏乾漆、蜀椒、磁石。

按虎骨入腎。亦以腎主骨故也。其治骨間毒風者何也。易曰。風從虎。夫風。木也。虎。金也。木受金制。焉得不從。

雷公云。虎睛。凡使須問獵人。其眼有雌有雄。有老有嫩。有殺得者。惟有中毒箭死者勿使。能傷人。凡用虎睛。先於草羊血中浸一宿。漉出。微微火上焙乾。搗成粉。候衆藥出。取合用之也。

犀角。味苦酸鹹。性寒無毒。入心肝二經。主百毒蠱疰。鬼魅邪氣。傷寒瘟疫。煩躁顛狂。痘疹血熱。癰疽腫毒。清心鎮肝。明目定驚。孕婦忌服。須紋細色烏。光明滑潤者佳。取其茸尖。功力具備。松脂爲使。惡雷丸。忌鹽。

按犀角苦寒。本入心家瀉火。又入肝臟者。蓋以火不妄炎。則金能制木也。丹溪曰。屬陽性走。比諸角猶甚。痘瘡後用以散餘毒。俗以爲常。若非有餘毒而血虛者。與以燥發熱者用之。禍無極矣。

雷公云。凡使勿用奴犀角。病水犀。攣子犀。無潤犀。惟取烏黑肌皺折裂光潤者。

上。凡修治時銼其屑入臼中。杵令細。再入臼中研萬匝。方入藥用。婦人有妊勿服。能消胎氣。忌鹽。

羚羊角。味苦鹹。性寒無毒。入肝經。主傷寒熱在肌膚。溫氣注伏在骨間。邪氣不祥。驚夢狂越。心神不寧。小兒卒熱驚搐。產後敗血冲心。清心解毒。明目益氣。燒灰又主食噎不通。其角多倒掛痕深入者爲真。

按丹溪曰。羚羊屬木。宜入厥陰。木得其平。而風火諸症無能乘矣。

雷公云。凡用有神羊角。其神羊角長有二十四節。內有天生木胎。此角有神力。可抵千牛之力也。凡修事之時。勿令單用。不復有驗。須要不折元對。以繩縛之力。將鐵銼子銼之。旋取用。勿令風犯。銼未盡處。須三重紙裹。恐力散也。銼得了。卽背風頭重篩過。然後入藥中用之。若更研萬匝。用之更妙。免刮人腸也。

牛黃。味苦。性平無毒。入心經。主大人癲狂發瘧。中風痰壅不語。小兒驚癇。天弔。客忤口禁。除邪逐鬼。定魄安魂。能墮胎孕。須體輕微香。磨用色透。置舌上先苦後甘。清涼透心者爲真。人參爲使。惡龍骨。地黃。龍膽。蜚蠊。常山。畏牛膝。乾漆。按牛黃味苦。宜歸心部。癲狂等症。何不屬心。而有不療者耶。

雷公云。凡使有四件。第一是生神黃。賺得者。次有角黃。是取之者。又有心黃。是病死者。後識者剝之。擘破取心。其黃在心中。如濃黃醬汁。採得便收於水中。黃沾水後。便如碎蒺藜子許。如豆大。便如帝珠子。次有肝黃。其牛身上。光眼如血色。時復鳴吼。照水自有皮光。恐懼人。或有人別采之。可有神妙之事。凡修事先搗細研如塵。用絹裹。又用黃嫩牛皮裹。安於井面上。去水三四尺。已來一宿。天明方取用之。

麝香。味辛。性溫。無毒。入十二經。主惡氣。鬼邪。蛇虺蟲毒。驚悸癰疽。中惡。心腹暴痛。脹滿。目中醫膜。淚眇風毒。溫瘧癰瘡。通關竅。殺蟲。蠱。催生墮胎。忌大蒜。

按麝香爲諸香之最。其氣透入骨髓。故於經絡無所不入。然辛香之劑。必能耗損真元。用之不當。反引邪入髓。莫可救藥。誠宜謹之。

雷公云。凡使多有僞者。不如不用。其香有三等。一名遺香。乃是子臍閉滿。自於石上用蹄尖剔出。落處一里草水不生。並焦黃。人若取得此香。價與珍珠同也。二名臍香。採得甚堪用。三名結香。被大獸捕逐。驚畏墜死。被人收得。擘破。見心血在脾上。結作一個乾血塊。不堪入藥。凡使麝香。勿近火日。磁鉢中細研任用。

鹿茸味甘鹹。性溫無毒。入腎經。主益氣滋陰。強志補腎。理虛羸。固齒牙。止腰膝酸疼。破流血作痛。療虛勞如瘧。女子崩漏胎動。丈夫溺血洩精。小兒驚癇。散石淋癰腫。骨中熱中癢。狀如瑪瑙紅玉。長三四寸。破之中有朽木者佳。連頂骨用。長城鹿角主逐鬼邪。益神氣。續絕傷。強筋骨。消癰腫。愈惡瘡。及婦人夢與鬼交。麋茸及角功相倣而性更熱。專主補陽。麋鹿角茸四種俱杜仲爲使。畏大黃。

按鹿茸鹹溫之品。舍腎奚歸。功效雖宏。須脈沈細。相火衰弱者。始爲相宜。若有火熱者用之。何異抱薪救火。其角亦然。麋者更甚。夫麋冬至解角。則屬陽。鹿夏至解角。則屬陰。其性熱。所以其功捷。大凡含血之物。肉易長。角難長。惟二茸不兩月長大至一十二觔。其堅如石。生長神奇。莫過於此。且諸獸之角。終身不易。惟此種一年一易。蓋其性熱。生生不已。舊者未去。新者隨之。氣化穠密。孰能與京。諸賢盛述其功。良有以也。

雷公云。凡使先以天靈蓋作末。然後鋸解鹿茸作片子。以好羊脂拌天靈蓋末。塗之於鹿茸上。慢火炙之。令內外黃脆了。用鹿皮裹之。安室中一宿。其藥魂歸也。至明則以慢火焙之。令脆。方搗作末用之。每五兩鹿茸。用羊脂三兩。炙盡爲



度。又製法用黃柏自然汁浸兩日夜。漉出焙令乾。搗漉免渴人也。鹿角使之勝如麋角。其角要黃色緊重大好者。緣此鹿食靈草。所以異於衆鹿也。其麋角項根上有黃色毛。若金線。兼傍生小尖也。色蒼白者上。注乾寧記云。其鹿遊龍相戲。乃生此異耳。採得角了。須金戴者。並長三寸。鋸解之。以物盛。於急水中浸之一百日滿。出用刀刮去粗皮一重。以物盛。水治令淨。然後用醃醋煮七日。旋旋添醋。勿令少歇。成時不用煮火。只從子時至戌七日足。其角白色軟如粉。即細搗作粉。却以無灰酒煮。其膠陰乾了。重重研篩過用。凡修事十兩。以無灰酒一盞煎乾爲度也。孫真人云。鹿肉解藥毒。不可久服。蓋服解毒草也。孟詵云。主益氣。不可以鼻嗅。其茸中有小白蟲。視之不見。入人鼻必爲蟲類。藥不及也。阿膠味甘鹹。性微溫無毒。入肺肝腎三經。主風淫木旺。肢節痿疼。火盛金衰。喘嗽痰血。補勞傷療崩帶。滋腎安胎。益氣止痢。明澈如水。質脆易斷者真。山藥爲使。畏大黃。蛤粉炒成珠用。

按阿膠用黑驢皮造成。黑屬水。專入腎。能尅火。蓋以制熱則生風之義。故宜入肝。且火得制則金亦無侵。故又宜入肺。夫東阿井係濟水所生。性急下趨。清而



且重用之煎煮。攪濁澄清。所以能清上炎之火。及上逆之痰也。熊膽味苦。性寒無毒。入膽經。主時氣熱盛。變爲黃疸。小兒風痰壅塞。驚癇疳蠱。殺蟲散毒。可敷惡瘡及痔。入水分塵。如練不散者真。惡防已地黃。

按熊膽入膽。從其類也。清火定驚之功。較勝諸膽。

雷公云。凡收得後。煉就器中安。每一斤熊膽。入生椒十四個。煉去滓。并椒入瓶中收。任之。

膻臍味鹹。性大熱無毒。入脾命門二經。主助腎添精。補中益氣。鬼氣尸疰。夢與鬼交。宿血癥結。心腹疼痛。置睡犬傍。驚狂跳走。入水不冰者真。酒浸一宿。紙裹於文火上炙脆。細剉搗用。

按膻臍鹹熱之品。本入命門補火。脾家所快者。膻熱也。故亦入之。助陽之功。獨甲羣劑。今出登萊州。卽海狗腎也。其狀頭似豕。尾似魚。止生兩足。價殊貴。類多僞者。須細辨之。

雷公云。凡使先須細認其僞者。海中有獸號曰水烏龍。海人采得取腎。以充膻臍。入諸藥中。修合恐有誤。其物自殊有一對。其有兩重薄皮裹九核。其皮上

自有肉黃毛。六三莖。年年溼潤如新。置於犬頭上。其驚跳如狂。卽是真也。須用酒浸一日。後以紙裹微微火上炙令香。細剉單搗也。

狗肉。味鹹酸。性熱無毒。入命門經。主壯元陽。補絕傷。安五臟。益氣力。其陰莖最助房事。及治婦人帶漏十二疾。血主補陰辟邪。療癩狗忌蒜。

按狗亦鹹熱之品。命門之所由歸也。助火最速。有熱症者所以深戒。炙而食之。令人發渴不止。九月食之傷神。孕婦食之。生子缺脣且無聲。丹溪曰。人之虛。皆陰虛也。陰虛則陽必亢。用狗爲補。寧不熾其火。以甚其病也。世人信其補虛。以爲指陽虛也。不知凡虛屬陰。若果陽虛。死亡立至。倉扁復生。無能措手。豈此之能補乎。雖然。丹溪生平主意。只是滋陰。故有此論。而溫補之功。諸家具道。當非虛語。惟命門脈弱。素無火症者。殊爲相宜。不然。則未獲其功。先嘗其禍矣。羊肉味甘。性大熱無毒。入脾肺二經。主虛勞寒冷。腦風大風。補脾益氣。安心定驚。按羊肉之甘。宜其歸脾。於卦爲兌。實屬西方之金。故亦入肺臟。十劑云。補可以去弱。人參羊肉之類是也。夫人參補氣在中。羊肉補形在表。凡補虛者。當分用之。不得概視也。六月食之傷神。孕婦及水腫骨蒸瘧疾。一切火症。咸宜忌之。

黃牛肉味甘。性平無毒。入脾經。主安中益氣。健脾養胃。強骨壯筋。其乳補虛弱。養心肺。潤皮膚。解熱毒。止消渴。滑大腸。腦治頭風。膽主風痰。角腮主赤白帶及行血。按牛肉色黃味甘屬土。於卦爲坤。故專入脾家。用之倒倉。誠有再造之功。然此爲稼穡之資。不輕屠殺。其自死及有病老邁者。不惟無補。反能損人。市中多犯此弊。食者慎之。

猪肉味甘。性溫無毒。入脾經。主補脾益氣。然多食能動風痰。四蹄主撻傷下乳及諸瘡。臟腸主內痔。腎主腰疼。肚能扶胃。肺能止嗽。心能定驚。舌能健脾。油可敷瘡。腦治頭眩。腦鳴膏能潤肺利血脈。解風熱。

按猪肉之甘。自宜入脾。遍身之用。各以類從。丹溪謂其熱能生痰。痰多則氣不升降。故外感者食之而愈劇。患瘧者食之而復成。善頤生者。節食爲貴。

## 蟲魚部

蜂蜜味甘。性平無毒。入脾肺二經。主益氣補中。潤燥解毒。祛邪定經。養脾氣。除心煩。通便閉。解虛熱。療心疼。悅顏色。和百藥。除衆病。畏生慈。惡荒花。每斤煉至十二

兩半用。蠟主痢下諸瘡。

按蜂蜜甘宜歸脾。潤宜歸肺。其用最多。良有百花之精。且取人溺以釀之故也。七月勿食生蜜。令人暴下霍亂。

雷公云。凡煉蜜一斤。只得十二兩半。或一分是數。若火少火過。並不可用之也。牡蠣味鹹。性微寒無毒。入腎經。主遺洩帶下。喉痺咳嗽。榮衛虛熱。去來不定。心脅下老痰痞積。宿血溫瘧。瘡腫結核。貝母爲使。喜甘草。牛膝。遠志。蛇牀。惡麻黃。吳茱萸。辛夷。火煨微紅。杵絕細用。

按牡蠣本是鹹水結成。故專歸腎部。軟堅收斂之劑也。

雷公云。有石牡蠣。頭邊皆大小甲沙石。真似牡蠣。只是圓如龜殼。海牡蠣可用。只是丈夫服之。令人無髭。真牡蠣火煨過。用鑿試之。隨手走起者是也。鑿是萬年琥珀。凡修事先用二十個。以東流水入鹽一兩。煮一伏時。後入火中燒通赤。入鉢中研如粉用。

珍珠味無考。性寒無毒。入心經。主手足皮膚逆臚。鎮心潤顏。止渴墜痰。點目去膜。塞耳除聾。催生下死胎。又主小兒驚熱風癩。須未經鑽眼者。研細篩過。再研二萬



下方用。

按珍珠爲水精所孕。專能制火。且其性鎮重。心經之所由入也。研之不細。傷人臟腑。功未獲奏。害已隨之。

雷公云。須取淨新者。以絹袋盛之。然後用地榆五加皮五方草三味各四兩。細剉了。又以牡蠣約重四五斤以來。先置於平底鐺中。以物四向安令穩。然後置珍珠於上。方下剉子。三件藥籠之。以漿水煮三日夜。火歇日滿出之。用甘草湯洗之。令淨。後於臼中搗令細。以絹羅重重篩過。却更研二萬下用。凡使要不傷破鑽透者。方可用。

石決明。味鹹。性平無毒。入肝經。主風熱。青盲內障。骨蒸勞熱。久服益精。九孔七孔者良。以麴裹煨。磨去其外黑處并粗皮。搗細。於乳鉢中再研細極。永忌山桃。

按石決明本水族也。宜足以生木而制陽光。故獨入肝家。爲眼科要藥。命曰決明者。丹溪所謂以能而名也。

雷公云。凡使先去上粗皮。用鹽并東流水於大磁器中。煮一伏時。漉出拭乾。搗爲末。研如粉。却入鍋中。以東流水淘三度。日乾。再研一萬匝。入藥服至十兩。永



不得食山桃。令人喪目。凡修事五兩。以鹽半分取。則第二度淘用地榆五加皮阿膠各十兩。

龜甲味鹹甘。性平無毒。入心脾肝三經。主陰虛不足。骨蒸勞熱。癥瘕瘧疾。五痔陰蝕。四肢重弱。血麻痺風疾。產前後痢疾。驚恚氣心腹痛。傷寒勞復。肌體寒熱欲死。小兒顛門不合。及頭瘡。女子赤白漏下。及陰癢。逐瘀血。續筋骨。催生益智。自敗者更佳。酥炙用。龜尿主耳聾久嗽。斷瘧。俱畏狗膽。惡沙參蜚蠊。

按龜甲稟壬癸之氣而生。其補陰也甚捷。心主血。肝藏血。脾裹血。故並入之。骨蒸云云等症。靡非陰虛所致。用此主之。不亦宜哉。欲取其尿者。取龜置磁器中。以鏡照之。既見鏡中影。則淫發而失尿。另有一種夾蛇龜。中心折者。不堪服食。生搗其肉。晉傳蛇毒最良。敗龜版及自死之龜。形肉滲爛。甲內性氣俱全。故其功力較倍。今本經以卜師鑽灼者爲是。恐非。灼過者不過燒炙焦黑而已。與生者何異。又何取義。特加敗字。諄諄以示人耶。

鼈甲味鹹。性平無毒。入肺脾二經。主骨蒸勞嗽。積聚癥瘕。瘰癧肉陰蝕痔疽。瘡腫瘀血。催生墮胎。婦人五色漏下。九肋者佳。童便浸一宿。濾起酥炙用。其肉益肺補金。

大涼血熱。奇形異狀者有大毒。誤食者。以黃耆吳藍煎湯解之。俱惡理石礬。

按丹溪云。鼈甲屬金與土。肺脾之所以入也。須生取之。煮脫者不堪用。肉性大冷。過食傷脾。癰疽勿食。恐益其疾。孕婦勿食。恐短子項。同鷄食成瘕。同雞子食能殺人。同莧菜食生血鼈。同芥子食發惡疾。不可不慎。

雷公云。凡使用要綠色九肋多裙。重七兩者為佳。治痞破塊消癥。定心藥中用之。每個鼈甲以六一泥固。餅子底待乾。安甲於中。以物撐起。用頭醋下火煎之。盡三升醋為度。乃去裙并肋骨。方炙乾。後入藥中用。又治勞去熱。藥中用法。似前。不用醋。須用童子小便。煮晝夜。小便一斗二升為度。後去裙留骨。於石臼中搗成粉子。以雞脰皮裹之。取東流水三兩。斗盆盛。攪於盆上一宿。至明任用。力有萬倍也。

蕘州烏蛇。味甘性平。有小毒。入脾肺二經。主諸風皮膚不仁。散癰疹。身體瘙癢。熱毒風淫。眉髭脫落。塞耳治聾。須辨真者佳。去頭及皮鱗。帶子剉碎。酒浸一宿。酥炙埋地一宿炙乾用。

按烏蛇之用。專主去風以理皮肉之症。肺主皮毛。脾主肌肉。故兩入之。色黑如

漆。背有三稜。渾如劍脊。尾細尖長。性善不傷生命。都在蘆叢中嗅其花氣。亦乘南風而吸。雖至枯死。兩目不陷。儼如生者。頭有逆毛二寸一路。可長半分已來。頭尾相對。稱之重七錢至一兩者爲上。粗大者轉重。力彌減也。

雷公云。凡一切蛇。須認取雌雄及州土。蘄州爲蛇頭上有逆毛二寸一路。可長半分已來。頭尾相對。使之入藥如神。只重一兩以下。彼處得此多留進供。蛇腹下有白腸帶子一條。可長一寸已來。卽是雄也。採得去其頭兼皮鱗帶子。剉之以苦酒浸之一宿。至明漚出。向柳木灰中焙之令乾了。却以酥炙之。酥盡爲度。炙乾後於地上掘一坑。可深一尺已來。安蛇於中。一宿至明。再炙令乾。任用。凡修事一切蛇。並去膽并上皮了。乾溼須酒煮過。用之良。

白花蛇。味甘鹹。性溫有大毒。入肺肝二經。主肺風鼻塞。去癰疹浮風。四肢不仁。骨節疼痛。口眼喎斜。半身不遂。癰癩風。白癩風。髭眉脫落。鼻柱塌壞。鶴膝風。筋骨拘攣。凡使須火燒一尺磚令通紅。醋沃之。使熱氣薰蒸。將蛇頭尾各一尺。去淨置磚上。以盆覆一宿。如此三過。去骨取肉用。亦以眼不陷者爲真。

按白花蛇專主皮膚之風。肺主皮毛。肝爲風水。故都入之。然服之者。瞑睡一晝。

夜方醒。善螫人。是者。輒自斷之。補養已痊。木接代步。不然令人死。其毒可知。然諸藥不效者。獨能引達成功。以其性竄。直領藥力。至於風處。所謂大毒之病。必用大毒之藥。以攻之。是也。諸蛇鼻向下。惟此蛇鼻向上。背有方勝花紋。以此得名。愚謂凡用之。更須日日換酒。浸過五宿。去酒不用。盡去皮骨埋於土坑。一宿取出。再炙用。其毒咸去矣。

雷公云。凡使用治風。速於諸蛇。緣蛇性竄。即令引藥。至於有風疾處。故能治風。蝦蟆味甘。性寒無毒。入脾經。主除邪氣。破堅血。解結熱。療兒疳。貼癰腫。療大傷。凡使去皮及腸并爪。陰乾。塗牛酥炙用。眉酥主蛀牙惡瘡。疔腫。瘰癧痔漏。助陽。其肋塗玉。即刻之如蠟。

按蝦蟆歸脾。甘之故也。形狀與蟾蜍相似。本經未嘗分析。自陳藏器極口分殊。以爲蝦蟆背黑點。身小能跳。接百蟲。在陂澤間。舉動極急。蟾蜍身大。嘴黑。點多。疥癩不能跳。不解作聲。行動遲緩。腹下有丹書八字者。然意其功用。無甚差別。想有牝牡之分。而種類之異也。雷公云。有多般勿誤用。有黑虎。有蚰黃。有黃蛤。有螻蛄。有蟾。其形各別。其蝦蟆



皮上腹下有斑點。脚短不鳴叫者是也。黑虎身小黑嘴。脚小。斑蝥黃斑色。前脚大。後腿有小尾子一條。黃蛤徧身黃色。腹下有臍帶長五七分已來。所住處帶下有自然汁出。螻蛄即夜鳴。腰細口大。皮蒼黑色。蟾即黃斑。頭有肉角。凡使蝦蟆先去皮并腸及爪子。陰乾。然後塗酥炙令乾。每修事一個。用牛酥一分。炙盡爲度。若使黑虎即和頭尾皮並陰乾。酒浸三日。漉出焙乾用之。

蝎味甘辛。性平有毒。入肝經。主小兒風癇。手足抽掣。大人中風。口眼喎斜。風痰耳聾。風毒癰疹。出青州緊小者良。去鹽土炙黃用。

按蝎之主療。莫非風症。肝爲巽風。宜獨入之。喜螫人。甚者令人死。雄者螫人。痛在一處。取并泥傅之。稍溫則易。雌者螫人。痛牽諸處。用瓦屋溝下流傅之。或不值天雨。可汲新水調用。如螫手足。竟以冷水浸之。微暖即易。若餘處不可用水浸者。則以冷水浸布貼之。小暖則易。觀其喜寒若此。則爲大熱之劑無疑。今諸書不載其性。惟日華子稱其平。故姑錄之。此即方書所稱蟬螂者是也。

五靈脂味甘。性溫無毒。入心肝二經。主心腹冷氣疼痛。腸風。產後血暈。小兒疳癰。去目翳。辟疫氣。解蛇毒。酒研飛煉。令去研石爲佳。生者行血。炒者止血。



按五靈脂專主血症。心主血。肝藏血。故兩入之。行氣血最捷。勿宜過用以傷臟腑。

蜈蚣味辛。性溫有毒。不載經絡。主小兒口噤。鬼疰。蠱毒。諸蛇毒。殺精物。溫瘧。去三蟲。心腹寒熱結聚。去瘀血。墮胎。去頭足。慢火炙黃用。畏蛞蝓。蜒蚰。大蒜。雞屎。

按蜈蚣最似百足蟲。第百足蟲足較細密。死而不僵。頭上有白肉。面及尖嘴。其毒更甚。勿宜輕用。

雷公云。凡使勿用千足蟲真似。只是頭上有角肉。面并嘴尖。若誤用者。腥臭氣。入頂致死。凡使用蜈蚣。用柳木末放於器中。炒木末焦黑後。去木末。用竹刀刮去足用。

蝸牛味鹹性寒。有小毒。不載經絡。主賊風口眼喎斜。驚風筋脈拘攣。收大腸脫肛。痔痛。消渴累疳。火炒過用。

按蝸牛之名。以頭有角似牛也。夏月往往升高。涎盡即枯死。必用火炒者。誠欲去其寒毒爾。是即蛞蝓也。圖經考之甚核。本草分爲四種。恐非。有一種田螺。主眼赤熱瘡。醒酒渴。點痔瘡。類分數種。功約相同。茲不多贅。

白殭蠶。味鹹辛。性微溫。有小毒。入心肝脾肺四經。主風溫口噤失音。疔毒風痰結滯。皮膚風動如蟲行。小兒驚癇夜啼。女子崩中赤白。止陰癢。去三蟲。滅黑點。米泔水浸去涎。炒去絲用。惡茯苓、茯神、草薢、桑螵蛸、桔梗、雄蠶蛾。性熱。主固精強陽。交接不倦。

按丹溪云。白殭蠶屬火而有土與金水。心肝脾肺之所由入也。凡使須頭番者力倍。蠶蛾亦然。

雷公云。凡使先須以糯米泔浸一日。待蠶桑涎出如蝸牛涎。浮水面上。然後瀝出。微火焙乾。以布淨拭蠶上黃白毛。并黑和甲子。單搗篩如粉用也。蟬蛻。味鹹甘。性寒無毒。不載經絡。主催生下胎衣。通乳汁。止夜啼驚癇。逐邪熱。殺疳蟲。亦能止渴。

按蟬有五種。陳藏器辨之甚悉。今以形極大而聲極高。一鳴而無所停斷者。入藥最良。西川有一種蟬花。乃蟬在殼中不出。而化為花。自頂中生出。功用略同。故不另載。

刺蝟皮。味苦甘。性平有小毒。不載經絡。主五痔腸風瀉血。翻胃鼻衄。腹痛。積疝陰

腫痛。酒煮熬用。畏桔梗、門冬。

按蝟亦有數種。惟蒼白色脚似猪蹄者佳。此外並不宜用。其骨切忌入口。令人消瘦。

土鼈蟲。味鹹。性寒有毒。入心肝脾三經。主留血壅瘀。心腹寒熱洗洗。祛堅積癥瘕。下乳通經。一名廕蟲。畏屋遊、皂角、菖蒲。

按土鼈專主血症。心主血。肝藏血。脾裹血。故三入之。今跌打損傷者。往往主此。或不效。則加而用之。殊不知有瘀血作疼者。誠爲要藥。倘無瘀血。而其傷在筋骨臟腑之間。法當和補。愚者不察。久服弗已。其流禍可勝數耶。

蜣螂。味鹹酸。性寒有小毒。不載經絡。主小兒驚風癰瘕。大人癲狂狂忤。破血墮胎。通腸治脹。又主疔惡諸瘡。出箭頭入肉。去足翅火炙。勿置水中。令人吐。畏羊肉、羊角。

按莊子云。蜣螂之智。在於轉丸。宜其破血通腸之功矣。驚狂皆屬火。亦賴之以洩其亢耳。其性猛驟。最能傷脾。勿得概用。

斑貓。味辛鹹。性寒有大毒。不載經絡。主寒熱鬼疰。蟲毒鼠漏。疥癬惡瘡。疽蝕死肌。

破石癰血積。利水道墮胎。凡使去足翅。拌糯米炒。米黃爲度。馬刀爲使。畏巴豆、丹參、空青、惡曾青、豆花。

按斑貓入腹。有開山鑿嶺之勢。最稱猛烈。故輒致腹痛不可忍。余見里中一壯年患痞疾。服斑貓數劑。初則大瀉不止。煩悶欲絕。繼則二便來紅。三日而死。自非百藥不效之病。不可輕使。

穿山甲。味甘鹹。性微寒有毒。不載經絡。主五邪驚悸。婦人鬼魅悲傷。山嵐瘴癘。惡瘡疥癬。蟻漏痔漏。亦能去風。炙黃用。

按穿山甲形似鯉魚。有四足。能陸能水。山岸間開鱗甲如死。令蟻入中。閉而入水。開甲蟻浮水面。於是食之。故主蟻漏。其性喜穿山。是以名之。故其用亦主潰癰疽。通血脈。及治吹乳疼痛。

鯽魚。味甘。性溫無毒。入脾胃二經。主溫胃健脾進飲食。補虛羸。療腸澼。水穀不調。腸風血瘀。燒灰可傅諸瘡。其子調中益肝氣。惡猪肉、雉、沙糖。

按鯽魚甘溫之品。且是土所化成。其入脾胃宜矣。集要雜錄云。諸魚屬火。惟鯽魚屬土。而有調胃入腸之功。然多食亦能動火。

鯉魚味甘。性平無毒。入脾肺肝三經。主咳逆氣喘上氣。水腫脚滿。黃疸煩渴。安胎。妊娠身腫。冷氣痲痺。氣塊橫關伏梁。膽點眼去翳。滴耳除聾。塗小兒熱腫。血塗小兒丹毒及瘡。脂主小兒痢疾驚悸。鱗燒灰酒服。破產婦滯血。腸主小兒肌瘡癰癰。取蟲骨主陰蝕。赤白帶下。齒主癰閉石淋。皮主癰疹惡瘡。忌猪肝。天麥門冬。

按鯉魚之甘本入脾家。土能生金。金能制木。故亦入肺肝二經。衍義曰。鯉魚至陰之物也。故其鱗三十六。陰極則陽復。所以有魚熱中之故。叔和曰。熱即生風。故食之多發風熱。諸家並不論及。惟日華子云。鯉魚涼。恐無是理。萬一風症更使食魚。則是貽禍無窮矣。煙薰者損目。天行病後食之。再發必死。烏賊骨味鹹。性微溫。有小毒。入腎經。主崩漏赤白帶下。經閉陰蝕腫痛。除目翳止淚。理金瘡止血。治驚氣入腹。腹痛環臍。陰莖因寒腫。瘡多膿汁。寒熱癰瘕。久服令人有子。惡白蘆。白芨。附子。

按烏賊之鹹。宜歸水臟。治病有殊效。今用之者鮮。夫亦未達其功歟。雷公云。凡使勿用沙魚骨。緣真相似。只是上文橫。不入藥中用。凡使要上文順。以血滷作水浸。并煮一伏時了。漉出於屋下掘一地穴。可盛得前拌烏賊魚骨。



多少。先燒坑子去炭灰。盛藥一宿。至明取出。用之其效倍多。

鰻鱺魚味甘性平。有微毒。不載經絡。主虛勞不足。陽事衰微。傳屍鬼疰。蠱毒諸蟲。婦人陰瘡蟲癢帶下。皮膚惡瘡。疔癰痔漏。腰背間風寒溼痺。諸般草石藥毒。脚氣。癰瘍風。白剝風。肉燒室內。可辟蚊蟲。骨置廂中。能除衣蠹。

按鰻鱺雖有小毒。而功甚溥。或言是蛟蜃之類。未可盡信。今據稽神錄載。主療傳屍甚奇。信亦非常物也。五色全者。其功最勝。然罕能得爾。

鱖魚味甘性大溫無毒。入脾經。主產後淋瀝。血氣不調。腹中冷氣腸鳴。及溼痺氣。又主補脾益氣。血堪塗癬。

按鱖魚甘溫之品。脾所快也。宜專入之。生於泥窟。其性善蟄。過夏方出。則為陰類可知。大有補血之功。惜本經及諸家未能悉載爾。多食令人霍亂。時行病食之多復。

雷公云。凡魚頭有白色如連珠及腹中無膽者。頭中無腮者。並殺人。註不可合。鵠鵠肉食之。鯽魚不可合。鹿雉肉食之。鰕鱖不可合。白犬血食之。鯉魚子不可合。猪肝食之。鯽魚亦爾。青魚鮓不可生。胡荽及生葵。并麥醬食之。蝦無鬚及腹

中通黑及煮之反白者。皆不可食。生蝦蟇不可合鷄肉食之。亦損人。蟹味鹹性寒。有微毒。不載經絡。主散血破結。益氣養筋。除胸熱煩悶。搗塗漆瘡。爪專主破血墮胎。惡柿子。

按蟹者解也。故其用主散不主斂。過食令人傷脾吐瀉。風疾食之再發。孕婦食之橫生。狀異者能殺人。誤中其毒。用頭水冬瓜黑豆煎湯。並可解之。

## 雷公炮製藥性解

雷公炮製藥性解 卷六 蟲魚部

## 後記

《神農本草經》，簡稱《本經》。原書不著撰人，是我國第一部藥物學專著。其著成年代，或謂秦漢，或謂戰國時期。原書早佚。現行本爲後世從歷代本草書中所輯出，主要有清代孫星衍、黃奭、顧觀光及日本森立之等不同輯本。

書凡三卷，共載藥物三百六十五種。根據藥物的性能和使用目的之不同，分爲上、中、下三品。上品一百二十種，爲君藥，可營養滋補。中品一百二十種，爲臣藥，可治病補虛。下品一百二十五種，爲佐使藥，不可多服久服。這是中國醫藥學最早的分類法。書中提出了中藥學的基本理論，如四氣五味，有毒無毒，七情和合，服藥方法及藥劑調制等，爲中藥學的發展奠定了基礎。是書由于總結了秦漢（或戰國）時代以前藥物知識和治療經驗，是我國本草學發展的核心，也是後世學習研究本草學、博物學的一本重要參考文獻。《神農本草經》輯本頗多，內容不盡一致。這次重刊，在保存《大成》本特色的前提下，主要與中醫古籍出版社一

九八二年影印之黃氏輯本作校勘，以正錯訛。

《珍珠囊補遺藥性賦》舊題元·李東垣撰，恐系托名，原撰者未詳。是書分爲四部分。第一、二部分綜述了藥性的寒、熱、溫、平和用藥的發明、方法、畏、反、禁忌，以及五臟苦欲補瀉等，收藥二百多種，用駢文賦體寫成。第三、四部分，用簡明扼要的詞句分類按味介紹了每一藥物的性味、效用和主治病證。

《雷公炮制藥性解》舊題明·李中梓撰，或謂系托名，原著者未詳。書凡六卷，按金石、果、穀、草、木、菜、人、禽獸、蟲魚分部。金石部三十種，果部十八種，穀部十一種，草部九十六種，木部五十七種，人部十種，禽獸部十八種，蟲魚部二十八種，共收藥二百六十九種。每味之下各有藥性介紹，并別附宋·雷斅《炮炙論》（已佚）有關性味炮炙煮熬修事之法（據《本草綱目》），故書名冠以「雷公」。

以上二書，以一九五九年上海科學技術出版社排印本爲校本，對其明顯錯訛作了訂正。

鮑 蓉 芬